

Txomin Garmendia

**2008ko
nere egunkaria**

Auspoa Liburutegia

317

GARMENDIA, Txomin (1934-)

2008ko nere egunkaria / Txomin Garmendia ; [transkripzioa, edizioa eta hitzaurrea], Joxemari Iriondo. - [S.l.] : Auspoa ; Donostia-San Sebastián : Gipuzkoako Foru Aldundia, Kultura eta Euskara Departamentua, 2009. 303 or. : ir. ; 20 cm. - (Auspoa Liburutegia ; 317)
Txikiren eta Arozenaren irudiak dauzka. - Aurkibidea
LG SS 1636-2009. - ISBN 978-84-7907- 632- 0

I. Iriondo, Joxemari (1938-). II. Txiki (1892-1948). III. Arozena, Andoni (1907-1989). IV. Gipuzkoa. Departamento de Cultura y Euskera. V. Izenburua. VI. Saila.

821.361-94"20"

821.361-1"20"

Transkripzioa: Joxemari Iriondo

Edizioa: Joxemari Iriondo

© edizio honena: AUSPOA Argitaletxea
Gipuzkoako Foru Aldundia

400 aleko tirada

ISBN: 978-84-7907-632-0

Legezko Gordailua: S.S. 1636/09

Fotokonposizioa eta inprimaketa: Itxaropena S.A., Zarautz

Txomin Garmendia

**2008ko
nere egunkaria**



Gipuzkoako Foru Aldundia
Diputación Foral de Gipuzkoa

Kultura eta Euskara Departamentua
Departamento de Cultura y Euskera

Donostia-San Sebastián, 2009

Aurkibidea

Hitzaurrea	9
Ilbeltza dauka izena baiña zuria gerta leike	17
Otsaila, motza izateko ohea	39
Martxoko trumoia berrogei eguneko ekaitze	59
Apiril euritsuak ganbara betetzen du	81
Maiatzeko lorea utsa baiño ohea	107
Sanjuanetan eguzkia dantzan	133
Uztaillean euria egingo du, baiña lendabizi trumoia	155
Abuztuan egunak mozten eta gauak luzatzen	177
Sanmieletan bero, emaitza ona gero	201
Urria urri, illunabarretan igarri	223
Azaroa azaro, egin eta itxaro	247
Abendua, erdia gaua eta beste erdia jaia	275

Hitzaurrea

Artean Antonio Zavala bizi zela hartu nuen Txomin Garmendiaren **2008ko nere urtekaria** hau plazaratzeko ardua, ahalik eta arinen argitaratzeko aginduz, gainera. Hala ere, hau delako edo hori delako, hilabete asko joan zaigu beti laster izatekotan. Inoiz ez dela berandu, ordea, eta aurrrera egin dugu azkenean.

Aspaldi, 1962ko urtarrilean egin nuen Txominen fitxa laburra atera eta hitzez hitz irakurri dut hitzaurre hau pres-tatu ahal izateko. Honelaxe idatzi nuen garai hartan: “Txomin Garmendia Galartza, Paulino Garmendia eta Bittori Galartzaren semea, Berrobiko Tontola-behera baserrian jaio zen, 1934ko otsailaren 3an. Bertso errezeko bertsolaria, euskera ederra, eztarri bikaina, jendearen aurrean kokiltzen ez dena...”.

Baina fitxa hobeki osatzeko, Txominek berak egindako aitorpenari esker, eskuartean baditut berari buruz inoiz esan ez diren beste xehetasun batzuk ere. Izan ere, “Tontola-beera baserrian jaiotzekoa nintzan ni, baiña 1934ko otsailaren 3an San Blas eguna larunbatez egokitu, eta Tolosan azoka-eguna izaki, gure ama zana Tolosara abiatu omen zan, astoa tratuz kargatuta. Berrobitik Tolosara bidean kilometro erdira-edo dagoen Errota-Berri etxean osaba-izebak genituen, eta gure amari nobedadea etorri omen zitzaion etxe-parean. Eta ala, asto gaiñetik jetxi eta etxe ortara erretiratu zan. Elur lapatsa ari omen zuen, ain zuzen. Eta arratsaldeko zazpiak inguruan jaio omen nintzan, baiña zazpikia. Ain txikia eta eskasa omen nintzan, arropak janzteko ere txikiegia, noski, eta goa-ta artean jarri omen ninduten kajatxo baten. Aurki ilko nintzala ere pentsatu omen zuen batek baiño geiagok. Gure aita zana, berriz, biaramonean apaizerengana joan omen zan ba-taio-gorabeerak zuzentzeko; eta erriko mutil gazteak Santa-geda eskean omen zebiltzan. Nork esan bear zuen orduan ume ziztrin ura andik ogei urtera Santaeskean koplari ibiliko zala?”.

Berrobiko bertsolaria aspalditxo ezagutu nuen, bada. Go-goan dut *Arantzazu* aldizkarian argitaratu zituen soldadus-kako bertso batzuk irakurri nituela behin, eta haiek zirela-ta kartzelaldia izan omen zuela jakin nuen. Halaxe gorde nuen Txominen lehenengo fitxa hura.

Gero, berriz, Loiolako Herri irratian *Bertsolari Gazteen sariketa* antolatzen hasi ginenean –1962ko apirilaren 1etik maiatzaren 20ra egin genuen lehenengoa–, Koxme Lizaso, Inazio Jauregi, Joxe Mari Gabilondo, Patxi Beloki eta Patxi Etxeberriarekin orpoz orpo lehiatu zen Txomin; eta saridun izan, gainera, gure irрати-entzuleen iritziz, entzuleek kartaz egiten baitzuten bertsolari onenaren hautaketa.

Urte hartan, beste ezaguera haundirik ere izan ez artean bertsolari gazteei buruz, eta han-hemen bertsolari gazte edo bigarren mailako deitu bertsolarien bila hasi eta Berrobiraino joan nintzan, eta hantxe Tontola-behera baserriko gaztainadian orbela biltzen aurkitu nuen Txomin, goiz hotz batez. Berrobi aldeko bazterrak zuri-zuri zeuden izotzetan, baina eguzkitsu zetorren neguko eguna. Luzaz hitz egin eta egin nahi genuen gure sariketaren berri eman nionean, berehala eman zidan baiezkua. Ez nintzen hasarre!

1963ko otsailaren 17an, bigarren sariketako lehenengo saioan agur eginez bota zuen bertsoa idatzita jaso nuen, hain zuzen. Jesus Azkune *Iztinge* azpeitiarra zuen bertso-laguna, bistan danez:

Au da Iztinge, ni Garmendia,
gaur emen kantatzekoak;
gu gera euskaldun batzuek, noski,
lengo zarren antzekoak.
Agurtzen ditut berrobitarrak,
ondoren gainontzekoak.
Zuen gustua eitera gatoz,
entzule biotzekoak.

Ordu ezkerro, dozenaka bertso-jaialditan egokitu ginen elkarrekin, Garmendia bertsolari eta ni aurkezle eta gai-emaile,

ahal nuen bezala jaialdi bakoitzeko bertsolariak suspertu eta lanerako egokitzen. Eta edozer gai ematen zitzaiola ere azkar eta egoki moldatu ohi zela bertsotarako pentsatu izan dut beti. Etorri eta iturri errezekoa baita.

Hala ere, Txomin Garmendiak *Vivir/Bizi* aldizkarian 1994an idatzitako kronika batean kontatzen duenez, apenas asko animatu zuten bertsolarien bide horretan sartzeko bere gazte-garaian:

Berrogei bat urte gertuan izango dira Berrobin leenengo aldiz kantatu zutela Basarrik eta Lasartek; aien etorri eta bertsolaritasunez arritu zan jendea, baiña aitona bateri auxa entzun nion: “Ortatik aberastutakorik ez det ezagutu”. Berrogei urte paseak izango dira, berriz, Astigarragako sagardotegi batera eramane nindutela erriko gazte elduak. Bertsotan saio bat egin nuen, eta onela esan zidan aitona batek: “Gazte, oso ondo kantatzen dezu, baiña etzaitez inoiz asi bertsolari on oiekin batera, oiekin sartzen bazera, alperu eta bide txar asko artuko dezu-ta”. Aitona arene esanari ez nion kasurik egin, eta nere afizio edo bidean jarraitu nuen, eta gaur ez det damurik. Kontseju edo aolku aiek aintzat artu izan banitu, *Bizi* errebista onetan ere ez zuen inork nere lanik irakurriko.

Entzungor egin zion aitona haren esanari, eta horrela egin zuen hobe. Baina Txomin ez da lan batera mugatu den bertsolaria izan. Nekazaria zela ezagutu nuen nik, lehen esan bezala, orbela biltzen. Gero, berriz, Berrobiko aroztegi batean lanean, taxi baten bolantean hurrengo, eta Sendoa argitaletxeko lantaldean liburu-saltzaile azkenik, bati hau eskaini eta besteari hori saldu.

Ez dakit horretarako irritis haundirik zuen, baina politika maila ere probatu zuen, Berrobiko alkate izan baitzen aldi batean. Sekula ez diot galdetu izan zein alderdiren ordezkari izan zenik, nahiz eta ez dudane duda-mudarik abertzale zintzoen ordezkari izango zela bere jaioterrian ere.

Baina, batez ere, bertsolaria izan da Txomin Garmendia; eta bertsolari ezagutu dugu gehienok. Amazazpi urterekin,

1952an, egin omen zuen lehenengo bertso-plaza garai hartan Berrobin bizi zen Sebastian Eizmendi *Loidisaletxe* errezildarrarekin eta Joxe Joakin Mitxelenarekin. Handik hona auskalo izango den Euskal Herrian herririk edo auzorik Txominek inoiz edo behin kantatu ez duenik, lagunarteetako bazkari-afarietako saioak alde batera utzi gabe.

Urte hauetan zehar ez da hutsari begira egon izan berrobitarra bertso-munduan. Txapelketa edo sariketa asko eta askotan eskuhartu du. Eta ez du berriketako curriculum osatu, gero nire artxiborako jaso ditudan xehetasunak okerrak ez badira behintzat:

- 1959an Gipuzkoako Bertsolari gazteen txapeldun.
- 1962ko Gipuzkoako Bertsolari Txapelketan, finalista.
- 1962an Loiolako Herri irratiko Bertsolari Gazteen sari-ketaren irabazle.
- 1964ko Gipuzkoako Bertsolari Txapelketan, txapeldunordea.
- 1965eko Euskal Herriko Bertsolari Txapelketa nagusian, finalista.
- 1966-67ko Gipuzkoako Bertsolari Txapelketan, txapeldun.
- 1967ko Euskal Herriko Bertsolari Txapelketa nagusian, finalista.
- 1980ko Euskal Herriko Bertsolari Txapelketa nagusian, finalista.
- 1982ko Euskal Herriko Bertsolari Txapelketa nagusian, finalista.
- 1999ko Gipuzkoako herri arteko bertsolaritza txapelketan, txapeldunorde Erniope taldean.

Badu, orde, beste lanbide edo profesio haundi bat ere Txominek azkeneko urte hauetan. 1980an istripu gogorra izan eta min hartu zuen; eta erituta luzaroan asper-asper eginda zegoela, idazteari eman zion serio, bere kabuz. Eta zenbait bertso-liburu eta kontakizun bildu dituen geroztik! *Denbora pasa* (kronika, Auspoa 159, 1982); *Bizitzaren arian* (kronika, Auspoa 160, 1982); *Bordaberri'ko gozo-mikatzak*

(eleberria, Auspoa 170, 1983); *Gipuzkoa. Biotz-begietan* (Gipuzkoako Aurrezki Kutxa, kronika, 1983 Iñaki Linazasororekin elkarlanean egina); *Bertsolari-kurpilla* (Auspoa 171, bertsoak, 1984); *Erririk-erri* (Auspoa 177, 1984, bertsoak); *Beltzak eta zuriak mendian ardiak* (Auspoa 188, 1985, bertsoak).

Bestalde, komunikabideetan ere saiatu da Berrobiko bertsolaria. Begiratu bestela Donostiako DV egunkarian argitara ematen dituen kronikak. Aspalditxo hasi zen lan horretan, eta hantxe jarraitzen du aldian behin idazten, Iñaki Eizmendi *Basarri* zenaren oinordekotzan-edo. *Aiurri*, *Galtzaundi* eta beste zenbait herri-aldizkaritan idatzitakoak ere gogoan izatekoak dira, noski.

Azkenik, gure irakurleren batek Arrate irratian ematen dituen bertsoz hornitutako kronikak ere gogoratuko ditu, seguruenik.

Hizketan hasita, berriz, kontalari atsegina eta oparoa duzu Txomin. Euskera gozo eta herrikoia jabe, memoriz harrigarri, eta kontakizunetan aberats. Eta bertsotan edota bertso zaharrak kantatzen, zoragarria, bere eztarri indartsu eta emankorrari esker. Zenbat lagunartetan kantarazi ote diogu, *Ala, morena...* Donostiara serbitzeta joan zen neskaxa buruarinaren historia hura.


Baina hori dena aski ez balitz ere, honatx urte guztiko egun bakoitzean zerbait idatziz Txominek osatu duen **2008ko nere egunkaria** kronika saila, eguneko albiste bakoitzari bertsoa erantsiz azkenean. Auspoak zure eskuetan uzten du, eta zeuk ikusi segiran ala egunero zatika irakurriko duzun, Arantzazuko egutegiarekin zaharrek egiten zuten bezala.

Joxemari Iriondo

Txomin Garmendia

**2008ko
nere egunkaria**

Ilbeltza dauka izena baiña zuria gerta leike



Urtarrillak 1 - Asteartea, Urteberri eguna

Goizetik oskarbi, eta izotza galanta. Gero, eguzkitsu eta gozo. Aurreko egunetako izketa-gai nagusia izan da gaurtik aurrera bizimodua asko garestituko zaigula.

Urte berria asi degu otzetikan;
zer ote datorkigu onen atzetikan?
Bizimodu santua danen itzetikan,
zail jarriko dirala babak eltzetikan.

Meza nagusiko sermoian apaizak esan digu mundu guztian “Pakearen eguna” ospatzen dala gaur, eta illuntzean jakin degu Kenian 50 lagun edo geiago il dituztela eliza bati su emanda.

Urtarrillak 2 - Asteazkena

Atzo baiña otz gutxixeago goizetik. Euri-itxura, baiña egun guztian euririk ez, ordea.

D.V. egunerokoak esan duenez, joan zan urtean Espaiñian, euskaldunak ere tartean, ogeita bost eiztari il ziran tiroz, lagunene utsegiñez eta abar. Zaurituak, berriz, 860 lagun. Ori ez dala arritzeko esan duenik ere bada, Espaiñian milloitik gora eiztari omen daude-eta.

Urteberria asi arren naigabeak eta negarrak jarraituko dutela ematen du.

Vianan irurogei urteko emakumea il da kamioko istripuan. Eta Gasteizen larogeita bi urteko emakumea il da kotxe batek arrapatuta.

Urte berria etorri arren
oker ta istripuz berdin,
gure etxe ta familietan
negarrik falta ez dedin.
Baiña alare gure aldetik
saia gaitezen alegin,
eta federik baldin badegu
otoitz bero bana egin.

Urtarrillak 3 - Osteguna

Goizetik aize indartsua, eta naiko otz gaur. Ateri. Gero euria zarra-zarra.

Gauza guztiak prezioz gora dijoaztela? Jakin degunez, atzo Ordiziako azokan kiloko 3 euroan saldu zan arkumea. Orain ogei urte ere prezio orixe egiten zuen:

Bizimodua garestitzeak
estutzen gaitu lasaiak,
atzo Ordiziko azoka orrek
berekin zitun ezbaiak.
Oso urruti gelditu ziran
arkume-saltzaillen naiak.
Aberasteko bildurrik gabe
biziko dira artzaiak.

Sestaon bost urteko mutiko bat ito da kanal batera erorita jolasean zebilela.

Kenia, Israel, Palestina eta Turkiako ilketaz zer esan? Au da mundu tristea!

Urtarrillak 4 - Ostirala

Goizetik naiko otz gaur ere, eta lainoak.

Formigalen elur-jausiak arrapatuta iru lagun il dira, bi donostiarrak eta irugarrena, berriz, an bertako langillea.

Ondarroan arrantzale bat il da istripuz. Malagan, irurogei urteko gizon batek berrogeita bi urteko andrea il omen du, urteko leenengo emakumea izan da illa.

Bi-bitarako eskuzko pilota-txapalketa asi da Donostian, zortzi bikote partaide dirala. Leenengo emaitza: Titin III-Laskurainek, 22; Olaizola II-Otxandorenak, 11

Zorionez osatzen gera pelotariz;
batez ere naparrak indarrean dabiltz.
Gozatutzen gaituzte joko arrigarritz;
ondo pintasun ori lan danetan balitz.

Urtarrillak 5 - Larunbata

Goizetik otza eta euria gaur.

Gaurko izketa-gai nagusia, batez ere politikoen artean, Gara egunerokoan ETAk agertu dituen albisteak dira: alegia, emengo konpondu eziñak eta pakerik ezak urte askoan iraungo duela.

Leendakariak, berriz, pakea gertu degula dio sarritan, ETari ez dagokiola erretiratzea besterik. Zeiñi sinistu?

Pilota-txapelketa Iruñan: Xala-Paskualek 22; Bengoe-txea VI-Ruizek, 17. Atzokoa partidu txarra baldin bazan, gaurkoa oso ona: 786 pilotakada eta ordu ta erdiko iraupe-na. Besteak beste, Paskual oso ondo, pilotak erreboteraiño boteaz.

Partidu ona edota txarra,
zertako asi auzitan?
Gaurkoa oso ona izan da
geientsuen iritzitan.
Edozein gauzetan dala ere
ona daukagu gutxitan;
pilotan berriz eziñezkoa
jokatzen duten guzitan.

Urtarrillak 6 - Igandea, Errege eguna

Goizetik otz aundirik gabe eguraldiak etorrera ederra izan du. Errege egun bezela, opariz gozatuz jendea. Alai.

Pilota-txapelketa Eibarren: Gonzalez-Barriolak, 22; Koka-Beginok, 20. Partidu xelebrea izan da, 11tik zuzenean 22ra joan baitira Gonzalez eta Barriola.

Donezteben marka arrigarria jarri du Migel Mindegia aizkolariak: lau kanako enbor ordubete, minutu bat eta berrogeita bederatzi segundoan ebaki ditu, berrogeita emezortzi urterekin. Ezkurrako seme au istorirako geldituko da aizkora-munduan.

Berriketako lana ez degu
ebatea lau kanako,
ta Mindegiak bukatu zitun
ortarakoxea dalako.
Berrogeita emezortzi urtetan
bildurrik ez lanerako.
Historirako geldituko da
aizkolari-mundurako.

Urtarrillak 7 - Asteleena

Otz aundirik ez gaur goizean ere, eta euri-itxurarik ere ez.
Gero euria asi du, ordea.

Kostako trena deskarrilatu da Deban; baiña illik eta zau-
riturik ez da izan, zorionez.

Pilota-txapelketa, Tolosan: Olaizola I-Belokik, 22, Eugi
-Lasak, 16.

Lugon bi arrantzale ito dira, bere txalupa iraulita.

Atzo, ETako bi lagun lotu zituzten Arrasaten, eta biak
lesakarrak. Bat, Igor Portu. Goizaldera ekarri dute Donostia-
ko gaixoetxera, oso gaizki. Errezeloa dago lotu zituzten guar-
dia zibillak egurra eman ziotela. Berak ere ala aitortu dio
sendagileari. Leenaz gaiñera badegu naiko komeri eta saltsa
berriro ere.

Gaurtik aurrera merkealdiak izango dira gure dendetan.
Zerbait bearko degu.

Beartsuak nai degu
aberatsen pare,
baiña luzitzen zail da
dirurikan gabe.
“Merkealdiak dira”
propagandak daude;
naiko garesti izango
ditugu alare.

Urtarrillak 8 - Asteartea

Goizetik eguraldi polita gaur ere, otz aundirik gabe.

Atzo aipatzen nituen Lesakako bi ETAkoen zuloak aurkitu omen dituzte Lesakan eta Hueskan, leergaiak egiteko materialarekin eta abar.

Bestetik, Igor Porturen gaixoaldia guardia zibillen erruz dala gero eta indar geiago artzen ari da.

Adiskide batek esan zidan Eguberri jaiak triste samar pasa zituztela, orain bi urte amagiarreba il zala-ta. Baiña oraindik jai aundietako otorduetan arentzako exerlekua eta platera leen bezelaxe berdin-berdin jartzen zituztela, eta utsune ori ikusirik tristetzen zirala. “Jeobaren lekukoak” ote dira? Entzunda bainago orrela jokutzen dutela.

Munduan ainbeste erlijio,
gaur Euskalerrian berdin;
bakoitzak badu askatasuna,
kontra ez leike itz egin.
Emen gauzarikan bearrena da
iñori gaitzik ez egin,
eta al baldin bada, lagundu
obetogo bizi dedin.

Urtarrillak 9 - Asteazkena

Otz aundirik ez, eta goizean euri lardatsa.

Espaiñiako Joan Carlos erregek, Errege bezperan irurogeita amar urte bete zituela-ta, gaur illuntzean Espaiñiako agintariei, eta orain arte izan diranei apari bat eman die –450 laguni, alazankoa!–, Juan Joxe Ibarretxe gure Leendakaria ere tarteko zala. Gure Leendakaria ara joate ori ez da izango askoren gustoko. Baiña danon onerako izan dedilla.

Tolosako emakume batek onela zion: “Eguberri jaiak pasa berriak ditugu, eta berealaxe iñauteriak datoz! Danetarako iritsiko ote gera?”

Aurten inoiz baiño goizago datozkigu jai zoro oiek, otsail-laren 3an. Jai eta festa faltan ez gera galduko:

Ospaketa bat bukatu orduko
emen badegu bestea,
askotan onek ekarritzen du
etxeko buruaustea.
Artua degun abiadari
zail izango da eustea;
okerra nonbait agertuko da,
ori da nere ustea,
ez baita errez danetarako
lanetik irabaztea.

Urtarrillak 10 - Osteguna

Otz aundirik ez goizetik, udaberri-giroa gaur ere.

Kamioko bizimodua ere arriskutsua jarri zaigu ba. Bi lagun il dira Pasaian eta Errenterian, bata Hendaiakoa eta bestea Lezokoa. Berrogeita amaika eta berrogeita amazapi urtekoak biak. Arrasaten ere bi oñatiar zauritu dira.

Leengo igandez Arrasaten ETako biak guardia zibillak lotu zituenean, Igor Portuk izan zituen zauriak etziralara guardia zibillaren erruz esan du Rubalcaba ministroak. Lekuko izan zan batek esan du ministroa gezurretan ari dala.

Irujo pilotari indartsuak eskutik operatzea erabaki du, eta biar egingo diote egiteko ori. Gutxienez ere iru illabeteko jaiak izango ditu, esan dutenez.

Derrigorrezko jaiak ditula
Irujo pelotariak...
Eskutik operatuko dute,
sendatu bear zauriak.
Pelotan luzitze ezkerotan
ondo bear esku biak,
bestela alper-alperrik dira
bere indar ugariak.

Urtarrillak 11 - Ostirala

Goizetik otz gaur. Ateri baiña aizea indartsu.

Goizeko leenengo berria, Beasaingo Indar fabrika sutan dagoela. 700 langilleko enpresa, ain zuzen. Sua eta ura, morroi onak, baiña nagusi txarrak.

Usterik gutxiñean suak artu indar,
orrela kiskali da Beasaingo Indar.
Ez bazaio eusten morroi edo maiztar,
edozein ondamendi ekartzen du azkar.

Arratsaldetik euria eta negu giroa.

Pilota-txapelketako bosgarren partidua Irunen: Tittin III -Laskurainek 22, Koka-Beginok, 4. Uste det beste berriketarik ez duela merezi onek.

Sendagilleak diotenez, Irujo pilotaria operatu dute, eta oso ondo omen dago. Ez omen zeukan beste erremediorik.

Arantzazu aldizkariak 88 urte betetzen dituela-ta, bertualdi bat emateko asmotan omen dira.

Urtarrillak 12 - Larunbata

Goizetik euria gaur ere, baiña otz aundirik ez.

Tolosako Sakramentinoetako aita Imanol Urangak urrezko eztaiak ospatu ditu. Azpeitiko Elosiaga ermitatxoan izan zan elizkizuna, eta Añota sagardotegian alkartasun bazkaria. Lopategi eta biok egin genituen ango bertso-lanak. Zorionak eta urte askotarako, Imanol.

Atzo goizean etzan izandu
mezaberri egun ura.
Berrogeita amar urte geroztik
apaizgintzako ardura.
Zure bitartez zenbat anima
sartu ote da zerura?
Aurreruntz ere jarrai ezazu
orain arteko modura.

Pilota-txapelketako partidua Iruñan: Gonzalez-Barriolak 22, Olaizola II-Zearrak, 11. Ustegabeko ederra!

Kamioko istripuz senar-emazteak il dira Vigon; eta Oiar-tzunen beste gizonetzko bat.

Gasteizen gizon batek bere emaztea il du labankatuta.

Urtarrillak 13 - Igandea

Goizetik udaberri-eguraldia gaur.

Pilota-txapelketako partidua Eibarren: Olaizola I-Otxandorenak, 22; Capellan-Paskualek, 21. Partidu gorabeeratsua, Olaizola eta Otxandorena galtzen zijoazten 18-11, eta galtzen zijoaztenak irabazi partidua azkenean. Antzeko zer-bait gertatu zan leengo igandez Eibarren bertan ere. Diru-jokatzailleak izango dituzte pozaldiak, baiña bai estuasun ederrak ere!

Lazkaon Astotxo eguna ospatu da, urtero bezela. Jose, Maria eta Jesus Aurtxo Egiptora igesi joan bearreko festa, alegia, Herodes errege gaiztoaren beldurrez. Agintarien bildurrez erbesteratzea ez degu atzo goizekoa.

Guk euskaldunok ondo dakigu
zer dan erbesteratzea,
etxe maitea utziz urruti
bizi bear dan trantzea.
Jose, Maria ta Jesus Aurra
joan ziran antzea,
Lazkaon ondo egiten dute
ori gogoratutzea.

Urtarrillak 14 - Asteleena

Goizetik eguraldi aizetsua. Hala ere otz aundirik ez.

Txapelketako partidua Tolosan gaur: Bengoetxea VI-Ruizek, 22; Eugi-Lasak III, 14. Ruiz gaztea danetan onena. Eugi, berriz, gaizki.

Naziotako agintari eta ondorengoak ere ez al dabiltza naiko xeble famila kontuan? Gaur, munduko oiartzunik aundiena Frantziatik etorri zaigu: Sarkozy, Frantziako presidentea, leengo ostegunean ezkondu ote zan alegia, ixillean. Leengo udazkenean apartatu zan leengo andre Zeziliaren-gandik, eta esan digutenez, badu emazte berria: Carla Bruni, Italiako artista bat, ain zuzen.

Frantzia aldeko oiartzun ori
denboraz jakin genduan;
Sarkozy bertako lendakaria
esaten duten moduan.
Lengoa utziz andre berria
ixilka artu ote duan...
Ala ere zorion guztiak
ez ditu izango munduan.

Urtarrillak 15 - Asteartea

Goizetik naiko aize otza. Eta egun guztian aizea indartsu: 102 kilometro orduko. Zuaitzak lurreratu eta naiko kalte egin du.

Eibar eta Elgoibarren artean kostako trena deskarrilatu da. Zauriturik ez da izan, ordea, zorionez.

Galiziako arrantzale-ontzi bat ondoratu da, eta itotako bat eta lau lagunen arrastorik ez. Lau gizon galdu, alafede!

Getariako sanantonak ari dira arrimatzen eta txakoliñak etorri omen dira beren onera. Eun ektarea maasti berritatik ogeita amar Getariatik kanpokoak dira.

Besteak beste, txakoliñaren lekua da Getaria, ta sanantonak arrimatzean or izaten da ugari.

Besteak beste txakoliñaren
lekua degu Getari,
ta Sanantonak arrimatzean
or izaten da ugari.

Euskaldunok aukeran ditugu
ez dakit zenbat edari;
baldin neurria artzen badiogu
gauza ederra da ori.

Urtarrillak 16 - Asteazkena

Goizetik otz aundirik ez, eta ateri. Gerora euria eta trumoa, negu-giroa eta aizea indartsu.

Realari buruz badabil aspalditxoan eztabaida pranko (futbolari buruz ari natzaizu, irakurle). Gaur Koleman entrenatzaillak agur egin dio Txuri-urdin taldeari. Askok uste ez genuena! Gaiñera azkenengo partidua irabazita zeukalarik...

Erreala jaitsi zan bigarren maillera,
geroztikan badegu milla gorabera!
Irabazi nai degu, askotan galera;
ainbat gizon-aldatze komeni ote da?

Urtarrillak 17 - Osteguna

Goizetik otz audirik ez. Txoriak kantari.

Gaur San Anton eguna. Getaria degu erri polit bat au ospatzen duena. Garai batean bixiguak bazuen fama; orregatik esaten zuten "San Anton, bixigu al monton!". Gaur ere bixigua jango da Getarian, baiña nungoa?

Azken urte auetan txakoliña da Getariari izen aundia ematen diona; eta gaur asi dira txakolin berriak ateratzen, emezortzi bodegatatik, ain zuzen. On egin.

Izen aundiko festak ditugu
Getariko sanantonak;
ori ez dauka ukatutzerik
an ibillita dagonak.

Txakoliñaren aldetik, berriz,
eman bear zorionak.
Aztu eziñak gertatzen dira
pasatako egun onak.

Irurogeita amalau urteko Berrobiko emakume bat arrapatu eta il du Tolosan kamioi batek (G.B.)

Jakin degunez, arrautza asko salmonela gaitzarekin kutsatuta dauzkagu. Ara aurrerapenak zertara ekarri gaituen.

Urtarrillak 18 - Ostirala

Goizetik euria eta eguraldi tristea. Negua.

Gaur goizean Iruñan ogeita iru urteko mutil batek ogei urteko neska lagunari lepoa ebaki dio labanaz, eta ondoren, bere burua bota du kalera (bizirik da, ordea). Biak brasildarrak dira. Noraiño iritsi gera?

Eraso gogorra asia dago
emakumeen kontrara;
entzun utsakin sortutzen zaigu
beldurra eta ikara.
Gaur odola etorria da
maitasunaren trukara.
Jaun zerukoa, gaitz orretatik
libra gaitzazu al bada.

Pilota-txapelketa Mungian: Gonzalez-Goñi III-ak 22, Olai-zola I-Otxandorenak 14. Gonzalez oso ondo gaur ere.

Urtarrillak 19 - Larunbata

Goizetik otz aundirik ez eta eguraldi polita oso.

Txapelketako partidua Iruñan: Olaizola II-Mendizabal II-ak, 22; Capellan-Lasa III-ak, 14. Partidu polita.

Eguneko oiartzuna Bartzelonatik etorri zaigu: Amalau islamista lotu dituzte leerketa aundi bat egiteko gertutzen ari ziranak.

Iru mendizale il dira Piriniotan mendiko istripuz (G.B.)

Jesuiten munduko buru izango dana aukeratu dute Erroman. Irurogeita amaika urteko Adolfo Nikolas da, palentziarra. Ogeita bederatzigarrena, San Inazio ezkeroz. Suerte on!

San Sebastian bezpera da, eta, nola Donostian eta Azpeitian izango dute danborra eta danbor-otsa.

Nola Donostin ala Azpeitin
izango dute danborra!
San Sebastian bezpera da-ta
ori gauza derriorra.
Aspalditako oitura dute
bi erri oietan, orra;
egin ezean ezin ordaindu
santuai dioten zorra.

Urtarrillak 20 - Igandea

Goizetik oso otz. Gero eguraldi ona.

San Sebastian eguna. Berrobin ere bada ermitatxo bat santu oni eskeiñia. Urtero meza izaten zan bertan, baiña aurten apaizak iru erri eta auzo bat dauzkalako bere gain, eziña gertatu zaio. Auek dira erriak: Berastegi, Elduain, Berrobi eta Eldu (auzoa). Denak ezin ba ondo serbitu.

Santu ta santak lengoak daude
baiña apaizak urritu;
dauden banakak erri guztiak
ezin dituzte serbitu.
Berrobi ortan gertatu danaz
ez dago zertan arritu.
Zeruan dagon Sebastianek
errez ulertuko ditu.

Txapelketako partidua Eibarren: Bengoetxea VI-Patxi Ruizek 22, Titin III-Laskurainek, 18. Partidu ikusgarria!

Aspalditxoan Realaz bada zer esanik; baiña gaur pozteko bidea artu dute: 3-1 irabazi diote Kordobari, Kordoban bertan. Beraz, urrutietan ere danborra jo dute donostiarrak!

Urtarrillak 21 - Asteleena

Goizetik otza, eta gerora etorrera ona.

Txapelketako partidua Tolosan: Koka-Beginok, 22; Xala-Paskualek, 15. Ustegabeko ederra.

Valladoliden bi automobilek elkar jota lau langille portugaldar il dira (G.B.)

Oviedon, bestalde, autobus eta kamioi batek elkar jota, autobuseko ogeita amalau lagun zauritu dira!

Kamioan odola oparo gaur egun!
Arrisku ori dago ta ez dakigu nun.
Segurantzirik, berriz, ez daukagu iñun.
Ara aurrerapenak zer ekarri digun.

Urtarrillak 22 - Asteartea

Goizetik naiko otz gaur; gero eguraldi aparta.

Toledon bee-laiñoa dala bide eun kotxek elkar jo dute. Oraindik ildakorik ez, esan dutenez. Zortzi zauritu eta abar oso gaizki dauden arren.

Bi-bitako eskuzko pilota-txapelketa bete-betean dabil; baiña bada naiko kezka, asko gertatu baitira eskutako miñez, gerritako miñez eta abar. Azkenengo berria, Xalari bizkarrezurreko ernia aurkitu omen diotela. Pilotariak ez al dabilta partidu geiegi jokatzeko?

Politika munduan ere badegu naiko lan. Madril eta Euskadi iñoiz baiño burruka latzagoan, alajaiña!

Euskadi eta Madril ezin konponduan;
eskarmeturik asko lendik bagenduan.
Aundiaren ondoan txikia galduan.
Gustura bizitzea zail dago munduan.

Urtarrillak 23 - Asteazkena

Goizetik euria otzik gabe.

“Auspoa”ko zuzendari dan aita Antonio Zavalak larogei urte betetzen dituela-ta, Gipuzkoako Aldundiko Koldo Mitxelena Kulturuneak omenaldi-bazkaria eskaini dio Amasako Arantzabi jatetxean. Ainbat urtean bere inguruan gabiltzanok bere inguruan bildu gera alaitasun ederrean, Euskaltzainburu dan Andres Urrutiagandik asita.

Euskeraren eta erriaren alde, era askotara lana egin liteke, noski; baiña liburugintzan aita Antonio Zavalak ainbat egindakorik ez da asko izango. 360 liburu dauzka argitara emanak (gutxi batzuk gazteleraz, eta besteak euskeraz). Ala ere, ez du atsedenean egoteko asmorik. Jarrai dezala urte askoan, eta zorionak.

Berdintzen ez da errez izango
aita Zavalan lan ori,
argitaratuz illunpen zeuden
millaka euskal istori.
Naiz larogei urte bete ditun,
jarrai nai dio lanari.
Euskalerria eta euskera
zorretan daude berari.

Urtarrillak 24 - Osteguna

Goizetik oso eguraldi polita gaur, otz pixka batekin.

Boltsak (dirua) aurreko egunetan bajealdiak izan baditu ere, gaur gora egin du, ezagutzen dan gorakorik aundienarekin.

Lau frantses lotu dituzte Donostian kotxeko maleteroan armak zeramazkitelako.

Euskalerriko pakerik eza dala-ta, badegu aolku-emaillea pranko gotzai jaunarengandik asita. Pakea urruti, ordea.

Hernaniko alkate anderea izan da Madrilen juezaren aurrean aitormen batzuk egiten, zigorrik gabe utzi badu ere.

Gotzai jauna ere kezkatzen du
emengo pakerik ezak,
kristau-izena badegu baiña
ain gerade aldrebesak.
Euskalerriko pake-bideak
ez daude oso errezak.
Lanaren faltik ez dute izango
fiskalak eta juezak.

Urtarrillak 25 - Ostirala

Goizetik eguraldi tristea gogotik baiña otzik ez.

Urretxun etxebizitza batek su artu eta irurogeita zortzi urteko gizon bat il da, kez inguraturik.

Espaiñiako presidente izandako Jose Maria Aznar jauna Lizartzara etorri da bixitan, bere partiduko udal-taldea eta abar besarkatu eta eskertzeroa.

Bizkaian zortzi Batzoki eraso dituzte, eta Atutxaren izena ere bai.

Esnez kargatutako kamioia irauli da Etxegaraten, ta txo-ferra naiko gaizki dago.

Pilota-txapelketako partidua Urdulizen: Olaizola II-Mendizabal II-ak, 22; Capellan-Paskualek, 14. Alde aundia bi aurrelarien artean.

Olaizola eta Capellan bat
ezin litezke konpara,
alde aundiko pilotariak
jaioak mundu ontara.
Ez dakit nola jarri zituzten
biak elkarren kontrara...
Bi atzelari artean berriz
diferentzi ori ez bada.

Urtarrillak 26 - Larunbata

Goizetik eguraldi ederra benetan.

Pilota-txapelketako bi partidu, bat Iruñan eta bestea Is-car-en jokatu dira. Iruñan, Gonzalez-Barriolak 22, Bengoe-txea VI-Ruizek, 9. Iscarren, Titin III-Laskurainek 22, Olaizo-la I-Otxandorenak 9.

Urnietara bidean Lasarteko gazte bat il da kamioko istri-pu batean.

Millaka eta millaka pertsona manifestatu dira Bilbon Atutxa eta beste bi lagunen alde, Eusko Legebiltzarrean zeuden garaian Herri-Batasunakoak kanporatu etzituztelako Madri-leko juezak eman dien zigorra dala-ta.

PPkoak eta Sozialistak gogor agertu dira manifestazio orren kontra. Pakea oso urruti dagoela dirudi.

Pake itza daukagu
nunai esateko;
pakeak maitasuna
bear du tarteko.
Maitasun ori sarri
degu aparteko,
gorrotoa jartzen da
emen bitarteko.
Ez da lagun ederra
pakea izateko.

Urtarrillak 27 - Igandea

Goizetik izotza eta gerora itxura ederreko eguraldia izan degu gaur.

Bederatzi Batzoki erasotuak izan dira Bizkaian; eta Nafarroan zakarrontziak erre dituzte.

Pilota-txapelketako partidua Eibarren: Koka-Beginok 22, Eugi-Lasa III-ak 15. Partidu txarra, eta eunda berrogeita amar ikusle bakarrik pilotalekuan.

Gure illobaren semetxoaren bataioan izan gera Adunan. Inar deritzon aur zoragarria benetan. Elizkizuna ere ederra izan da.

Pentsatumentu auek izan ditut elizkizun-denboran: Penagarria ain aingeru zoragarria zorigaiztoko mundu onen sareetan erori bearra. Ulertuko didazu, irakurle.

Beste errurikan ez, mundura jaioa;
kristautzeko ondoren artu bataioa.
Bizitzak berekin du bere karraioa.
Lo ez da ibilliko etsai arraioa.

Urtarrillak 28 - Asteleena

Astelen goiz onetan goizetik otz eta beelaiñoa.

Gaur egunean jendea asko zaartzen dala esaten gabiltza sarri. Bai, noski. Baiña zaartu gabeko pranko ere iltzen da ordea. Donostian, 51 urtekoa; Oiartzunen, 66koa; Pasaian, 50ekoa, eta nik ez dakizkidanak zenbat!

Tolosan alkate dagon Jokin Bildarratz dago Eudel-eko leendakari, eta esan du 2500 zinegotzitik 562k bizkartzaiña daramatela! Ez da ezaugarri ederra ori erri baterako!

Zinegotziak dabiltz gizonan beldurrez,
boto bidez erriak aukeratu aurrez.
Zer gertatutzen zaigun esan leike errez:
pakea nai degu eta emen pakerik ez.

Titin III ez dago konforme txapelketarekin bakarrik gaur; Nalda II lagun duela Capellan eta Eulate menderatu ditu Tolosako Beotibarren. Ez dago ganadu ederra, mutillak!

Urtarrillak 29 - Asteartea

Goizetik otz baiña ateri.

Goizeko amarrak inguru ziran, eta egundoko gaztetxo pillla Tolosako Leidor antzokira sartzen ikusi degu, an zuten

funtzioren bat-eta. Amabi urtetik amaseira bitartekoak edo ola ziran, eta ikastxeren batekoak, ain zuzen. Geienak euskeraz itz egiten zuten. Poztu naiz gogotik.

Gaztetxo talde ikusgarria
ikusia det Tolosan,
Leidorren zuten funtzioren bat
oso egun aproposan.
Iñauteriak zetozteneko
arrazoia izango zan.
Nere tristurak joan zitzaizkidan
entzuten nien abotsan.

Gironan gazte bat il da eskiatze-istripuan. Negarra emen, negarra an. Nunai ere badegu naiko lana. Aurrez ezin antze-man zer datorkigun.

Urtarrillak 30 - Asteazkena

Goizetik izotza eta arratsalde z euria.

Felipe de Borbon printzeak berrogei urte bete omen ditu. Zorionak.

Mundua berotzen ari dala, neurriak artu bearrean gerala eta kontua pranko entzuten degu aspalditxoan. Gaurko berri-emailleak diote, berriz, elurte izugarriak dituztela Txinan, Jerusalem, Libanon eta abarretan.

Txinan larogei ildako eta guzti, joandako berrogeita amar urtean ezagutu ez dutena. Jerusalem eta Libanon ere arri-tuta ikusten dutenarekin. Egia ote da mundua berotzen ari dala? Kontraesan geiegi dabil gure artean.

Mundua berotzen ari dala
jakintsu askon auzia,
baiña lurralde askotan ori
dute ezin ikusia.
Txinan, Jerusalem ta abar
dute negu itsusia.

Sinesgarria ez da izango
esaten duten guzia.

Urtarrillak 31 - Osteguna

Ostegun gizen degu gaur, inauteri-asiera erri askotan. Euriarekin asi du, ordea, eguna eta euria ez da ona jaietarako. Ernio mendia, berriz, zuri agertu zaigu gaur goizean elurrez.

Lodosan senar-emazteak il dira kamioko istripuz, alaba txikia eta beste lagun bat oso gaizki, baita ere.

Galizian beste eriotza bat kamioan.

Artzentalesen trena deskarrilatu da lau beirekin talka eginda. Zauriturik ez, ala ere.

Granadan aur jaio berria aurkitu dute zakarrontzian, illa.

Getxon, berrogei kilo leergai aurkitu dituzte bidoi batean. ETArena, ziurrenik. Leenaz gainera, naiko beldur bazterretan.

Granadan zakarrontzin aurra zegon illa,
Getxon bidoi batean lergaieitik pilla.
Polizia asiko zan pekatari billa.
Ez dabil oso ondo mundu biribilla.

Otsaila, motza izateko ohea



Otsaillak 1 - Ostirala

Goizetik oso otz egin du gaur, laino beltzez zerua jantzita.

Eibarko mendizale batek bizia galdu du Piriniotako Iru-Errege mendian, izotzetan irrist eginda (G.B.)

Beasainen gizonak andrea etxeko eskailleratan beera botatu du. Andrea gaixoetxean eta gizona lotuta aurkitzen dira.

Vigon, andrearekin asarretu eta gizon batek bere etxea leertarazi du, gasaren bidez.

Gure artean gertatzen danak
bai ote dauka izenik?
Orretaraino nola iritsi
senar-emazte izanik?
Alkar maitatuko zutela ta
amaika aldiz esanik;
fedea galdu genun ezkeron
emen ez dago gauz onik.

Legution pilota-txapelketako partidua: Olaizola I-Otxandorenak 22, Olazabal-Lasa III-ak, 11. Partidu txarra eta ez da arritzeko, ordezeko Olazabal bigarren maillako pilotaria izanik. Ordezko geiegi dabil gaur txapelketa ona izateko.

Otsaillak 2 - Larunbata

Goizetik euria eta naiko otz. “Kandelarioz euria, laster udaberria”, “Kandelarioz otz, negua degu motz”. Olako esae-rak ezagunak dira. Gaur Kandelario eguna izaki, izan ere.

Txapelketako bi partidu gaur. Bata, Idiazabalen: Gonzalez-Barriolak 22, Koka-eginok, 21. Bestea Iruñan jokatu dute: Olaizola II-Mendizabal II-ak 22, Titin III-Laskurainek, 16.

Beste jakin-miña Donostiako Anoetan genuen, Realaren eta Eibarren partidua (derbia) jokatzen zandak. Pakean etxeratze-ko emaitza oberik ezin zitekeen izan, biak gol bana sartuta erretiratu baitira.

Futbolak badu alderdi on bat
joko askok ez dutena,
Eibarri eta Errealari
gaurkoz gertatu zaiena.
Biak gol bana sartu dute ta
orrela izan da azkena.
Pakean erretiratutzeko
bera ez al da onena?

Armiñonen emakume bat il da kamioko istripuz.

Otsaillak 3 - Igandea

Gaur goizean naiko otz genuen ego-aizea ibilli bada ere.
Arratsaldean, berriz, indar artu du aizeak.

Txapelketako partidua jokatu da Eibarren: Bengoetxea
VI-Peñagarikanok 22, Xala-Paskualek, 20. Partidu txarra.

Ciudad Rodrigon, Donostiako gazte bat zezenak adarrak
sartuta oso gaizki dago. Billabonan kotxe bat aurkitu dute
sutan, berriz, eta barruan gazte bat zearo kiskalita. Pasaia-
koa omen zan, eta ogeita zortzi urtekoa.

Gasteizen ezezagun batzuek BBVA banketxeari eraso dio-
te, eta inguruko kotxeak-eta naiko kaltetuak izan bear dute.

Tolosan eta erri prankotan millaka jende Iñauteriak ospa-
tzen, arratsalde-erditik aurrera euria egin badu ere.

Iñauteriak izanik jartzen gera ero,
edariaren bidez odol danak bero.
Lau-bost bat egunetan festa egunero.
Garizuma luzea etortzen da gero.

Otsaillak 4 - Asteleena

Garaia ere bada eta goizetik naiko otz izan degu eta egu-
raldi tristea.

Pernando Barrena, Herri Batasunaren buruetako bat,
beste batekin lotua Garzon epailearen aginduz. Beste lagun
baten billa ere bai omen dabil polizia.

Kamioi bateko txoferra il da Tolosan, donostiarra, kotxe batekin talka eginda. Kotxeko txoferra ere gaixoetxera eramane omen dute.

Guadalajaran gizonak andrea il du, eta gero berak bere burua il, zubi batetik salto eginda. Eztu berriz egingo.

Santa Ageda bezpera degu.
Gazte taldeak eskean,
ikusi al izango dira, noski,
batean eta bestean.

Otsaillak 5 - Asteartea

Goizetik naiko aize, baiña otz aundirik ez. Zerua oskarbi.

Iñauteri-jaien azkena gaur. Eta gu, urteroko oiturari jarraituz, sagardotegira joan gera afaltzera. Iñoiz baiño jende gutxiago zan. Eta nagusia bera ere naiko pentsakor: zer patsatzen da emen?

Irundar bat il da moto-istripuz. Eta Sevillan, berriz, etxeak su artu eta senar-emazteak erreta il dira, eta seme bat naiko larri omen da, zaurituta.

Zeutan, gazte bat il da autobusak azpian arrapatuta. Gazte onek gurera etorri nai zuen, ixilka, autobusaren azpian gordeta. Baiña gauzak gaizki atera zaizkio. Au da mundua! Batzuek parrez, besteak negarrez. Alaxe izan da, eta ala izango da aurrerantzean ere.

Gazte onek nola edo ala
etorri nai zun gurera,
autobusaren azpian jarritz
ikusitzen zuen era.
Asko ez bazun pentsatzen ere,
ilda gelditu da bera.
Negargarria degu benetan
jende askoren izaera.

Otsaillak 6 - Asteazkena

Goizetik eguraldi polita egin du gaur. Auster-eguna, eta Garizumaren asiera. Zer pentsatua ematen duten ospakizunak.

Aurtengoa ez ote da izango egizko Garizuma?

Iruña ondoko Mutilba Goian, gizonagandik banandu berria dan ama batek, iru eta zazpi urteko bere semeak il ditu, benenoz. Beste bi iltzen ere saiatu omen da, eta azkenik bere burua ere bai, baiña irurak gaixoetxean daude eta bizitarako moduan omen dira. Zer geiago esan diteke gertakizun negargarri ontaz? Ez da asmatzen erreza.

Senar-emazte banaketa ori oso premizkoa zala genion asko giñan. Baña, ala ote da?

Mutilba Goian gertatu dana
Garizumaren aseran,
ez dakit ulertutzeko ere
gai izango ote geran.
Gorputzak ditun jokerak dira
buruaren araberan,
ta nola esan ori galtzeko
bidea nundik ote dan?

Otsaillak 7 - Osteguna

Goizetik naiko otz eta beelaiñoa.

Pernando Barrena eta Patxi Urrutia, Herri Batasunakoak, espetxeratuak izan dira Garzon epaillearen aginduz, ETaren laguntzaile diralakoa. Eta beste baten billa omen dabil polizia.

Azkenengo auekin ogeita sei badira espetxean dauden Mai Nazionalekoak.

Bergarako juzgaduan ETak leerкета egin du. Zauriturik ez da, baiña kalte aundiak bai, esan dutenez.

Seguran, atzerritar gaztetxoak bizi ziran etxea erre dute (Foru Aldundiaren babesean zeudenak ziran). Gazteak berak egindako azioa dala esan dute, eta lau lotu dituzte beintzat.

Gizalegean sartzeko etxe on bat eman,
Seguran olakoa zeukaten berengan.
Penagarria ez al da gertatu dana an?
Gazte oiekin ere badago naiko lan.

Otsaillak 8 - Ostirala

Gaur goizean izotz puxkat bazan, baiña zerua oskarbi. Etorrera ona.

Euskalerriko bi partiduri (EHAK eta ANV) datorren martxo Auteskundeetan partaide izatea debekatu die Garzon apeilleak, ETakoak diran ustez.

Bilbon lau etxe eraso dituzte.

Txapelketako partidua Donostian: Gonzalez-Barriolak 22, Olaizola II-Mendizabal II, 21. 21 eta 16 jarri ziran galtzailleak irabazten, eta kontrarioak 16-22ra joan zuzenean. Ikusgarria eta inork uste ez zuena gertatu zan bein eta berri. Pilota borobilla izan nonbait.

Estuasun ederrak jokalarientzat,
ustekabeko aundia gertatu da beintzat.
Olaizolaren alde joka zutenentzat,
logurerik etzala iruditutzen zat.

Otsaillak 9 - Larunbata

Eguraldi zoragarria goizetik.

Pilota-txapelketako partidua Iruñan: Xala-Paskualek 22, Olaizola II-Belokik, 8. Partidu polita.

Espainiako presidente Zapatero jauna Donostiako Kur-saalean mitina ematen izan da. Kanpo aldean bazan naiko ixkanbilla ezkerreko jendearekin.

Valentzian gizon batek bere andrea il du, eta andrea lurperatzeko etxeko jardinean zuloa egiten ari dala lotu du guardia zibillak.

Kordoban emezortzi illabeteko aur bat ito da piszinan.

PSEko bat bizi dan etxea eraso dute Irunen. Gasteizen eta Billabonan diru-etxeak eraso dituzte berriz; eta Basauriko eta Elorrioko Batzokiak ere atakatu dituzte.

Pake-bideak iges dijoaz,
kale-borrokak ugaldū;
alkar ez degu ulertzen eta
alkar nai degu zapaldu.
Gure arteko konpondu eziña
mundura zaigu zabaldu.
Negu beltz onek udaberria
noizbait ekarriko al du?

Otsaillak 10 - Igandea

Eguraldi zoragarria goizetik.

Ormaiztegin neska gazte bat il da moto-istripuz, eta beste gazte batek zauri asko.

Bilbon, Garzon epailleak aurrez debekatu arren, millaka gizon-emakume bildu da epaille orrek aurrez artutako erabakiaren kontra. Eta ango kaleetan sua eta txikiketa ugari izan da. Ertzainak lau lagun lotu ditu, eta zaurituak ere izan dira.

Toledon aita batek bere semea il du eizean zebiltzala, deskuidoz.

Madrilen denda bateko etxekoandrea il dute bi tiro eman-
da; ziartuenik lapurretara joanak ziran iltzailleak.

Iñaxio Perurenak 230 kiloko arria jaso du esku bakarrez, Getxon.

Logroñon pilota-txapelketako partidua. Titin III-Laskurainek 22, Koka-Beginok, 13. Titinen omenaldia ere izan da, aldi berean.

Titin irugarrena Logroñon omendu,
merezia zeukala askok esaten du.
Partidurik geiena berak jokatzen du.
Geienak irabazi, gutxitan galtzen du.

Otsaillak 11 - Asteleena

Goizetik naiko otz baiña etorrera ona.

Txapelketako pilota partidua Tolosan: Bengoetxea VI-Pa-txi Ruizek 22, Olazabal-Lasa IIIak 6. Partidu txarra.

Migel Soroa pilotari txapeldun aundia izana il da Tolosan, 82 urterekin (G.B.)

Atzo Bilbon ertzaiñak lotutako lau lagun aske utzi dituzte.

Bestalde, Garzon epaillearen aginduz amalau lagun ez-kertiarrak lotu dituzte, ETakoak diralakoa.

Atzo Ormaiztegin moto-istripuz zauritutako amasei urteko neska gaztea il da.

Eguraldi ederrak daramazkigu, baiña badegu naiko negu. Bai orixe!

Amasei urteko aingerutxo
ortxe gelditu da gorputz;
munduko lanak bukatu ditu,
eta motoko istripuz.
Aurrerapenak badira baiña
askotan egin milla uts.
Ziartuenik zeru ederra
ugalduko zan aingeruz.

Otsaillak 12 - Asteartea

Aize otza goizean eta oskarbi.

Tolosako San Frantzisko elizan Migel Soroa zanaren aldeko illeta egin da, eta eliza gainezka jendez.

Lizartzako PPko Regina Otaola alkate andereak esan du ogeita amairu udaletxe daudela ANVren mende, ogeita zortzi Gipuzkoan. Eta ori oker aundia dala, eta errua Zapatero presidentearena dala. Pakea ez da egongo erreza orain-txe ere.

Lizartzako alkate orrena
ote da bide zuzena?
Gaitzaz zertan artu bear degu
beti besteren izena?
Txarrez ta onez egon liteke
erri baten almazena.
Besteri kulpak botatzea da
emen gauzik errezena.

Otsaillak 13 - Asteazkena

Otz aundirik ez gaur goizean eta zerua oskarbi.

Leengo astelenez Garzon epaillearen aginduz lotu zituzten amalau lagunetatik amaika espetxean sartu dituzte. Aske gel-ditu diran irurak fiantza aundiak ordaindu bearko dituzte.

Ondarroan autobus bat eta sei auto erre dituzte. Pasaian trenaren geltokia eraso, berriz.

Zaarsaridun (jubilatua) jendea oso pozik Kutxak antola-tu dizkien ibillaldiak dirala-ta. Mundu guztian zear ibiltzeko aukera, alajaiña! Garai bateko zaarrak etzuten olako aukera-rik izan. Ez orixe!

Lotura ta espetxe sarri dagoena.
Nolakoa ote da onen ondorena?
Sendi askotarako au da ondamena!
Zarsaridunak gabiltz emen ondoena.

Otsaillak 14 - Osteguna

Goizetik otz aundirik ez eta eguraldi ederra gaur ere.

Espaiñiako gobernuaren jokaerak dirala-ta lanuztea egin da, ezkertarrak eskatuta. Eta antolatzaillak diotenez erantzun ona izan omen du. Eusko Jaurlaritzak dio ez dala izan ainbestekoa. Ogeita sei lagun lotuak, lanuztea dala-ta. Anoe-tako autoetxe batean zortzi kotxe erre dituzte. Bilbon eta toki geiagotan ere izan dira kale-ixtilluak.

Istorian leenengo aldiz Kutxako langilleetan emakumeak geiago dira gizonezkoak baiño.

Ondarrabiko egazkin-zelaiarekin eztabaida gogorra sortu da, aunditu egin bear dala eta txikitu egin bear dala.

Egazkin-zelai ori degu Ondarrabin,
aspalditxo onetan bada zer itz egin.
Jende askorentzako izan arren berdin,
baiña txikitu beintzat ezin leike egin.

Otsaillak 15 - Ostirala

Goizetik otzik ez baiña laiñotsu.

Pilota-txapelketako partidua Quintanar de la Sierran: Olaizola II-Mendizabal II-ak 22, Olazabal-Lasa III-ak 5. Alde aundia zegoen aurrelarietan. Izan ere, bat txapelduna eta bestea bigarren maillakoa izan, Irujoren ordeez.

Frantzian ETako bi lagun lotu dituzte: Joseba Iturbide eta Migel San Sebastian.

Baraiñanen berrogei urteko gizona il da etxeak su artuta.

Cadiz-en denda bateko emakume langillea il dute labanaz, ziartuenik lapurrak.

Lanuztea zala-ta atzo lotu zituzten batzuk aske utzi dituzte. Baiña argi dago berririk onenak eguraldiarenak dirala.

Mundu ontan badira pozak eta penak,
bein okertu giñan da auek ondorenak!
Amabosgarren eguna otsaillarenak,
berak ekarri ditu berririk onenak.

Otsaillak 16 - Larunbata

Goizetik oskarbi eta izotza. Garaia ere bada-ta...

Iruñan txapelketako partidua: Titin III-Laskurainek 22, Bengoetxea VI-Patxi Ruizek, 16. Partidua asi orduko ezker besoa zauritu zaio Bengoetxeari. Ala ere...

Txapelketako beste partidua Mirandan jokatu da: Gonzalez-Barriolak 22, Olaizola I-Otxandorenak 21. Partidu gogorra eta ederra.

Hernanin autobus bat zearo erre dute, eta ertzainari eraso gaiñera.

Ibarretxe Leendakaria Kalifornian dabil itzaldiak ematen eta abar. Berri-emailleak diotenez arrera ona egin diote gaiñera.

Zestuan Olaberri baserria erre da, biztanleak eta abereak salbo dirala. Ain zuzen, baserri ortan morroi ibilli zan Uzta-pide bertsolaria. Neu ere iritsi nintzan Santaeskean koplari.

Zestua ortan errea degu
Olaberri basarria;
ori da famili askotara
etorritzen dan arria,
nor bere etxera etorri arte
sumatzen ez dan larria.
Borondaterik baldin badegu
badaukagu nun jarria.

Otsaillak 17 - Igandea

Goizetik udaberri-giroa.

Pilota-txapelketako partidua Eibarren: Koka-Beginok 22, Xala-Paskualek, 17. Partidua asterako dirua doblatuan Xala eta Paskualen alde.

Kosovok askatasuna iritsi du Serbiagandik. Orain esaten dan bezela "independentzia", alegia. Iparramerika eta Europa geiena Kosovoren alde agertu dira; ez, ordea, Espainia eta

Errusia. Jakiña, Espaiña askatasun orren alde jarriko babiliz, badaki zer entzun bearko lukeen. Errez ikusten da orzein ankatatik errena egiten degun. Orain arte nagusi izan dan Serbia ere ez dago konforme. Parkerik izango ote dute? Gertatuak gertatu, arrazoibide bat geiago badegu euskaldunok.

Kosovo gertatu da Serbiatik aske;
Euskadi ala dago Espaiñiri eske.
Galdera sortzen zaigu sarri, bataz beste:
Ezagutuko al degu beste orrenbeste?

Otsaillak 18 - Asteleena

Goizetik aize arroa eta otza.

Urretxun zortzi zaborrontzi erre dituzte, kotxeak ere bai.

Elektrizidade-kableak alkar jota sua piztu zalarik, iru ek-tarea piñudi erre dira Legorretan. Suiltzailleei esker basarri batzuk salbatu dira.

Atzo iritsi zuen Kosovok nazio izateko askatasuna, baiña pakerik ezin iritsi, ordea; eta Kosovon bizi diran serbiarrak guztiz asarre omen daude, Iparramerikaren kontra eta abar gogor altxatu dira, erria bi puska egiten dutela-ta. Euskadik bere askatasuna iritsiko balu, zer gertatuko ote litzake? Lagun urkoa geure burua bezela ez degu bereala maiteko.

Kosovo iritsi da jabe izatera,
baiña ezin etorri egizko pakera.
Serbiarrak asarre irtenik kalera...
Besteren onarekin konforme ez gera.

Otsaillak 19 - Asteartea

Goizetik naiko aize otza eta laiño batzuk zeruan.

Munduan zabaldu dan oiartzuna: Fidel Castro diktadoreak utzi duela Kubako agintaritza, berrogeita bederatzi ur-

tez agindu ondoren, gaixo aurkitzen dalako, noski. Larogeita bat urte ere bai bizkarrean, eta...

Berrogeita bederatzi urtez
izan du agintaritza;
egun batean indarran bidez
artu zuen nagusitza,
eta geroztik Kuba orretan
mixeri baten dabilta.
Oso gertutik ikusi genun
daramakiten bizitza.
Poztuko gera aldaketa bat
zorionean balitza.

Gasteizen poliziak sei gazte lotu ditu, kale-erasotzailleak diran errezeloz.

Bi euskaldun il dira kamioko istripuz, Billabonan eta Castejonen.

Malagan eta inguruetan ujoldeak izan dira berriz, Euskerrian legorte beldurrez gauden bitartean.

Ermuan amabost urteko neska bat egurtu dute eskolako lagunak, eta gaixoetxean dago orain. Zer ikusteko ote gaude?

Otsaillak 20 - Asteazkena

Goizetik udaberri-giro ederra gaur.

Talaveran, eskolaumez beteta zijoan autobusa bidetik irten da, eta ogeita amaika ume zauritu dira. Ala ere, ildakorik ez, zorionez.

Atzo zabaldu bazan ere berria, Ermuan amabost urteko neskatoa egurtu zutela, amar egun leenago gertatu zan ori. Ain zuzen ere, atzo irten zan gaixoetxetik neska.

Gertakari onek bazterrak astindu ditu, noski. Nolz iritsi gera ontaraiño? Nun ote daude sustraiak? Familia edo sendia ainbat naaspillatu zaigun ezkerro, ortatik ez ote dator errua? Fedea galtzeak ez al du eragiñik? Eta irakasleak?

Bein da berriro, arkumearen prezioa iru euro kiloko iritsi eziñik Ordizian!

Azokaren lekua beti da Ordizi.
Arkume-prezioa gaur goizean jeitsi.
Iru euro kiloko ezbaite iritsi,
artzai gaixoak ezin asko irabazi.

Otsaillak 21 - Osteguna

Goizetik udaberri-giro ederra eta bazterrak loratzen.

Martxoaren 9an Espainia maillan Auteskundeak egingo dirala-ta, gaueko 12etan asi da mitiñen ekitaldia. Izango da sermoi ederrik ondorengo egunetan. Gero ikusi bear bakoi-tzak zer egiten duen.

Leengo asteleenez esaten nuen Kosovok iritsi duela aska-tasuna, baiña pakerik ez. Arrazoi ori gaur geiago indartu da. Ez da giro, batez ere Kosovoren nagusi izan diran serbiarre-kin orain. Gertakizun auk euskaldunoi ere ematen digute zer pentsatua.

Tarragonan bost lagun il dira kamioko istripuz. Negarga-ria benetan!

Gertakizun tristea, beraz, Tarragonan:
kamioko istripuz bost lagun illak an.
Gure bizi-ardatza dago motorrengan.
Konturatzen al gera zer garestia dan?

Otsaillak 22 - Ostirala

Goizetik naiko otz eta gerora etorrera ona.

Eusko Jaurlaritzta eta Nafarroakoa elkartu dira Gastei-zen, euskera indartzeko, esan dutenez. Zortzi urte joan dira bien arteko artu-emanik gabe.

Igor Portu lotu zuten guardia zibillak gaur aitortu dute epaillearen aurrean ez dutela errurik. Erriak ez du sinistu, ordea.

Venezuelan egazkin bat erori da eta barruan zijoazten berrogeita sei lagun il dira.

Txapelketako partidua Cobaledan: Titin III-Laskurainek 22, Olaizola I-Otxandorenak 16. Irabazleak errez nagusitu dira.

Asi dira mitiñak nunai besteak pekatari dirala esanez.

Emen bakoitzak arre bere astoari,
eta nik bidezkoa ikusten det ori.
Auteskundeak datoz, mitiñak nunari,
baiña beti besteak dira pekatari.

Otsaillak 23 - Larunbata

Goizetik izotz arrasta, gero eguraldi ona.

Bilbo ondoko mendi bateko antena leertu du ETak.

Txapelketako partidua Iruñan: Xala-Paskualek 22, Olai-
zola II-Mendizabal II-ak 12. Naiko partidua txarra.

“Euskadiko Sei Ordutan”, Goenatxok amairu jasoaldi eman dizkio amasei arroako arri erretangularrari, bost minutuko denboran. Ostolazak, amabi. Biak batera lana egin zuten. Leku berean kontrabandisten karrera larrogei kiloko zakua bizkarrean artuta, Asier Urbistondo eta Karlos Santamariaren artean. Santamaria izan zan irabazle, berreunda larrogeita bost metroko plazako jira berrogeita amaika segundotan korritu zuelarik. Inoiz baiño jende gutxiago bildu zan Belotromoan.

Jendea aspertutzen ari da jaialdiz;
ez noizik bein bakarrik gertatuko balitz.
Telebista ori're tarteko da, berriz...
Antolatzaile asko buruausten dabiltz.

Otsaillak 24 - Igandea

Goizetik ego-aize arroa eta epel.

Txapelketako partidua Donostian: Gonzalez-Barriolak 22, Leitzza-Patxi Ruizek, 20. Irabaztun auek zortzi partidu jokatu dituzte txapelketan, eta danak irabazi.

Igeldo mendian irurogei ektarea sail erre ditu suteak. Norbaitek gaiztoz su emandako errezeloak dira.

Otsailaren 19an utzi zuen Fidel Castrok agintaritza, eta gaur bere anai Raul jarri dute Kubako presidente.

Orion, Oria erriean traineru txapelketa jokatu da ogeita emezortzi partaideren artean. Eta Astillero aurrena gertatu; bigarren, San Pedro A; irugarren, Orio, eta orrela. Beraz, el-tzea asi da berotzen.

Ogeita emezortzi traineru baziran.
Astillero aurrena bere tira-biran.
San Pedro bigarrena, nola onak diran;
etxekoak jarraitu zioten segiran.

Otsaillak 25 - Asteleena

Goizetik udaberri-giroa.

Andoni Aizpuruk zuzentzen duen *Orrela da bizitza* telebistako saioan Goenatxo arrijasotzaillea amabost urteko seme bikaiñarekin agertu da. Agertu bakarrik ez, seme orrek zortzi arroako kubikoari iru jasoaldi eder eman dizkio gaiñera. Enborretik ezpala.

Hueskan eiztari bat il da mendian amilduta.

Txapelketako partidua Tolosan: Koka-Beginok 22, Olazabal-Lasa III-ak, 12. Burrukarik gabeko partidua izan da. Zortzi bikotetatik lau gelditu dira aurrerako, ogeita amabi partidu jokatu ondoren: Gonzalez-Barriola, Titin III-Laskurain, Olaizola II-Mendizabal II eta Bengoetxea VI-Patxi Ruiz.

Pelotan txapelketa, ta zortzi bikote.
Gure kirol maitea ez dabil arlote.
Bi txapel eder oiek zeñentzako ote?
Titin eta Laskurain, geienak diote.

Otsaillak 26 - Asteartea

Goizetik udaberri-giroa atzo bezelaxe.

Baiña egun beltza emakumearen aldetik. Lau emakume il dituzte egun onetan beren bikotekideak. Madrilen, ogeita bi urtekoa; Puerto de Santa Marian, berrogeita bederatzi urtekoa; Corellan, berrogeita lau urtekoa, eta Valladoliden, berrogeita amabost urtekoa. Azkenengo iltzaille onek bere burua il du gaiñera tiro batez. Zer geiago esan? Esan litezkeenak esanda daude!

Madrilen, beelaiñoa dala-ta, larogeita amar kotxek alkar jo dute, eta ogeita amabost lagun zauritu dira.

Ia bi milla milloi kilo berdel deskargatu dituzte Kantabria-ko kaietan. Itsasoa antzutzen ari dala entzuten degu askotan, baiña beti ez da egia izango, bistan danez.

Itsaso ori agertzen zaigu
iñoiz borondadezkoa.
Oraingo ontan ekarri digu
etekin eder askoa,
ta Garizuma joan baiño len
arrantzaleen Pazkoa.
Aragi-uztea egin nai dunak
badauka arrai preskoa.

Otsaillak 27 - Ateazkena

Goizetik euri-arrasta ederrak baiña otzik ez gaur ere.

Atzo lau emakume il baziran bere bikotekideen eskuetan, gaur beste bi zaurituak izan dira, labanaz. Bat Galizian eta bestea Mallorcan. Agintari eta gaiñontzekoak zer egin ez dakitela dabilz eraso bildurgarri oien aurrean.

Egunero bear ditugun janariak eta abar, goraka dijoazte-la preziotan eta badegu negarrik asko. Arkume-saltzailleak ez dute olakorik esango, gaur Ordiziako azokan iru euroan saldu baita kiloko. Eskerrak gazta onak prezio ederra daukan. Bestela...

Asteazkenez Ordizi ortan
ain degu peri zabala,
klase guztitik inguratzen da
batek konta ezin ala.
Ikusten degu gazta on ori
oso garestia dala...
Arkumearen utsune txarra
berak berdindu dezala.

Otsaillak 28 - Osteguna

Goizetik euri-lanbroa, otzik gabe. Apustua irabazteko lain euri sarri darabilkigu aurtengo neguan, baiña bazterrak legor daude oso.

Konfebasketik dioenez, ETak eskutitzak zabaldu dizkie enpresariari dirua eskatuz.

Jose Luis Lasa il da Ordizian irurogeita bat urterekin (G.B.). Gizon sonatua zan Jose Luis, Gazta-kofradiaren sortzaileetako bat, ain zuzen.

Mikel Ibañez ETakidea Espainiari entregatu dio Frantziak.

Joxe Jabier Arizkuren “Kantauri” ETakoari berrogeita zazpi urteko espetxe-zigorra eman diote. Alde ontatik naiko zigor badegu Euskalerrian.

Espetxe eta zigorretikan
ondo dabil Euskalerra;
mundu guztiak badaki, noski,
erri txiki onen berri.
Politikazko arazoa da,
orretan gabiltza larri.
Danok pakea mingaiñean ta
pakerik ezin ekarri.

Otsaillak 29 - Ostirala

Goizetik udaberri-giro proposa gaur ere. Gaur otsaillaren azkena, urte bisiestoa dalarik.

Zailla da aurtengoa baiño otsail ohea izaten. San Josetan gerezi arbolak loratzen baziran, udaberria goiz zala esan oi genuen; eta aurten dagoeneko loratan daude. 1956ko otsaila ezagutu genuenok zer esan?


Billabonan telefono-kabina bateko kristalak danak puskatu dituzte.

Derion PSEkoen etxea txikitu du ETAk leerketa baten bidez. Inguruko etxebizitzak ere kalte gogorrak izan dituzte.

Beste oiartzun bat zabaldu da gaur Euskalerrian: Martxoako auteskundeak dirala-ta, botatzera ez joateko erregua ezkertiarrek egin dutena.

Batzuk botoen eskean dabiltz,
besteak ez emateko;
beraz aukera badatorkigu
nai deguna egiteko.
Sarri gogorik ez du ematen
boto ematera joateko,
baiña orixe gerta liteke
geure buruen kalteko.

Martzoko trumoiak berrogei eguneko ekaitza



Martxoak 1 - Larunbata

Goizetik udaberri giroa gaur ere.

Jesus Alberdi Egileor bertsolari ezaguna il da Bergaran, 77 urterekin (G.B.).

Bi-bitako pilota-txapelketaren azken aurreko ligillaren asiera Iruñan, lau bikoteren artean: Olaizola II-Mendizabal II-ak 22, Bengoetxea VI-Otxandorenak, 13. Denok uste genuen bezelako partidua.

Millaka eiztari Madrilén gobernuak jarri dituen legeen kontra manifestatzen.

Tolosan, Usurbillen eta Barañainen PSE-EE eta EAren kontrako erasoak izan dira. Donostian ere ixkanbilla ederrak Falange eta Ezker Abertzalearen artean, ertzaiña tarteko zala.

Orion garaje batean suak indar aundia artuta gaineko biztanleak naiko larri.

“Sua ta ura obe belaunetik bera”,
egi aundia dala konturatzen gera.
Suak sarrera Orion garaje batera,
gaineko biztanleak bearko atera.

Martxoak 2 - Igandea

Goizetik udaberri-giro ezin ohea.

Billabonan berriro telefono-kabina bateko kristalak zearo txikitu dituzte.

Txapelketako partidua Eibarren: Gonzalez-Barriolak 22, Titin III-Laskurainek, 13. Partidu ederra, eta Laskurain iñoiz baiño galtzailleago.

Iurretan (Bizkaia) ETAko bi lotu ditu ertzaiñak. Iruñan, PSNko kide baten etxea eraso dute.

Arronizen irurogeita lau urteko gizon bat il du bere koñadoak, familiko asarreak zirala-ta.

Kantabrian, berriz, irurogeita amabi urteko aita il du bere semeak.

Toledon egazkin txiki batean 1200 kilo droga aurkitu dituzte.

Toledo ortan egazkin baten
aurkitu dute pentsua!
Droga izena daramakiena
ez da emaille antzua.
Arrigarria mugitzen duen
diru-pil edo multzua!
Penagarria gizarteari
galtzen diola zentzua.

Martxoak 3 - Asteleena

Goizetik lainotsu eta otz gutxi.

Igeldon gaztetxo atzeritarrentzat Foru Aldundiaren bidez izango zan etxea erre dute. Norbaitek, edo norbaitzuek pikardiz su emandako errezeloak dira.

Bergaran Egileor bertsolariaren illeta egin da eliza gainezka zala. Beste gorputz bat ere bazan illeta orretan. Gorrotxategi, Narbaiza eta Lazkano bertsolariak kantatu zuten illetan lagun zaarraren gorantzan.

Durangon eta Bilbon bi gizon lotuak bere bikotekideei tratu txarrak ematearren.

Donostiako ondartzan gazte bat lotu du ertzaintzak, motxilla bat lapurtzearren.

Lapurretako bidea ondartzatan dago,
motxilla edo poltsa aukeran badago.
Jabea egon leike baiñuz aruntzago...
Eskerrak ertzain oiek ez dabiltzala lo.

Martxoak 4 - Asteartea

Goizetik negu giroa, euria eta kazkabarrarekin. Ernion, elurra.

Rouco Varela artzobispoa aukeratu dute Espaiñiako Elizaren buru izateko. Bi botoren aldearekin irabazi omen dio Blazquez Bilboko gotzaiari.

Donostian ogeita amar urteko erritar bat il da motoan zijoala aizeak lurrera bota duen zuaitz batek azpian artuta.

Abaltzisketan Josefa Amondarain 103 urteko amona il da. Amar seme-alabaren ama (sei mutil eta lau neskarena). Bi ez beste denak bizi dira. Goian bego amona. Lana eta ume asko ez dala ona urte askoan bizitzeko dioten oiek zer esan bear dute eriotza onen aurrean?

Leengo igandez Iurretan lotutako bi ETAKoak aske utzi dituzte.

Gure ontan badabil lotu eta aske,
danetatikan badago emen batez beste.
Poliziak gazte billa azkar dijoazte.
ETAKoak ez dira izango ainbeste.

Martxoak 5 - Asteazkena

Goizetik euria, aize otza eta kazkabarra. Mendian beera elurra.

Ainbeste artu-eman genuenez, Abaltzisketan izana naiz atzo il zan eunda iru urteko amonaren illetan. Ez da arritzekoa, eta bazan jendea antxe!

Amar seme-alaba azita
eunda iru urtez bizi.
Jaun zerukoa, Zuri eskerrak
eman bear lendabizi,
oso banakak izaten dute
Josefak ainbeste grazi.
Ikasbide ederra benetan
baldin nai badegu ikasi.

Eizea gutxitzen ari dala sarri entzuten degu; baiña, itxurak diranez basurdeak ugaltzen ari dira, ordea, kamio eta

kaleetan ikusi bait litezke orain. Animali oien bidez okerrik gerta ez dedin, Gaintxurizketatik Irunera bitartean kamio azpitik gurutzatu ditezten iru pasabide irekiko ditu Foru Al-
dundiak, milloi bat euroko aurrekontuarekin. Entzuteko guztiak oraindik entzuteko geunden!

Martxoak 6 - Osteguna

Goizetik naiko otz gaur ere; baiña eguraldiak ontzera ematen du.

Gure artean badegu ezbear eta negarrik oraintxe ere. Ala ere, urrutietara begiratzen badegu gureak ez dira ezer. Adibidez, armadun bat Jerusalemgo eskola batera sartu eta tiroka ekin dio, larogei ikasle zeuden tokian. Zortzi lagun il ditu eta beste bederatzi zauritu. Erasotzailea bera ere poliziak il du azkenean. Burruka latza dago Israel eta Palestinaren artean, eta orra ondorena!

Eta gainontzekoak? Ameriketatik ere antzeko kontuak jaso izan ditugu.

Gipuzkoak zigorra jaso du Kantabriako Kofradiaren alde-
tik, berdel geiegi arrapatzen dutela-ta. Au zeinek ulertu?

Berdel geiegi arrapatzea
nunbait ez da komeniko,
bestela orrelako zigorrik
emen etzan etorriko.
Esaten dute arraiz antzutzen
ari dala Kantabriko.
Dana kontua ote dan ere
pentsatzen det nereko.

Martxoak 7 - Ostirala

Goizetik euria eta otza.

Politiko aundi oiek esaten ari ziran ETak azio aundiren bat egin zezakeela Auteskundeak baiño leen. Eta bai egin ere! Bazkalondoan, Arrasateko zinegotzi sozialista izandako Isaias

Carrasco berrogeita iru urtekoa eta iru umeren aita il dute, bost tiro emanda (G.B.). Kotxean sartu eta lanerako asmoak zituen nunbait, eta bertantxe il.

Leenaz gainera, ez da giro Euskalerrrian. Gaurko zeuden mitin guztiak bertan beera utzi dituzte. Zapatero eta Rajoy ere etorri dira Arrasatera, besteak beste.

Huelvan ilbeltzaren 13an galdu zan Mari Luz neska txikiaren gorputza aurkitu dute.

Neska txikia ilda aurkitu
eta zinegotzia il!
Gertatu diran gauzak izanik
ezin sinisturik nabil.
Alkarrentzako errespetoak
nunbait egin zuen amil,
ta bosgarrengo mandamentua
emendik urruti dabil.

Martxoak 8 - Larunbata

Negu-giroa, goizetik euriarekin.

Txapelketako pilota partidua Donostian: Olaizola II-Mendizabal II-ak 22, Gonzalez-Barriolak, 9. Olaizola oso ondo, eta Gonzalez gaizki, pattal. Leenengo partidua txapelketa ontan galtzen dutela.

Arrasaten millaka pertsona bildu ziran atzo ETAk il zuen Isaias Carrasco zanaren illeta zala-ta. Gipuzkoako gotzai dan Uriarte jaunak zuzendua izan da elizkizuna. Itz gogorak esan ditu itzaldikoan. Baiña, ETAk entzungo al dio? Parkerik ezagutuko ote degu?

Itxaropena omen da azkena galdu bear dana, eta jarrai dezagun itxaropentsu ea egitazko Pazkoa etortzen zaigun...

Izketarako gai nagusia
izan degu Arrasate.
Itzaldi ederran jabe izan da
gotzai jaun dan Uriarte.

Pakea eskatutzen zuan ta
emen pakea aparte...
Itxaropentsu bizi gaitezen
Pazko bat etorri arte.

Martxoak 9 - Igandea

Goizetik naiko otz gaur eta euria.

Espaiñiako Kongresurako eta Senadurako Auteskunde-eguna. Eta jakin ditugu emaitzak: Zapatero jauna izango da Espaiñiako presidente beste lau urtean, ezeren okerririk ez dala. Baiña Espaiña maillan irabaztea bat da, Euskadin ere berak jaso du botorik geiena, eta gure politiko abertzaleak asko bajatu dirala esan bear. Zer gertatu da emen? Nun utsegin dute? Edo erriak, guk utsegin degu? Zer pentsatua eman bear ligukeen emaitzak izan dira, zalantzarik gabe.

Ustez eskutan genun txoriak
oraingo ontan aldegin;
Euskalerriko zeru ederra
ez da ikusitzen urdin.
Ez da erri bat edo biretan,
danan gertatu da berdin.
Ontaz aurrera badadukagu
zer pentsatu ta zer egin.

Txapelketako partidua Eibarren: Tittin III-Laskurainek 22, Bengoetxea VI-Patxi Ruizek, 13. Burrukarik gabeko partidua izan da gaiñera.

Martxoak 10 - Asteleena

Goizetik aizeak indar aundia eta naiko otz.

Arrasaten millaka pertsona manifestatu da ETArekin kontra, Isaias Carrascoren ilketa egin zuelako. Espaiñiako beste leku askotan ere kaleratu dira asarreak. Espaiñiako presidente Zapaterok esan du Euskadin Auteskundeak irabaztea garaipen aundia dala.

Leengo osteguna ezkerro Maro itsasontzi aundia Jaizkibeleko arroketara baztertua zeukan denboraleak, eta gaur iru puska egin du. Ez da giro itsaso orrekin, jaunak!

Durangon langille bat il da, emeretzi urtekoa, 1.500 kiloko kristal-puska aundia gaiñera erorita, aizearen eragiñez. Zortzigarren eriotza da Euskadin aurten, laneko eginkizunetan.

Emeretzi urteko langillea
ortxe il zaigu Durangon;
bizirik jarraitutzeko ere
adin txarrean etzegon.
Lanetik degu guk bizi-poza,
etorkizun ta zorion.
Pena da, baiña orra sarritan
guretzat zer sari dagon!

Martxoak 11 – Asteartea

Goizetik euria eta aizea gaur. Negu-giroa.

Itsasoa oso asarre, amabi metroko olatuekin. Kalte ikargarriak egin ditu itsas-erri guztietan.

Itsaso orren asarreakin
bildurtutzen gera danak;
errez menderatutzen baititu
arrapatzen dituanak.
Nola ontziak ala kristauak
asko ditu eramana;
eriotz gabeko kalteak dira
orain gertatu diranak.

Donostian ogeita amabi urteko emakume batek orain dala bi illabete il zan amaren gorputza eduki du etxean gordeta. Auzokoak etxe artatik ateratzen zan kiratsarekin kezkatuta parte eman dute, eta argitu dira gauzak.

ETaren aspaldiko zuzendari izandako eta Carrero Blancoren eriotzean partaide izandako Pedro Inazio Perez il da Gasteizen, irurogei urterekin, gaixotasun luze baten ondoren.

Martxoak 12 - Asteazkena

Goizetik udaberri-giro proposa, txori guztiak kantari dirala.

Fustiñanan ogeita zortzi urteko gazte bat il da laneko istripuz. Lodosan, beste bat oso gaizki, zaurituta. Santurtzen ere bai, irureun kiloko pieza bat anka gaiñera erorita.

Frantziak iru ETAko kide entregatu dizkio Espaiñari: Eneko Paskual, Garikoitz Paskual (leengusuak) eta Juan Karlos Iriarte.

Donostiko alkate jaunak aditzera eman digunez, amabi milloi eurotik gorako kalteak egin ditu itsasoak Donostian.

Arroak gera baiña
zein eskas geraden,
umiltzeko gauz asko
ez da bear emen.
Naturaren mendean
gu nolatan gauden,
pentsa bear genuke
arrotu baiño len.

Martxoak 13 - Osteguna

Gaurko goiza ikusita neguak iges egin digula ematen du. Ikusiko degu.

Donostiako Ibaeta auzoan etxebizitza batean kalte aundiak egin ditu suak.

Pontevedran pizsina bat egiteko lanean ari zirala, pareta bat erori eta senar-emazteak azpian arrapatuta il dira.

Tolosako Ernialde jatetxeko nagusi dan Felix Garridok Euskadiko sukaldari gazteen arteko txapelketa irabazi du. Apirillaren 15ean eta 16an egingo da beste leiaketa bat Madrilén, Espainia maillan, eta tolosarra an ere agertuko da. Suerte on.

Bagdaden orain bi aste baitu zuten Boulos Faray artzobispoa gaur aurkitu dute ilda, balaz zulatuta. Alderdi aietan ere pakerik iritsiko ote da? Zer ikusi eta entzuteko ote gaude?

Boulos Faray artzobispoa
tiroz il dute Bagdaden;
guk nola esan zer ikusteko
edo entzuteko gauden?
Elizak etsai asko zitula
askotan entzunda geunden,
ta orra sinistu bearrean
nola aurkitzen geraden.

Martxoak 14 - Ostirala

Udaberri-giroak aurrera jarraitzen du; erdaldunak badute, ordea, esaera bat: “Cuando el invierno primaverea, la primavera inviernea”. Bildur izan gero.

Almerian eta Tarragonan bi emakume illak izan dira beren gizonen erasoz. Almeriako iltzaille onek bere burua il du.

Baiña... gaitz bildurgarri oni ez ote dio inork erremediorik jarriko?

Oporren asiera dala-ta naiko enbarazu izan da kamiotan. Iruran eta Bergaran zauritutako bi pertsona ere bai. Au asieran, bukaeran zer kontatuko ote degu?

Asteko izketa-gai nagusiak leengo igandeko Auteskun-deak eta itsasoaren asarreak izan ditugu. Itsasoaren okerrak konponbidea badute, noski. Politikoak darabilzkiten tira-birak ez dirudite ain errezak konpontzeko. Bakoitzak bere asoari arre esaten dio, eta or daude komeriak.

Itsasoaren asarrealdiak
badituzte oker gaitzak,
baiña eriotzik ez baldin bada
zuzentzen diran ekintzak.
Onartzen baldin baditugu guk
demokrazizko baldintzak,
ontzat artu bear genituzke
Auteskundeen emaitzak.

Martxoak 15 - Larunbata

Goizetik lainotsu baiña oso epel. Olakorik! Gerora trumoiak eta euri jasa. “Martxoko trumoiak berrogei eguneko negua” da esaera. Ez dedilla olakorik gertatu.

Oñatitik Arantzazura millaka pertsonaren igoera, oiñez, Uriarte gotzai jauna buru zutela, eta pakearen alde.

Pake billa ditugu guk buruaustek,
pakea eskatuaz zar eta gazteak,
berdin aiton-amonak, senar-emazteak.
Baiña alperrik dira pakean eskeak,
pekatari juzgatzen badira “besteak”.

Dotriñan ikasia “ni pekataria”,
gaurkoan otoitz ori ez da ugaria,
indartu zaiguna da gerekoikeria.
Erru danak besteak, au da komeria!
Arren zuzen gaitzazu, Birjiña Maria.

Txapelketako partidua Iruñan: Gonzalez-Barriolak 22, Bengoetxea VI-Otxandorenak, 16. Partidu ederra.

Nafarroako bertsolari-txapelketa egin da Elizondon, eta Berako Julen Zelaietak irabazi du txapela. Bejondaiola!

Martxoak 16 - Erramu igandea

Goizetik udaberri-giro ederra.

Bi-bitako pilota-txapelketako azken aurreko partidua Donostian: Titin III-Laskurainek 22, Olaizola II-Mendizabal II-ak, 12. Partidu ona izan danik ezingo degu esan beintzat, baiña ustekabeko ederra bai. 12 eta 9 jarri ziran Olaizola ta Mendizabal partidua irabazten, eta 9tik 22ra zuzenean joan ziran Titin eta Laskurain. Tantoketaren bidez gaurko bi bikote aukeratzeko dira azkena (finala) jokatu dutenak, martxoaren 30ean. Pilotalekua erabakitzeke dago oraindik.

Ustekabeko eta gaixotasun geiegi izan da txapelketa on-tan, eta ordezkotari aukeratu ibilli dira utsuneak betetzen: Otxandorena, Eugi, Goñi III, Mendizabal II, Capellan, Olazabal, Peñagarikano eta Leitza. Adibidez, Mendizabal II-k azken partiduekin hamar aldiz egingo du ordezkotari, eta txapelketa izan liteke gañera!

Butano gasaren oker batekin senar-emazteak eta hamar urteko semea il dira Jerezen. Aurrerapenaren okerrak.

Amar uteko semea eta
bere aita eta ama
gasaren bidez Jerezen illak,
ori negarrezko zama!
Mundu guztian zabaldua da
butano orrek dun fama,
baiña askotan aurrerapenak
atzerapena darama.

Martxoak 17 - Asteleena

Aste Santuan sartu gera; opor-kontua geiago entzuten degu, ordea, eliz-kontua baiño.

Aste Santua degu egutegi legez,
baiña santutik gutxi edo batere ez.
Gaur beste izen bat jarri leike errez,
opor astea deituz Aste Santu ordeztu.

Bartzelonan gas-leerketa baten bidez etxeak su artu eta iru senide il dira, eta amairu zauritu. Bertan bizi zan emakume

batek errentarik pagatzen etzuelako azken eguna omen zuen etxe ortan, eta su-emaille bera izan dan errezeloak dira. Leerketaren aurretik ikusi omen zuten maletarekin alde egiten.

Madriren, suketa baten bidez baitere, erabat kixkalita aurkitu dute gizon bat.

Bilboko bi mendizalek bizia galdu dute Gorbeian (Bizkaian), eta Hueskan (Piriniotan).

Andoaiñen lapurreta egin dute BBVA bankutik bi gizoneko armadunek. Zenbat diru eraman zuten ez da esan.

Frantziak Espaiñiari entregatu dio Eneko Galarra ETA-kidea.

An edo emen negarrik gabe
ezin igaro egunik,
zeru urdiña nai genuke ta
badabil laiño illunik!
Naturaleza tarteko degu,
ez dago ukatzen dunik,
baiña ez pentsa geronek ere
errurikan ez degunik.

Martxoak 18 - Asteartea

Goizetik otz aundirik gabe euria.

Atzo Bartzelonan gertatu zan suketaren egillea, igesi zi-joala ikusi zuten emakumearen errezeloa egin zan leenengo; eta gaur esan digute illik agertu dan senideetako bat dala.

Azpeitian Kutxa batera sartu da lapur armadun bat, baiña irtetzera zi-joala ertzaiñak zai atean eta gauzak gaizki atera zaizkio lapurrari. Atzo Andoaiñen lapurreta egin zutenak suerte obean dabiltz, oraindik. Ogeita lau ordu barruan bi lapurreta izan diralarik, diru-etxeetako arduradunak begiak argi jarriko zituzten.

Garai batean San Joseak eta Pazkoa inguratzean arku-meak diru egiten zuen. Gaur ez dago orrelakorik. Biar San Jose eguna dalarik, gaur izan da Ordiziako azoka, eta kiloko

iru euroan saldu dira ekarri dituzten arkume txamarrek.
Oraintxe ogei edo geiago urteko prezioan, ain zuzen.

Orain ogeita amar urte ere
prezio ori bazuan,
arkumerikan jan bear bazan
etxean edo auzuan.
Arkume orrek gure artzaiak
artuta dauzka lazuan;
etekin ona ez dadukate
beti leku erosuan.

Martxoak 19 - Asteazkena

Goizetik euri pixka bat eta naiko otz.

Gaur San Jose eguna degu, baiña iñoiz ainbateko jai-gi-
rorik ez da sumatzen gure aldean. Elizak ere leengo larunba-
tez ospatu zuelarik, aurten Aste Santuan gertatu dalako...

Tolosan aspalditxoan mota bateko edo besteko ospaketak
antolatzen aurrelari dabiltzala esan liteke, eta gaurtik asita aste-
-bukaera arte, arkumez ornitutako bazkariak antolatuko dituz-
te Zerkausi deritzon azoka lekuan. Gaur bai omen ziran eunda
berrogeita amar bazkaldar, esan dutenez. Billera oiekin jendea
arkumezaletzen bada, artzaientzat ez da gaizki etorriko.

Txarrik ez dala zerbait onik ez dunik esan oi da, eta Do-
nostian itsasoak egin dituen kalteak ikustera kanpotar asko
etorri omen da opor-egun auek dirala-ta.

Txarrik ez dala zerbait onik ez duanik,
ori ikusi leike Donostira joanik.
Kanpotarrak ugari oporrak izanik;
dirua uzten dute, ez da zer esanik.

Martxoak 20 - Osteguna santu

Gaur goizez sartu omen gera udaberrian eta benetan ize-
naren jabe agertu zaigu goiza. Jarrai dezala olaxe.

Urtero-urtero mundu berri bat
sortzen zaigu udaberriz;
neguak ilda utzi ditunak
piztutzen zaizkigu berriz.
Nik galdera bat egingo nuke:
maitatzen al degu egiz?
Sarri geronek ondatzen degu
gorrotoz eta txarkeriz.

Ostegun Santu bezela Jesusen Azken afariko elizkizun ederra izan degu Billabonan, Jesusen agindurik nagusiena premian dagoenari laguntzea zala entzunez. Agindu ori bete ezean, mezetara joatea alperrik dala esan digu apaizak. Egi galanta.

Kamioko istripuz, Espaiña maillan, dagoeneko ogeita amasei ildako bai omen dira Aste Santu onetan. Ikaragarria da gero! Datorren asterako zenbat izango ote dira?

Martxoak 21 – Ostiral santu

Ostiral Santu, eguraldiak negu tankera eta naiko otz.

Gaurko eguna kristautasunak
daukan egunik aundiña,
gurutz batean gugatik illa
Jaungoiko gizon egiña.
Bestela ez genuen zerurik,
ori da gauza jakiña.
Obe genuke sarritan ortaz
konturatuko bagiña.

Kalahorran ETak guardia zibillen kuartel aurrean kotxe bat leertuarazi du; eta aurrez abixua eman zuelako guardia zibil bat bakarrik arin zauritua. Baiña berrogei bat etxe ondatu eta kaltetun asko badira. Kalagorriarrak oso asarre gertakari onen aurrean. Zer geiago esan?

Piriniotan lau mendizale il dira elur-jausiak azpian arrapatuta. Frantzia aldetik gertatu danez, angotarrak izan bear dute.

Gaur illuntzeko elizkizuna Billabonan apaizik gabe izan degu, gizon eta emakume batzuek osatua. Bertako apaizak iru erritako eginkizunak dauzka gaur egun: Billabona, Astia-su eta Alkizakoak. Irurak ezin serbitu garai bateko erara. Erri geiagotan ere jokaera ori ikusi bearko degu.

Garai batean apaiz ta praille
guk bagenuen aukera;
emen geiegi, irtengo ziran
asko mundu zabalera.
Zeiñek ulertu azken urtetan
etorri zaigun galera:
orain bertako premitarako
ezin osatuz bai gera.

Martxoak 22 - Larunbata

Bart gauean eta gaur goizean ere euria erruz. Ibaiak azi dira, eta otz egiten du. Kamio asko elurrez eta denboralez zailduak ibiltzeko.

Tarragonan mendiko zulo batera erorita, aita-semeak il dira.

Le ridan emeretzi urteko gazte bat il da kamioko istripuz.

Alikanten gizon batek bere bikotekide emakumea il du, labanaz.

Aurtengo Pazkoak ere izango dute pozetik ainbat negarretik. Jakiten ditugun kontuak jakinda, zer esan besterik? Biar piztuko dan Jesusek gogoan izan gaitzala.

Zorionean degu Pazkoa bezpera.
Garizuma joan zan, asarre ez gera.
Koska aundiak daude batetik bestera.
Saia gaitezen miñez dagona poztera.

Martxoak 23 - Pazko igandea

Pazko egun alaigarria. Ala ote askorentzat? Garai batean arloteago bizi giñan, baiña ez al genuen Pazko alaiagoa izaten?

Nun da garai bateko
Pazkoan jarduna?
Arkume erre ura
oroitzen zaiguna.
Biarkoa ere etzan
aztutzen genduna:
morroiak'e perira
joateko eguna.

Elizarekin ere
fededun izanik,
Pazkoazkoa egin
ez da zer esanik.
Ezkontzako pregoiak
gogoan dauzkat nik...
Orain ez dadukagu
orrelako lanik.

Aberri-eguna ere badegu Pazkoa. Baiña gabiltzan bezela
ibillita zer poz dago askorengan Aberri-egun itxaropentsu bat
ospatzeko?

Bestetik, elurrez eta negu-erauntsiz agertu zaigu aurtengo Pazko-eguna. Ala ere, illuntzeko berriak diotenez, Bilbon, Gernikan eta Irundik Hendaiarako joaneran millaka abertzale bildu dira etorkizunari begira itxaropentsu. Bidezkoa dan bezela, Madrili eta Parisi Euskalerriaren burujabetza eskatu diote danak. Beste euskaldun politiko sonatu batek eskaera oiek alperrikakoak dirala esan du ordea. Nori sinistu?

Aberri-eguna etorri arren
ezin bildu alkarrena;
ondo dakigu banatutzeak
aulezia dakarrena.
Erru dana ez da Madrildik edo
Paristikan datorrena.
Geure arteko konpondueziña
degu gaitzikan txarrena.

Martxoak 24 - Pazko asteleena

Goizetik euria eta negu-giroa gaur.

Gaur Pazko bigarrena degu, eta urte batzuk daramazkigu legez jai egiñez. Alde batetik irabazi deguna bestetik galdu egin degu ordea, kaletarrak lan egiten zuten bitartean baserritarrak jai izaten bait genuen garai artan. Nolaz aaztu Tolo-sako peri eta apustu aiek? Onako esaera onek ere esaten digu zerbait: “Pazko bigarrenez egindako lana, irugarrenean urak darama”.

Gaur baserritarrak lana egingo dute, ez peri ez jai. Kalendar askok, berriz, oporrak bukatu eta etxerako etorrera naiko triste eta goibel.

Donostian gaueko dantzaleku oietako bateko atezaiña labankatu dute aita-seme batzuek, barrura sartzen utzi nai etzielako. Goizeko seiak ere baziran eta orduan omen zijozaten dantzalekua ixtera.

Bilbotar batek parapente edo aireko kirol orretako istri-puz bizia galdu du Marruekosen.

Penagarria dantzalekuko
atezaintzaillearena,
penagarrigo Marruekosen
bizia utzi dun orrena.
Otoitz bero bat egin dezagun
Jaun zerukoarena,
danak pozteko ez baita etorri
Pazkoaren bigarrena.

Martxoak 25 - Asteartea

Mendietako elur-urez eta atertu gabeko euritez errekek gaiñez egiteko zorian daude. Orain arte beintzat kalte nabarmenik ez da gure aldean, eta garai ontako asealdiak onuragarri dirala esan bear. Gaur ur asko bear degu gero...

Legor bildurrak bagiñun baiña
ederki aseak gera,
errekak gaiñezkatzeko zoriz
dijoaz itsas aldera.
Busti-legorran eskutan dago
gure emengo izaera;
oiek neurrian ditun erria
aberatsenen pare da.

Gaur Amabirjiña Martxoko eguna degu; eta esan oi da kukuak Erromako zubian gaurko egunez jotzen duela, eta andik zortzialdira ona ez bazetorren beregatik erregutzeko eskatu zuela. Gure jaioterri Berrobin gaurko egunez izaten zan leenengo Jaunartzea. Gaur ainbateko lujorik gabe, noski, eta zazpi urterekin.

Tolosako *Cantabrico* taberna famatua da apustu-munduan eta diru-jokalarien artean. Aspaldi asi ziran zurrumurruak agintari aldetik ori etzala legezkoa eta abar. Gero ango nagusi jaunak esan zidanez, orretarako baimen osoa iritsi zuten gobernuaren aldetik. Eta gaur etorri zaie albistea jokaera ori erabat galerazita gelditzen dala eta gaiñera 2.000 euroko isuna. Jokaera orrek etzion iñori gaitzik egiten (asarrerik ere ez da iñoiz ezagutu), eta tabernari bizia ematen zion. Adibidez, pilotalekutik kanpora ere ez dago dirua jokatzerik, eta “seapoto”en bidez jokatzen diranak, zer?

Martxoak 26 - Asteazkena

Atzo ibaiak gaiñez egiteko zorian baldin baziran, gaur goizean berri-emailleak esan digute euriteak jarraituko duela eta kontu izateko.

Udaberria aurten negu girokoa,
itxaropena dago emen gerokoa.
Kanilletako ura kezkik gabekoa.
Ori ziurtatu da puxka batekoa.

Ordizian asteko peri-eguna izan dalarik, Artzai-Eguna egin dute. Bi milla ardi kaleko joaneran, gazta berriaren asie-

ra, sariketak, omenaldiak eta abar, izan da zer ikusi eta zer entzun. Arrigarriena, ogeita amasei arkume kiloko 2,70 euroan saldu dirala. Eta, bitartean, bost kilo ziza xuri, kiloko 140 euroan! Beraz, amar kiloko arkumea lau milla ta bos-teun pezetan erosi zitekeen. Prezio guztiak goraka dijoaztela? Ez danenak.

Arkumearen aldeko festa bat izan berri da Tolosan, baiña ez dirudi geroztik estimazio aundirik etorri zaionik.

Martxoak 27 - Osteguna

Goizetik euria izan degu eta naiko aize. Baiña bildurtzekorik ez, atzo besterik esan baziguten ere. Oria ibaia bistan degula bizi gera, eta eranegundik metro ta erdi bajatu zaizkigu urak.

“Belaunetatik bera sua eta ura”,
probatua izango zan esan zuen ura.
Neurriz errenditurik, bear dan modura,
morroi onak etorri ziraden mundura.

Coruñan etxeak su artuta, irurogeita sei urteko aita eta ogeita emeretzi eta ogeita amasei urteko semeak kixkalita gelditu dira.

Zaldibarren, enborrez kargatutako kamioi bat irauli ta zazpi orduz itxita egon da Donostiarako bidea. Kamionaren txoferra gaixoetxera eraman dute.

Argentinako nekazari eta lurgintzan lan egiten dutenak amabosgarren eguna badute lanuztean, huelgan. Janariekin dijoazten kamioiak geldiarazten dituzte eta denda eta saltokiak utsik gelditzen ari dira jendearen larritasunerako. Gobernuaren kontra altxatutako asarrea da, zergak aunditu eta irabaziak gutxitu diralako. Ala ere, presidente dagoen emakumeak esan du ez duela amorerik emango. Argentina gaixoa!

Martxoak 28 - Ostirala

Goizetik udaberri-giroa gaur, eguzkia irten naian, eta epel samar. Eguraldiak onera dijoala ematen du. Berri-emailleak

diotenez putzuak ondo bete diralako, urtebeteko urak ziurta-
tu zaizkigu.

Itza ematea errezago izango da betetzea baiño. Adibidez,
Tren Azkarra martxan jartzeko lanak asko ari dira atzeratzen
Bizkaian eta Gipuzkoan. Martxoan asi bear zuten lanak
oraindik asteko itxurarik gabe daude. Badakigu zer eztabai-
da dabiltzan ekintza orri buruz, eta ori ez da ona gauzak
ondo egiteko. Leitzarango autobia zala-ta tartean arrapatu
gindunak badakigu gauza oien berri.

Indarra artutzean baietz ta ezetzak,
ekintzak ez dirade izaten errezak.
Eguzki zuri orde z sarri laiño beltzak,
lanan faltaz ez dira izango juezak.

Ainbeste eztabaida sortu duen “Jesus” izeneko Jose An-
tonio Pagolaren liburua erosi det, eta dana irakurtzera iristen
banaiz, zerbait iritzi eman nezake nik ere.

Martxoak 29 - Larunbata

Goizetik udaberri-giroa eta eguzkiaren etorrera ederra.

Castro Urdialesen ogeita emezortzi urteko santurtziarra
kamioko istripuz il da, bi kotxek elkar jota. Bizkaian eta Gi-
puzkoan ere badira sei zauritu, kamioa dala-ta.

Kamioan jarri da ezin kabitua,
noiznai bada ildakoa edo zauritua,
kotxea txatartuta sarri gelditua.
Istripurik ez dunak dauka meritua.

Zubieta, Donostiari eta Usurbili tokatzen zaion auzo polit
bat da; baiña oraingo onetan asarre dira bertako biztanleak.
Zabor-lekua, espetxea, militarren koartela eta abar antxe
bertan jarri nai bait dituzte donostiarrak. Asarre orrek era-
ginda burujabetza eskatzen ere asiak dira.

Martxoak 30 - Igandea

Goizetik oso epel eta euria asten du.

Iritsi da gaurko eguna ere. Eta pilotazaleak Gasteizera begira izango gera. Gaur arratsaldean jokatuko baita bi-bitako eskuzko pilota-txapelketaren azken partidua, Titin III eta Laskurain, Olaizola II eta Mendizabal II-ren kontra dirala.

Ez det pentsatzen partidu ori
ikusi gabe uzterik,
naiz ez izan bertara joanda
gertutikan ikusterik.
Baldin telebista ondo bada
ez dago buruausterik.
Partidu on bat izan dedilla,
ez genuke nai besterik.

Erabaki da Gasteizko auzia ere. Olaizolak eta Mendizabalek osatutako bikotea txapeldun irten baita 22-17 Titin eta Laskurain menderatuta. Ez estuasunik pasatu gabe, ordea, 15-7 jarri baitira irabazten errioxarra eta soraluzearra. Bearezkoena, partidu ona nai genuen danok eta alaxe gertatu da. Zorionak lauoi.

Salamankan gizon batek taberna bateko etxeoandrea il du, tiroz.

Azpeitiko errepetidore batean leerketa txiki bat egin du ETAk. Kalte aundirik ez da izan, eta bildurra sortzeko egin duen errezelo eta susmoak dira.

Gure konpondu eziñak indar dutelako,
sarri berri tristeak datoz aukerako.
Bildurrez bizitzea txarra degulako,
lanik ez da faltako bizkarzaiñentzako.

Martxoak 31 - Astelena

Goizetik euria eta negu-giroa.

Carlos Chivite Nafarroako politikoa sozialista sonatua il da 51 urterekin, illabete gaixo pasa ondoren. Joan zan martxoaren 9ko Auteskundeetan Madrileko Senaturako aukeratua izan zan (G.B).


Emakume bat illotza aurkitu dute Zumaiako ondartzan. Baiña oraindik ez daukate arrastorik ez zein dan, ez nungoa dan.

Avilan irurogeita amazazpi lapur lotu dituzte kobre-lapurretan saiatzen ziranak.

Iruran, emakume bat seiña urteko seme bixkiekin legezko leku batean kalea gurutzatzeko zai dagoela, kotxe bat ondo gelditu eta irukotea orduan pasatzen asi da, baiña geldi zegoen autoa beste batek atzetik jo abiada bizian eta ama eta seme bat azpian arrapatu ditu, atzekoaren bultzadarekin aurrekoa mugituta. Segituan gaixoetxera eraman dituzte, eta ezur-autsirik ez dutela beintzat, kolpe aundiak badituzte ere. Gaitzerdi. Ama ori gure erraiña da, eta semeak gure billobak, jakiña.

Trantze ederra pasiak dira
billobak eta erraiña,
txofertzan ere asko baitabil
bear ainbat ez dakiña.
Okerra errez gerta liteke,
ori da gauza jakiña.
Gero damutzen gerade baiña
gaitza izaten da egiña.

Apiril euritsuak ganbara betetzen du



Apirillak 1 - Asteartea

Goizetik euria gogotik eta atertzeko itxurarik ez. Badakigu apirillak zer izen daukan, eta asieran beintzat izenaren jabe da. Joan zan martxoa ezagutu dan euritsuenetakoa izan degu, eta kontuz il onekin ere. Baiña au da polita: gu urez gañezka gabiltzan bitartean, Cataluñan legorte beldurgarria dabilkite. Beste leku prankotan ere bai, noski.

Giro-kontua aldatutzeko
gizonak ez du indarrik;
etortzen dana artu bearra
ez dago beste bearrik.
Batzuk gañezka, besteak utsik,
ez da faltatzen negarrik.
Zorigaitzean ez da gertatzen
ori urakin bakarrik.

Andoañen kamioi bat irauli eta zaurituak eta gaixoetxera eramanak emakume bat eta aur jaio berri bat. Traba aundiak Donostiara bidean.

Zaragozako polizi-koartelean kotxea lapurtu zuelako aurkitzen zan ogeita iru urteko gazte bat il da. Diotenez, alabearrez izan da.

ETAk bere gain artu ditu Arrasateko Isaias Carrascoren ilketa eta beste lau leerketa. Baita ere adierazi die PSOEko kideei, besoak gurutzatuta ez dala egongo jokatzan ari diran bezela jokatzan ikusita.

Sinisteak lanak ditu, baiña berri-emailleak diotenez, ETArí Suitzako bankuetan zeuzkan iru milloi euro lotu eta blokeatu dizkiote.

Gaur aurkeztu dituzte eskuzko banakako pilota-txapelketan partaide izango diran pilotariak; ogei dira guztira. Datorren ostiralean izango da asiera Zeanurin Eulate eta Zubietak jokatuako duten partidurekin.

Apirillak 2 - Asteazkena

Goizetik euri-langarra eta giro ezko eta goibela.

Abiadura aundiko trenan martxan jartzeko lanak asi dira Gipuzkoako Goierriin, Ordiziatik Itsasondora. Diotenez, 2014garren urtean bukatuko da lan osoa.

Donostian kamio nagusian kotxea iraulita pertsona bat zauritu da.

Donostiako supermerkatu aundi batean ogeita iru urteko neska batek zazpi soiñeko jantzi eta ordaindu gabe irtetzeko asmoa zuen, esan dutenez. Lazoan erori da, ordea, zorigaitzekoa.

Iparramerikan zortzi urtetik amarrera bitarteko ume talde batek beren maistra iltzea pentsatuta zeukan. Beste eskola batean zazpi urteko ume bati pistola erori zaio poltsikutik. Irakasleari ia txorabioak eman dio ori ikusi duenean. Eta ez da ori bakarrik. Ume orrek beste pistola bat eskolako armarioan gordeta omen zeukan. Zer ikusi eta entzuteko ote gaude?

Bildurgarrizko kontuak dira
emen entzuten diranak,
edo ziara galdu al gera
mundura sortu giñanak?
Ta “zer ikusi, ura ikasi”,
askotan gaude esanak.
Gezurak ez dira izango, noski,
lengo esaera danak.

Apirillak 3 - Osteguna

Goizetik naiko epel eta udaberri-giro ederra.

Tolosan kamio bazterretako langille bat kotxeak arrapatu du eta larri xamar gaixoetxera eraman dute. Lantoki danak izango dira arriskutsuak baiña kamio bazterretako ori?

Poliziak lotu ondoren Leongo kalabozean berrogeita lau urteko gizon bat il da. Alabearrez, diotenez. Lapurreta izan zuen, berriz, lotzeko arrazoia poliziak.

Leridako mendi batean bi eskiatzaille il dira elur-jausiak azpian arrapatuta.

Arrantzaleen artean ere bada ezin konpondua. Gipuzkoa-koak 250.000 kilo berdel arrapatu, Gijon-go kaira joan deskargatzeko asmoz eta galerazi ziotelarik, ogeita lau barku Gipuzkoara etorri dira. Gijondar oien arrazoia: Gipuzkoako arrantzaleak ez dituztela betetzen berdel-arrantzan jarrita dauden legeak.

Asarre eta lege-austea
nunai dago sakondua,
emen askotan palta zaiguna
degu zeiniek lagundua.
Sarri diogu gogorra dala
arrantzaleen mundua.
Itsason ez ezik lurrean ere
badago zer konpondua.

Apirillak 4 - Ostirala

Goizetik udaberri-giro aproposa.

Salneurri geienak goraka dijoazten ontan illeta-prezioak ere goraka omen dijoaz ba... 1807 euro kostatzen omen da eriotz ondorengo gora-beera ori. Orretan ere ez al degu lujo geiegi artu?

Bilbon berrogeita lau urteko gizon bat lotu du ertzainak bere emakume laguna alabaren aurrean kolpatu eta labanaz amenazatu ondoren.

Buruz buruko eskuzko pilota-txapelketaren asiera Zea-nurin. Emaizta: Eulatek 22 eta Zubietak, 18. Partidu entrenigarria izan da, baiña nola bat ala bestea ez daude mailla orretako partiduak jokatzeko moduko pilotariak.

Buruz-buruko partidu oiek
ez dira bi-bitakoak.
Zaindu bear dira aurre ta atze,
zabalak eta txokoak,
ezker-eskubi indartsu izan,
berdin gerri ta zankoak...
Nai izan arren geiegi ez dira
izaten orrelakoak.

Apirillak 5 - Larunbata

Goizetik naiko otz baiña gerorako onaren itxura artu du.

Mutrikun “Berdelaren eguna”. Gure arrantzaleak oparo arrapatzen duten arraia izan bear du berdelak. Aspaldi ikasi genuen “Joxemielen batela/ txitxarroa ta berdela...”. Baiña estimazio geiegi gabeko arraia da nunbait, eta jendea zaletu dedin urtero jai aundi ori antolatzen dute Mutrikun. Irurageita amar milla errazio banatu omen dituzte gaur ere. Gaur ain goxoa jartzen badute itsas-erri ortan, zergatik ez gure etxeetan? Ala izan dedilla guztion onerako.

Frantziak Espaiñiari entregatu dio Naia Zuriarrain, ETA-ko kidea.

Bagdaden apaiz bat il dute tiroka ezezagun batzuek. Beste ogeita lau pertsona ere il dira leerketa bidez Irakeko ejertzitoaren eta etsaien burruketan. Gu ere keja gera, baiña...

Leenengo maillako eskuzko txapelketako partidua jokatu da Zornotzan: Agirrek 22 eta Urberuagak, 11. Erdira arte partidu ona, baiña gero Agirreren nagusitasun nabarmena.

Gu ere keja gerade baiña
emen ez dago ainbeste;
gure mundu au ez da jarriko
gorroto danetik aske.
Alper-alperrik ez al gabilitza
pake santu baten eske?
Gerraren bidez gorroto danak
aunditutzen dijoazte.

Apirillak 6 - Igandea

Goizetik aize otza eta negu-itxura.

Nafarroan, aireko kirol oietako batean (Ala Deltan) irakaslea il da eta ikaslea zauritu.

Amazazpi txofer zigortuak izan dira Euskadin, geiegi edanda zijoaztelako.

Bilbon berrogeita amabost urteko gizon txirrindularia il da, ibillaldi batean partaide zala. Alabearrez izan omen da.

Bilbon gizon bat lotu dute kalean emakume bati zartakoak ematearren.

Lazkaon, Lazkao Txiki bertsolari zanaren eriotzaren amabosgarren urteurrena aundikiro gogoratu dute, bertso, soiñu eta dantza. Gaztetxoak izan dira izarrik nagusienak.

Atzo gertatu zala uste ta
amabost urte joanak.
Ta bide ori daramakigu
munduan bizi geranak.
Nolatan aaztu ain maiteak
beti izandu giñanak?
Egun aundia datorrenean
bilduko al gera danak.

Apirillak 7 - Asteleena

Goizetik otz baiña etorrera onarekin.

Apirillaren 2an esan ziguten Tren Azkarra martxan jartzeko lanak asi zirala Ordiziatik Itsasondora bitartean. Gaur, berriz, paraje oiek ikusi dituen batek esan digu dana gezurra dala. Seriotasun geitxeago ez ote zaigu komeni denoi ere?

Nafarroako Urrozen Lesakako basomutil bat il da zuaitz-adar batek azpian arrapatuta.

Nunbait saiatu bearra dago
ogia irabazteko,

berri tristeak sarritan datoz
bateko eta besteko.
Ta azken ori zedukanikan
iñork etzuen usteko.
Gertatu bitez bizi geranoi
zerbaite erakusteko.

Leonen gizonezko bat eta emakumezko bat il dira bei eroen gaitzarekin. Orain zortzi urte kutsatu omen ziran gaitz orrekin; sendagilleak gaitz orren erremedioa aurkitu baiño leenago. Diotenez garai artan kutsatuak geiago ere ilko omen dira.

Gaur aragia orrelako kezkarik gabe jan genezakela esan digute agintariak.

Senar-emazte arteko asarre eta labanketak eguneroko ogia bezela jarri zaizkigu. Gaur ere izan dira Ondarroan eta Fuerteventuran.

Vartsovian ama batek bost alabatxo ekarri ditu mundura leenengo aurdunaldian, eta bostak ondo! Guraso gazteak omen dira, ala ere, eta izango dute norbaiten laguntzaren bearra.

Banakako leenenengo maillako eskuzko txapelketako partidua Tolosan: Beginok 22, eta Paskualek, 7. Leenbaitleen aaztutzea komeni dan partidua izan da. Txarra.

Apirillak 8 - Asteartea

Goizetik ego-aizea eta euri-itxura.

Bei eroen gaitza dala-ta, jendea asi da begiak argitzen. Galizian pertsona batek gaitz ori ote daukan errezelatuta sendagilleak asi dira azterketak egiten.

Izan genuen garai bat egaztitik zetorren gripeareen bildurrezkoa ere. Orain Txinan jarri zaigu argi gorria piztuta, erio-tza bat edo beste izan baitira. Zer geiago esan? Garai bateko sanidadeak galdu genituen, eta orain dira komeriak.

Eusko Jaurlaritzak milloi bat euro jarri du familietako asarreak zuzentzeko abogaduak lana egin dezaten.

Abogaduak bearrezkoak ditugu, bai, baiña geran bezelakoak eta gabiltzan bezela gabiltzalako.

Sendiko asarrea tristea benetan.
Ori ugari degu alderdi danetan.
Zerbait aberastasun baldin dagonetan,
lanik ez da faltako abogaduetan.

Apirillak 9 - Asteazkena

Goizetik ego-aizea eta benetako udaberria.

Gipuzkoako azokarik famatuenetako bat asteazkenero Ordizian egiten dana izango da, noski. Eta gauza batetik bestera salneurrietan gaur izan diran gora-beerak merezi dute aipamen bat. Gaur zortzi arkumea 2,70 euroan saldu zan kiloko, eta gaur prezio ori ezin iritsirik ibilli da. Baba berria ere asi da, eta iru euroan saldu kiloko. San Prudentzioak gertu dirala-ta karakolak amabi euroan saldu dira, berriz, kiloko. Baba eta karakolak arkumea baiño obeak ote dira?

Gipuzkoako Aldun Nagusi dan Markel Olano jauna probintziko erriak bixitatzen dabil aspalditxoan, eta gaur izan da gure jaioterri Berrobin. Oiko diru-etorritik aparte danak eskean jardungo zaizkiola ez dago zalantzarik, eta danentzako ezin iritsia izango dala ere bistakoa da. Arrazoi jator bat eman du, ordea, Berrobin, besteak beste: “Zuen asmo guztiak osatzeko oraingoz ez dago dirurik, baiña denborarekin zerbait egin liteke”. Bestetik bere mende dauzkan errien premiak gertutik ezagutzea jokabide jatorra dala esan bear.

Olano dabil erririk-erri
premi danak neurtutzen,
ta jokabide jatorra dala
errez gera oartutzen.
Zail izango da eskari danak
nai bezela onartutzen,
baiña itxita dagon agoan
elbirik ez da sartutzen.

Apirillak 10 - Osteguna

Goizetik euria baiña otz aundirik ez.

Guadalajaran militar batek bere andre izandua eta onen oraingo gizon laguna biak il ditu lau urteko bere semetxoaren aurrean. Eta azkenik bere burua ere bai. Beraz, errugabeko umetxo onek iru eriotz ikusi ditu, bere gurasoena eta amaren lagunarena. Otzikara sortzen duen gertakaria, benetan!

Madrilen jaio berria dan ildako aur baten gorputza aurkitu dute zabor artean.

Basaurin, Zierbenan eta Aranjuezen iru lagun il dira, laneko istripuz.

Eibarren, Idiazabalen eta Ormaiztegin bost pertsona zauritu dira kamioko istripuetan.

Nueva Yorken Frantziako presidentearen emazte Carla Bruniren argazki bat billutsik subastatu da, eta 91.000 dolar pagatu omen dute.

Naiko jantzi izan da billutsik alare!
Diruan bidez egin argazkian jabe.
Beste millaka berriz zer jantzirik gabe...
Pakea izateko gauzak oker daude.

Orrelako konturik bai al zan lenago?
Entzuten diranekin arriturik nago.
Mundu au badijoa gero ta okerrago,
erotu giñan eta gauz onik ez dago.

Apirillak 11 - Ostirala

Goizetik euri-langarra baiña otz aundirik ez.

Donostian lapur bat lotu du ertzaiñak, denda batetik lapurretan egin ondoren. Dendatik irten eta ondoren ertzaiñez eta jendez inguratuta bere burua ikusi duenean kañoiak moztutako eskupetaz tiroka asi da, iñor zauritu

gabe. Ogeita zortzi urteko gaztea da, eta lapur-fama leendik daukana.

Israel eta Palestinaren artean ere ez dago, ba, pakerik. Israelgo ejertzitoak amar palestinar il ditu Gazan, oien artean lau ume. Errurik asko izango zuten, gaixoak!

Ortuellan eskuzko pilota-txapelketako partidua: Leitzak 22, Eulatek, 9. Eulate, ia bi metroko gizona, ez da buruz-bururako pilotaria.

Rodriguez Zapatero jaunak gaur artu du bigarren aldiz Espainiako presidentetza, bere partiduko botoekin bakarrik eta bigarren bueltan. Guztion onerako izan dedilla.

Leen lau urte bazeramazkin,
orain beste lau baditu.
Eskaintza pranko badu egiña
iñork nai bazun aditu.
Kontrarioak ugari zitun,
ixillik ez da gelditu.
Ondo giñake agindu danak
beteko baldin balitu.

Apirillak 12 - Larunbata

Goizetik otz puxka bat, baiña etorrera ona. Kukua ere entzun det gaur leenengo aldiz, eta zorionez patrikan dirua-rekin gaiñera. Esaera zaarra bete dedilla.

Poz-pozez entzuna det kukuan jarduna,
udaberrin gaudela esan nai diguna.
Ixtimatzekoa da olako laguna,
San Pedrok bitartean izango deguna.

Txapelketako bi pilota-partidu Iruñan. Batean, Beginok 22 eta Kokak, 8. Bestean, Olaizola I-k 22 eta Xalak, 13. Bi irabaztunak oso ondo, eta atsegindu giñan alde ortatik.

Euskalerriko Txirrindulari Itzulia Orion bukatu da, eta Alberto Contador irabaztun.

Danok itxaro genuen arrijasotzaille apustua zerratu dute Tolosako *Cantabrico* tabernan, alde batetik Joxe Ramon Iru-retagoiena Izeta II-k eta bestetik Aimar Irigoien errezildarrak. Amaika arroako arri kubikoa dantzatuko dute, iruna amar minutuko denbora izango dutelarik lanerako. Urrengo irailla-ren 28an jokatu da apustua Tolosako zezen-plazan, eta ogei milla euro jokatu ditu alderdi bakoitzak. Ez dute ikus-le faltarik izango, seguru asko.

Apirillak 13 - Igandea

Goizetik oskarbi eta udaberri-giroa. Arratsaldetik euria eta ekaitza, eta mendi altuetan elurra.

Eibarren txapelketako partidua: Peñagarikanok 22, Agi-rrek, 12. Peñagarikano errez nagusitu da, indarrean dago-ta. Ori alderdi ona izan buruz-buru jokatzeko. Bestetik, mutilla ere alakoxea dago beizamarra.

Iruña de Ocan (Araban) gizon bat il da kamioan kotxeak arrapatuta. Diotenez drogatuta zijoan txoferra.

Jaiialdirik asko izan da Zaldibian, Olaberrin, Urretxun, Hernanin, Errenterian eta Elgoibarren, Dantzari eguna, Txis-tulari eguna eta abar izan diralarik. Udaberria, benetan.

Udaberria gurekin,
alaitasuna berekin.
Txori kantuak entzuten dira
esnatzearekin.
Zein ezta pozten oiekin?
Zaletasunak ezberdin;
baiña aukerik asko badegu
nai deguna egin.

Apirillak 14 - Asteleena

Goizetik negu-giroa, gero eguzkia iñoizka. Eguerditik au-rrera euria.

Euskadiko gotzaiak kejavu dira eskoletan ez dala erlijiorik erakusten-eta. Eusko Jaurilaritzara kejavu ere. EAJren ezau-garririk aundiena “Jaungoikoa eta Lege Zaarra” zan garai batean. Gaur ala ote da?

Ogeita bat lagun lotu dituzte Nafarroan txatarra lapurtzea-gatik, kobrearena, noski. Eta bi txatarrerri itxiarazi ere bai.

Andoaiñen exkabadora bat erre dute; Eusko Jaurilaritza-koak diotenez, enpresa ori Tren Azkarra martxan jartzeko lanetan dabil. Makina orren nagusiak, berriz, esan du orain-dik ez duela lanik egin tren orrentzat, eta Andoain aldeko mendi batzuk garbitzen ari dala Aldundiaren aginduz.

Txarkerirako suak badauka indarra,
aztu genuen alkar maitatu bearra.
Gertakizun au ez da izango bakarra;
garesti irtengo da gure Tren Azkarra.

Apirillak 15 - Asteartea

Goizetik oso otz eta izotz arrasta leku askotan.

Gipuzkoako ogeita amabi apaizek gaur ospatzen dituzte Donostiako Seminarioan apaizgintzako urrezko eztaiak, go-tzai jauna buru dutela. Emendik berrogeita amar urtera izango ote da orrelako ospakizunik? Ezetz esango nuke, etor-kizuna ziurtatzerik ez dagoen arren.

Erromako Aita Santu Benedikto XVI-a gaur irten da Ipa-rramerikako Washintonera, eta Bush presidentea izango du egazkin-zelaian zai. Guztion onerako izan dedilla bixitaldi ori. Bestetik, biar beteko ditu 81 urte Aita Santu agurgarri onek. Espiritu Santuak lagun dezaiola.

Zizurkilen bi plaza zeuden eskaiñiak ETAko izan ziran Joxe Arregiri eta Joxe Luis Gerestari. Atzoko udaletxeko bi-lleran erabaki zuten plaza oieri izen oiek kentzea, eta baita busto eta adierazgarriak kentzea ere. Ezkerreko jendea, be-rriz, asarre da erabaki orrekin, eta oso illuntze tristea izan zan Zizurkilgo erri politerako.

Italian berriro bost urteko agintaritza artu du Silvio Berlusconi, Auteskunde bidez, jakiña. Irurogeita amaika urte baditu, eta irugarren txanda badu oraingoarekin. Italiaren onerako izan dedilla.

Tolosako Amarozen paper-fabrika sonatua zan, eta eunda amar langillek jaten zuten eguneroko ogia berari esker; baiña istera dijoan berria zabaldu da orain. Legorretako Papelerara aldatzen omen da Amarozenkoa. Gaitzerdi. Baiña banaiz naiko bildur. Izan ere, badegu naiko eskarmentu sinesgaitz izateko. Au da polita: Papelera zan tokian bosteun etxebizitza egingo omen dituztela. Langabezia indartzearekin ez gaitezen arritu, jaunak...

Fabrikak itxi eta lantokiak galdu,
leku oietan berriz etxeak ugaltu.
Martxa onek luzaro jarraituko al du?
Langilleak lanetik luzitu bear du.

Apirillak 16 - Asteazkena

Goizetik naiko otz gaur ere, baiña tira, eguraldi polita.

Atzo gaueko amarretan (Españiako ordua) iritsi zan Aita Santua Iparramerikara, eta Bush presidentea eta bere sendia buru zirala egin zioten ongi-etorri. Apaizak Amerikan egin dituzten pekatuekin lotsatuta aurkitzen dala esan du Benedikto XVI-k. Garrantzitsuago omen da apaizak onak izatea asko izatea baiño. Bai, noski.

Aragirako griñak artu du laiñeza,
gure gorputza berriz ain da ezereza!
Naiz izan kristau soilla, naiz izan apeza,
zintzoa izatea ez dago erreza.

Amaika zauritu eta batzuk oso larri Sunbillan autobus batek eta kamioi batek talka egin dutelako.

Olazagutian irurogei urteko frantses bat il da kamioko istripuz.

Madriren emakume bat larri, bere gizon edo kideak laban-
katuta.

Bidasoa ibaian arrantzale ondarrabiar batek aurtengo
leenengo izokia arrapatu du. Ia lau kilo t'erdi izanik, Iruñako
Hartza jatetxera saldu da, 1664 euroan. Ura jaten duenak
ere ez du otordu merkea izango, alazankoa!

Apirillak 17 - Osteguna

Goizetik naiko epel baiña euria gogotik.

Bilboko auzo batean ETAk leerketa bat egin du PSEkoak
daukaten etxearen aurrean, eta zazpi ertzaiña zauritu ditu.
Gaiñontzean, inguruko kotxe eta etxeetan kalte aundiak.

Donostian, etxebizitza batek su artuta larogeita bederatzi
urteko gizon bat il da. Bere emaztea eta alaba zaurituta erre-
durarekin.

Urnietako Maria Jose Sardon neska indartsuak Andoni
Aizpuruk zuzentzen duen *Orrela da bizitza* telebistako saioan
126 kiloko arri zilindro zaarra jaso du bizkarrera iru aldiz,
bost minutuko denboran. Epailleak bi jasoaldi eman dizkiote
ordea ontzat. Leenengo jasoaldia ere zalantzazkoa izan da,
baiña epailleak esaten duenak balio du.

Esan liteke neska gazte onek munduko marka jarri duela,
ez baita ezagutzen orrelako lana egin duen beste neskarik.
Gazteleraz esan oi da emakumea “sexo debil” omen dala.
Ezin esango degu olakorik urnietar au ikusita. Zorionak.

Gizonen lekua artzen emakumezkoa;
balio baldin badu gauza legezkoa.
Garai batean genun dana etxezkoa,
orri eman diote orain ezezkoa.
Askok ezin aurkitu berriz ordezkoa.

Apirillak 18 - Ostirala

Goizetik aize epela eta laiño illunak.

Errenterian, Oiartzunen eta Arrasaten amar gazte lotuak 2005garren urtean kale-borrokatan partaide izan ziralako.

Berriozarren basora lanera joan zan irurogeita iru urteko gizona il da, zulo batera erorita. Bezperan illa izan zitekeen.

Andoaiñen bi zauritu izan dira kotxe bat iraulita. Istripu orren bidez traba aundiak kamioan ibiltzeko.

Donostian leenengo maillako txapelketako partidua: Iru-jok 22, eta Peñagarikanok, 12. Tantotan dagon aldea badago bi pilotari auen artean. Kontuz Irujo onekin!

Urteroko oiturari jarraituz Getariako txakolindegri batean izan gera lagun talde bat, mama eder ortatik edateko, jatekoa lagun genuela, jakiña. Ondo pasa degula esan bear. Badago aukera ederrik.

Joan-etorrirako taxixa genduan,
gero ez gertatzeko joandako damuan.
Geiago ere baziran gu giñan moduan.
Lasaitasuna gauza ona da munduan.

Apirillak 19 - Larunbata

Goizetik oso epel eta euri-itxura. Arratsaldean, euria.

Txapelketako pilota-partidua Iruñan: Patxi Ruizek 22, eta Beginok, 11. Bi pilotariak ezaguturik, partidu on bat itxaro genuen danok baiña ez da ala gertatu ordea. Aurreko bi partidutan ikusi genuen Begino ez degu ikusi gaur. Egia da partidua batek galdu bearra daukala, baiña ainbeste uts egitea ez da errez bar-katzeko pekatua, ultzamarraren aala nolakoa dan ezaguturik.

Malagan kotxe baten aurreratze txarragatik autobusa irauli da, eta bederatzi ildako eta ogeita bi zauritu. Batzuk oso larri gañera.

Sabiñanigon pertsona bat il da autobusak eta bi kotxek talka egin ondoren.

Errenterian naiko ixkanbilla izan da ertzaiña eta aien kontra asitako gazteen artean. Asarre oien bidez bi gizon lotu dituzte.

Negarrik eta asarre gabe
egunik ezin igaro;
itxaropena ona da baiña
iraungo al du luzaro?
Guk nai genuken pake santua
nun dabil edo nun dago?
Edozein gauza etorri leike
pakea baiña lenago.

Apirillak 20 - Igandea

Goizetik benetako udaberria.

Elgoibarren ETak leerketa bat burutu du PSEko egoitzaren aurrean. Kalte eta txikiketa aundiak izan badira ere, zauriturik ez beintzat. Azken bolada ontan ETaren “blanco” PSE da. Noiz arte? Atzo moldatu nuen bertsoan ez ote nuen zerbait esaten?

Errenteriako kale batean etxeak su artuta bizilagun mor-
doa kalera atera bearrean izan da.

Sevillan okerragoa izan da: etxe batek su artu eta sendi bateko sei lagun il dira. Sua eta ura belaunetik beera, dio esaera zaararak.

Eibarren leenengo maillako txapelketako partidua: Bengoetxea VI-k 22, eta Leitzak, 18. Partidu gogorra eta ikusgarria! Alkarrentzako egindakoak dirala ematen dute.

Somalian “Playa de Bakio” deritzon atunetako arrantza-ontzi euskalduna baitu dute. Bertan badira bost arrantzale euskaldun, beste ogeita bat kanpotarrekin. Baitzaille oiek dirua nai omen dute, eta or buruaustek. Ez da eroso jarri arrantzale gizarajoen bizimodua ere.

“Playa de Bakio”ko arrantzaleak
aurkitu dira baituta;
atunetara joanda zebiltzan,
ez daude ola oituta.

Ondo daudela esaten dute
etxekeeri deituta.
Suerte on bat opa diegu
arazoak garaituta.

Apirillak 21 - Asteleena

Goizetik epel xamar eta euria.

Bilbon goxoak saltzen dituzten denda batean bi gizon lotu ditu poliziak, karamelo-zorrotan droga saltzen zutelako.

Leenengo maillako txapelketa-partidua Tolosan: Olaizola I-k 22 eta Belokik, 6. Beloki oso gaizki, eta irten bear etzuenaren irten da plazara. Sarrera ordaintzen dutenak ez dute ori merezi.

Londresen munduko berrogeita hamar jatetxe onenak zein diran erabaki dute. Leenengo, Gironako Adriá; bigarren eta irugarren Ingalaterrakoa eta Frantziakoa dira. Laugarren, Errenteriako Mugaritz; zortzigarren, Donostiako Arzak; eta ogeita bederatzigarren, Lasarteko Berasategi sailkatu da, eta orrela.

Gu euskaldunak zale izanik
janera ta edanera,
ta ori ondo egiteko ere
emen badegu aukera.
Gure izenak noiznai artzen du
munduaren zabalera.
Erri txikia gera gu baiña
nunai azaldutzen gera.

Apirillak 22 - Asteartea

Goizetik otz pixka bat baiña etorrera ona.

Leengo igandea ezkerreko Somalian baituta dauden arrantzale euskaldunak gaur itz egin dute telefonoz beren etxekeekin, ondo daudela esanez. Onako au ere esan dute, orde: Baitzaille oiek ondo preparatutako jendeak dirala eta dirua dala beren naia. Ango eta emengo gobernuak sartu dira bitartekotzan, eta ondo bukatu dedilla korapillo latz ori.

Donostian langille bat oso larri da, laneko istripuz.

Urnietan kamioi batek eta iru kotxek alkar jo dute, eta badira bi zauritu.

Frantziak Espainiari bi ETako kide entregatu dizkio: Joseba Iturbe “Makarra” eta Mikel San Sebastian “Pottoko”.

Trebiñon ogeita amalau urteko bizkartzain baten gorputza aurkitu dute Zadorra errekan. Lana egiten zuen enpresa-koak atzo eman zuten parte, bere arrastorik etzala-ta.

Zadorra errekan aurkitu dute
bizkartzaiñaren gorputza;
zer dala eta jakingo balitz
izango litzake utsa.
Berak ez baitu itzik egingo,
nori utzi asmakuntza?
Bere animak izan dezala
Jaungoikoaren laguntza.

Apirillak 23 - Asteazkena

Goizetik euri lardats eta narratsa otzik gabe.

Iritsi dira Somaliako berri geiago ere. Euskaldun arrantzaleak eta beren lagunak baituta dauzkaten baitzailleak milloi bat euro eskatzen dutela esan dute. Ez da txantxetako eskaria! Espainiako gobernuaren barku bat eta egazkiña iritsi dira bertara, arazoa konpontzeko asmoz. Bitartean beren sendikoak ez dira lasai egongo.

Itsaso ortan ugaldtu omen da
lapurra edo pirata,
lanikan gabe ondo bizitzen
oitu izango dira-ta.
Lurrean ere bada ortatik
ainbeste tira-bira ta,
pake-leku bat aurkitzen zail da
mundu guztia jirata.

Atzo Donostian laneko istripuz zaurituta larri zegoen gizona gaur il da, berrogeita emezortzi urterekin.

Getxon gizon bat lotu dute bere emaztea labankatu delako.

Apirillak 24 - Osteguna

Goizetik udaberri-giro aproposa eta oskarbi.

Leaburun irurogeita bi urteko baserritar bat il da, trakto-rea amilduta.

Zarautzen bizi zan ogeita bederatzi urteko eibartar bat il da Atxarte (Bizkaia) mendian, arkaitz-pareta eskalatzen ari zala. Eun metroko alturatik erori da.

Berastegin, Andoaíñerako autobidean, kamio bat erre da su artuta; zauriturik ez, eta gaitzerdi.

Somalian leengo igandez baitu zituzten arrantzaleak ditugu eguneroko notizi, besteak beste. Arrantza-kontuan munduko itsasorik aberatsena omen da Somaliakoa. Ikusten denez, mundu guztitik joandako arrantzaleak dabilta an, eta ez danak legez gaiñera. Somalia, berriz, gerra batean dagoen nazioa izanik, agintari nagusirik gabe. Eta ez da arritzekoa, ez, pirata oien jokaera.

Arrantza-kontun oso aberats
omen degu Somalia;
ondo giñake ango jendeak
ain gaiztoak ez balia.
Lanerako oso gogo gutxi ta
gaiñera diru zalia,
beti bildurrez ibilli bear
emengo arrantzalia.

Apirillak 25 - Ostirala

Goizetik egitazko udaberria. Arratsaldean oso bero.

Bi txirrindulari gazte il dira, bata Oñatin eta bestea Arantzazun (Bizkaian).

Egazkin txiki bat erori da Ciudad Realen, eta bertan zi-
joazten bi lagunak il dira. Berreun kilo droga hachis ere ba-
zeramazkien egazkin orrek.

Irunen txofer bat lotu dute, Getafen kamioia ostuta zi-
joana.

Gaurko berriak diotenez, Banco Guipuzcoanok aurtengo
leenengo iru illabetean 14,8 milloi euro irabazi omen ditu.
Beste diru-etxeak ere antzeko kontuak zabaltzen dituzte. Gi-
zarteko berdintasuna ez dago urrean.

Bizi izateko derrior bear
ditugu irabaziak,
bide onetik egin ezker
ez daude galeraziak.
Batzuk gaiñezka, besteak utsik,
or daude diferentziak.
Jateko ainbat eman deigula
Jaungoikoaren graziak.

Apirillak 26 - Larunbata

Goizetik oso giro ona egin du gaur. Egizko udaberria.

Somalian leengo igandea ezker baituta dauden euskal-
dun ontziko arrantzaleak libre utzi dituzte, diru-sorta ederra
norbaitek ordainduta. Baiña bizia da leenengo eta badute
pozik egoteko arrazoirik.

Baituta zeuden arrantzaleak
gaurkoz askatu dituzte;
Afrikatik datozen berriak
guztioz poztu gaituzte.
Ziartuenik bere etxetan
izango dirade laiste.
Askatasuna gauz ederra da,
orain gozatu zaitezte.

Amezketako Aralar papelerak su artu du kalte aundiegiak egin baino leen itzali badute ere.

Ogeita amar urte betetzen zirala HB sortu zala eta Duran-gon ospaketa aundiak ziran izatekoak. Goikoen aginduz ertzaiñak galeraztera irten dira ordea, eta or sortu dira ixkan-billak. Zauritutako ertzain bat eta amairu lagun lotuak izan bear dute.

Apirillak 27 - Igandea

Goizetik atzoko eguraldiaren jarraipena: udaberria. Arratsaldean eguraldi tristea eta euri lardatsa.

Azpeitian amabost urteko mutiko bat aitaren BMW ko-txea artu eta amabost urteko beste bost lagun barruan zitue-la mendian beera amildu da ogei metro inguruan. Seirak zaurituta, eta iru oso larri gaiñera.

Gaur jakin degunez, Espaiña maillan aste-bukaeran amazapi pertsona il dira kamioko istripuz, oietatik zazpi motoan.

Adunan erri-kirol jaialdi ederra izan da Muskil Elkartek antolatuta. Aimar Irigoieneke, bost minutuko txandan, bedera-tzi jasoaldi eman dizkio 208 kiloko zilindro zaarrari (Gorostidi-arria); Joseba Ostolazak, bost jasoaldi denbora berean, ba-liozkoak; Joxemari Mendizabal, Mendizabal II-k irurogeita bat urterekin kanako enborra ebaki du, zutik, 25,40an erdibituz. Badago kirol-indarra Euskalerrian oraintxe ere. Bai orixe!

Kirol-indarran leku izan da Aduna,
poztekoa izanik ikusi deguna.
Plazan nabarmentzen da indar asko duna.
Mendizabal oraindik ez daukagu juna.

Apirillak 28 - Asteleena

Goizetik otz gutxi baiña euri-itxura. San Prudentzio egu-na da gaur, eta Gasteizen eta Lazkaon urteko jai nagusiak. Gasteizen euriz ondo bustiak gaiñera.

Andoaiñen, drogatuta zijoan txofer batek kamioia eta koxearen arteko istripua sortu du. Zauritu larririk ez omen da, baiña Donostiara bidean traba aundiak izan dira.

Galdakaon erriko Batzokiari eraso diote ezezagun batzuek.

Txinan bi trenek talka eginda irurogeita amar ildako eta lareundik gora zauritutako izan omen dira. Ukranian, elikoptero batek bazterra jo eta ogei ildako.

Gerra bearrik ez dago emen
jendea bakandutzeko;
eguneroko berri tristeak
datoz alkarren antzeko.
Aal aundiak ditu gizonak
aurrerapenak sortzeko,
eta askotan izaten dira
negar-malkotan jartzeko.

Apirillak 29 - Asteartea

Goizetik eguraldi onaren itxura baiña otz aizea.

Pasaian gazteak biltzen ziran gela batek su artu du eta iru lagun naiko larri izango dira kearen eragiñez.

Pasaian baita bi motok talka egin eta bi motoristak zauritu dira.

Madriilen egazkin txiki bat erori da eta bi lagun il.

Berri-emailleak diotenez, Migel Goñi baztandar pilotaria sei illabetez pilotalekutik apartatuta egon ondoren nagusien aginduz, datorren larunbatez agertuko da berriro Legazpin, Santikutz jaiak dirala-ta. Suerte ona opa diogu.

Migel Goñi zan pilotarako
nabarmendua gazterik,
baiña iñoren gogoko etziran
egin zitun itsuskerik;
ori zala ta sei illabetez
ez degu izan ikusterik,

berriro ere probatu gabe
nunbait etzegon uzterik.
Suerte on bat izan dezala,
ez genuke nai besterik.

Apirillak 30 - Asteazkena

Goizetik naiko otz eta euri-itxura gaur ere.

Somalian baituta zeuden “Playa de Bakio” ontziko euskaldun eta gaillego arrantzaleak, Afrikakoak ere bai tartean, gaur iritsi dira beren etxeetara. Andik itz egiten zutenean telefonoz ondo zeudela esaten zuten, baiña orain askatasunez itz egiteko moduan diranean, beste kontu batzuk esaten dituzte: libratu zituzten egunean ilko zituztela ere pentsatu omen zuten.

Emengo gazte-jendea arrantzako lantegi orri aspalditxotik ezetz esaten asita zegoen. Eta onelako gertakizunekin leenaz gaiñera ez dira asko zaletuko. Gero esango degu arraia garesti dagoela!

Gaur ere badira Nafarroan, Bizkaian eta Gipuzkoan kamio bazterretako langilleak eta txoferrak naiko larri zaurituak. Eguneroko kontua.

Donostian eta Arrigorriagan bi leerketa egin ditu ETAk. Donostian, Osalanen aurrean, eta Arrigorriagan, Seguru Soziallean. Kalte aundiak, baiña zauriturik ez beintzat.

Garzon epaillearen aginduz, Arrasateko alkate anderea espetxeratu dute. Arrazoirik nagusiena, ANVkoa izatea.

Garzonen erabakiz gu gaude oituta:
aurrena beregana poliziz deituta,
etorkizunarekin asko larrituta,
alkateak kartzelan sartutzen ditu-ta.

Maiatzeko lorea utsa baiño ohea



Maiatzak 1 - Osteguna

Goizetik lainñotsu eta otz, baiña gero oso eguraldi ederra.

Urteroko oiturari jarraituz, artzai eta ganaduzaleak gaur bota dituzte beren ganaduak Aralarrera, Larraiztik gora. 19.500 buru, gutxi gora-beera. Festa polita egin dute, eta suerte ona izan dezatela opa diegu.

Berrogeita amabi urteko gizon bat il da Bergarako mendietan dabilela.

Tolosako mendigoizale Edurne Pasaban emakumeak, amargarren zortzi milla metrokoa egin du, Dhaulagiri igoz. Irugarren emakumea da mundu guztian marka ori burutzen duena. Ez da edozein!

Urte mordo bat bada asi giñala, eta jarraitzen diogu zorionez, lagun talde bat autobus txiki bat artu eta Errioxara ardotara. Aurten Kordebillen eta Baños de Ebron izan gera. Danok dakigun bezela, ango bizimodua ardogintza da, eta pozik bizi dirala ematen du. Artu degu, edo genuen, asealdi bat geuk ere, eta ortatik aurrerakoa ez dago esan bearrik, noski.

Patatak txorizoz gozatuta,
gero arkume txuletak;
ta postrerako izozki ederra
baretutzeko betekak.
Salda beltz orrek alaitu zitun
goibel genduzkan kopetak;
ondorenean bidezko ziran
balantzak eta aldekak.

Maiatzak 2 - Ostirala

Goizetik benetako udaberria.

Legazpiko senar-emazteak il dira Altsasun, zijoazten koteak geldituz zegoen kamioi baten kontra talka eginda. Irurigeita amabiña urtekoak biak.

Sevillan emezortzi urtetik ogeita batera bitarteko lau gazte il dira kotxe-istripuz. Beste bi zaurituta ere bai istripu berean, eta naiko larri gaiñera.

Bost diru-etxe edo banku eraso dituzte Abadiñon, paretetan eta abar naiko kalte eginda. Ezezagun oiek kaletako zakarrontziak ere irauli dituzte. Kale-borroka eman zaio izena joera orri, eta eguneroko ogia bezela jarri zaigu.

Zuaitz guztiak esnatu ziran
negua lotan egonik,
fruta-arbolak berriz loretan,
ez da falta usai onik.
Egunsentian txoriak kantuz
badaukate zorionik;
ta gizarteak ez du ematen
giro orretan dagonik.

Maiatzak 3 - Larunbata

Goizetik asi eta egun guztian udako egun zoragarria, ondartzarako giroarekin. Santakruz eguna gaur, ain zuzen. Legazpin, Orexan eta abar zaindari festak.

Aurten ere etorri zaigula Santakruz,
maiatzaren iruan ez du egingo uts.
Itxaropenez egin eskariak goruntz,
izan dezagun pozik bizitzeko laguntz.

Iruñian leenengo maillako txapelketako partidua: Olaizola I-k 22, eta Eugik, 9. Partiduko emaitzan dagon aldea badago pilotaritik pilotarira, eta kontuz Asier Olaizolarekin.

Leengo asteartez esan nuen bezela, Mikel Goñi pilotaria plazaratu da Legazpin, sei illabetez nagusien aginduz jokatu gabe egon ondoren. Ta berriro galtzea egokitu zaio: Del Rey eta Urberuagak 22, eta Goñi eta Apeztegiak, 16. Irabaztunik izango bada, galtzaillea ere bear du, noski. Baiña baztandarra ez omen zan geiegi gustatu. Agian...

Ogeita sei urteko zarauztar mutil gazte bat il da Orion, motoarekin kotxearen kontra talka eginda.

Bi milla pertsona edo geiago manifestatu dira Arrasaten beren alkate anderea espetxetik askatzeko eskatuz. Ondorenean kale-borrokak izan dira.

Leopoldo Calvo Sotelo, Espainiako presidente izandakoa il da Madrilen larogeita bi urterekin. Bat-bateko eriotza izan omen du.

Maiatzak 4 - Igandea

Uda-giro aproposa goizetik. Illuntzerako euri-langarra.

Pilota-partidutan arrigarritzko ustekabeak gertatu izan dira; eta aundienetako bat Eibarren gertatu dana, Olaizola II (txapelduna) eta Bengoetxea VI-ren artean. Txapelketa nagusiko kanporaketa zan, eta zeruak lurra jotzea ainbat ez genuen pentsatzen Bengoetxeak partidua irabazi bear zuenik, eta alaxe gertatu: Bengoetxea VI-k 22 tanto egin zituen txapelduna 12an uzten zuelarik. Leenengo sakea Olaizolari egokitu zitzaion, eta jarraian zazpi eta uts jarri zan irabazten. Partidua asterako ere dirua arrika zegoelarik goizuetarraren alde, korredoreak laster mututu ziran. Zazpi tantotaraiño joan zan zuzenean. Ura zan ustekabea! Aurrez nion bezela, ogeita bi eta amabi partidua irabazi Bengoetxea VI-k txapeldunari.

Aurreruntz ez dakigu zer gertatuko dan, baiña leitzar onek ogeita iru urterekin istorirako geldituko dan garaipena izan du. Zorionak.

Donostian motorista bat il da, eta berekin zeramakien emakumea oso larri dago.

Donostian, baita ere, emakume bat gaixoetxera eraman dute gizonak egurtuta.

Espainiako kamiotan aste bukaeran ogeita amazapi il-dako izan dira. Zortzi, motoarekin.

Orretarako daudenak nunbait
beren kontuak atera:
ogeita amazazpi ildakoz
astearen bukaera!
Ta Espainiko kamiotako
okerra degula bera...
Zer arriskutan bizi geraden
konturatutzen al gera?

Maiatzak 5 - Asteleena

Goizetik otzik gabe eguraldia lainotsu. Gero oso ona.

Gure agintariak buruauste asko izango dituzte, baiña aundienetako bat kamioetako ezbearrak. Berrikuntza aundiak ari dira egiten kamioetan, ala ere...

Matxuratutako kamionak baztertzeko lekuak eta gruak jarriko omen dituzte. Aalegin guztiak izango dira bearrezko, baiña bear ainbatekorik ez, ziartuenik.

Eguneroko eriotz-leku
biurtu da kamioa.
Or bada ezin kabitua ta
bada odol-jarioa!
Utsaren truke jarria dago
pertsonaren balioa.
Agintarien buruaustea:
nun da erremedioa?

Garzon epaillearen aginduz, Portugaleten ANVko taberna itxi dute. Poliziak orretara joan ziranean egundoko ixkanbilla eta asarreak izan ziran. Badirudi epaille orrek oraingoz partidu ori daukala begitan, eta kontuz!

Bilbon lau gazte lotu ditu poliziak, Metroko zaintzailleari erasotzearren.

Maiatzak 6 - Asteartea

Goizetik oso giro ona eta jendeak utzi ditu elastikoak.

Pedro Jose Cabrera soziologoak dionez Espaiña maillan 30.000 pertsona bizi dira etxerik gabe, eta iru milloi etxebizitza daude utsik.

Bilbon gizon bat lotu du ertzainak, bere emaztea egurtu duelako.

Mañerun irurogei urteko frantses bat ilda gelditu da, Santiago bidean zijoala.

Gaurko berriak diotenez, leengo aste-bukaeran izandako "Nargis" ekaitzaldiak Birmanian (Asian) ogeita bi millatik gora ildako utzi ditu. Ekaitzaldi ori, berreun kilometroko aize-abiadurarekin etorri omen zan eta etxe pranko lurreratu izango du. Oso lurralde beartsua da Birmania. Zakur argalari, arkakoso asko.

Berri tristeak nunaitik datoz
berdin uda eta negu;
gizarte onek ainbeste zigor
nolaz merezi ote du?
Gu ainbekorik iñor ez dala
sarri esanez emen gu.
Badadukagu zeñi lagundu
biotzik baldin badegu.

Maiatzak 7 - Asteazkena

Goizetik atzoko eguraldiaren jarraipena gaur ere, uda-giroarekin.

Politika-munduan eltzeak irakiten daudela esan bear. Ibarretxe Leendakaria billera eske ari zitzaion Espaiñaiko presidenteari aspaldian, eta gaur eman dio erantzuna Zapatero jaunak: maiatzaren 20an bilduko dirala, goizeko 10etan, Moncloako jauregian. Guztion onerako izan dedilla.

ANVkoak agintzen dauden udaletxetan ere ez dago asarre eta billera faltarik. Orain bi illabete ETAk Arrasaten il zuen Isaias Carrascoren ilketa kondenatu etzuelako partidu orrek, kendu egin nai dituzte agintaritzatik. Ori boto bidez egin bear da

ordea, eta or komeriak. Adibidez, Legazpin eta Soraluzen kentze-koak irabazi dute; Billabonan ez, ordea. Azken batean zer gertatzen ari da? Danok pake eske eta pakea gero eta urrutiago.

Kamioetako ezbearrak, familietako asarreak, emakume jotzeak eta esateko moduko ez diran kontuak eguneroko jakia bezela jarri zaizkigu, eta gaur ere badira an eta emen.

Bapo aztu genuen Jesusen dotriña,
geroztikan badegu konpondu eziña.
Nunai bada bildurra, negar ta samiña...
Etorkizunean daukat kezkarik aundiña.

Maiatzak 8 - Osteguna

Goizetik lainotsu ego-aize kutsuarekin.

Leengo asteartez eman nuen Birmaniako ezbearraren berri, eta orduko zenbakiak baju gelditzen ari zaizkigu. Dagoe-neko kontatu dituzte eun milla (100.000) ildako, eta etxerik gabe geldituak bai omen dira milloi bat pertsona. Mundu guztitik laguntzak asi dira iristen. Bai bear ere.

Amasei urteko mutiko bat Tangerretik Extremadura-raiño kamioi baten azpian kokatuta etorri da. Mixeriaren igesi, jakiña.

Donostian fiskalak zigorra eskatu du neskato ume batentzat, bere maixtra jo zuelako. Entzuteko guztiak ez genituen entzun!

Toledon lau putrek irureun ardi il dituzte. Artzaiak laguntza eskatu diote gobernuari, eta mendian jarri dezala pizti oientzat jana eta abar. Goseak begiak argi, zera!

Goseak begiak argi,
ikusia dago garbi;
baiña artzaiak ez du merezi
ainbeste pikardi.
Bizimoduko alderdi:
larrean bildots ta ardi.
Gobernuaren laguntza ori
ona izan bedi.

Maiatzak 9 - Ostirala

Goizetik euri tanto batzuk eta aizea naiko otz. Illuntzera-ko euria.

Lege berria jarri zan ezkeren leenengo espetxeratua Gipuzkoan gizon bat, Errenterian ertzaiñak lotu ondoren karnetik gabe txofer zijoalako.

Sabadellen gizon bat lotu dute ordubetea lau bankutatik lapurretan egin ondoren. Ezta edozein izango!

Caceresen, Alikanten, Kantabrian eta Pontevedran ujoldeak kalte aundiak egin dituzte.

Ezezagun batzuek Arrasateko EAJko kide baten kotxea erretzen aalegiña egin dute. Gaizkilleak, kotxearen alarma saltatu zanean, igesari eman zioten. Bestela...

Bilbon kalera irten dira basarritarrak asarre bizian, berak sortzen dutena merezi duen prezioan saldua izan dedilla eskatuz.

Arrazoiakin baserritarrak
irten dirade kalera,
agintariak ikus dezaten
daramakiten galera.
Erosi bear dutena gora
eta saltzekoa bera.
Koska ori berdindu ezean
gaizki ibilliko gera.

Maiatzak 10 - Larunbata

Goizetik euria oparo eta giro goibela. Arratsaldean ateri.

Zumaian mutil gazte bat eta neska gazte bat kotxe barruan zeudela itsasora erori zaie kotxea, eta mutilla ito. Neska, larri xamar baiña bizirik irten da.

Nafarroan, azkenengo gerra zibillea 3.400 napar il zituzten frankotarrak. Eta Sartagudan oien oroimenezko parke eder bat zabaldu dute orain.

Jerezen eta Zaragozan bi emakumezko il dituzte beren gizonak, asarrez eta jokaeraz.

Eskuzko pilota-txapelketako partidua Donostian: Gonzalezek 22 tanto eta Irujok, 20. Partidua ona izan danik ezin esango degu, baiña arrigarritzko tantoak ikusi genituela bai. Diru-jokatzaillerik baldin bazan biotzetik sufritzen zuenik, gaizki ibilli bearko zuen. Partidua asterako doblatuan zegoen dirua Irujoren alde. Leenengo sakea Gonzalezi egokitu zitzaion eta lau tanto egin zituen segidan. Utsetik amabiraiño joan zan jarraian Irujo gero, eta lautik amazapiraiño Gonzalez. Ondoren, emeretziña eta ogeiña jarri ziran, eta azkenik ipartarrak partidua irabazi. Zalantzarik gabe istorirako geldituko dan partidua.

Alde batetik Irujo zan da
kontrarioa Gonzalez,
ta Donostiko frontoi ederra
beterik pelota zalez.
Galtzaillearen alde dirua
zegoan itxura gabez;
jakintsu pranko izanagatik
bear ainbat dakiñik ez.

Maiatzak 11 - Igandea

Goizetik ateri eta epel xamar.

Eibarren eskuzko txapelketako partidua: Barriolak 22 eta Patxi Ruizek, 6. Partidua asterako doblatuan zegoen dirua Barriolaren alde, eta oraingoan ondo zebiltzan diru-jokatzaillae oiek. Itz gutxitan esateko, Ruiz ez genuen ikusi pelotan, bi tanto kendu ezkerro. Partidua bukatuta bere aitormen batzuk ere etzitzaizkidan gustatu. Eskubiko eskua ondo etzeukala etorri zala, alegia. Partidua jokatzera ondo etorri bear du pelotariak, bestela etxean gelditu. Bi pelotariak ondo datozen itxaropenez pagatzen dute sarrera ikusleak. Barriola, askotan bezela, ondo.

Lemoan amazazpi urteko mutiko bat il da moto istripuz.

Urteroko gisan egin da Senperen *Herri Urrats*, berrogeita amar milla euskaltzale bertan bildu diralarik. Ogeita bosgarrena zuten aurtengoa, eta jarrai dezala beste urte on askoan. Gure alde onetan ez ezik, alderdi artan ere badauka euskerak premi ederra.

Gure euskerak gaurko onetan
Senperen zuen ostatu,
eguraldia eta partaide
geiago ezin eskatu.
Berrogeita amar milla lagunek
Herri Urratsa ospatu.
Maitasun ori dagoan arte
ez gaitezela kezkatu.

Maiatzak 12 - Asteleena

Goizetik uda-giro bikaina.

Txinan lurrikara bidez bederatzi milla ildako eta amaika milla zauritu izan dira. Etxe osoak lur jota, eta oien artean bederatziareun ikasle barruan zituen eskola bat. Txinan bertan, Birmanian, orain dala amar bat egun ekaitzaldi batek ogeita amabi milla ildako utzi zituen, eta orain au. Gizakiok gerez arroak bagera ere, badegu zerekin apaldu. Bai orixe!

Elorrion mutil gazte bat il da bere kotxea kamioi baten kontra joan ondoren.

Hernanin ETAk bi leerketa burutu ditu Amenabar enpresaren makinatan. Enpresa au, Tren Azkarraren langintzatan omen dabil eta ori omen da erasoaren arrazoia.

Zumaian, Bilbo aldera dijoan autopistan lur-jausi aundia izan da. Gaitzerdi, inor ez du arrapatu-ta.

Berri tristeak nunaitik datoz
ta onak berriz banaka;
beti zabalik daukagu emen
zorigaitzaren ataka.

Batetik sua, bestetik ura
edo ekaitza dala-ta,
ta lurrikaran ondamendia
neurtzen erreza ez da-ta.
Jaun zerukoa lagun zaiguzu,
ain ezerezak gera-ta.

Maiatzak 13 - Asteartea

Goizetik egitazko uda. Arratsaldea lainotsu eta euri-itxura.

Txinan atzo izandako lurrikararen bidez ildakoen zenbakia gogor dijoa aunditzen. Milloi erdi bat etxe lur jota gelditu diralarik, oien azpian millaka gorputz aurkituko dirala diote.

Alegin eta Hernanin bi lagun il dira trenak arrapatuta.

Durangon mutil gazte bat il da, kotxeko txoferra, kamioi batekin talka eginga.

Benidormen etxekoandre donostiar bat il da amabigarren bizitzatik bere burua botata. Gizonak jo egiten zuen kontuak zabaldu dira.

“Negarrezko ballea” jartzen zun
ikasi genun Salbeak.
Dotrin artako erakutsiak
akats aundirik gabeak.
Indartu dira aurrerapenak,
indartu dira legeak,
baiña usterik gutxienean
datozkigu naigabeak.

Maiatzak 14 - Asteazkena

Goizetik euria eta gerora eguraldi ona.

Legutianon guardia zibillaren koartel ondoan ETak leerketa aundia burutu du, eta berrogeita bat urteko guardia zibil bat il eta beste lau gogor zaurituak izan bear dute. Zau-

ritutakoak bizitarako moduan dirala diote. Ildakoak, berriz, emaztea eta sei urteko semetxoa utzi ditu.

Euskalerrria erri txikia
entzutetsua munduan,
ezagututzen ez gerala
ez gera irtengo galduan.
Politikaren aldetik gabiltz
beti ezin konponduan;
ta bosgarrenago agindua ere
aspaldi aztu genduan.

Ondarrabian ogeita amar urteko emakume bat larri omen da, moto-istripuz zaurituta. Motoen kontuak dirala-ta datozkigun berriak tristeak dira benetan.

Irungo mutil gazte bat espetxeratu dute bere gurasoak jo zituelako.

Ogeita emeretzi urteko austriar batek, aizkoraz bere alaba, gurasoak eta aitagiarreba il ditu, amabi orduren buruan. Burua galtzea zala azkenengoa esan zuenak etzuen gezurrik esan izango.

Maiatzak 15 - Osteguna

Goizetik eguraldi onaren etorrera.

San Isidro eguna danez, eta baserritarren zaindaria, ospaketa ederrak izango dira erri prankotan.

Edari-saltzaillea zala esanez Donostiako tabernetan lapurretan saiatzen zan; baiña bukatu zaio karrera orri ere, urtebeterako espetxean sartu baitute.

Huelvan iru atzeritar kotxea ostuta zijoazela beste kotxe batekin talka egin eta irurok il dira.

Ordizian Tren Azkarra martxan jartzeko langintzak ordu-betean eduki dituzte geldituta tren orren kontrako ogeita amar bat lagunek.

Zorigaitzean ezin ikusi
nai genuken ainbat pake,
beste nunbaite bai ote dabil
emen ainbeste atake?
Tren orren alde dira batzuek,
besteak kontra jo ta ke.
Azkarra dauka izena baiña
mantsoa gerta liteke.

Maiatzak 16 - Ostirala

Goizetik lainñotsu eta euri-itxura.

Durangon igeltsero bat, berrogeita lau urtekoa, bigarren bizitzako alturatik erorita il egin da.

Lazkaon ezezagun batzuek denda bateko atea puskatu eta lau telebisio ostu dituzte. Lapur oiek lapurtutako automobil batean joan omen dira igesi.

Bilbon ogeita emeretzi urteko seme batek bere ama jo du amak etxetik bidali zuelako.

Berri-emailleak diotenez, joan zan urtean, Gipuzkoan, milla zazpireun eta amar ezkonduetako bikote apartatu omen ziran. Aurten ere beste ainbeste gertatuko omen dira, eta eguneko bost bikoteren banaketa omen dator. Sinistreak ere lanak ditu.

Gure artean bada naiko komeri latz,
gozotasunak nunbait biurturik mikatz.
Ondorengoa ere askorentzat garratz.
Larrosa billa baiña beti mila arantz.

Maiatzak 17 - Larunbata

Goizetik eguraldi tristea euri-tantoeekin.

Imanol Murua, Zarauzko alkate eta Aldundiko diputatu nagusi izan zana il da Zarautzen, irurogeita amabi urterekin.

Tolosan Joxemari Gorrotxategi konpittero sonatua omen-
du dute aundikiro, Udaletxean.

O, Joxemari, tolosar onak
omenaldi au zuzendu!
Orrelakorik etzan izango
gaizki jokatu bazendu.
Era ontako jaialdi batek
bizipoza sortutzen du,
ta maitasuna ematen dunak
maitasuna jasotzen du.

Eskuzko txapelketako partidua Iruñan: Bengoetxea VI-k
22 eta Olaizola I-k, 16. Beraz, txapelketaren azkena (finala)
jokatuko duen bat Bengoetxea VI izango da. Bestea, berriz,
Gonzalez eta Barriolak jokatu duten partiduko irabazlea
izango da.

Ogeita iru urterekin, Bengoetxeak, istorirako geldituko
diran garaipenak izan ditu. Besteak beste, bi anai Olaizolak
menderatu, alajaiña. Eta biotako bat txapelduna gaiñera.
Garai batean txapeldunari irabazten ziona txapeldun izaten
zan. Orain beste baldintza batzuk daude, baiña egindakoa
ortxe dago.

Maiatzak 18 - Igandea

Goizetik eguraldi onaren etorrera, baiña aize otzarekin.
Gauerako euria gogotik.

Getxon ETak leerketa burutu du itsas-ertzeko paseoan.
Aurrez abixua eman zuelarik, ertzaiñak inguruko etxeak eta
abar ustuarazi dituzte eta zauritutakorik ez da izan. Gai-
tzerdi.

Donostiako Kursaalean ETak ildakoen sendikoak omen-
du dituzte, itzaldi eta opari prankorekin.

Bilbon mutil bat lotu dute bere neska laguna jotzeagatik
gerrikoarekin.

Urteroko oiturari jarraituz, Tolosatik irten eta oiñez ama-lau orduko ibillaldia Aralartik barrena. 2.826 ibiltari izan dirala esan dute.

Ongi dakigu ibillaldiak
ugaltzen dijoaztela;
mendia gauza sana da ta
ondo ibil ditezela.
Amalau ordu ez degu txantxa,
ez dago jende motela.
Nunbait lanean ez da nekatzen
garai batean bezela.

Maiatzak 19 - Asteleena

Goizetik naiko otz eta euri-itxura. Arratsaldean, euria.

Imanol Murua, Zarauzko alkate eta Aldundiko diputatu nagusi izanaren illeta egin da Zarautzen, elizaren barrua eta atarialdeak jendez gainezka zirala. Bere kuñado zan on Sebastian Uriak eman du meza, ogei bat apaiz laguntzaille inguruan zituela. Karlos Garaikoetxeagandik asita politiko pranko ere ikusi degu. Nolako gizona, alako oorea. Goza beza betiko atsedenean.

Alkarrekin igaroak giñan
ez dakit zenbat txolarte;
maite giñanak banandu gera
eriotz ori bitarte.
Imanol, zure txanda etorri,
gurea ez da aparte.
Beste gauzarik ezin det esan:
agur eta laster arte.

Maiatzak 20 - Asteartea

Goizetik eguraldi goibela eta lainotsu.

Ibarretxe Leendakaria eta Zapatero presidentearen billera Moncloan. Leendakaria datorren urriaren 25ean erriari egin

nai dion galdeketaz eta abar baimena eskatzera joan da, baiña ezezko borobilla jaso du Espaiñiako presidentearengandik. Ala ere, Leendakariak esan digunez, bere asmoak aurrera eramaten saiatuko da. Gauden zai zer gertatzen dan ikusteko.

Leioako Unibertsidadean aurki erretore berria aukeratze-ko auteskundeak dituztela-ta, asarre gogorrak eta txikiketak izan dira, ikasle abertzaleak eraginda.

Burdeoson lotu dute ustez ETAko buru dan Thierry. Beste iru lagun ere lotuak izan dira.

Baserritarrak asarre traktore eta guzti kalera irten dira Europak esnari buruz artu dituen erabaiak dirala-ta.

Durangon trenak arrapatuta berrogeita amar urteko gizona il da.

Bartzelonan, atzo apartatzea erabaki zuten bikote batek, eta gaur ogeita emeretzi urteko gizon orrek andrea il du, tiroz.

Kantu zaar batek onela dio: Mundu engaiñagarria, nundik zera etorria?

Iñoiz bada-ta gaur badaukagu
mundu engaiñagarria,
ta batez ere emakumeai
etorri zaien arria.
Au da fedea galdutzetikan
etorri zaigun larria...
Sendia puskatutzen danean
puskatzen da oiñarria.

Maiatzak 21 - Asteazkena

Goizetik eguraldi bikaiñaren etorrera.

Andoaingo alkate izandako Joxe Antonio Barandiaran lotu du guardia zibillak, ETAko partaide dalako ustetan.

Labankadaz ildako emakume baten gorputza aurkitu dute Bartzelonan.

Iru lapur lotu dituzte Mendaron taberna batetik lapurretarako asmoak zituztelako.

Anoetan urteko jai nagusiak Korputzetan diralarik, eta gaur bezpera, festaren asiera bikaiña izan dute.

Euskadiko PPko buruzagi dan Maria San Gilek Mariano Rajoy Espaiñiako PPko buru danari esan dio Euskadiko Parlamentuko kargu guztiak utziko dituela.

Politikoen artean ere
bada konpondu eziña;
goiko aulkitan exeri naia
degu askoren dotriña.
Ori ez bada iristen, berriz,
dana utzitzeko griña.
Galtzen dakiñan jokabidea
ez degu gauza berdiña.

Maiatzak 22 - Osteguna

Goizetik lainotsu eta eguraldi tristea. Gerora, oso ona.

Nafarroan aur-galtze edo abortatzeko legea onartu da.

Donostiako epaitegiak Gipuzkoako Aldundia zigortu du 93.043 euro pagatzera, 2005eko maiatzaren 15ean Añorgan kamioko zulo batzuk zirala bide motozale bat il zalako. Ogeita amairu urteko mutila il zan, eta amak jasoko du dirua.

Donostian, Urretxun eta Deban iru zauritu izan dira, kamioko istripuz.

Olaberrin ogeita bat urteko gazte bat lotu du ertzainak, kobre-lapurretan arrapatu dutelako.

Gauzik baliotsuenetako bat
izan liteke urrea,
ta orain berriz aren paretsu
ez al da jarri kobrea?

Gaurko lapurrak jakiten dute
nun ta zer dagon gordea,
ala ta guztiz nai duten ura
ezin iritsi ordea.

Maiatzak 23 - Ostirala

Goizetik euria. Gerora eguraldi on xamarra, ego-aize naiarekin.

Iñaki Otxoa Olza, berrogeita bost urteko Iruñako mendigoi-zalea il da Himalaian. Amairugarren “zortzi millakoa” igotzera zijoala, 7.400 metroko gorakoan, maiatzaren 19an, eskuak izozten asi zitzaizkion eta gaizkitu egin zan. Bere lagunak sendatzeko egiñaalak egin arren gaur eman du azken arnasa. Bere naia alaxe zalarik, gorputza antxe bertan utziko dute betiko.

Marka aundiak burututzeko
asko izango dira gai;
“zortzi millako” mendi oietan
bat ez da biziko alai.
Ez du merezi gure biziak
arriskatzea nolana.
Mendia maite dezagun baiña
gure bizitza ere bai.

Beasaiñen Tren Azkarraren kontrako bi gazte lanean ari ziran bi makinari lotu zaizkie katez. Ertzaiñaren bidez bonberoak etorri bear izan dute kateatuak askatzera.

Alturako arrantzaleak gasoillaren prezioa dala-ta beren ontziak kaian amarratzea erabaki dute.

Paris inguruan marrokiarrekin zijoan autobus batek bazterra jo du, eta zazpi ildako eta beste zazpi larri zauritutako izan dira.

Maiatzak 24 - Larunbata

Bart euria erruz eta goizean ere bai.

Realak 2-1 irabazi du Tenerifen. Leenenengo maillara igo-
tzeko oso gutxi falta zaie, eta pozik dira txuri-urdiñak. Jarrai
dezatela aurrera.

Taberna bateko kristalak austeagatik gazte bat lotu dute
Orion. Lapurretan egiteko asmoak izango zituela pentsatzen
da.

Iru ildako eta bi zauritu Lugon, kontrako aldera zetorren
kamioi batek kotxea talkatuta.

Madrilen emeretzi urteko gazte bat il da beste batek
emandako labankadaz, taberna batean.

Amenabar enpresako makina bat erre dute ezezagun ba-
tzuek Hernanin, Tren Azkarraren kontra dabillen jendeak
ain zuzen.

Ez dakit nolaz jarri geran gu
ainbat gaitz egiteraiño;
gure artean ugaldtu zaigu
ainbat pentsamentu ñaño.
Guk oskarbi nai genuken ori
sarri ikusten da laño...
Makina erretzen errezago da
berria erosten baiño.

Maiatzak 25 - Igandea

Goizetik naiko otz baiña etorrera polita. Arratsaldetik tru-
moia eta ekaitza. Eta Beizaman arri-erauntsi izugarria egin
omen du kalte aundiak egiñez tellatueta eta abar.

Ordizian milla laguneko manifestazioa egin dute Tren
Azkarraren langintzaren kontra. Ertzaiñarekin ixtilluak izan
dituzte.

Duranan (Araban) Urrezko Aizkora txapelketaren kanpo-
raketa: Nazabalek 20 minutu eta 34 segundoan lan danak
bukatu ditu, eta Arria V-k, 21,50ean. Beraz, Nazabal sailka-
tu da azkenengo norgeiagoka jokatzeko. Bestea datorren

igandez Legution jokatuko duten Larretxea eta Lopez Azpili-
kuetaren arteko irabaztuna izango da.

Urnietan, bertako alaba dan M^a Jose Sardonek marka
berria jarri du arrijasotzen: bost minutuko txandan iru ja-
soaldi eman dizkio 126 kiloko zilindro zaarrari.

Kirolean sartu da emakumezkoa;
balio izan ezkerro gauza legezkoa.
Urnietar au ez degu bazter uztekoa,
ta txalotu dezagun daukan berezkoa.

Maiatzak 26 - Asteleena

Goizetik giro goibela eta euri itxura.

NASako trepeta bat Martera iritsi da, 679 milloi kilometro
korritu ondoren, bederatzi illabetea. Segituan asi da ang
argazkiak lurrera bidaltzen eta diotenez ura aurkitu lezake
an. Zer ikusteko ote gaude?

NASako tresna Martera iritsi,
ori gaurko oiartzuna;
ta diotenez milloika mundu
or nunbait dabilkiguna.
Bizirik inun bai ote dagon,
au da galdetzen deguna.
Ikusten degun zerua berriz
dago bazterrik ez duna.
Orrek ederki erakusten du
Jainkoan aunditasuna.

Valentzian futbolerako zelaian berrikuntzak egiten ari zi-
rala lau langille il dira, andamioak uts eginda.

Andoañen, Donostira bidean, lastoz kargatuta zijoa
kamioi batek su artu eta bost orduko trabak izan dira.

Arrasaten eta Lasarten bi gizonezko lotu ditu ertzaiñak,
beren andreak egurtu dituztelako.

Maiatzak 27 - Asteartea

Goizetik eguraldi illuna eta naiko otz; arratsaldean euria.

Donezteben ogeita amazazpi urteko etxegintzako langille bat il da, laneko istripuz.

Besteak beste, zer gertatzen da
gure langille artean?
Zenbagarrena ote degu au
daramakigun urtean.
Lana eginda bizipoza nai
sendian ta alkartean.
Jaun zerukoa, artu itzazu
zorion eder batean.

Euskaldun epaillak (juezak) gobernuari bi bizkartzain eta kotxe bat eskatu dizkiote bakoitzarentzat. Beraz, ez gaitzen arritu zergak igotzen badizkigute.

Maiatzak 28 - Asteazkena

Goizetik eguraldi tristea; gerora ontzeko itxura.

Ibarretxe Leendakariak aspalditxotik esana zeukan datoren urriaren 25ean erriari galdeketa egingo ziola. Gaur Ajouria-Enean eman du zer galdeketa izango danaren berri. Auek dira galdeketak itz laburretan: Bat) Konforme al zaude alkarriketa bidez ETak alde z aurretik erakusten badu indarke-riari betiko amaiera emango diola? Bi) Konforme al zaude euskal partidu guztiak negoziazioaren bidez eta demokraziz erriak zer nai duen galdetzeko, eta 2010garren urtea bukatu baiño leen auteskundeak izateko?

Madrileko agintarietatik asita, sozialistak eta PPkoak diotenez, Leendakariaren nai ori ez da beteko. Denboraz jakingo degu.

Alkar artzea premizko degu,
onik egin begeneza;
gure artean sumatzen dana
alkartasunikan eza.

Alderdi batek baietz badio
besteak gogor ezetza.
Guk nai genuken pake eder bat
ez da egongo erreza.

Maiatzak 29 - Osteguna

Goizetik uda-giro ederra, ego-aizea, lainoak bistan dirala.

Aitzumarri-goikoa baserria erre da Aratz-errekako auzoan (Azpeitia). Zazpi lagun bizi diran sendia baldin bada ere, dnak kanpoan aurkitzen ziran. Baita dituzten ganadu guztiak ere. Baserria erabat kixkali baldin bada ere, gaitzerdi.

Baserritako bizimodua
iñoiz ez da eroso,
ala ta guztiz etortzen zaio
nunaitikan eraso.
Penagarri da, besteak beste,
sendi onen arazoa:
ordu gutxitan auts biurtu da
bere bizitza osoa.

ANV partiduak Tren Azkarraren langintzak gelditzeko oiuegin du.

Sao Paolon (Brasil) eunda bi urteko emakume bat ezkondu omen da, irurogeita iru urteko baserritar batekin. Biak ere leenengo aldiz iritsi omen dira ezkontzako uztarri orretara, eta beren bizitzako egunik zoriontsuena gaurkoa dutela aitortu dute.

Esaera batek dio leen gertatu gabekorik ez dala ezer gertatzen munduan. Egia ote da?

Maiatzak 30 - Ostirala

Goizetik eguraldi tristea eta naiko otz garai ontarako.

España guztiko arrantzaleak, euskaldunak ere bai tartean, Madrilen beren asarrea adierazten izan dira, gasoilla-

ren prezioa dala-ta. Ogei tonelada arrai oparitu dituzte Madrileko kaleetan, daukaten preziotan saltzerik ez duela merezi-ta. Solbes ministroak ez die nai duten erantzunik eman, ordea, gasoillaren prezioa ez dagoela jeisterik, alegia. Beste zer baitetan lagunduko ote dien zurrumurrua ekarri dute; baiña...

Donostiako Uriarte gotzaia Eusko Jaurlaritzari zuzendu zaio eskoletatik erlijioa ez baztertzeko eskatuz. Kezkatsu ego-teko arrazoiak baditugula ez dago zalantzarik.

Tudelan alaba batek bere aita arrapatu du kotxearekin, eta il egin da.

Toledon egazkin txiki baten istripuan bi lagun il dira.

Donostian makina bat erre dute Tren Azkarraren langintzatako enpresakoa dala-ta.

Naiz begiratu geure errira
edo berdin erbestera,
naiz begiratu zar jendeagan
edo berdintsu gaztera,
eguna joan ta eguna etorri
berdiña gure izkera.
Aurrerapenak badira baiña
konforme iñor ez gera.

Maiatzak 31 - Larunbata

Goizetik euria gogotik. Maiatz euritsua benetan aurtengo.


Zaragozatik etxera, ezta batetik Labastidako sendi bat autobus txiki batean zetorrela, istripua izan dute eta iru lagun il dira eta beste amaika geiago zauritu. Batzuk oso larri gaiñera.

Ibarretxe Leendakariak erriari galdeketa egingo ziola adierazi zuen ezkerre berri ori ari da arrotzen. Gaur esan du Leendakariak, Murgian, galdeketa orri erriak bizkarra ematen badio, danak utzi eta etxera joango dala bera.

Millaka asko manifestatu dira Donostian, Tren Azkarra-
ren kontrako manifestazioan.

Gure asarrea erakusteko
millaka lagun kalera,
askok diote Tren Azkar ori
degula gure galera.
Beste batzuek jokatzan dute
egitearen aldera.
Egunen baten egiten bada
danok ibilliko gera.

Sanjuanetan eguzkia dantzan



Ekainak 1 - Igandea

Bart euria ikaragarri egin du eta leku askotan ujoldeak izan dira. Gaur goizean ere euria.

Eskuzko pilota-txapelketako azken aurreko partidua Donostian: Barriolak 22, eta Gonzalezek, 8. Tanto arrigarriak ikusi genituen. Beraz, azkena bi leitzarrak jokatu dute -Bengoetxea VI eta Barriolak- ekaiñaren 15ean, Donostian.

Zer miraria Leitza deritzon
erri euskaldun batetik,
Bengoetxea ta Barriola
bertako diran aldetik!
Ta txapelduna irtengo zaigu
bi seme auen artetik.
Milla zorion pilotazale
geran guztion partetik.

Zarautzen Tren Azkarraren langintzatan ari dan Amena-bar enpresan ETAk leerketa bat egin du, eta bi ertzain eta auzotar bat zauritu dira, egin dituen txikiketatik aparte.

Itziarren ama bat eta amar urteko bere semea zauritu dira bost kotxek alkar jota.

Ekainak 2 - Asteleena

Goizetik lainotsu gaur eta naiko otz gaiñera garai ontarako.

Gipuzkoako Aldundiak urtero sagardorik onena daukan sagardotegia saritzen du. Ogeita bederatzi kanporatu ditu eta sei auen artean erabakiko da, datorren larunbatean, zein izango dan txapeldun: Altzueta eta Zelaieta, Hernanikoak; Kalonge, Donostiakoa; Irigoien, Astigarragakoa; Itsastegi, Tolosakoa; eta Saizar, Usurbilgoa.

Gipuzkoako tabernarien artean pintxo edo zizka-mizkarik onenaren txapelketa, Donostian Kursaaan, eta onatx emaitzak: Leenengo, Ondarribiko *Gran Sol*; bigarren, Donostiako Andra Mari; eta irugarren, Zizurkilgo Pesus.

Gure artean badabil puxka goxorikan,
sukaldaritan ez da emen lausorikan.
Ez dago erririkan edo auzorikan
mostradore eder bat jartzen ez dunikan.

Galdakaon armatutako bi lagunek banku batetik lapurreta egin dute, eta milla euro arrapatu banku orretan aurkitzen ziran bi auzotarri.

Ekainak 3 - Asteartea

Goizetik giro tristea eta euri lardatsa. Arratsaldean euria naikoa.

Ama bat lotu dute Valentzian amabost eguneko bere aurtxoa bosteun euroan saltzeagatik. Aurra erosi zuten senar-emazteak ere lotuak izan dira, baita bitartekotza egin zuten beste bi lagun ere.

Gregorio Ordoñezen illobian, Donostiako Polloen, “Gora Eta” idatzita agertu da.

Gorrotoa nabarmen jarri da gaur egun,
ez dakit zer ikusi bear ote degun.
Ortarako ez gaitezen illobitara jun,
ildakoei pakean utzi dezaiegun.

Asturiasen irurogeita amaika urteko ama bat bere alabak zaar-etxe baten atarian utzi du, abandonatuta. Etxe ortako buru egiten duen mojak esan du ez dutela etxetik bidaliko emakumea. Eskerrak biotz guztiak ez diran berdiñak.

Ekainak 4 - Asteazkena

Goizetik eguraldi onaren itxura, baiña aize otzarekin.

Mary Furlongon emakume iparramerikar pertsonaren adin-kontuan jakintsu danak esan du gaurko irurogei urtekoak leengo ogeita amarrekoak bezelaxe dirala. Emakume ori jakintsua izango da, baiña nik esango nioke gezurra esan duela.

Santanderren, gaixoetxe batean, ogeita zortzi urteko sendagille batek bere lankide dan ogeita zazpi urteko emakume langillea labankatu du. Zauritua oso larri bada ere bizitzeko moduan izango dala diote.

Zer ikusteko ote gaude gu
munduan bizi geranak?
Sinesten ere nekezak dira
emen entzuten diranak.
Besteak beste, sendagilleak
alkar iltzera emanak.
Burua galdu genuen eta
ortik datoz oker danak.

Puerto Ricon (Ameriketako) ogeita emezortzi urteko emakume bat gaixoetxera eraman dute arnasa ezin arturik. Ez da arritzekoa, ia lareun kilo pixatzen ditu-ta. Gaixoetxeko orma bat bota egin bear izan dute emakumea barrura sartuko bazuten.

Ekainak 5 - Osteguna

Goizetik lainotsu eta naiko otz.

Kamioitako txoferrak gobernuari kamioi-zaintzailleak jarri ditzala eskatu diote, gasoil-lapurretak ugaltzen ari dirala-ta.

Arrigorriagan zortzi lapur lotu ditu ertzainak autopistako serbizio batean lapurreta egiteagatik.

Kamioilarin eskari ori
ondo iruditutzen zat,
lapur bildurrez bizitutzea
ez degu ederra beintzat.
Ortatik ez da etorkizunik
langille zintzoarentzat.
Ai, zer nolako laguntzailleak
len juxtu dabillenantzat.

Konfebask-eko idazkariak esan du Euskalerrian aurki amasei milla langille ofiziodunak faltako dirala. Jakiña, danak eman diogu estudiantzeari eta langilleak falta.

Ekainak 6 - Ostirala

Goizetik eguraldi tristea eta euri-langarra.

Madriren ogeita iru lagun lotu ditu poliziak lujo aundiko kotxeak lapurtzen zebiltzanak.

Basaurin ogeita amalau urteko gizon bat lotu du er-tzaiñak beste bati labankadak eman ondoren bere burua il-tzera zijoala.

Gasoillaren salneurria dala-ta Bartzelonan txoferrak asarre dira, kamioa itxiz eta abar. Datorren astelenean lanuzteari ekingo dioten zurrumurruak dira. Vigon arrantzaleak berdin, gasoillari jarri zaion salneurriarekin ez dagoela zer egiñik-eta. Albiste berdintsuak datoz Espaiñi guztitik, euskaldunak tartean.

Motorren bidez bizitzen gera
mundu ontako geienak,
ta motor oiek ibiltzen ditu
petroleoaren almenak.
Kezkagarriak errekin orren
salneurrian ondorenak,
irabazia premizko baitu
lana egiten duenak.

Ekainak 7 - Larunbata

Goizetik laiñotsu eta naiko otz. Garai ontarako arrigarri xamarra, baiña negurik ez genuen izan da...

Laudioko berrogeita emeretzi urteko gizonezko mendizale bat il da Amezketako Balerdi mendian. Txorabio baten bidez eroria izan bear du, eta ortatik etorri okerra.

Urtero Gipuzkoako Aldundiak jartzen duen sagardorik onenaren sariketan Astigarragako Irigoien izan da txapeldun.

Urrezko Aizkoraren txapelketaren azkena jokatu da Azpeitian jaialdi bikain batean. Iru mailla ziran, eta mailla nagusian Floren Nazabal txapeldun bein eta berriro, 20,53an bere lan danak eginda. Donato Larretxeak, 22,10ko denbora bear izan zuen. Ogeita iru urtez azpiko maillan, berriz, Yon Errekondo nagusitu zan, 18,34an lanak eginda. Zugaitz Murgertza II-k 22,48ko denbora bear izan zuen. Emezortzi urtez azpikoetan, Ander Erasun txapeldun, 16,03an lanak eginda. Oier Larretxeak 16,20ko denbora bear izan zuen.

Aurrez nion bezela, jaialdi bikaina Azpeitiko, eta aizkolaritzaren etorkizuna ziurtatuta dago. Zorionak denoi.

Bost napar eta gipuzkoar bat
Azpeitin izan diranak;
zaleak berriz pozez zoratzen
begira egon giñanak.
Gazte guztiak ere ez daude
zabarkerira emanak.
Txalo beroak jaso dituzte,
ondo mereziak danak.

Ekainak 8 - Igandea

Goizetik euri lardatsa eta naiko otz garai ontarako.

Olaguen kotxe batek kamioiaren kontra talka eginda ama eta bi seme il dira; berrogei bat urteko txofer zijoan aita ere larri zauritua.

Zamudion “El Correo” egunerokoan leerketa egin du ETAk. Pertsonetan okerrik ez, baiña gaiñontzean kalte aundiak.

Realak, Alavesen kontra jokatu du partidua. 2-1 irabazten zijoazten txuri-urdiñak. Lau miñuturen luzapena izan du partidua, eta luzapen ortan bi gol sartu dizkio Alavesek Realari. 3-2ko emaitzarekin partidua amaitu da Mendizorroztan, arabarren zorionerako eta gipuzkoarren naigaberako. Urrengo igandean du denboraldiko azkenengo partidua Realak Kordobaren kontra, Anoetan. Ori irabazten badegu, eta

beste batzuren emaitzen laguntasunarekin leenengo maillara
igo litekela diote. Bai? Baiña...

Osasungarri eta pozgarri
izan liteke kirola;
bakoitzak ditun zaletasunak
ezin baztertu iñola.
Baiña neurritik ondo pasata
ez ote dabil futbola?
Ta badirudi beste arazorik
gure arten ez dagola.

Baserritarrek Donostiako kaletara irten dira manifesta-
zioan, bei eta guzti, gasoillaren salneurria dala-ta protesta
egitera. Berak saltzen dutena orain ogei urteko preziotsuetan
saltzen ari omen dira, ez ordea berak erosi bear dutena.

Ekainak 9 - Asteleena

Goizean eta gerora ere euria gogotik.

Kamioilariak lanuzteari ekin diote, gasoillaren salneurria
dala-ta. Arrantzaleak ere bai arrazoi berdiñengatik. Gauza
onik bai ote datorkigu oraintxe?

Erreterian amaika urteko neskatoa il da, bezperan bizi-
kletan zijoala kotxe batek arrapatu zuena.

Txuri-urdin zaleak oraindik malkoak legortu eziñik dabil-
tza, atzo Gasteizen artu zuten egurra gogora erakarriz. Dato-
rren igandez malkoak irripar biurtuko ote dira? Bizi bagera,
ikusiko degu ori ere.

Gerta liteke galtzea, noski,
ta berdin irabaztea;
jokatzen dunak beti daduka
bata ez bada bestea.
Futbolarekin etorri zaigu
olako buruastea;
okerragoa ez ote degu
asi zaigun lanuztea?

Ekainak 10 - Asteartea

Goizetik giro euritsua berriro eta ujoldeak leku pranko-tan. Adibidez, Astigarragan bost minutuko erasoak bakarrik izan arren ogeita amazazpi garaje urak artu ditu. Aurtengo uda nola izango ote degun bildurtzen asi da jendea.

Kamioilariak eta arrantzaleak lanuzten jarraitzen dute; eta Granadan txofer bat furgoneta bateko txoferrarekin eztabaidan asi eta automobilla aurrera, eta piketeko bat azpian arrapatu eta il du.

Irunen bi mutil gazte lotu ditu ertzaiñak beste gazte bat labankatu dutelako.

Aurtengo udaberria
ez da ondo etorria.
Giro aldetik pasata dabil
bear dan neurria.
Ta gaiñontzeko berria:
gasoillaren larria.
Langilleari badatorkio
nunaitik arria.

Ekainak 11 - Asteazkena

Goizetik euri-naia eta eguraldi illuna. Gero ujoldeak Leizta eta Donibane Garazin.

Kamioilarien lanuzteak gogor jarraitzen du. Biriatur zeuden millaka kamioi poliziak eta ertzaiñak mugituarazi ditu ordea, eta iparraldera eta egoaldera eunka abiatu dira. Noraiño ez dakit.

Berrogeita zazpi urteko gizon katalandar bat, mendigoizalea, Piriniotan il da erorketa baten bidez.

Ogeita amar urteko motozale gazte bat il da Derion kotxe batekin talka eginda.

Orioko bi aizpa lotu ditu guardia zibillak beren borondatez ETAr dirua ematen zioten susmuz.

Emen pake-bideak dijoaz eskasten,
gorrotoz ari gera bapo aberasten.
Ikusten degun ura errez da ikasten.
Oso zail izango da pakez egurasten,
beste bide batetik ez bagera asten.

Ekainak 12 - Osteguna

Goizetik ateri, baiña bart euri asko egin du. Otzik ez.

Kamioilariak danak ez omen dira konforme, baiña geienak asi dira lanean lanuzteari utzita. Jarrai dezatela, oien gelditzeak larritu bai gindun danak.

Danok dakigu txofer orien
eginkizuna nola dan:
falta zaiguna ekartzen dute,
sobre deguna eraman.
Eta bakoitzak jakingo zuen
zer bizimodu zeraman.
Lanuzteari ekin zioten,
danok bagenun naiko lan.

Tren Azkarraren proiektuaren aurkezpena Tolosako Aranburu jauregian, Ibarretxe Leendakaria, Foru Aldundiko diputatu nagusia, Tolosako alkatea eta abar bertan dirala. Kanpoan, ordea, eun bat lagun bildu dira tren orren kontrakoak, beren asarrea erakutsiz.

Madriren ogeita amalau urteko gizon bat lotu du poliziak, irurogeita bost urteko aita tiroz iltzeagatik.

Ekainak 13 - Ostirala

Otzik ez baiña egun guztian laino beltzak tantaka eguzkiarekin jolasean.

Lekeitioko berrogeita amar urteko arrantzalea il da istri-puz Guinean, arrantzan zebillela.

Caceresen andre batek gizona il du, biak labanaz burru-
kan asita.

Tolosan berrogeita bost urteko tolosar batek errekiñez
igurtzi eta su eman dio bere buruari, kalean. Eta bereala
eriotza etorri zaio, naiz inguruko jendeak egiñaalak egin aren
bizia salbatzearren.

Berri tristeak jarri zaizkigu
eguneroko janari;
aurrerapenez gaineztu arren
badegu negar ugari.
Sarri etzaio antzik ematen
ondoren datorrenari.
Zaindu gaitzala eska deiogun
gure Jaungoko onari.

Ekainak 14 - Larunbata

Goizetik eguraldia ontzeko itxurak, baiña egun guztian
trumoi-laiño ikusgarriak zeruan.

Mundu guztian izen aundia duen Expo deritzon feria za-
baldu da Zaragozan. 12.400 bixitari izan dituzte gaur bertan,
eta iru illabeteen zabalik izango dalarik, zazpi bat milloi pa-
sako omen dira andik. Euskadik ere jarri du bere lekua feri
orretan. Gure onerako izan dedilla.

Ogeita amabi urteko lasartear bat, Jon Texedor pultsolari
sonatua il da Donostian, moto-istripuz.

Besteak beste, okerrik asko
badatorkigu mototik.
Gazte geiegi galtzen dijoaz
bata bestean ondotik.
Talka batean buru-kopetak
jotzen dira lenengotik.
Ori pentsatu bear genuke
artu baiño lenagotik.

Ekainak 15 - Igandea

Goizetik lainñotsu eta euri-tantak. Gauera, euria.

Pasa da gaurkoa ere, ustekabeko ederrak emanda. Donostiako Atano III pilotalekuan, Bengoetxea VI-k jantzi du eskuzko pilotarien txapela, pronostiko guztien kontra Barriolari 22-11 partidua irabazita. Adibidez, ogeita bost euni zegoen dirua partidua asterako. Ogeita bostekin eun irabazi zituen etzan asarre izango. Biak leitzarrak diranez, festa aundiak Leitzan, baiña beren arantzatzxoarekin. Zorionak txapeldunari. Ogeita iru urterekin ez du azio makala egin Bengoetxeak. Ez orixe.

Pilotalekutik metro gutxira etzan kezka txikiagoa, Realak jokatzeko baitzuen Kordobaren kontra denboraldiko azkenengo partidua, eta partidu ortan zer ikusi aundia zegoen: txuri-urdiñak leenengo maillara igo ala bigarreanean jarraitu. Eta oraingoz, beste urtebete, bigarren maillan jarraitu bearko dute errealzaleen naigaberako. Jokoa ez baita errenta.

Barriola triste gelditu da
baitare txuri-urdiñak;
jokoa eta errenta, noski,
ez dira gauza berdiñak,
eta alperrik izandu dira
egindako alegiñak.
Itxaropenak legortu bitza
dituzten malko-samiñak.

Berriro odola Gipuzkoako kamiotan. Besteak beste, Geta-riatik Zarautza bitartean berrogeita bederatzi urteko donostiar bat il da. Beste lau zauritu ere badira, istripu berean.

Ekainak 16 - Asteleena

Goizetik euria gogotik, jendea eguraldi onaren eske jardun arren.

Ibarretxe Leendakariaren galdeketa ori ari da autsak arrotzen. Eusko Parlamentuan irabazi bear dute leenengo baiezkokoak, urriaren 25ean izango bada ere erriari galdetzea.

Bada ordea naiko bildur. Arabako Junta Generala ari da leenengo ezetza ematen. EAk, berriz, esan du Leendakariaren gogo ori ez bada aurrera joaten, urrian auteskunde aurrera-tuak izango dirala.

Bilbon berrogeita sei urteko gizon bat kafeteri batetik lapurreta egin ondoren zaborrontzi batean gordeta zegoela arrapatu du ertzaiñak. Gizon bera aurreko goizean lotu omen zuen ertzaiñak, beste taberna batetik lapurretan egin zuela-ko. Ikusten degunez, denbora gutxiko lotu zuten nunbait.

Gure alde ontan kamioilarien lanuzteak amaitu zaizkigu-nean Frantzian asi zaizkigu, an ere gasoillaren salneurria dala-ta.

Petrolioan emaitz oriek
mendean artzen gaituzte;
danok orrekin bizi bear ta
ortik milla buruauste.
Iruditzen zait izango dala
asarre eta lanuzte,
gasolioaren ordezkon batzuk
sortutzen ez badituzte.

Ekainak 17 - Asteartea

Goizetik euria gogotik eta jendea eguzki eske.

Zestuan eta Oiartzunen lau zauritutako kamioko istri-puz.

Tolosako lantoki batean milla kilo kable aluminiozkoak lapurtzeagatik bi urteko eta egun bateko espetxe-zigorra eman diote gizon bati.

Ekaiñaren 11n Garzon epaillearen aginduz Orioko bi aiz-pa espetxeratuak izan ziran, ETari beren borondatez dirua eman omen ziotela-ta. Gaur larogeita iru urteko aien aitak eskutitz baten bidez salaketa gogorra egin du borondatezko ori gezurra dala esanez, bere alabak ondo ezagutzen dituela-ta. Aita onek dionez, ogeita zortzi urte daramazki ETaren

amenazopean, eta orain justiziarena ere bai. Aita eta sendi onen naigabea azkar bukatzea nai genuke.

Gure lurrean sarri ez degu
pakearen jarraipenik,
erri zar onek izango ote du
bear luken ondorenik?
Garzoni eta beste askori
esango nioteke nik,
ez pentsatzeko euskaldun danak
ETAkoak geradenik.

Ekainak 18 - Asteazkena

Goizetik uda giro bikaiña benetan. Arratsaldean ere bai, zorionez.

Berrogeita zortzi urteko motozale bat, donostiarra, zauritu da Orion, kotxe batekin talka eginda.

Ordizian Udaletxeko balkoian bi gaztek katez beren bu-ruak lotu dituzte, Tren Azkarraren kontrako asarrea ager-tzearren. Su-iltzailleak eta ertzaiñaren bidez askatuak izan dira.

Euskotrenen geltokiari eraso diote Donostian su emanaz, aurpegiak estalita.

Gipuzkoako krisialdiari aurre egiteko “Gipuzkoa aurrera” alkarteak sortu dute, Markel Olano Aldundiko leendakaria buru dala.

Bizimoduko martxa estutzen,
ori dago ikusia.
Aurre egiteko sortu digute
alkarte bat berezia.
Nere iritziz mendera leike
krisialdiko auzia,
baldin ez badegu gastatutzen
irabazten dan guzia.

Ekainak 19 - Osteguna

Goizetik uda-giro bikaiña gaur ere.

Lau gizonezko lotu ditu ertzaiñak Euskalerrian, beren emazteak gaizki tratatzeagatik. Batek bere emaztearen aurpegia gasolinaz igurtzi eta gero su emateko asmoak omen zituen.

Tarragonan ama-semeak tiroz il dituzte. Drogaren kontua ote zegoen tarteko dira susmoak.

Ondarribiko kaian 56.000 kilo atun deskargatu dituzte. Dagoeneko bai omen dira 124.500 kilo deskargatuak Gipuzkoan. Jarrai dezatela.

Arrantzalean bizibide bat
nola dagoen atunez,
ta berri onak zabaldu dira
gaurkoan jakin degunez.
Arrai preskoa gauz ederra da,
gozatzen gera jatunez.
Txarra litzake jan naia eta
jatekorikan iñun ez.

Ekainak 20 - Ostirala

Goizetik uda-giro bikaiña berriro ere.

Iparraldean, Ziburun, bi urteko neska txikia ilda aurkitu dute “ume-zaintzaille” bateko kolunpiotan.

Oiartzunen bankuko kajero bati su emanda igesi zijoan gizonezkoa lotu du ertzaiñak.

Atzo esan nuen atunetan ondo asi zirala gure arrantzaleak eta osatuko gerala atunez. Gaur, Kantabria guztiko arrantzaleak lanuzteari ekin diote, atuna kiloko 2,30 euro bakarrik pagatu dietela-ta. Aurreko astean bost euro pagatu omen zieten, eta aurreragokoan Ondarrabiko kaian, zortzi euro. Ugaltasunak ekarri duen beerakoa zalantzarik gabe, baiña lana egiten duenak ez al du bear berea?

Asarre eta lanuzte oiek
asi dira naiko arin.
Arrantzaletan bakarrik ez da,
beste askotan'e berdin.
Agintariak badadukate
zer pentsatu ta zer egin,
lanean zintzo ari dan ura
galduan irten ez dedin.

Ekainak 21 - Larunbata

Gaur San Luis eguna degu eta uda-asiera ere bai. Egun guztian bero ikaragarria egin du, eta gauerako trumoi-euria. Garai bateko "Luistarrak" eta "Mariaren alabak" nolaz aaztu?

Donostiko Zurriola ondartzan Pasaiaiko biztanle bat, ogei-ta sei urtekoa ito da.

Baztanen ogeita lau urteko Berriozarko mutilla il da, kamioko istripuan.

Donostian, Bilbon, Gasteizen eta Iruñan manifestazio aundiak egin dituzte "Euskalerriak Aldaketa" bear duela-ta.

Manifestazio ta asarreak gaur
dauzkagu aukerako;
aukera gauza ederra degu
gogoa degunerako.
Bide oberik ez da izango
demokrazi legerako,
ta aldaketak etorri bitez,
baiña danon onerako.

Ekainak 22 - Igandea

Goizetik lainotsu eta sargori.

Madrilen amazapi urteko gazte bat labankatuta il dute, asarre baten ondoren.

Salamankan bi motozale il dira kamioko istripuan.

Almeriako ondartzan berrogeita amar urteko gizona ito da.

Gasteizen korreotako furgoneta bati leergaia jarri diote, eta automobilla kixkalita gelditu da.

Gipuzkoako erriarteko eskuzko pilota-txapelketaren azken jokatu da Donostiako Atano III pilotalekuan, bi-bitara, Donostia eta Azpeitiren artean, ain zuzen. Iru partidu zituzten jokatu bearrak mailla ezberdiñetan, eta iruretan azpeitarrak nagusi. Azpeitia ez da pilotari-erria izan, baiña gauzak aldatu dira ederki.

Bi erri ziran alkarren leian:

Azpeiti eta Donosti.

Biak saiatu ziran gogotsu,

ez dira portatu gaizki.

Orain artean Azpeiti etzan

pilotari-erri, noski;

ontaz aurrera kontuan izan,

gazte bizkorrak datozi.

Ekainak 23 - Asteleena

Goizetik lainotsu eta arratsalderako ekaitz bildurra. Sanjoan-sua egiteko bada naiko kezka.

Muxikan, Bizkaian, kamioi batek okerra izan duelako, autobusari iges egiten asi eta ondoko trenbidera irauli da autobusa. Amasei zauritu eta bi oso larri gaiñera. Beste bati besoa moztu bear izan diote.

Itoitzen, Nafarroan, igandea ezkerro arrastorik etzan ogeita iru urteko gazte bat, Billabakoa bera, mendi-zulo batean aurkitu dute ilda, kotxe eta guzti.

Lau lagun lotu dituzte Tolosan ertzaiñak enpresa batetik kobrea eta burnia ostutzeagatik.

Trumoaia, tximista eta euria izan arren, sanjuan-suak indartsu izan dira bazterretan.

Sanjoan-suak erretzen ditula
espiritu txar guziak.
Udara eder bat izan dezagun
Sanjoan-su oni graziak.
Etxeko suak gutxitu ziran,
ortatik datoz auziak.
Ez su onek erreko balitu
zabor tokitan utziak.

Ekainak 24 - Asteartea

Goizetik San Joan egun tristea eta euri-langarra.

Barakaldon, San Eloi gaixoetxean, igogaillua konpontzen ari zan berrogeita amabi urteko gizona il da, laneko istri-puan.

Leonen, senar-emazteak eta beren bi seme il dira kotxeko istripuz. Bosgarren bat ere oso larri zaurituta dago.

Legution bi lagun zaurituak larri, kotxeko istripuan baita.

San Joan egunari dagozkion festa alaiak erri askotan, eta jaien amaiera ere bai. Eguzkirik ez degu ikusi dantzan baiña...

Betikoa sanjuanetan:
festak alderdi danetan;
euzki-dantzarik etzan ordea
aurtengo onetan.
Laiñoak zeru goietan,
euri tantoak oietan.
Karakol eta bareak pozik
dabiltz zelaietan.

Ekainak 25 - Asteazkena

Goizetik lainotsu eta eguzki-itxaropenik ez gaur ere.

Zarautzen eskolaumeentzako dagon aterpetxe batean zortzi urteko iparraldeko mutiko bat laugarren solairuko leiotik erori eta il egin da, goizaldeko 2,30etan. Hazparneko ikastola bateko aur-talde bat zegoen aterpetxean egunak pasatzen, eta ederra kontua!

Gasteizen baita ere, urte ta erdiko ume bat il da bedera-tzigarren solairuko leio batetik erorita, goizeko bederatziak laurden gutxitan.

Tolosan amalau eta amabost urteko bi mutiko lotu ditu ertzainak, labanaz beste mutiko bati poltsa lapurtzearren. Zer ikusteko ote gaude?

Zaragozan bertako ferira zijoazten iru italiar il dira beren kotxeak kamioi baten kontra talka eginda.

Eguneroko berri tristeak,
asko alkarren antzeko,
eta biderik ez da ikusten
okerra zuzendutzeko.
Besteak beste kamio ori
dago bizia kentzeko.
Gerra bearrik ez dago emen
jendea bakandutzeko.

Ekainak 26 - Osteguna

Goizetik lainotsu eta euri-itxura eguraldiak.

Europako futbol-txapelketaren azken aurreko partidua jokatu da Vienan, Rusia eta Espaiñiaren artean, eta Espaiñiak irabazi, 3-0. Orain, datorren igandez jokatu da azkena Espaiña eta Alemaniaren artean, Vienan berriro ere.

Kirola bear-bearrezko du
daramakigun bizitzak,
ta batez ere ostikoketak
sortutzen ditun ekintzak.

Zer ote dira igande ortan
espaiñitarren emaitzak?
Baldin txapeldun irtetzen bada,
akabo emengo krisisak!

Elchen poliziak gizon bat lotu du, ogeita zazpi urteko mutilla tiroz il duelako.

Salamankako zabor-toki batean aur jaio berria ilda aurkitu dute. Poliziak gogor ekin omen dio errudunak bi-llatzeari.

Ekainak 27 - Ostirala

Gasteizko Eusko Legebiltzarrean billera izan dute gaur Ibarretxe Leendakariaren galdeketa ori aurrera atera ala ez erabakitzeko. Ogeita amalau boto izan dira baiezkoak, eta ogeita amairu ezezkoak. Beraz, erriari egingo zaion galdeketa urriaren 25ean izango da. Maiatzaren 28an esaten nuen eguneroko onetan bertan, erriari zer galdetuko zaion. Danok pakean bizitzeko izan dedilla.

Galdeketa bat bide dalako
ainbat gazi eta geza.
Gasteiz ortan ikusi dana
alkartasunikan eza.
Ogeita amairuk ezetza zuten,
ogeita amalauk baietza.
Guk nai genuken pake eder bat
ez da egongo erreza.

Ogeita lau orduan bi aldiz lotu du ertzaiñak gizon bat Donostian, bere andreari tratu txarrak ematearren. Ikusten danez denbora gutxiko loturak egiten dituzte.

Autopistan kotxearekin kontra-eskura zijoala Donostialdean, kamioi batekin talka egin eta oso larri zaurituta kotxe-ko txoferra.

Ekainak 28 - Larunbata

Eguna joan eta eguna etorri uda-giroa urri.

Atzo, Leendakariaren galdeketa dala bide baiezekoak irabazi zuen, eta urriaren 25ean erriari galdetzeko eskubidea nai du Ibarretxek. Zapatero eta bere lagunak gogor asi dira, ordea, galdeketa ori ez dala egingo eta debekatu egingo dutela esaten. Bizi bagera ikusiko degu zer gertatzen dan.

Emen indarra artu digute
baietzak eta ezetzak;
eskatzen degun pake ederrik
ez ote dago guretzat?
Politikoai begiratuta
ez da ikusitzen beintzat,
demokrazian bizi gerarik
ere iruditzen etzat.

Bartzelonan kotxe baten zijoazten iru lagun il dira, beste kotxe batekin talka eginda.

Tenerifen bi mendigoizale, emakumezkoa eta gizonezkoa, il dira erorketa batean.

Ekainak 29 - Igandea, San Pedro eguna

Goizetik lainotsu eta eguzkirik ez.

San Pedro eguna danez, eta igandea gaiñera, bazan nora joanik eta zer ikusirik. Gipuzkoako Segalarien txapelketa Orendaingo Urkik irabazi du Zaldibian.

Zaragozan Expo feria dala-ta Ebro ibaian traineru norgeiagoka egin da, eta Urdaibai nagusitu. Ainbeste erri festatan daudenez, erri-kirolak aukeran izan dira. Eta zer ez?

Gure kezkarik nagusiena futbola zan ordea, Europako txapelketako azkena (finala) jokatu baita Vienen, Alemania eta Espainiaren artean, eta 1-0 Espainiak irabazi du, eta Europa guztian txapeldun izan da. Bazirudien geiago lanik egin bearrik ez genuela izango, bukatu dirala bizimoduko kezka eta krisiak. Danon onerako izan dedilla.

Bazan ordea negarrik an eta emen. Madrilen gizon batek bere andre izandakoa labanaz il du. San Petersburgon bederatzi lagun il dira, eta amazazpi zauritu, autobus bat eta kamioi batek talka eginda.

Viena ortan gertatu dana
gauza aundia badare,
Espaiñi ori jarri ote da
zorion guztien jabe?
Ustekabeko negarrak ere
guretzat egiñak daude.
Komeniko da jarraitutzea
geiegi arrotu gabe.

Ekainak 30 - Asteleena

Goizetik lainoak baztertzen joango ote diran itxura.

Orion ere sanpedrotan dituzte jai nagusiak eta gaur Zaa-rren eguna izan dute. Etxeberria eta biok izan gera bertsolari, urteroko gisara, eta pozik igaro degu eguna. Eunda laro-geita bost aitona-amona bildu dira, eta badala zeozer esango nuke erri txiki baterako.


Ortatik aparte, erri askotan ikusi ezin leiken zerbait ikusi liteke Orion: apaiz jauna eta alkate jauna ogeita amar urtez azpikoak eta sasoi bikaiñekoak. Alkate jauna, penaz noski, arraunketari utzia dago, danetara ezin iritsi dalako, baiña joan zan urtean Kontxako Bandera irabaztean partaide izan zan.

Orio beti izan da erri berezia,
artutako izena ondo merezia.
Orko jendea degu lanean ezia,
aurreko zarrengandik duten erentzia.

Donostiako Kontxako uretan irurogeita amalu urteko gizon bat ito da.

Gordexolako Batzokiari eraso diote, naiko kalte egiñaz gaiñera.

Uztaillean
euria egingo du, baiña lendabizi trumoia



Uztailak 1 - Asteartea

Eguzki-itxaropen gutxi gaur ere uztaillean sartu geran arren.

Gizon bat lotu dute Irunen, bere andrea semearen aurrean amenazatzearren.

Pasaian arrantzale bat barkura igotzera zijoala uretara erori eta ito egin da. Berrogeita bi urte zituen, eta portugaldarra zan.

Gasteizen gizon bat lotu dute bere andre izana labanaz amenazatzearren.

Amar gazte lotu dituzte Donostian, kale-borrokan partaide izan diran errezeloz.

Kale-borroka nunai, au da zorigaitza!
Nolatan sortu zaigu olako ekaitza?
Txikitu edo erre, daukaten ekintza...
Etxeko teillatura arrika gabiltza.

Uztailak 2 - Asteazkena

Goizetik lainotsu eta euri-itxura ere bai. Arratsaldean euria.

Itsaso zabalean, Euskalerrirako bidean, poliziak ontzi bat geldiarazi du, eta 1.500 kilo kokaina aurkitu ditu bertan. Egoameriketatik zetorrena zan, eta eunda larogeita amalau milloi euroren balioa omen zekarren guztira. Oraingoz zazpi lagun lotu dituzte.

Erreterian gizon bat lotu du ertzainak billutsik bizikletan zijoalako.

Telebistako bigarren katean Jaime Otamendik elkarriketatatu du Leendakari Ibarretxe jauna, urriaren 25ean izango dan galdeketa dala-ta. Leendakariak dionez, ziartu egingo da galdeketa ori, urrian ez bada ilbeltzean; baiña egingo da. Espainiako presidenteak, berriz, dio ez dala egingo. Nork irabaziko ote du auzia?

Leendakarian galdera oiek
pakea dute oiñarri,
gure arteko eztabaida au
ez ote da lotsagarri?
Alkarrizketa dala bidea
esaten gabiltza sarri,
anaiarteko konpondu eziña
ez degu onuragarri.
Danok pakean eske gaude ta
pakerik ezin ekarri.

Uztaillak 3 - Osteguna

Goizetik lainotsu eta euri-tantoak. Gerora, euri-zaparra-
da ederrak.

Altsasun txofer portugaldar bat il da bere kamioia iraulita.

Uruguaytik zetorren napar bat lotu du poliziak Barajasen
sei kilo kokainarekin. San Ferminetarako pentsua ekarriko
zuen, noski...

Bermeon ildako baten gorputza legorreratu du itsasotik
ertzainak, elikoptero bidez.

Lazkaon atzerriko gazteak bizi ziran Aldundiko hotelari
su eman diote. Errezeloa danez, bertan bizi zan baten azioa
da au, eta kalte aundiak izan dira. Laugarren sutea da joan-
dako amabost illabetean etxe mota oietan gertatzen dana.

Kezkaz bizi dirade erri ta auzoak,
kezkaz agintariak, berdin gurasoak.
Usterik gutxien datoz erasoak;
igesi joango ziran egun erosoak.

Uztaillak 4 - Ostirala

Goizetik uda-giro bikaina eta jendea bazala garaia esa-
nez. Egun guztian bero ikaragarria!

Ekaiñaren 11n Orioko bi aizpa espetxeratu zituen Garzon epailleak ETari bere borondatez dirua eman zioten aitzakian. Ekaiñaren 17an salaketa gogorra egin zuen neska oien aitak, borondate ori gezurra zala esanez. Gaur aizpa oiek aske utzi dituzte, ogei milla euroko fiantza pagatuta.

Aizpa oien ondoren beste bi enpresari aundi ere deituak izan dira epaillearen aurrean aitortzak egitera, arrazoi bera-gatik, oraindik espetxeratu ez badituzte ere. Espaiñiako epaille orren kontra gogor ari da jartzen jendea, eta nere ustez arrazoiarekin!

Albazeten senar-emazte baserritarrak il dira traktorea iraulita.

Zaldi-astoak utzi genitun,
osatu giñan traktorez;
lengo nekeak bukatu ziran
gaurko makina dotorez.
Ta nola esan aurrerapena
ekarri degun ala ez?
Gertatzen dana ezin gozatu
arantzik gabeko lorez.

Uztailak 5 - Larunbata

Goizetik euria lainoak gaiñezka dirala. Ez du atzokoaren antzik.

Mendaron, kotxe-istripuz berrogeita bi urteko emakume bat il da, eta beste bederatzi zauritu ere bai euskal kamio-tan.

Logroñon iru urteko neskato bat il da etxe bateko laugarren solairutik erorita.

Medina del Campon, Talgo trena bere bidetik irten da, eta lau zauritu izan dira.

Istripu eta berri tristeak
datozkigu egunero,
illuntzerako odolak oztu
goizean ziranak bero.
Geienak asko dakigu baiña
okerra pasata gero;
emen ez dago gauza onikan
bidetik irten ezkerro.

Uztaillak 6 - Igandea

Goizetik atzoko giro berdiña, euri-langarra atertu gabe.

San Fermin-bezpera dalarik, besteak beste, Iruñan festak
asi dira eguerdiko suziriarekin, eta millaka pertsona saltoka.

Aurten ere etorri zaigula San Fermin;
Iruñaldean ez da izango atsegin!
Santu beltxaranari otoitz bana egin,
odol ixurketarik gertatu ez dedin.

Badegu ordea leendabiziko illotza. Arratsaldeko ordubie-
tan aurkitu dute gazte baten gorputza Erredin ormaren
gaiñetik erorita. Irlandarra ote dan errezeloak dira, ango diru
-etxe bateko txartela besterik ez zeukanez.

Madrilen ogeita bost urteko gazte bat il dute labanka-
daz.

Zestuan iru emakume lotu dituzte fabrika batetik txata-
rra lapurtzearren.

Uztaillak 7 - Asteleena, San Fermin

Goizetik laiñotsu eta naiko otz.

Iruñan ez da otzik, ordea, goizeko entzierroan amairu la-
gun izan dira zaurituak, eta oien artean ogeita amazazpi ur-
teko lekunberritar bat oso larri.

Loiun motoan zijoazten bi gazte il dira kotxe baten kontra
talka eginda.

Donostian bi gizon lotu dituzte, beste bat labankatzeagatik.

Amalau afrikar ito dira bere txalupa olatu batek iraulita, Motrillera iritsi nai zutenak.

Joango gerade illargira ta
joango gera Martera,
baiña ez dator zuzenbiderik
munduan gure artera.
Lana eginda ogia jan nai,
itsasora irteera;
eta betiko agur egiñez
asko dijoaz urpera.

Uztailak 8 - Asteartea

Goizetik naiko otz, baiña zerua oskarbi eta uda-itxaropenez jendea.

Gaurko etzierroa azkarra eta garbi xamarra izan da, estutzeko moduko zauriturik ez beintzat.

Orondritzen, Nafarroan, ogei urteko Irungo neska bat ilda aurkitu dute. Gizonezkoren batek nai dituen guztiak egin ondoren il duen errezeloak dira, eta ogeita zazpi urteko iruñar bat lotu du poliziak.

Nafarroan jarraituz, kamioko istriputan ogeita amazazpi urteko gizonezkoa eta iru urteko neskatoa il dira, Zangozako eta Aoizkoa, ain zuzen.

Espaiñiako agintariak Madriletik Ibarretxe Leendakariaren galdeketa ez dala egingo esaten ari diran bitartean, Eusko Jaurlaritzak 5.133.237 euro prestatu ditu galdeketa orren gastuetarako. Zer gertatuko ote da?

Iñoiz izan ote da ainbat ika-mika?
Adiskidetasunak dijoaz amilka.
Espaiñi ta Euskadi dabiltz ukabilka...
Orra kirol biurtu gure politika.

Uztaillak 9 - Asteazkena

Goizetik otz pixka batekin baiña zerua oskarbi. Uda asi ote dan ematen du.

Entzierro arriskutsua oso gaur Iruñan, amerikar bat zenezaren adarrekin larri zauritua izan dalarik.

Barakaldoko berrogeita amar urteko gizonezko bat Hueskako mendi batean erori eta il da.

Oiartzunen bi kotxek eta bi kamioik alkar jo dute, eta iru lagun zauritu dira.

Donostiako sukaldari famatua dan Joan Mari Arzakek sari berezia jaso du Eusko Jaurlaritzatik, Euskadiren izena munduan zear zabaltzeagatik.

Nola sukaldaritzan ta ala sukalde,
alde ortatik ondo osatuak gaude.
Gure akatsak asko izango dirade,
baiña jan-edanean onenak gerade.

Uztaillak 10 - Osteguna

Goizetik lainoak gaur ere baiña eguraldi polita.

Entzierro naiko garbia Iruñan, adarrez zauritutako bakararrekin. Beste sei geiago zauritu, ordea, erorketan golpetuak.

Gaur San Kristobal eguna da, txoferren zaindaria. Euskalerriko kamiotan beintzat ez da oker aundirik gertatu, zorionez.

Bizi naiak eraginda txalupakada bat jende zetorren Afrikatik Almeria aldera, eta itsasoaren eragiñez amabost lagun il dira, eta oietatik bederatzi, umeak. Umeen gorputzak itsasora bota dituzte. Ala ere, ogeita bederatzi pertsona izan dira salbatu diranak. Mundua zaintzen dauden agintariak lasai lo egiten ote dute? Egiten degun baiño geiago guk ere ez ote genezake egin?

Euskalerriko arrantzaleak etekin ederra dute gaur: 300.000 kilo atun arrapatu dituzte, alajaiña! Ez dute pozik, ordea, pagatzen zaiena oso gutxi dala-ta.

Aldika-aldika itsaso ori
ikusten degu emankor;
oraingo ontan ontzi guztiak
atunez bete dira or.
Baiña kaiara iritsitzean
merkealdia derrior.
Arrantzaleen asarretzea
jokera ortatik dator.

Uztaillak 11 - Ostirala

Goizetik lainotsu eta euri-itxura.

Entzierro garbia gaurkoa, eta zauritu bakarra gaixoetxera eramana beintzat, erori batean kolpatua.

Almazor menditik jaisten ari dala berrogeita amar urteko iruñar bat il da, erorita.

Murtziako erri batean berrogeita iru urteko aita batek labana aundi baten bidez ogeita emeretzi urteko andrea eta bi seme, lau eta sei urtekoak il ditu; eta ondoren bere burua il du eskopeta tiroz.

Oraingoa iritsi da Tenerifeko eskiña batera txalupa bat afrikarrez beteta, baiña beren artean lau ildako dituztela.

Gaur ainbeste berri txar izan al da inoiz?
Egunerokoa da, eta askotan goiz.
Eriotza badator ez dakigula noiz,
Jainko onari egin dezaiogun otoitz.

Uztaillak 12 - Larunbata

Goizetik lainotsu gaur ere eta euria. Aurten udarik ez degula eta jendea bildur.

Gaurko entzierroa ere naiko garbia, larritasun batzuk pasa ondoren.

Legazpin bost zauritu kotxe batek zuaitzen kontra jota, eta bat naiko larri gainera.

Madriren gizonak bere andrea il du, eta gero bere bu-
rua.

Donostian gizon bat lotu dute, andrea jotzeagatik.

Alikanteko etxe batean ama eta jaio berriaren gorputzak
aurkitu dituzte.

Urte asko espetxean daramazkien ETako baten alde jaial-
dia egin nai zuten Zornotzan, bere askatasuna eskatuz. Goi-
koen aginduz ertzaiñak galerazi egin du, ordea, eta or sortu
dira ixkanbillak eta kale-borrokak.

Penagarria ez al da, jaunak,
emengo pakerik eza?
Batek baietza esaten badu
besteak azkar ezetza.
Danok pakea eskatzen eta
pakea lortzen nekeza,
ta arrazoia zeiniek dadukan
ez da esaten erreza.

Uztaillak 13 - Igandea

Goizetik lainotsu eta euri-itxura. Bart euri asko egin du.

Entzierroa oso arriskutsua, baiña oker aundirik gabe pa-
sa da.

Mutrikun bi kotxek alkar jo eta ogei urteko mutil onda-
rrutarra il da, eta iru zauritu ere izan dira.

Zestuan, amalu urteko mutiko bat il da, torre bateko ka-
bleko indarraren bidez.

Urteroko gisara, Zaarren Eguna egin dute Zegaman. Eta
urtero bezela, Agirre eta biok kantatu ditugu egunari zego-
kion bertsoak, meza nagusitik asita. Oso ondo pasa degula
eguna esan bear. Eunda berrogeita iru aitona-amona bildu
dira Udal-agintariak buru dirala. Bada zerbait milla ta lareun
biztanleko erri baterako. Aizkorri-azpiko aizea osasungarria
izan nunbait!

O, Zegamako aiton-amonak
bai gozatutzen dutela,
jaialdiaren asiera ederra
meza nausian zutela,
bazkari ederra ta opariak
urtero oi diran bezela.
Gaur dadukaten bizi-poz ori
luzaro dakiotela.

Uztailak 14 - Asteleena

Goizetik lainotsu gaur ere baiña giroak ontzeko itxura du.

Zortzigarren entzierroa eta azkenengoa Iruñan. Garbia eta oker aundirik gabea gaiñera. Aurtengoak erabat jota, nai-ko ondo joan dira.

Abel Barriola pilotariarentzat ere onak izan dira Sanfermiñak, bi torneo famatu irabazita, alajaiña! Bat, Nafarroako lau kuadro ta erdikoa Olaizola II-ri 22-11 irabazita, eta bes-tea, bi-bitakoa, Xala lagun zuela Olaizola II eta eta Beloki menderatuta 22-19ko emaitzarekin. Gure leitzarrak ixildu ditu berriketak. Zorionak.

Atzo Mutrikun zauritutako irutik bat il da.

Araban, Tren Azkarra jartzeko langintzatan ari dan langille bat il da laneko istripuan.

Jakan bi lagun il dira, moto-istripuz.

Kamio orrek motorran bidez
asko ditu eramanak,
arrisku ederra darabilkigu
or ibillitzen geranak.
Eta ez dago ukatutzerik
baizik ikusten diranak,
izenik ere bai ote dauka
emen gertatutzen danak?

Uztaillak 15 - Asteartea

Goizetik egun ederraren etorrera. Alaxe izan ere.

Eibarren etxegintzan ari zan langille bat il da, laneko istripuan; berrogeita iru urteko azkoitiarra, ain zuzen.

Zallan bi kamioik alkar jo eta bietako bateko txoferra il da, italiarra jatorriz.

Billabonan ogeita iru urteko gazte bat lotu du ertzaiñak, bere neska laguna jotzeagatik, iltzeko amenazoa egin ondoren.

Ibarretxe Leendakariaren galdeketaren berri agertu da Euskadiko boletinean, eta segituan Espaiñiako presidentek eta bere lagunak txibunalera sartu dute arazoa, debekatzeko esanez. Bein eta berriro Leendakariak dio aurrera jarraituko duela. Zapatero eta lagunak, berriz, ez dala egingo diote gogor. Txirrita bertsolariak onela kantatu zuen bertso batean:

Juezak alde daramazkinak
irabazten du auzia;
andik aurrera egingo dio
berak nai duan guzia.

Uztaillak 16 - Asteazkena

Goizetik lainotsu gaur ere eta eguraldi goibela.

Zornotzan, lantokiko istripuz, berrogeita amaika urteko langille bat il da. Maizegi asi zaizkigu lantokietako eriotzak.

Berrogeita amazapi urteko usurbildar bat il da errian bertan kotxean zijoala txorabioak emanda.

Zaragozan motozale bat il da kamioko istripuz. Berrogeita bat urte zituen.

Badajozen senar-emazteak il ditu tximistak.

Asturiasen mendigoizale bat il da erorketa batean.

Azkenengo iru egunetan euskaldun arrantzaleak 710.000 kilo atuneko arrantza egin dute. Salneurria ere zerbait igo omen zaie eta konformatzen ari dirala ematen du. Gaitzerdi.

Karmengo Amaren eguna danez, eta arrantzaleen zaindaria, Gipuzkoa guztiko arrantzale zaarrak omendu dituzte Donostian, urtero bezela. Ondo merezitako omena. Bai orixe.

Arrantzalean bizimodua
iñoiz ez da eroso,
ala ere askok or daramate
beren bizitza osoa.
Asarretzean bildugarria
izango da itsasoa...
O, zenbat aldiz ekarri duten
guretzat arrai gozoa!
Karmengo Ama, larrialditan
luza zaiezu besoa.

Uztailak 17 - Osteguna

Goizetik lainotsu eta eguraldi onaren itxurarik ez.

Bere gelako tetxua erorita ijito arrazako senar-emazteak il dira Errioxan. Berrogeita bost eta berrogeita iru urtekoak, ain zuzen.

Tarragonan ogeita amasei urteko mendigoizale bat il da, erorketa baten bidez.

Granadan zazpi urteko neskatoa ito da pizsina batean.

Frantziako Tourra bete-betean dabil, eta gaur Rikardo Rico txirindularia zigortu dute drogatuta arrapatu omen dutelako. Bere taldea erretiratu egin da bere asarrea erakustearren. Irugarrena bada aurtengo Tourrean.

Norgeiagokak aukeran dabiltz,
danok nai lendabiziko;
eta drogaren laguntza ori
askok dute bereziko.
Orretatik bat ondatu leike
bere denbora guziko;
dirua eta sona onak ditugu,
baiña ez du mereziko.

Uztaillak 18 - Ostirala

Goizetik lainotsu berriz ere baiña oskarbitzeko itxura. Gerora oso eguraldi ona.

Asturiasen, Sevillako amasei urteko mutiko bat, eunda berrogei kilo pixatzen dituen, Kobadongako ur-putzu inguruan dabillega arnasa ezin arturik gelditu eta il egin da.

Badakigu kanpotar asko dagoela gure artean, danak etzuten uste zutena iritsiko oraingo itxuraz. Espaiñiako Estaduak laguntza bat eskaini die beren errira itzuli nai dutenei, eta dagoeneko eun milla (100.000) apuntatu omen dira. "Urrutiko intxaurrek amalau, bertaratu eta lau" esaera ez da gezurra izango.

Amaika aldiz gu jartzen gera
urrutitara begira,
kanpotik berriz millaka datoz
gu bizi geran tokira.
Ta diotenez damaturikan
askok nai dutela jira.
Nunai dalare zakurrak beti
ankautsik ibiltzen dira.

Uztaillak 19 - Larunbata

Egun guztian eguraldi bikaina, eguzkia aukeran dala.

Urbanen kotxe-karrera zan izatekoa, eta kotxe bat entrenatzen dabillega bidetik irten eta Olazagutiako irurogeita iru urteko gizon bat arrapatu ta il du. Oker ori dala-ta, bertan beera gelditu da norgeiagoka.

Pantikosan Salamankako mendigoizale bat il da, berrogeita sei urtekoa, erorita.

Gasteizen bi gizon il dira beren bizilekueetatik beren buroak kalera botata.

Lantziegon ogeita amazazpi urteko motorista bat il da, kamioko istripuz.

Sendiarteko afari bat zala-ta Aburuza sagardotegian
giñan, eta larogeita amairu urteko amagiarreba (emaztearen
ama) tarteko genuen.

Txalogarria ez al da, jaunak,
era ortako amona,
larogeita amairu urte bete
ta osasuntsu dagona?
Zortzi seme-alaba azita,
au da ikusten zaiona:
sendi guztia bildutakoan
poza eta zoriona.

Uztailak 20 - Igandea

Goizetik lainñotsu eta euri-lanbroa.

Kantabrian lau leerketa burutu ditu ETAk. Laredoko bi
ondartzatan eta Nojan. Azkenengo ontan emakume bat arin
zauritua. Eskerrak aurrez albistea eman zuten eta neurriak
artu zituzten.

Karraskalen, kamioko istripu batean kotxe batek txirrin-
dulari bat il du eta beste bat zauritu.

Hueskan ogeita emeretzi urteko mendigoizale bat il da,
mendian erorita.

Allozen gazte bat il da ur-putzuan zebillela. Ogeita amai-
ru urteko kataluiñarra, ain zuzen.

Lasarten ogeita bosgarren artisau edo eskulangintza feria
egin dute. Badago artista ederrik bazterretan! Etxeberria eta
biok egin genituen ango bertso-lanak, urtero bezela. Industri
bidez kanpotar asko dagoen erria degu Lasarte, baiña zorio-
nez Euskalerrriak ere badu puska aundi bat.

Garai batean auzo genuen,
erri biurtuta dago;
eta euskera bizituko zan
orain baiño okerrago.

Bear bada erdaldun arraza
egon liteke geiago,
baiña euskeraz ikasitzea
gaur zeiniek ez du naiago?

Uztaillak 21 - Asteleena

Goizetik lainotsu eta eguraldi onaren itxurarik ez. Ala ere, arratsaldea ona.

Pasaiako astillerotako berrogeita amar urteko langille bat il da altura batetik erorita.

Bilbon ogeita amairu urteko mutil bat lotu du ertzaiñak bere neska-laguna jotzeagatik.

Espainiako Estaduak gaur eman du albistea, gastuak aundiagoak dauzkala sarreratako diruak baiño. 2004garren urtea ezkerro ez omen zan orrelakorik gertatu.

Gastuak aunditzen ta sarrerak gutxitzen,
onerako martxarik ez det ikusitzen.
Ez da errez izango naiera luzitzen,
lanean ez bagera geiago ezitzen.

Uztaillak 22 - Asteartea

Gaur Santa Maria Madalena eguna degu, eta esaera zaararak dio: “Madalena bero, agata gero” (gaztaiña izango dala, alegia). Goizetik udagiro ederra. Ain zuzen, egun guztian zear bero egin du.

Bilbon eta beste erri batzuetan ETako “Bizkaia taldea” lotu du guardia zibillak. Bederatzi lagun guztira, eta oien artean buru egiten zuen Arkaitz Goikoetxea.

Oropesan (Castellonen), bi kotxek alkar jo eta bost lagun il dira, berrogei urtekoa gazteena eta larogeikoa zaarrena.

Zarauzko ondartzatik bederatzi urteko neskato bat eraman dute osakidetzara, medusak elduta.

Giro onean zaletasun bat
daukagu ondartzarena,
medusa ori izan bear du
berotikan datorrena.
Alabearrez ozka eltzera
neskato ederrarena,
guztia ona ez degu nunbait
itsasoak dakarrena.

Uztailak 23 - Asteazkena

Goizetik uda-giro bikaiña. Eguerditik aurrera bero ikaragarria, berrogei gradutaraiño iritsi dalarik leku askotan. Amaika aldiz ibilli gera aurtengo udan eguzki eske, eta gaur itzal billa ibilliko giñan geienak.

Itzalan billa giñan gazte eta zarrak,
eguzkitik zetozen suak eta garrak.
Ixildu dira ondo beroan bearrak.
Neurritik pasatzean danak dira txarrak.

Eskoriatzan zazpi lagun lotu dira katez Tren Azkarraren langintzetan ari diran makineri, ekintza orren kontra asarrea erakustearren. Ertzaiñak eta bonberoak askatu dituzte ordu batzuen ondoren.

Uztailak 24 - Osteguna

Gaur ez dirudi atzo ainbateko beroa izango degunik, laiñotsu agertu zaigu beintzat goiza.

Gaur Santio-bezpera degunez, Billabonako jai eta festak gaur asten zaizkigu, beste erri askotan bezela. Gaur asi eta San Inazio egunarekin amaitu. Zortzialdia, beraz.

Billabonan maiteak Santio-Santanak,
festa aukera badu gogo daukanak.
Nai nuke poztutzea bizi geran danak,
gaitzikan egin gabe jan eta edanak.

Gasteizko Udaletxeko bi kotxe erre dituzte ezezagun bartzuek.

Leengo asteartez lotu zuten ETako “Bizkaia taldea” Marlaska epailearen aurka erasotzekotan omen zebillen. Goi-maillako sozialista bat baitzeko ere bai.

Banco Guipuzcoano diru-etxeak urte ontako leenengo sei illabetetan ogeita bederatzi milloi euro irabazi omen ditu. Beste diru-etxe askorengatik ere kontu berdintsuak entzuten ditugu. Krisia ez da izango danontzat etorria.

Uztailak 25 – Ostirala, Santio eguna

Goizetik lainotsu baiña eguraldi onaren itxura.

Iruñara zijoazten bi emakume, ogeita bederatzi eta ogeita amar urtekoak il dira kotxe istripuan, Lekunberrin. Beste iru emakume gazte baita ere zauritu dira kotxe berean zijoazte-larik.

Motozale frantziar bat il da Baztanen, kamioko istripuz.

Toledon karnetik gabe kotxeko gidari zijoan batek zazpi ume azpian pasa eta bat il eta bestea zauritu ditu.

Sevillan aita batek bi urteko umea utzi du kotxean aaztuta, eta beroaren berroz kotxe barruan il da aurra.

Frantzian ETakoa omen dan Asier Ezeiza lotu dute jendar-meak.

Euskalerriko erriarteko afizionatuen eskuzko pilotako bi -bitako txapelketaren azkena jokatu da Iruñan, Azpeitia eta Ugarteren artean, eta azpeitiarrak izan dira txapeldun iru partidutatik iruak irabazita.

Azpeiti iñoiz ez genun izan
pilotarien baratza,
esan liteke oraingo ontan
aldatu dala arraza.
Azkoiti dago orain gai ortan
utsik dadukana plaza;
auzo batetik bestera degu
arrigarrizko mudantza.

Uztaillak 26 - Larunbata

Goizetik uda giro bikaiña bart euri-tanto batzuk eginda.

Legorretan bi lagun lotu dituzte kokaina zeramatelako.

Albazeten erreka batean preskatzen zebillela ogeita bost urteko gazte bat ito da.

Elorrioko Batzokiari su eman diote ezezagun batzuek.

Ordizian Santa Anaren prozesioa egin ondoren kale-ixkanbillak izan dira. Lau ertzain zaurituak gertatu dira, eta pertsona bat lotu dute.

Santu eta santak aukeran datoz,
ta erromeriak nunai;
irribarretsu ikusi leizke
ainbat arreba ta anai.
Etsaia ere ez dago lotan,
apenas egin nai dun jai...
Festaz osatzen gerade, baiña
pakerik ezaz ere bai.

Uztaillak 27 - Igandea

Goizetik uda-giro bikaiña bero aundirik gabe.

Ogeita bat urteko gazte bat il da Areition kotxe-istripuan, kotxea iraulita. Hueskan senar-emazteak eta amabi urteko semea il dira, baita ere kotxe-istripuz.

Tolosan gizon bat lotu du ertzaiñak obra batetik lapurretan ari zala.

Carlos Sastre espainiarrak irabazi du Frantziako Tourra edo Itzulia. Amaika euskaldun omen ziran karrera orren asieran, eta danak iritsi dira Pariseraíño. Marka ederra izango da ori ere.

Bere bizitza ziurtatuta
izango da Carlos Sastre.
Txirrindulari bat ez da egongo
zorion geiagon eske.

Ogeita amairu urte oraindik,
naiko sasoiko ta gazte.
Sari aundia jaso dun arren
mereziko du ainbeste.

Uztaillak 28 - Asteleena

Goizetik atzokoaren berdiña: laino batzuekin eguzkia kilikaka.

Arrasateko alkate andere Ino Galparsoro, ia iru illebeta espetxeratu zutela, ETArek laguntzaille juzkatuta, eta gaur irten da espetxetik, ogeita hamar mila euroko fiantza ordaindu ondoren.

Orion ETAk leerketa bat burutu du Tren Azkarraren langintzetan ari dan enpresa baten kontra. Zauriturik ez dan arren, kalte aundiak egin dituzte, itxura danez.

Torremolinosko hotel baten ondoan ETAk leerketa bat burutu du baitare, oker aundirik egin gabe.

Zumaian kotxe ta guzti itsasora erorita berrogeita bost urteko zestuar bat ito da.

Lleidan kotxe barruan iru pertsonaren gorputzak aurkitu dituzte.

Logroñon gizon batek bere andre izandua il du, eta ondoren bere burua.

Donostian gazte bat lotu du poliziak zazpi kilo kokaina zeramazkiela.

Besteak beste, kokaina ori
egongo da zabaldua,
ta diotenez beraren bidez
gazte ugari galdua.
Eroslerikan ez da faltako,
badago zeinnek saldua...
Poliziak'e badadukate
lanean zein'i eldua.

Uztaillak 29 - Asteartea

Azken egun auek berdintsu dijoazte eguraldiari dagokionez: lainotsu, ez bero eta ez otz.

Espainia maillan iru pertsona ito dira baiñuak artzen zebiltzala.

Madrilen berrogeita amalau urteko kubar batek etxean zeukan maizterra il du labanaz.

Bilbon amazazpi urteko gazte batek bere amaren bizi-laguna jo du, amak ematen dion “paga” txikiegia dala-ta. Golpatua gaixotxera eraman dute.

Familiko bizitza sarri negartua,
okerrik txikiena ezin onartua.
Jainkoan legea genun baztertua,
eta etsaia dabil ondo indartua.

Uztaillak 30 - Asteazkena

Goizetik uda-giroa eta berotuko duen itxura.

Andoañen ogeita emeretzi urteko erritar bat trenak arrapatuta il da.

San Millanen (Araban) iru zauritu larri kamioko istripuan, iru kotxek alkar jota.

Atzo zala uste ta gaur bete dira ogei urte Ereñozuko San Antonio ermitan ezkondu giñala. Nola dijoan denbora!

Diferentziak beti badaude
egun batetik bestera,
eta jatetxe eder batera
gaur bagoaz afaltzera.
Oroimengarri baita guretzat
San Iñazio bezpera:
ogei urte ezkondu giñala,
oraindik damu ez gera.

Uztaillak 31 - Osteguna, San Inazio eguna

Goizgiro bikaiña, laiño batzuekin. Bart trumoi-jasa ederra egiña da.

Lekeition, besteak beste, emakumeen arteko traiñeru norgeiagoka egin da Euskalerriko Ikurriña jokatu. Lau ontzi ziran partaide izatekoak, baiña Arkotek utsegin duelarik, Ondarribia, Zumaia-Getaria eta Tolosarren artean izan da burruka. Ondarribiak jaso du Ikurriña; bigarren, Zumaia-Getaria; eta irugarren Tolosa gelditu da.

Ondarrabiarren poza denbora gutxikoa izan da ordea, balizak etzeudela ondo jarrita eta norgeiagoka baliorik gabe uztea erabaki baitute epaileak. Denboraz jakingo degu berriro norgeiagoka ori nun eta noiz izango dan.

San Inazio egunari dagokion sermoi bikaiña egin digu Billabonako erretoreak, Inazio gerran zaurituta oian denbora errezago pasatzearren koñatak Jesusen bizitzari buruzko liburu bat eman ziola eta bertan Jesusekin topo egin eta santutasunerako bidea artu zuela, alegia, Loiolako semeak.

Oporretara sartzera goazenez, guretzat ere ondo legokela liburu on batzuk irakurtzea eta Jesusekin topo egitea, alegia. Ikasbide ederra Inaziok ematen diguna.

Mundu maillara murgildua zan
Inazio lendabizi,
gerraren bidez milla meritu
nai zituen irabazi.
Zauritu zan da liburu batek
zuen aldatuarazi...
Ikasbide ederra benetan
baldin nai badegu ikasi.

**Abuztuan
egunak mozten eta gauak luzatzen**



Abuztuak 1 - Ostirala

Goizetik lainotsu eta euri-langarra.

Zestoan TS deritzon fundizio edo lantoki aundi batek su artu du, eta kalte aundiak izan dira. Benidormen ere Sol deritzon hotel batek su artu du eta estuasun ederrak izan dituzte.

Castro Urdialesen berrogeita zazpi urteko Gasteizko mendigoizale bat illotza aurkitu dute. Leengo osteguna ezkerro galduta aurkitzen zan gizon au.

Madrileko erri batean zazpi urteko ume bat ito da piszi-nan.

Sitgesen (Bartzelona) bost pertsona lotuak izan dira irureun kilo heroinarekin arrapatu dituzte-eta. Diotenez, Espainian arrapatutako zamarik aundiena izan da.

Marten ura badagoela ziurtatu dute, eta mundu-miatzaille oiek ez dira asarre, an bizitza aurkitzeko itxaropena dute-larik.

Marte orretan ura dagola
ziurtatua digute,
ta urarekin bizia ere
izan leikela diote.
Biar edo etzi bizitza ori
aurkitzen baldin badute,
nolakoa dan ikusi naia
danok izango genuke.

Abuztuak 2 - Larunbata

Goizetik aize otz xamarra baiña etorrera ona.

ETAkoa izandako Iñaki de Juana Chaos donostiarra Madrileko Aranjuezko espetxetik gaur goizean irten da, ogeita bat urte an igaro ondoren.

Klasikoa deritzon Donostiatik-Donostiara txirrindulari-karrera jokatu da gaur, eta Alejandro Valverde murtziarra

izan da txapeldun, 239 kilometro bost ordu, ogeita bederatzir minutu eta amaika segundoan korritu ondoren. Leenengo euskalduna Aimar Zubeldia izan da, bederatzigarren sailkatuta.

Arraunlariak ere ez daukate jairik aste-bukaera etorri ezkeror. Gaur Getxoko Ikurriña jokatu da, eta Castro irabaztun; bigarren, Orio; eta irugarren, San Pedro. Irurak ere ogei minutuz azpitik lanak bukatuta.

Begiratzen badegu kosta Kantabrirar,
arraun-norgeiagokak erritik errirar.
Mutil zaildu askoak luzatuta tira.
Donostirako eltzeak berotuko dirar.

Abuztuak 3 - Igandea

Goizetik euri-itxurarik ez baiña lainotsu.

Tren Azkarraren kontrako erasoak Donostiar, kale bat itxi dutelarik beren soiñak katez bidoi batzueri lotuta eta abar. Amaika pertsona izan dirar ertzaiñak lotuak, eta kaleak askatuak.

Azkenengo aldiz ASPE enpresan sartu zanetik Mikel Goñi pilotariak gaur jokatu du leenengo partidu nagusia Zarautzen, eta irabazi egin du 22-20, Lasa III-a lagun duela Irujo eta Arrutiren kontra. Baztandarar bere mailla ematen asi dalar dirudi. Opa diogu benetan.

Arraunlariak ere ez daukate atsedetik, eta gaur Zumaia-ko Ikurriña jokatu da, eta Oriok irabazi. Bigarren, Urdaibai izan da; eta irugarren, Zarautz. Irurak ogei minutuz azpitik lanak bukatuta.

Ikurrin danantzako lekurik bai ote?
Azkenengoa ez dalar izango diote.
Oriotarrak arrauna artutzen badute,
ortarakoak diralar erakusten dute.

Abuztuak 4 - Asteleena

Goizetik lainñotsu baiña oso sargori eta baserritarrek euri eske.

Pasaiako kaiako saltokian zortzi milla kilo legatz bota dituzte zaborretara, gutxieneko prezioa pagatzeko eroslerik agertu eztalako. Ikusten denez, urrutiko nazio batzuetatik merkeago dator legatza. Mundua konpontzen ez da egongo erreza!

Frantziako iparraldean aizete batek iru pertsona il ditu, eta etxe eta zuaitz asko lurreratu. Kalte aundiak, beraz.

Meridan gizon batek bere andre izandua labankatu du taberna batean, bere alabaren aurrean. Bizirik da, baiña oso larri. Okerra egin ondoren gizonezkoa bera entregatu zaio poliziarri.

Emakumearentzat noiznai eraso,
berdin neska gaztea, berdin gurasoa.
Bizitzak gutxitan du zorion osoa;
fedea galdutzetik dator arazoa.

Abuztuak 5 - Asteartea

Goizetik lainño batzuekin etorri da eguna baiña berotuko duen itxura. Illuntze aldera tximistak eta trumoiak, euri-zaparrada eder bat ere bai.

Bartzelonan eta Figeresen bi emakume illak beren bikote lagunek. Ogeita amasei bai omen dira illak aurten Espaiñi maillan.

Eibarren larogeita bat urteko gizonezkoa il da kamioi batek arrapatuta.

Gasteizko jaiak dirala-ta, norgeiagoka edo torneoko leenengo partidua jokatu da, eta emaitza auxe: Berasaluze VIII-k eta Barriolak 22, Olaizola I-k eta Belokik, 4. Bat da partidua galtzea, eta bestea lau tantorekin gelditzea! Berasaluze bigarren maillako partidutan zebillen, baiña ondo jokatzen ari zala-ta, partidu nagusi ori jokatzeke aukera eman diote eta begiak argituarazi ditu, bai orixe!

Norbait badira pilotaritan
Olaizola ta Beloki,
baiña gaurkoan egun ederra
biak ez dute eduki.
Berasaluze nabarmendu da
ezker-eskubi, egoki;
lanaren bidez erakutsi du
nun dagoen bere toki.

Abuztuak 6 - Asteazkena

Goizetik lainotsu eta sargori. Arratsaldetik bero izugarria, eta illuntzerako tximistak eta trumoiak. Euri-jasa ederrak ere bai, tartean kazkabar-ale batzuekin.

Donostian ogeita amazazpi afrikar lotu ditu guardiak lapurreta eta droga negoziotan zebiltzalako.

Zaragozan bi milla ektarea baso erre ditu suak. Su ori kotxe batek piztu zuen nunbait, kamioitik irten eta basoan talka eginda.

Suarentzako leku egokiak
jarri zaizkigu basoak;
su artu ezkerre erre litezke
aguro mendi osoak.
Babesik gabe gelditzen dira
ango biztanle gaixoak.
Zer janik gabe piztiak eta
udazkeneko usoak.

Abuztuak 7 - Osteguna

Goizetik lainotsu eta sargori gaur ere.

Atzo esan nizuen illuntzerako zer tximista-trumoiak genituen. Ba, Zabale deritzon istoritako etxe bat erre zuen Ordizian tximistak. 1459an egiña zan, eta iru famili bertan bizi ziran. Eta gaitzerdi, danak osasuntsu irtenak baitira.

Tximista orrek len'e baditu
oker ugari egiñak;
ori sartzen dan lekuan beintzat
negarrak eta samiñak.
Laiñoak asarratzen dira ta
ortik datoz eragiñak.
Naturan kontra indar gutxi du
gizonaren alegiñak.

Salamankan emeretzi urteko mutil batek emezortziko an-
dregaia il du, labanaz. Gai oni buruz esatekoak esanda dau-
dela esango nuke, eta zertan asi berritzen?

Abuztuak 8 - Ostirala

Goizetik laiñotsu euri-tanto batzuekin.

Gaur Pekingo olinpiadak asi dira. Mundu maillan kirol-
kontuan ori izango da izketa-gai nagusia. Nola gizonezko ala
emakumezko euskaldun batzuk ere badira aruntz joanak,
eta suerte ona opa diegu. Olinpiada auen asiera arrigarria
izan dala esango nuke, oso gutxi ezagutzen degun Txina aun-
diak aundia dala erakutsi baitu.

Toledon bi kotxek elkar jo eta sei lagun il dira, famili ba-
tekoak bost gaiñera.

Gasteizen, jai nagusiak dirala-ta, urtero jartzen dute par-
tidu bereziren bat pilotan. Eta gaur neurtu dira Irujo eta
Olaizola II-a, bat bestearen kontra. Emaidza parregarria izan
du, ordea, partiduak: Irujok 22, eta Olaizolak, 5. Irurogeita
amar euro zan kantxako sarrera, eta ori ikusi bear.

Sarrerarikan garestienak
iruroita amar eurotan...
Geienak saldu partidu on bat
ikusitzeko asmotan.
Jokoa ez degula errenta
esana nago askotan,
baiña ustekaberik aundiñak
gertatzen dira pilotan.

Abuztuak 9 - Larunbata

Goizetik eguraldi onaren etorrera.

Zumaian Euskal Jaia zalarik, ostiral gauean bi gazte-talde alkarren artean asarretuta burruka gogorrak izan dira kalean eta tabernetan. Kaleak jendez beteta zebiltzalarik, bildurra eta kezka nagusitu dira, eta emaitza, zazpi zauritu eta kalte aundiak Batzokian eta abar.

Donostian millaka pertsona manifestatu da Ezker Atertzelekoak politikaren aldakuntza eskatuz EAJ eta PSEren kontra oiuginez.

Gasteizko bi-bitarako eskuzko pilota-norgeiagoka edo torneoaren azkena jokatu da. Tintin III-k eta Paskuak 22, Xalak eta Lasa III-k, 21, arrigarritako partidua jokatu zuten, galtzaillerik merezi etzuen. Titiñek-eta etzuten irabazi, Xalak galdu baizik, boleakada bat txapara joan ziztziolako.

Aspalditxoan nolabaiteko
asko ari gñan ikusten,
partidu txarrak gogoak ere
sarritan ditu zapuzten.
Nik nola esan laukote onek
zenbatsu poztu gintuzten.
Txalo beroak baziran baiña
danak merezi zituzten.

Abuztuak 10 - Igandea

Goizetik eguraldi onaren etorrera, baiña naiko otz garai ontarako: amabost gradu besterik ez.

Donostian Igeldo arriarekin norgeiagoka. Bost minutuko denbora zuten lanerako. Eunda ogeita amalau kilo pixatzen ditu arri onek, eta zortzi partaide ziralarik, auxa izan zan emaitza: Izeta II-k, 15 jasoaldi; Jokin Eizmendik, 12; Unai Lertxundik, 12; Urtzi Telleriak, 9; Elosukortak, 9; Izeta III-k, 7. Unai Bertizek, 7; eta Xabier Igoak, 4 jasoaldi. Jaialdi bi-

kaiña izan zan, baiña iru aundiren utsunea nabari zan txapelketa ontan: Goenatxorena, Ostolazarena eta Aimar Irigoienena. Izango zituzten beren arrazoiak, bai.

Donosti ortan bazan gatza ta indarra,
ta Izeta daukagu txalotu bearra.
Zortzi indartsu ziran, etzegon bakarra.
Oraindikan bizi da Euskalerra zarra.

Abuztuak 11 - Astelena

Goizetik lainotsu baiña otzik ez.

Benidormen amar urteko mutikoa itsasoko moto oietako batek arrapatuta il da, itsasotik kanpora zebillela gainera.

Gironan 500.000 euroren balioa tabakotan zeramakien kamioiari zama guztia lapurtu diote armadun atrakadore batzuek.

Toledon eizean zebiltzala, diskuido, ogeita amalau urteko gizon batek ogeita amaikako koñadoa il du tiroz.

Gipuzkoako Beterriko erri prankotan lur-azpitik zeuden argien kableak ostu dituzte. Bide oiek zuzentzeko zeuden errejistro tapak ere bai.

Donostian lau lagun lotu dituzte, larogeita bi urteko emakume bati amaika urtean Kutxako txartelaren bidez 90.000 euro lapurtzearren. Lau oietako bat emakume ori zaintzen ibiltzen zan.

Zazpigarrengo agindu ori
alperrik ez ote dago?
Lapur-giroa sumatzen degu
gero ta ugariago.
Ta jende askok lan egin baiño
lapurreta du naiago,
ez baldin badago espetxe edo
justizitikan geiago.

Abuztuak 12 - Asteartea

Goizetik lainotsu eta euri-itxura. Gerora euria ere bai.

Bost egunetan gerran zebiltzan Rusia eta Georgia, bata bestearen kontra. Armak ixildu eta paketu dirala ematen du. Gerra asterako zituzten pentsamentuekin gelditu dira ordea biak. Georgiak Iparramerika bere alde irtengo zan itxaropena zuen, baiña Rusiarekin ez asarretzearren pausorik eman ez onek, eta ortatik dator georgiarren asarrea. Beraz, armak ixildu dira, baiña egitazko pakerik iritsi gabe.

Elgoibarko bederatzi urteko neskato bat il da Zamoran, kotxe-istripuz. Kotxean zijoazten bere gurasoak okerrik gabe gertatu dira, baiña alabak ez du suerte ori izan.

Nunai odol jarioa,
negarra ta erioa;
denbora gutxiz galdu liteke
gure balioa.
Motorrezko jenioa
daukagu gora igoa,
gerra bat bezin bildurgarria
dago kamioa.

Abuztuak 13 - Asteazkena

Goizetik lainotsu euri-tanto batzuekin.

Güeñesen (Bizkaia) eskabadorarekin lanean ari zan langillea il da makina amilduta.

Avilesen bere andrea alkoholez igurtzi eta su eman zion gizonaren billa dabil polizia.

Nigeriako etorkin edo inmigrante batek Sevillan kalean paperezko pañueloak salduz bizimodua ateratzen du, eta kartera bat aurkitzea egokitu zaio 2.700 euro, 870 euroko taloia eta Kutxako kartillarekin. Poliziari zintzo entregatu dizkio danak, eta onek egitazko jabeari itzuli ere bai. Jabe orrek berrogeita amar euroko saria eman dio afrikarrari. Ez da gauza aundia, geiago merezi zuen, noski; baiña etzaizkio gaizki etorriko gizajoari.

Nigeriar onek dionez, diru ori beretzat gorde izan balu ez omen zuen onik izango. Gizon onak badaude oraindik ere munduan.

Txalogarrizko pentsamoldeak
nigeriatar onenak.
Era ortara jokatzeko dunak
merezi ditu omenak.
Oraindik izan esku garbia
kontzientziaz daukatenak.
Zenbat aurkitu ote leizke gaur
ori egingo lutekenak?

Abuztuak 14 - Osteguna

Goizetik lainotsu eta triste, naiko otz ere bai garai ontarako. Illuntzerako tximista eta trumoiak, eta gauean euria gogotik.

Donostiar bat, eskalatzailea, Piriniotan il da, Pico Gallineroko orma igotzen ari zala.

Donostian eunka pertsona manifestatu dira Ikurriñaren alde.

Eunda bat urteko amona baten illetan izan gera Lasarten. Azken urteak Lasarten zeramazkien arren, Astiasun bi base-rritan bizitakoa zan, eta bederatzi seme-alabaren ama. Martina Irazusta bere izen-abizenak.

Gaixoa, etzan zorionean
nai zun guztitan biziko,
baiña fedean itxaropenez
iñoiz etzuen etsiko,
bestela etzitun bederatzi
seme-alaba aziko.
Eunda bat urtez meritu gutxi
etzuen irabaziko.
Jainkoak ere Martina etzun
zerurik gabe utziko.

Abuztuak 15 - Ostirala, Andremari eguna

Goizetik euria eta naiko otz.

Emeretzi urteko erreteriar bat il da kotxe-istripuz. Beste bost zauritu ere izan dira Gipuzkoan euriaren eragiñez.

Baños de Ebron (Araba), irurogeita amabi urteko gizonak adin bereko emaztea il du, labanka.

Madriilen larogeita bi urteko aitona bat illotza aurkitu du-te etxe batean, golpatuaren ezaugarriekin eta lotuta.

Burladan, erriko jaiak izan arren, PSNko etxea eta beste bi diru-etxeri eraso diote.

Donostian Aste Nagusia dala-ta, Urrezko Aizkora txapelketa jokatu da, amalau kanaerdikotara. Floren Nazabal izan da txapeldun, bere lanak 30:31n eginda. Bigarren, Joxemari Olasagasti, 32:07an; irugarren, Juan Joxe Lopez, 34:24an; laugarren, Luis Mari Txapartegi, 35:30ean; eta bosgarren, Iñaki Azurmendi, 36:05ean. Markarik one-na Donato Larretxearena dago, 1995ean egiña: 27:17an. Ori ontzen zuenarentzat sari berezia zegoen, baiña oso urruti gelditu ziran.

Urtero-urtero Aste Aundian
Urrezko Aizkora degu gai;
bera ikusten bildu oi gera
ainbat arreba ta anai.
Basomutillak urritu ziran
eta aizkorak ere bai.
Len egindako lanak ontzea
ezin etorri nolanai.

Abuztuak 16 - Larunbata

Goizetik lainotsu eta naiko otz. Uda bukatu zaigula esanez jendea.

Donostiako Aieteko Palazzo hotelean sua izan da, eta bertan zegoen jendea kanporatuta egon da ordubetea.

Kamioko istripuz lau zauritu izan dira Gipuzkoan.

Donostiako Aste Nagusiaren bukaera gaur izan da, eta diotenez oso festa onak izan dira, eta danak pakean eta pozik.

Uztaillaren 12ko egunerokoan esan nuen Georgia eta Rusiaren arteko gerra amaitu zala. Baita ere esan nuen biak ere leengo pentsamentuekin jarraitzen zutela. Gaurko berriak diotenez, pakerik ez da iritsi, ordea. Bakoitzak bereari eusten dio, eta orrela pakerik ezin izan.

Kaiñek Abel il zun ezker
gerrarik etzan faltako;
aurreruntz ere ala izango da,
gerekoia generalako.
Agindu naia berriz tarteko,
armagintzak ortarako.
Ta okerreña sarri arrika
etxeko teillaturako.

Abuztuak 17 - Igandea

Goizetik laino batzuk eta eguraldiak ontzeko itxura dauka.

ETAk iru leerketa burutzeko asmoa zuen Malagako ondartzetan, baiña bi iritsi ziran leertzera, irugarrena poliziak indargabetu zuelako. Zauriturik eta kalte aundirik ez da izan, baiña Benalmadenako ondartzatik millaka pertsonak iges egin bear izan zuten.

Lasarten etxe bateko suiltzalleak sua itzali ondoren, irurogeita bat urteko gizonaren gorputza aurkitu zuten. Labanaz ilda zegoen gizona. Etxeari su emanda bere burua il ote zuen? Edo, iltzailleren batek il eta gero etxeari su eman ote zion? Or dago jakin-miña.

Oropesan marrokiz beteta zijoan autobusa irauli eta zortzi ildako eta berrogeita bost zauritutako izan dira.

Marroki oiek Kataluiñara
joateko bidean omen,
lanean asteko asmotan, noski,
oporrak pasa ondoren.
Esango zuten autobusean
joango zirala ondoen.
Ara zertara iritsi diran
lanean asi baiño len.

Abuztuak 18 - Asteleena

Goizetik eguraldi onaren etorrera.

Noaiñen gasolindegia batera sartu da kotxe bat ziztu bizian eta irurogeita bost urteko gizona arrapatu eta il egin du. Bertan zeuden bi kotxe puskatu ere bai bidean.

Toledon iru kotxek eta kamioi batek alkar jo eta iru ildako izan dira. Kotxeko txoferra emakumea da.

Tenerifen eta Vigon bi emakume il dira, beren gizon-kide izandakoen azioz.

Ikaztegiatarra dan ogeita amaika urteko neska gazte batek, Leire Olaberriak, brontzezko medailla irabazi du Pekingo Olinpiadetan, txirrindularitzan. Arritzekoa ez denez, pozaren pozez negarra irtetzen zitzaion. Beraz, urruti aietan ere euskaldunak izan gera norbait.

Aukera ederrak badituztela
Pekinen kirolariak,
baiña banaka izaten dira
medallak eta sariak.
Marka ederra egiña digu
Leire txirrindulariak.
Erri txikia geraden arren
gizatasunez aundiak.

Abuztuak 19 - Asteartea

Goizetik lainotsu eta euri-tantoak.

Getxoko bi neska gazte il dira Marruekoson, errentan artutako kotxea irauli zitzaientean; eta irugarren neska zaurituta larri dago.

Bilbon pilotaleku berria egiten ari zan langille bat il da, altura batetik erorita.

Gipuzkoako ondartzetan kalte aundiak olatuen indarrez eta itsasoaren asarrez.

Itsasoari ostu ta kendu
sarritan ari geranez,
baiña iñoizka agertzen zaigu
“au nerea dek” esanez.
Ixil-ixillik egon bear guk
berak arrazoi daukanez,
bere asarre eta indarrak
neurri gabeak diranez.

Abuztuak 20 - Asteazkena

Goizetik laiño batzuk baiña eguraldi onaren itxura gaur.

Ikusgarria gertatu da Madrilén. Spanair konpaiñiako egazkin bat Kanarietara joateko asmotan abiatu da eunda irurogeita amairu lagun barruan dituela. Aireratu eta berea-laxe motor batek su artu eta lurraren kontra txikitu da. Eunda berrogeita amairu lagun badira ildakoak, eta ogei baka-rrik bizirik gelditu diranak, baiña larri zaurituta.

Bildurgarria egazkin orri
gaur gertatu zaiona,
sendi askori negar samiña
errez ekarri diona.
Ildakoentzat erruki bedi
Jaungoiko altsu ta ona,
ta zaurituak izan bezate
sendatzeko zoriona.

Abuztuak 21 - Osteguna

Goizetik uda-giro ederra.

Gaurko berri nagusienak ere atzo Barajasen gertatu zan ezbearraren jira-biran ditugu. Ildakoen nortasunaz jabetzen ari omen dira, eta oien artean lau bizkaitar eta napar bat dirala esan dute.

Errege-erregiña, printzeak eta Espaiñiako presidentea izan dira ildakoak ikusten eta sendikoei samin-agurra agertzen. Zaurituei laguntza eskeintzen ere bai. Baiña ildakorik ezin piztu.

Ezbearrak ez dira bukatu, ordea, Madrilekoarekin. Iruña-ko zinegotzi emakumezkoa eta Lunbierko gizaseme bat il dira kamioko istripuz.

Gaurko ezbear negargarriak ikusita, aspaldi ikasi nuen bertso zaar bat datorkit gogora:

Ai, gure antziñako
guraso nobliak
zituzten legiak,
guk ainbat trabaju ta
petxarik gabiak!
Adelantua dala
uste du jendiak,
jarri dituztelako
trena ta tranbiak.
Ondoren datozenak
ez dira obiak.

Esan liteke bertsolari ark urrutira ikusi zuela zetorrena.

Abuztuak 22 - Ostirala

Goizetik lainotsu eta euri-langarra.

Gasteizen berrogeita amar urteko igeltseroa lanean ari zan, eta aldamiotik erori eta il egin da.

Millaka pertsona manifestatu da Bilboko kaleetan bere asarrea agertuz. Ezkerreko jendea da martxa ortan ibilli dana, eta Eusko Jaurilaritzaren eta Aralarren kontrako oiuaundiak jaulki dituzte. Gaiñontzean pakea izan da.

Bilboko kale batean, goizaldeko irurak laurden gutxitan, amabost urteko neskatoa ustez bi magrebiarrek bortxatu edo nai dituzten guztiak eginda utzi dute. Gaixoetxera eramana izan da neskatoa, baiña etxera itzuli omen dute bereala.

Arrazoi aundiz, ekintza orren kontra gogor mintzatu da jendea, agintaritzatik asita. Lotu ditzatela errudunak aal dan azkarrena, eta izan dezatela merezi duten zigorra. Orixe eskatzen du jendeak.

Orain, goazen txanponaren beste alderdia ikustera. Amabost urteko neskatoa, Aste Nagusia dala-ta, nola ibilli liteke ordu oietan kalean gurasoen edo lagunen laguntzarik gabe?

Azari zarrak nunai dabilta,
begiak dituzte ernai,
bildotsa edo arkumeren bat
nundik izango duten zai.
Amabost urteko neskatoak
festak bear ditu alai,
baiña goizeko ordu txikitan
ez da ibiltzeko garai.
Lengoko ura gelegia zan,
ta oraingoa ere bai.

Abuztuak 23 - Larunbata

Goizetik lainotsu eta naiko otz: amabost gradu.

Getarian ontzi txiki batean arrantzan zebillen gizona ito da, ontzia ondoratu bait zitzaion enbor bat jo-ta. Irurogeita bat urteko gizona zan, eta emaztea eta iru alaba utzi ditu.

Txirrindulari ingles bat il da Gaintxurizketan, kamioi baten kontra talka eginda. Hueskan ere beste txirrindulari bat il da, bizikletatik erorita.

Altza auzoan zortzi zakarrontzi erre dituzte kale-borroka-
riak, eta 15.000 euroren kalteak juzgatzen dute egin dituzte-
la. Inguruko kotxe eta abar, kalte aundiak izan dira.

Uste ez dala piztutzen zaigu
kale-borrokan sutea,
borrokalari oien jokera
ez ote da arlotea?
Jende jatorrak ezin txalotu
lan orretara joatea.
Norberetzako mesederik ez,
besterentzako kaltea.

Abuztuak 24 - Igandea

Goizetik eguraldi onaren etorrera baiña naiko otz: amairu
gradu besterik ez.

Cadizen lau gazte il dira festatik etxera zijoaztela beren
kotxeak kamioi batekin talka eginda.

Kordoban asarre baten bidez anai batek bestea il du, la-
banaz.

Sevillan lapurrak eta guardia zibillaren arteko tiroketan
lapur bat illa eta iru zauritu, oietako bat guardia zibilla.

Orion motorista bat oso larri zaurituta.

Bilbon kale batean neska gazte bat labankatua, ogeita
amaika urteko beste gazte batek.

Iran-era zijoan egazkin bat erori da Kirgistanen, eta iru-
rogeita amar ildako eta ogei bat bizirik gelditu diranak.

Gaur San Bartolome eguna degularik, erri prankotan fes-
tatan izango dira, eta badaukagu zerbaiten bearra.

Egunero negarra ez da komeniko,
bestela gauza onik ez da etorriko.
Mundu xeblebre ontan ez gaude betiko.
Jaun ona, errukitu zaitez gurekiko.

Abuztuak 25 - Asteleena

Goizetik lainotsu eta euri-langarra izan degu gaur.

Bilbon gizon batek bere etxebizitzako bizi-lagun gizonetz-koa labankatu nai izan du, etxeko lanak ez zituelako egiten.

Donostiako agintariak zigorrak ugaltzeko asmotan dira, billuzkeria nola ondartzetan ala kaletan ugaltzen dijoalako.

Mont Blanc mendian atzo, igande goizean, zortzi mendi-goizale ezkutatu ziran izotz-jauzi batek arrapatuta, eta gaur illak izango dirala juzkatu dute. Uda asi zan ezkerro eun mendigoizale baiño geiagok bizia galdu dute Frantziako Alpes mendi oietan.

Mendi oietan besterik ez da,
elurra eta izotza.
Esan liteke oien artean
nai degula eriotza.
Ta orain ere zortzikote bat
or gelditu da illotza.
Bai dala denbora gutxikoa
mendizale askon poza!

Abuztuak 26 - Asteartea

Goizetik laino eta eguzkia izango degun itxurarik ez.

Gaur ogeita bost urte ere ez genuen udaren itxura aundirik: ujolde bildurgarri batek zigortu zuen Euskalerrri geiena.

Ogeita bost urte beteak dira,
emen jendea larri zan:
kaltegarritzko ujolde latz bat
ustekabe etorri zan.
Denborarekin erri ugari
len baiño obeto jarri zan.
Itotakorik etzala piztu,
penagarria ori zan.

Itsasondon gazte bat il da laneko istripuan, milla kiloko tubo batek azpian arrapatuta. Bizkaian ere bi langille badira oso larri zaurituak.

Zanbranan bi kotxe eta kamioi batek alkar jo dute eta gizon bat il da.

Marzillan, festak dirala-ta, entzierroan bei batek berrogei-ta sei urteko gizona il du.

Senar-emazte argentinarrak ziran, iru ume gaztetxoren gurasoak eta Almerian bizi ziranak. Ogeita amabost urteko ama orrek ogeita emeretzi urteko bere senarra il du, sukaldeko labanaz.

Abuztuak 27 - Asteazkena

Goizetik laino, gerora eguzkiak irten naia.

Ogeita amabost urteko igeltsero batek bizia galdu du Azpeitian. Bazkalondoren sentitu zan gaizki zegoela, baiña lanera joan zan. Denbora luzean jarduterik etzuen izan ordea.

Bilbon Isozaki zubitik erorita gizon bat il da, eta kezka dago berak bere burua bota ote duen ala irristatuta eroria ote dan.

Iruran bi lagun lotu ditu ertzaiñak furgoneta batean lo zeuden bi lagun jotzeagatik.

Errepublikak Dominikarrear eta Haitin ujolde izugarriak izan dira, eta ogeita bi ildako gaiñera. Oso nazio beartsuak dira (ikusitako bat ari da idazten), eta an ere zakur argalari arkakosoak.

Haiti eta Dominikana,
alkarrekin bi nazio,
aberastasunean ez dute
zenbaitek ainbat bizio.
Ujolde aurren gaizki ziran ta
ondorenean gaizkio.
Zakur goseai arkakosoak
sarri etortzen zaizkio.

Abuztuak 28 - Osteguna

Goizetik uda-giro ederra eta gerora ere bai.

Gaur San Agustin aundiaren eguna degu, eta gure jaioterri Berrobin festak. Meza nagusian izan naiz, eta erretorea-ren sermoia entzuten nagoela bertso auxa bururatu zait:

O, San Agustin, zure bizitza
guretzat ez da arrotza;
denborarekin utzi zenuen
deabruaren morrontza.
Gu ere pekatari gerala
egiten degu aitortza.
Gure zaindari zeran ezkero
egizu bitartekotza.

Elizkizunaren ondoren erri-kirol jaialdi ederra izan da, eta arratsaldean sagardo-probaketa, pilota-partiduak eta erromeria.

Apustuak dirala-ta, erri-kirolak eta abar, dirua jokatu nai duenarentzat Eibarren zabaldu da Gipuzkoako leenengo joko-etxea. Ondoren an eta emen geiago zabalduko dirala ez dago zalantzarik. Adibidez, pilota-partidu batean dirua jokatu nai duenak ez dauka pilotalekura joan bearrik, ez aizkol-apustua jokatzen dan plazara ere. Suerte on.

Abuztuak 29 - Ostirala

Goizetik udako eguraldiaren etorrera.

Laredon gizon bat ondoezik aurkitzen zala eta andrearen laguntzaz Osakidetzara joan da. An errebisioa egin ondoren, senar-emazteak gaixoetxera bidean jarri dira anbulantzi batean. Anbulantzi orrek, orde, bidean istripu izugarria izan du, gizona iltzerainokoa eta andrea larri zaurituta. Gaur goizean gertatu da eriotz ori.

Eta au da gogorra: Anbulantziko txoferrak ez zeukala automobil ori gidatzeko baimenik. Ortatik aurrera zeuk juzkatu, irakurle.

Bi ildako izan dira Mendaron, kamioko istripuan.

Bilbon bizkartzain batek bi lagun zauritu ditu pistolaz; zaurituetakoa bat zaintzaillea zan baita, eta asarretu eta biak pistolak atera zituzten.

Aizoañen festetan daudela-eta, Berriozartik bost gazte zijoazten kotxe batean mendiko pistan. Kotxe ori amildu da, eta amalau eta amasei urteko bi gazte il dira. Besteak zaurituak.

Aizoain festan dagolarikan
istripuz illak bi gazte:
pozan lekura negarra etorri,
zeiñek pentsatu ainbeste?
Zauritu oiek sendatu bitez
gaitz guztietatik aske,
saia gaitezen il diranentzat
Jaunari zorion eske.

Abuztuak 30 - Larunbata

Goizetik bero eta trumoi-eguraldia. Gerora, bero ikaragarria, ego-aizearekin.

Malagan txofer batek bere burua eta besteak iltzeko asmotan abiada bizian jende multzoa arrapatu du, eta bederrazi lagun zauritu ditu.

Leitzan izan gera eztai batean Azpillaga bertsolaria eta biok. Mikel eta Mirenen ezkontzan, ain zuzen. Gaur askatasuna dago, baiña elizaz egiten diran ezkontzak grazi berezia dutela esan bear.

Etxarri Aranazko Borda jatetxe ederrean genuen bazkaria eta ondorena, eta ura zerua! Zorionak.

“Gizona ez dago bakarrik ondo,
eman deiogun laguna”,
ori da Adan egin zunean
Jaungoikoak esan zuna.

Agindu onen jarraipena da
Mikel-Mirenen jarduna.
Zorioneko ezkontza eta
zorioneko eguna.

Abuztuak 31 - Igandea

Goizetik beroaren etorrera.


Gertatu da gaur ere an eta emen kontu negargarririk.
Baiña oriek utzi eta alaiagoetara sartuko naiz.

Urteroko oiturari jarraituz, Artzai-Eguna egin da Uharte Arakillen, eta norgeiagoka guztien artean, gaztarena izan da. Eulateko Rikardo Remirok jaso du gazta onenaren saria, eta gazta orren erdia subastan saldu da 4.070 euro ordainduta. Puente la Reinako *Peregrino* eta Iruñako *Alhambra* jatetxetakoak izan dira subastako gazta-erdi ori eraman dutenak.

Artzai-txakurren zeingeiagoka Aresoko Alustizak irabazi du, Txiki txakurrarekin. Ardi-moztailleen saria, berriz, Eulateko Kristobal Gurgirentzat izan da. Aurki emen ditugu Ordi-ziako eta Oñatiko txapelketa famatuak ere, besteak beste. Artzantzaren onerako izan ditezela.

Uharte Arakillen feri ona
pentsatzen genun bezela;
era ortako oiartzunikan
etzun izango bestela.
Aitortu bear billera oiek
ugaltzen dijoazela.
Gure artzaien gorantzarako
danak izan ditezela.

Sanmieletan bero, emaitza ona gero



Irailak 1 - Astelena

Goizetik lainotsu baiña giro ederra aurreko beroen ondoren.

Irunen, oporrak igaro eta leenengo egunean lanera zijoan gizonezkoa il da kamioi batek azpian arrapatuta. Berrogeita iru urte zituen.

Lizartzan bi bizitzako etxe batean sua indartu eta naiko kalte larriak izan dituzte, suiltzaille eta auzotarrak denboraz itzali badituzte ere su-garrak. Norbaitek pikardiz egindako azioa ote dan errezeloa dago.

Ibarretxe Leendakariak oporrak igaro ondoren leenengo billera Donostiako Miramar jauregian egin du bere gobernuko kideekin. Bere itzaldian antzeman litekenez, urriaren 25ean egin nai zan galdeketaz naiko etsita dago. Jaurilaritzak ez omen dauka Europako auzitegira joaterik Espaiñiaren kontra, Espaiñiaren parte bat dalako. Politiko edo beste edozeinek ere bakoitzak bere suari putz.

Zakur txikiak aundian kontra
ez daduka zer egiñik;
ta alde ori ez al daukate
Euskadik eta Espaiñik?
Otaño batek esan zuena
ondo gogoan daukat nik:
Arrazoirikan ez daukagula
txiki ta gutxi izanik.

Irailak 2 - Asteartea

Goizetik lainotsu gaur ere baiña giro ederra.

Bi urteko neskato bat artzai-zakur batek ozka egin eta naiko larri da Azpeitian, eta gaixoetxera eraman dute. Ala ere, onera egin omen du.

Urruñan, itxurak diranez, senarrak emaztea il du, eta gero bere burua.

Madrilen bizi ziran senar-emazteak ziran, baiña Urruñan etxea zeukatelarik, aldika or bizitzen ziranak.

Alegin mutil batek neskari segitu dio atzetik bi labanarekin, eta neska taberna batean babestu da. Baiña labanaduna tabernara sartu eta an estuasunak ertzaiña etorri arte!

Nafarroan, kale-borrokariak diran ustez, zazpi gazte lotu ditu poliziak.

Nunai ikusten degu ezin konpondua,
borroka griña ori dago sakondua,
maitetasuna berriz oso atzendua.
Gurea da pakerik ez duen mundua.

Iraillak 3 - Asteazkena

Goizetik lainotsu eta euri-itxura.

Leengo asteleena ezkerro Aiako egoitzatik falta zan laro-geita bost urteko aitona ilda aurkitu dute mendian. Sasartean aurkitu dute, eta erorketaren bidez il da, ziartuenik.

Bizi naiak eraginda, Afrikatik Kanarietara jendez beteta zetorren kayuko batean amalau lagun il dira, nekez, gosez eta egarriz.

Berri tristeak etortzen dira
jendeak jakindu dezan.
Afrikar oiek an ezin bizi
ikusten duten pobrezan,
eta onera etortzerako
asko eriotzak etzan.
Pentsa al degu orien alde
zer egin ote genezan?
Edo bestela danok senide
geradela zertan esan?

Iraillak 4 - Osteguna

Goizetik lainotsu eta euri-itxura gaur ere.

Irurogeita amalau urteko gizon eibartarra kotxe batek arrapatu du Zestuan eta il egin da.

Donostian, iraillaren 7an eta 14an urteko estropadak dirala-eta, zazpi traiñeru aukeratzeko norgeiagoka izan da, ogeita iru traiñeruren artean, erlojuaren kontra. Onako auen artean erabakiko da Donostiako Bandera: Astillero, Orio, Urdaibai, Ondarribia, San Pedro, Castro, Tiran, eta Donostia neurketarik gabe sailkatua, bertakoa dalako. Zarautz, Pedreña eta beste batzuekin ere bazan itxaropena, baiña olaxe da jokoa.

Beraz, zortzi ontzi auen artean erabakiko da aurtengo Kontxako Ikurriña.

Zortzi ontzi leian ta bandera bakarra,
izango da oiua eta deadarra;
zazpi ondorenetik gelditu bearra.
Galtzen jakitea ere ez da gauza txarra.

Iraillak 5 - Ostirala

Goizetik lainotsu eta ego-aize epela. Euri-itxura.

Lekeition San Antolin jaiak dirala-ta, pilota-torneo edo norgeiagoka ospetsua jarri dute aurten ere, eta gaur jokatu da azkena. Emaitz onekin bukatu da: Gonzalez eta Barriolak 22, Berasaluze VIII-k eta Beginok, 16. Lau berdinketa izan ditu partiduak, azkenengoa amaseinakoa. Eta ortik ogeita bira zuzenean joan dira irabazleak.

Aurtengo udan, besteak beste, ederbegira dabil Berasaluze, bajualdi aundia igaro ondoren; baiña gaur Gonzalez izan da pilotalekuko nagusi. Itz gutxitan esateko, partidu ederra izan da.

Partidu asko telebistari
esker ikusten diranak,
zorionean aurkitzen gera
pilotazale geranak.
Bi bikoteak eman dituzte
eman zitezkean danak;
gozatu ederra artu ere bai
begira egon giñanak.

Iraillak 6 - Larunbata

Goizetik lainñotsu gaur ere euri-tanto batzuekin.

Zuriaiñen, Nafarroan, motozale gizonezko bat il da, ko-
txearekin alkar jota.

Sei gazte lotu ditu ertzaiñak Gasteizen, lantoki batetik
lapurretan arrapatuta.

Donostian Euskal Festak dirala-ta, Gipuzkoako Aizkolari
-txapelketa egin da bost partaiderekin. Burutu bearreko la-
na: launa kanaerdiko, launa 60 ontzako eta bina oinbiko.
Emaita: Azurmendik 33:19an ebaki ditu bere egurrak; Ola-
sagastik, 34:55ean; Txapartegik, 36:11n; Lasak, 36:39an;
eta Mugertzak, 39:34an.

Aizkolaritzak gaur ez daduka
len zeukan ainbeste gradu;
kale-giroa ugaldtu da ta
basomutillak bakandu,
ta Azurmendik Gipuzkoako
txapela jantzi ondradu.
Geiago ere jantzi lezazke
zintzo jarraitutzen badu.

Iraillak 7 - Igandea

Goizetik eguraldi onaren etorrera gaur, otz piska bate-
kin.

Ondarrabian Irungo ogeita lau urteko mutil gazte bat itsasora erorita ito da, goizaldeko 2:30etan.

Zumaian ogeita bederatzi urteko mutil gaztea moto-istri-puz larri zaurituta. Ertzaiñak gaixoetxera eraman du, elikop-terean.

Donostian urteko estropadak dirala-ta, gaur izan da leenengo jokaldia. Ustekabeko ederra eman du Castrok, 19:51n lanak eginda; bigarren Urdaibai eta Astillero izan dira, emezortzi segundo pasara; Orio, ogeita lau segundora; bosgarren, Ondarribi; seigarren, San Pedro; zazpigarren, Tiran; eta zortzigarren, Donostiarra. Datorren igandez erabakiko dira gauzak, baiña esan liteke Castrok banderaren erdia baiño geiago etxean daukala.

Zortzi traiñeru bi txandako
zuzenki zeuden jarriak,
andik aurrera ikus genitun
bakoitzaren alderdiak.
Gertatu dana, usteak ustel
izan ditula erdiak.
Iñork pentsatzen etzun lekutik
salto egin du erbiak.

Irailak 8 - Asteleena

Goizetik oso eguraldi onaren etorrera. Gerora bero ikaragarria, ego-aizearekin.

Donostiako Miramar jauregian Ibarretxe Leendakaria bere kideei itzaldi bat ematen ari zala, Tren Azkarraren kontrako emakumezko batek ekin dio, eta ixilduarazi egin dute. Era berdiñean ekin diona beste gazte bat ere izan da. Segurantziko indarrak kanpora atera dituzte gazte oiek; eta lagun geiago bildurik jauregiko atarian agertu dute beren asarrea.

Lizartzako Otaola alkate anderea erriko apaizarekin asarre omen da, meza nagusian bizkartzaiñak pistolarekin elizan ametitu ez dituelako.

Ondarrabian ere urteroko asarreak izan dira bi alardeak kalera irten dirala-ta.

Ezin konpondu ori badegu betiko,
nola erriko festaz edo itzaldiko.
Iñoren esanera ez gera jarriko.
Orrela pakerikan ez da etorriko.

Irailak 9 - Asteartea

Goizetik ego-aize epela eta indartsua eta lainotsu. Arratsaldean euria.

Bizkaiko Arrietan ogeita iru urteko mutil gazte bat il da, lau kurpilleko moto oietako batean mendian beera amilduta.

Gaur Arantzazuko Amaren eguna. Zizurkillen bada Elbarrrena deritzon auzo bat Arantzazuko Amari eskainitako elizarekin. Goizeko 11:30etan elizkizun ederra izan degu, eliza jendez beteta zalarik.

Arantzartean arantzik gabe
zeru-lurren Erregiña;
zure barruan Jainko semea
izan zan gizon egiña.
Gure Ama ere bazera, noski,
au da gure atsegiña.
Zer miraria bear bezela
konturatuko bagiña!

Pekatariak gerade, Ama,
argatik gabiltz itsusi;
eta arantza beste gauzarik
askotan ezin ikusi.
Bitartekotza egin zaiguzu,
eta erregutu Jesusi,
eriotzako ordu latz artan,
arren, ez gaitzala utzi!

Iraillak 10 - Asteazkena

Goizetik eguraldi onaren itxura. Gero oso bero.

Miranda de Argan, traktorea amilduta, irurogeita zazpi urteko gizona il da.

Tolosan bi gizonezko lotu ditu ertzaiñak, taberna bateko atea puskatu eta lapurretara zijoaztela.

Gaurko berriketa nagusiak Ordiziako feri sonatuan edo sariketan izan dan gaztaren irabaztuna, eta berarengatik subastan ordaindu dan dirutza izan dira. Nafarroako Eulateko Rikardo Remioren gazta izan da irabaztuna, eta gazta orren erdia subastan jarri dalarik, Tolosako Ezeiza gozo-e-txeak erosi du 6.700 euro ordainduta. Joan zan urtekoa baiño irureun euro geiago, alajaiña!

Sei milla eta zazpireun euro,
gazta erdia izanik...
Askok ez genun pentsatuko're
orrelakorik bazanik.
Propagandaren indarra degu,
ortan ez da zer esanik.
Negozorik ez omen dago
or saiatutzen ez danik.

Iraillak 11 - Osteguna

Goizetik lainotsu, eta euri-itxura. Arratsaldean euria.

Kalahorrako gizonezko eta emakumezko bat il dira Pradejonen, zijoazten furgoneta kamiotik irtenda. Irugarren bat ere bada larri zauritua.

Ikusten danez, Euskadin zeuden zergakin beste lurralde batzutakoak ez ziran konforme eta Europako auzitegira jo zuten. Orain, gurearen alde erori da epaia, eta ez dira asarre diputatuak eta Leendakaria.

Larrosak arantza urrean izaten dute orde, urriaren 25ean Leendakariak egin asmo duen galdeketari ezezkoa

eman dio Konstituzio tribunalak, legezkoa ez dala-ta. Gure agintariak diotenez, oraindik ez daude burua makurtzeko, ordea. Denboraz jakingo degu zer gertatzen dan.

Alde batetik poza da baiña
bestetikan naigabea.
Politika're ez da izango
gozo-mikatzik gabea.
Batzuek alde, besteak kontra
berotutzen da labea.
Komeni bada zuzen gaitzatzu,
zeru ta lurren Jabea.

Iraillak 12 - Ostirala

Goizetik lainotsu eta naiko otz. Baiña argitzera ematen du. Arratsalde z euria.

Ogeita amazapi urteko emakume bat lotu du ertzainak Arrasaten, bere ama jo eta iltzeko desapioa egin ondoren.

Bartzelonan seme batek bere aita il du, ama jotzen zuelako.

Murtzian emeretzi urteko bailarina bat il da, zaborra biltzen zebillen kamioi batek azpian arrapatuta.

Benedikto XVI.a Aita Santua Parisera joan da, eta Sarkozy presidenteak eta bere emazteak egin diote ongi-etorri. Beste millaka kristauk ere bai, noski. Biar Lourdesera joango da Amabirjiña agertu zala eunda berrogeita amar urte betetzen dirala-ta. Asteleen arte bertan izango da, millaka kristauk jarraitzen diotela. Munduaren onerako izan dedilla.

Aita Santua Parisen da gaur,
biar joango Lourdesa;
Amabirjiñari erregutzeko
ez da leku aldrebesa.
Astelen arte an izango da,
itzaldi, otoitz ta meza.
Iñoiz bada-ta premizko degu
Ama on baten babes.

Iraillak 13 - Larunbata

Goizetik naiko otz, eta euria. Gero ere eguraldi kaskarra.

Burgosko Frias errian iru gazte il dira, zijoazen kotxea kanal batera erorita.

Malagan bi emakume gazte il dira, eta irugarrena zaurituta gertatu, zijoazen kotxea kamiotik irtenda. Malagako Alfarnate errian gertatu da istripu au.

Donostiako Kontxan emakumezkoen zortzi traineruren arteko norgeiagoka jokatu da, eta lau leenengoak aukeratu dituzte biar Bandera jokatzeko: Getaria-Zumaia, Galizia, Ondarribia eta Astillero. Kanporatutakoak, berriz, Tolosa, Arkoite, Colera eta Badalona. Bi azkenengo aukeratuak Kataluñakoak dira. 2.778 metroko luzera korritu bearko dute emakumezko aukeratuak, gizonazkoen erdia bain zuzen.

Biarko dira bi bandera ta
bi txapeldun ikustea;
bat emakumezkoen degu ta
gizonazkoen bestea.
Besteak beste, emakumeen
arraunerako ustea.
Beste gauzarik ez genduke nai:
onak irabaztea.

Iraillak 14 - Igandea

Goizetik naiko otz gaur ere eta euria.

Madrilen andre batek bere gizona il du, labanaz.

Palman ogeita zortzi urteko emakumea illik aurkitu dute bere etxean. Itzaille gizona izan dan errezeloak dira, eta bera dago lotuta.

Erabaki dira Donostiako estropadak eta Banderak. Emakumezkoen leenengo saria Galizira joan da; bigarrena, Astillerora; irugarren, Getaria-Zumaira; eta laugarren Ondarribira.

Gizonezkoetan, geienok uste genuen bezela, Castro izan da Bandera eskuratu duena. Gaurko estropada Oriok irabazi du, baiña lau segundu kendu dizkio Castrori eta ogeita lau segundoren alde zeukanez, etzuten estuasun aundirik izan kantabriarrak. Irugarren Urdaibai gelditu da; laugarren, Astillero; bosgarren, San Pedro; seigarren, Ondarribia; zazpigarren, Tiran; eta zortzigarren, Donostia.

Estropadaren ondoren, aurrez debekatuta zegoen presoan aldeko manifestazioa irten da, eta bost lotutako eta zazpi zauritu izan da emaitza.

Millaka pertsona Donostiratu
egun on baten ustetan,
baiña kukuak oker jotzen du
amarretatik bostetan.
Sendi askotan ez dago pozik,
gazte asko espetxetan;
argatik dabil ainbat ixkanbil
Euskalerriko festetan.

Irailak 15 - Asteleena

Goizetik naiko otz eta lainotsu.

Deba eta Lekunberrin bi gizonezko il dira kamioko istripuetan, bat Legazpikoa eta bestea Lasartekoa.

Leengo ostiralez irurtzundar bat larri zauritu zana kamioko istripuan Iruñan, gaur il da Iruñako gaixoetxe batean.

Benedikto XVIa Aita Santua gaur egatu da Lourdesetik Erromara, Frantziako ibillaldia amaituta. Oso pozik joan omen da izan duen arrerarekin. Elizak naiko utsik omen daude Frantzian ere, euneko bost (%5) bakarrik joaten omen da igandetako elizkizunetara.

Nola Parisen ala Lourdesen
millaka pertson bildu da,
Aita Santua zetorrela-ta
danak bere ingurura.

Adiskideak, pentsamentu au
sarri datorkit burura:
sinismenetik baiño geiago
ote daukagun itxura.

Irailak 16 - Asteartea

Goizetik eguraldi tristea baiña argituko duen itxura.

Ogeita bederatzi urteko donostiar mendigoizale bat il da
Mont Blanc mendian amilduta, itxura danez.

Donostian motorista bat il da, kotxe batekin talka eginda.

Bilbon ETak polizi baten kotxean leergaia edo bonba jarri
eta kotxeak amar bat kilometro korritu ondoren, Basauriko
kuartelean konturatu da zer zekarren azpian itsatsita, eta
alaxe indargabetu dute bonba ori, okerrik gertatu gabe zorio-
nez.

Españiako Tribunal Gorenak legez kanpora utzi du ANV
alderdia Herri Batasunaren jarraitzailea dala-ta. Berrogeita
bi alkate eta lareun eta ogeita emeretzi zinegotzi dauzka par-
tidu orrek.

Madril aldeko ainbeste legek
jartzen gaituzte urduri,
ziartuenik zerbaite txarra
ikusten digute guri.
Gure gaiñera etorritzen da
ainbat kazkabar ta euri,
demokrazian bizi gerala
sarri gezurra diruri.

Irailak 17 - Asteazkena

Goizetik oso eguraldi onaren etorrera. Gerora, bero aun-
dia.

Iru langille il dira Espaiña eta Argelia arteko gasodukto-
ko langintzan tubo batzuk gaiñera erorita.

Tarragonan ogeita amazazpi urteko fabrika bateko langi-
llea il da tiroz, lapur batzuei aurpegia ematearren.

Berriro zigor gogorrak –zortzi eta amar urteko espetxea–
amabi lagunentzat Madril aldetik, ETaren laguntzailleak di-
ran susmoz.

Gu euskaldunak ez dadukagu
bear genuken indarrik,
aspaldi ontan nola gabiltzan
ez dago esan bearrik.
Laiño illunak ditugu sarri,
ez da ikusten izarrik.
Pakerik etorriko ote da
zigorrarekin bakarrik?

Irailak 18 - Osteguna

Goizetik laiñotsu eta euri-itxura.

Bere emaztearekin kotxean Madriletik datorrela istripu
latza izan du Gasteiz Irratiaren zuzendariak. Andrea antxe
bertan il da, eta bera larri zauritu.

Berriro Espaiñiako Tribunal Gorenak EHAK alderdia le-
gez kanpora utzi du, ANV bezelaxe ETaren ordezeko dala esa-
nez.

Madriletik badator lege eta arau,
ta gure kalterako bostetatikan lau.
Pakea lortutzeko bear ote da au?
Gure etorkizunak gogor bildurtzen nau!

Irailak 19 - Ostirala

Goizetik laiñotsu gaur ere eta eguraldi goibela.

Hernanin berrogeita iru urteko gizon bat lotu du er-
tzaiñak, bere andrea izandakoa jo du bi aurrak kentzea-
rren.

Sanmateoak dirala-ta, Logroñon gaur asi da pilota festa. Iru partidu badiran arren, Titin III-k eta Berasaluze VIII-k lau kuadro ta erdian jokatuکو dutena da erakargarriena. Emaizta: Titinek irabazi, 22 eta 17. Partidu ona ez da izan, tanto ederrak baziran arren, biak ere uts asko egin dute-eta. Arritzekoa al da egunero partidua izanik? Adibidez, biar ere partidua dauka Titinek leku berean.

Pilotarentzat txit festaleku
ederra degu Logroño;
eguraldiak lagun dezala
eguzki, aize ta laino.
Gure artetik jendea pranko
joaten zaigu bertaraino.
Beste gauzarik guk ezin opa
ondo pasatzea baino.

Irailak 20 - Larunbata

Goizetik bee-lainoa eta naiko otz. Gero eguraldi ona.

Bartzelonan emakume bat eta neska ume bat il dira, eta amaika zauritutako izan dira autobusak etxe baten kontra jota.

Bilbon bi gizon gazte lotu ditu ertzainak beren emazteak jotzeagatik.

Gasteizen Vital Kutxa txikitu du ETak leerketa baten bidez. Zauriturik ez da izan beintzat, denboraz abixua eman zutelako.

Logroñon pilota-partiduan ustekabeko ederra izan da. Emaizta: Olaizola II-k eta Barriolak 22, Titin III-k eta Beginok, 5. Joan zan abuztuan partidu bera jokatu zan Donostian, eta gaurko irabazleak baldin baziran ere, 19 tanto egin zituzten gailtzailleak, eta partidu ederra izan zan. Gaur ere itxaropen orrekin bete da pilotaleku guztia. Leku ederrean gelditu dira, ordea.

Ustekabeko ederra gaur'e
Logroñon pasea dago,
ta Adarraga ikusitzen zan
iñoiz baiño ederrago.
Pilota biribilla degula
askotan esanda nago.
Jokoa ez da errenta eta
partidutan areago.

Iraillak 21 - Igandea

Goizetik eguraldi onaren etorrera.

Donostiako kale batean ogeita amabost urteko gazte bat aurkitu du poliziak larri zaurituta. Gaixoetxera eraman dute, baiña laster il da. Norbaitzuek gogor zaurituta utzi zuten errezeloa dago.

Oñatin oporretan zegoen katalandar bat Arantzazutik beera oiñez zetorrela kotxe batek arrapatuta il da. Irurogeita zazpi urte zeuzkan.

Ondarroan ETAk eun kilo leergai zeuzkan kotxe bat leerta-razi du ertzaiñaren kuartelaren aurrean. Kalte aundiak kuartelean, sei ertzain eta beste bost lagun zaurituta. Zaurituetako ertzain baten emazteak onela zioen: Onela ez dago bizitzerik!

Emazte onek arrazoi ona
edozeiñentzat eman du.
Esango genuke oker ori
etxean baldin bagendu.
Gertakari onek gerra zibillan
ataria ematen du.
Oraindik garaiz egon gindezke,
gero izan leike berandu.

Iraillak 22 - Asteleena

Goizetik laiñotsu baiña altxatzeko itxura dauka eguraldiak.

Andaluzian, Madrilen, Kataluñan eta abar ujolde gogorak izan dira ildako bat eta lau zauriturekin. Gaiñontzeko kalteak ere aundiak.

Zaragozan eiztari bat il da bere deskuidoz eskupeta disparatuta.

Valladoliden gizon batek bere emazte izandua il du, laban-kadaz.

Hueskan irurogeita bost urteko gizon bat il da, erleak erasota.

Santoñan berrogeita sei urteko militar brigada bat il da, eta sei geiago zauritu, bat oso larri gainera, ETAk jarritako kotxe-bonba batek leer eginda.

Eguneroko kanta, kontu berdiñakin,
asko gozatu gabe zero urdiñakin,
bonba eta lerketak negar-zotiñakin.
Ondoren zer datorren Jaungoikoak jakin.

Iraillak 23 - Asteartea

Goizetik laino asko baiña eguzkia ere irten naian.

Kotxe baten zijoazten bost langille atzeritar il dira, kotxea mendian beera amilduta, Lleidan.

Toledon egazkiñetik saltatutako parakaidista bat il da, lurraren kontra gogor jota.

Finlandian ogeita bi urteko gazte batek estudiotako bere amar lagun il ditu pistolaz eskolara sartuta, eta ondoren bere burua il du.

Frantzian, Trelinsen, neska eta mutil bat, itxuraz ETAkoak, lotu ditu poliziak baso batean. Biak armatuak zeuden eta ostutako bi kotxe zeuzkaten, esan dutenez. Toldozko aterpe bat zeukaten lotarako eta gaiñontzekotarako.

Berri tristeaz osatutzen da
nere egunerokoa,
gaurko mundua etzaigu jarri
pakearen girokoa.
Larrosa pranko badegu baiña,
ez arantzik gabekoa.
Orain orrela gabiltza eta
zer ote da gerokoa?

Iraillak 24 - Asteazkena

Goizetik laino arteko eguzkiaren etorrera eta naiko otz.

Iparraldean amalau lagun lotu ditu poliziak, ETAkoak diralakoan.

Bilbon ogeita lau urteko langille gazte bat il da teillatutik erorita.

Valentzian ogeita iru urteko gazte batek bere osaba kamioiarekin arrapatu eta il du. Aurrez izeba baten illetan izan eta gogor asarretu omen ziran biak. Illoba orrek bere gogoz egin omen du azio txar ori.

Valentzian eta inguruetan ujoldeak eta arri-erauntsiak kalte aundiak egin dituzte. Irureun eta ogeita amar litro euri erori ziralarik lau orduan metro kuadroko.

Alde askotatik badatorkigu
ujoldearen kantua,
oraingo ontan Valentzin degu
zigor gogorran kontua.
Urrengoa nun izango ote dan
nik dedan pentsamentua.
Bada ezpadare piztu dezagun
kandela bedeinkatua.

Iraillak 25 - Osteguna

Goizetik otz xamar egin du gaur ere baiña eguraldi onaren etorrera.

Gasteizen ogeita amabost urteko gizon bat lotu du ertzaiñak bere emakume laguna kalean jotzeagatik.

Berantebilla errian (Araba) furgoneta bat bere bidetik irten eta bertan zijoaztenetako bat il da eta beste zazpi zauritu.

Zumarragan kamioi bati amar toneladako burni-pieza bat erori zaio, eta kotxe baten gaiñera erori, eta bertan zijoan berrogeita zortzi urteko debarra il da.

Norbera ondo joanagatikan
etortzen da erioa,
Jaungoikoari eskatu bear
gero erremedioa.
Sendi askotan ugaldutzen da
sarri negar-jarioa.
Gerra bat bezin bildurgarria
jarri zaigu kamioa.

Iraillak 26 - Ostirala

Goizetik otz xamar gaur ere baiña eguzkiaren etorrera onarekin.

Ogeita sei urteko gazte bat lotu du ertzaiñak Donostian, iru kotxetatik lapurretan egiteagatik.

Arabako Arrazua-Ubarrundian iru ertzain motorista larri zauritu dira kotxe batek bidean arrapatuta. Kotxea kontrabidetik zijoan, esan dutenez.

Donostian berrogeita bat urteko gizon bat lotu du ertzaiñak, bere emaztea kale gorrian jo eta lurrera bota duela-ko. Ori gutxi balitz, berriz, etorri ziran ertzaiñei ere gogor ekin zien.

Ertzaiñak ere lanikan asko
badute zenbait alditan,
bearrezkoak jarri zirala
aitortu bear egitan.

Zer gertatzen da gure izaeran,
zer gertatzen da senditan?
Danok erotu ote geraden
pentsatu izan det sarritan.

Irailak 27 - Larunbata

Goizetik oso otz gaur, bederatzi gradu; gero oso eguraldi ederra.

Bilbon, etxe batean gizon bat lagun zuela lapurretan ari zan emakumea lotu du ertzaiñak. Dalako emakumea kuartelera zeramakitela, erditzen (partoan) jarri zan eta anbulantzi batean gaixotxera eraman bear izan zuten.

Elgoibarren amabost urteko neskato bat kotxeak arrapatu eta larri zauritua da. Hernanin, Baskonia Banku-etxeko kajeroa erre dute ezezagun batzuek.

Suaren mende sarri dauzkagu kaleak;
nolaz jarri gera gu ain gerra zaleak?
Askotan pagatzen du errurik gabeak.
Arren, zuzen gaitzala guztion Jabeak.

Irailak 28 - Igandea

Goizetik otz pixka batekin asi da eguna baiña eguraldi zoragarria.

Tolosako zezen-plazan arrijasotzen ikusi liteken apusturik zoragarrienetako bat ikusi degu. Aiako Izeta II-a eta Errezilgo Aimar Irigoienaren arteko auzia, amaika arroako arri kubikoarekin, iru amarrekotara. Eta errezildarra izan da irabaztun, marka arrigarria eginda.

Aimarri egokitu zaio lanean astea, eta leenengo amar minututan ogeita emezortzi jasoaldi eman dizkio arriari. Ondoren Izetak ere beste 38 jasoaldi. Bigarrenez Aimarrek, 38 baita ere. Izetak, berriro ere, 38 jasoaldi. Irugarrenean, errezildarrak danok aoa zabalik utzi gaitu 39 jasoaldi on eginda. Guztira eunda

amabost (115) jasoaldi, alajaiña! Irugarren txandan Izetak 32 aldiz jaso du arria, guztira eunda zortzi jasoaldi osatuz.

Urrezko letretan istorirako geldituko dan apustua izango dala auxe esango nuke.

Apustuaren etekiña da
galdu edo irabazi,
baiña nunaitan ez da ikusten
Tolosan ainbeste grazi.
Errezildarra ematen dizkat
milla zorion berezi.
Apustu orrek etzun, ordea,
galtzailerikan merezi.

Iraillak 29 - Asteleena

Goizetik atzoko eguraldiaren antzekoa eta udazken onen bat izango degun itxaropenak dira. Gaur San Migel eguna da, eta jaiak erri prankotan. Etxeberriak eta biok Urnietan genituen bertsozko eginkizunak, urteroko gisara. Eta ondo igaro degula esan bear. Nola meza nagusian ala erriko plazan bazan jendea, arrenek ez ezik! San Migel egunez Urnietak badu zerbait berezia. Erriko odol-emalteei, berriz, omenalditxo bat eskaiñi die Udalak, besteak beste.

O, San Migel Goiaingerua,
Urnietako zaindari,
ikusi degu zure gorantzan
dala ekintza ugari.
Erria berriz pozetan dabil
otoitzez eta kantari.
Bitartekotza egin zaiguzu
sinistun geradenari.

Iraillak 30 - Asteartea

Goizetik lainotsu eta euri-tanto batzuk.


Gasteizen, Ilarraza errekan, irurogeita amairu urteko gi-zonezko bat illotza aurkitu du ertzaiñak.

Bilbon, emeretzi urteko mutil gazte batek beste gazte bat labankatu eta larri zaurituta utzi du.

Txalupa edo kayuko batean berreun da ogeita bederatzi afrikar iritsi dira Kanarietara, bizi bearrak eraginda. Orain-goz osasuntsu aurkitzen dirala esan dute.

Txalupa baten sartzen dirade
bizi naiak eraginda,
bizia arriskatzen dutela
aldez aurretik jakinda.
Kanarietan larri dabilta
danak kabitu ezinda.
Mundua ez al leike obetu
azterketa bat eginda?

Urria urri, ilunabarretan igarri



Urriak 1 - Asteazkena

Goizetik lainñotsu baiña gorrotozik gabe.

Granadan ejerzitoko kabo batek bere lagunkide emakumea il du, eta ondoren bere burua.

Errenterian gazte bat lotu du ertzaiñak, sei motozikleta lapurtzera zijoala.

Nafarroan lau gazte lotu ditu poliziak kale-borrokariak diralakoa, eta ETArekin bat eginda daudelakoa.

Aspaldin ez daukagu guk beste konturik,
guregana ez dator pozteko kanturik.
Espetxera bidean gazteak loturik,
aurki izango al da danentzat lekurik?

Urriak 2 - Osteguna

Goizetik lainñotsu eta euri-itxura.

Gasteizen ogei urteko mutil gazte bat lotu du ertzaiñak, kalean emakume bat beartu eta gaizki tratatzeagatik.

Galdakaon gizon bat lotu du ertzaiñak baita ere, pistola dirudien jostaillu batekin ikaratuta kotxea lapurtzearren.

Bi polizia espetxeratu dituzte Marbellan emagaldutako batzuri nai dituzten guztiak egitearren beren borondatearen kontra. Polizia geiago ere bai omen ziran festa orretan.

Ordena jarri bear dutenak
orrela asten badira,
basati utsa jarriko zaigu
gizartearen segira.
Zigorrik ere bai ote dago
komeni zaien neurrira?
Eta zigorrik ez dan lekuan
legeak alperrik dira.

Urriak 3 - Ostirala

Goizetik euria gogotik eta mendi altuetarako elurra izango dala esan digute.

Lesakan, gaurko berriak diotenez, amasei urteko mutiko batek bost urteko neskatoa bortxatu du. Nik ezin det sinistu.

Giro euritsua izan dalarik, Gipuzkoako kamiotan izan da naiko istripu. Lau bat zauritu beste oker aundirik ez izan ordea, zorionez.

Tolosako Juzgaduan ETAk poltsa-bonba bat leertarazi du. Aurrez abixua eman zutelako, eta ertzaiñaren ekintzari esker, ildakorik eta zauriturik ez da beintzat. Gaiñontzeko kalteak aundiak dira, baiña konponduko dira.

Egun batean indartu giñan
jokaera txarrerako,
onduko geran itxurarikan
ez daukagu aurrerako.
Gaur badakigu nola gabiltzan,
zer ote degu biarko?
Aurrez abixu ematen dute,
gaitzerdi esan bearko.

Urriak 4 - Larunbata

Goizetik naiko otz eta euri-itxura.

Lezaman Eusko Trenaren geltokia erre du ezezagun talde batek su emanda.

Millaka pertsona manifestatu da Bilbon alderdiak edo partiduak legez kanpora utzi dituztelako. Garai zail eta gogorretan bizi gera, esan du alkate jaunak, eta ziurtatu du ezker abertzaleak ez diola utziko kale-borrokari berak eskatzen dituenak iritsi arte.

Bilboko alkate jaun orrek
zein ez du jarri pentsakor?
Ikusten ditugunak ikusiz
arrazoi izango du or.
Bakoitzak bere astoari arre
txit setatsu eta gogor.
Mirarin bat gertatu ezean
emen gauz onik ez dator.

Urriak 5 - Igandea

Goizetik oso otz egin du baiña eguraldi ederraren etorrera gerora.

Egon litezke kontentu *Kilometrotako* antolatzaillak eta irurarrak, gauzak ez zegoen obeto irtetzerik-eta, eguralditik asita. Zer izan da gaurkoa!

Ez det Irurara joaterik izan, baiña emazteak ekarri dizkit ango berriak. Ibiltzeko ere gozamenik ez, noski, jendearen ugaltasunez. Gure euskeraren onerako izan dedilla guztia. Izango du zerbaiten bearra, gaixoak.

Beste garaipen bat Edurne Pasaban tolosar neska gazteak: Amaikagarren zortzi millakoa igo du, alajaiña! Manaslu deritzon mendia, ain zuzen. Amalau igotzeko ametsak omen ditu. Zorionak eta suerte on ona opa diot.

Dana galera ez degu emen,
baditugu garaipenak;
Irurarekin poztu gerade
euskeran alde gaudenak.
Ta arritzeko dira benetan
Edurne Pasabanenak!
Erri txikia izanagatik
askotan gera onenak.

Urriak 6 - Asteleena

Goizetik eguraldi ederraren etorrera gaur.

Irurogeita bi urteko Altsasuko gizonezko bat il da Etxarri Aranatzan, laneko istripuz.

Bi lagun lotu ditu ertzaiñak kale-borrokariak diralakoa.

Leengo ostiralez ETak leertuarazi zuen bonbak Tolosan egin zituen kalteak 400.000 eurokoak juzgatzen dituzte. Iru bat illabeteko lanak bai omen dira oker guztiak zuzentzen.

Danok nozitu bearko degu
emengo pakerik eza,
ta ikusten diranak ikusiz
bat jarritzen da zer pentsa.
Bide ortatik ugaltzen dira
gorrotoa ta lainjeza.
Kalteak samur egin litezke,
zuzentzea da nekeza.

Urriak 7 - Asteartea

Goizetik epel xamar, lainñotsu eta euri-itxura.

Santurtzin irurogeita zazpi urteko Portugaleteko emakumearen gorputz illotza aurkitu dute itsasoan. Leengo asteleena ezkerro falta omen zan etxetik.

Bilbon bi gizonezko eta emakumezko bat lotu ditu ertzaiñak taberna batetik 6.000 euro lapurtzearren.

Gasteizen Juan Mari Arzak sukaldariak “Euskaldun eza-guna munduan” saria jaso du Leendakariaren eskutik. Ospakizun entzutetsua, benetan.

Ondo merezitako gorantzak
Juan Marik jaso ditunak,
berari esker mundu guztian
egin gera ezagunak.
Aitortzen degu akatsik asko
badegula euskaldunak,
baiña jan-edan kontu orretan
nagusi ta txapeldunak.

Urriak 8 - Asteazkena

Goizetik euria eta egun goibela.

Erretereriako ogeita lau urteko andre bat il da Lekunber-
rrin izandako kotxe-istripu batean. Bere urte beteko seme-
txoa ere larri zauritua da, eta beste bi lagun ere badira zau-
rituak istripu berean.

Gotzon Garate jesuita il da Bilbon, irurogeita amalau ur-
terekin. Elizgizona izateaz gaiñera, euskal-baratzan nabar-
mendu zan geiena bere idazlanetan eta abar, Ameriketatik
joan-etorri asko egin zituen arren. Elgoibarko semea zan, eta
biar izango da bere animaren aldeko illeta Deustuko Uniber-
tsidadean. Loiolan illobiratuko dute. Goian bego.

“Euskalerrria euskerik gabe
ezin zeikela ulertu”
amaika aldiz esan zuena,
iñork nai badu aztertu.
Berari esker ainbat landare
euskal-baratzan agertu;
Deustuko Unibertsidadea
etzuen gutxi edertu.

Besteak beste, basarritz-basarri
sarri xamar ibilli zan,
gure izkuntzan kabi goxoak
oiek dirala zeritzan.
Ta euskeraren kezka orrekin
beti lanean bizi zan.
Orain atsedean artu dezala
azkenik ez dun bizitzan.

Urriak 9 - Osteguna

Goizetik bee-laiño itsua eta naiko otz.

Iru lagun lotu ditu gaur ertzaiñak Bilbon, ogeita lau ur-
teko kolonbiar emakume bat dantzalekutik artu eta gela

batera eraman ondoren nai zituzten guztiak egin zizkiotela-ko. Ikusten danez, alkohola edo drogaren bidez emakume ori zentzugabetu zuten aurrena. Emakumea gaixoetxean aurkitzen da.

Izenik ez duten eraso oiek
gaur bai indar daukatela.
Emakumeak ibilli bear
bildurra dariotela.
Justizirikan baldin balego
bear litzaken bezela,
iruditzen zait ainbeste oker
izango ez genukela.

Urriak 10 - Ostirala

Goizetik otz gaur ere baiña eguraldi onaren etorrera.

Berrogeita amairu urteko irundar bat Zubeltzu mendian uso-parada daukan torre batean usoen zai dagoela erori eta il da.

Ziburun (iparraldean) egurrez kargatuta zijoan kamioi bati bere karga erori eta kotxe batean lanera zijoazen iru langille azpian arrapatu eta irurak il dira. Etxegintzako langilleak ziran. Bi, ogeita bat urtekoa eta ogeita zazpikoa, bestea, ogei ta zazpikoa. Bestea, berriz, ogeita zortzi urtekoa, portugaldarra. Kamioiko txoferra eta beste kotxe batean zijoana ere larri zaurituak.

Valentzian ujoldeak eta berrogeita zazpi urteko ama eta amalauko alaba urak eramanda il dira.

Bilbon, berrogeita zortzi urteko gizonezkoa il da laneko istripuz.

Asko pentsatzen ez dan garaian
sarri dator eriotza,
sasoi ederra dadukan pranko
gelditutzen da illotza,

eta beroien sendietara
berriz ezpata zorrotza,
edo obeto esatekotan
lurmentzen ez dan izotza.

Urriak 11 - Larunbata

Goizetik epel eta ego-aizea.

Irunen iru lagunekin zijoan egazkin txiki bat erori da, eta irurak onik atera dira, zorionez.

Goizeko bostak eta erdietan Bilboko kaleetan bakarrik zebillen neska gazte bat bortxatu dute. Basatikeri izugarria, noski. Baiña neska gaztea kalean bakarrik ibiltzeko orduak al dira oiek?

Salbatierran bi banku-etxe atakatu dituzte ezezagun batzuek.

Onetik gutxi degu, asko txarrerako;
pauso asko dauzkagu gure galerako.
Jarriko ote gera bide onerako
gorrotorikan gabe aldamenerako?

Urriak 12 - Igandea, Andre mari garotako

Goizetik oso epel egin du, ego-aizea.

Gaur betetzen dira ogeita bost urte Euskal Telebistak leenengo pilota-partidua eman zuela. Ori dala-ta, Donostiako Atano III-an pilota-jaialdi aundia izan da gaur arratsaldean. Leenengo maillako iru partidua erakargarri antolatu dituzte. Usteak erdia ustela izan du, orde, gaur ere. Leenengo partidua bi-bitarakoa izan da, Berasaluze VIII eta Laskurain 22ra iritsi dira, bederatzi tantorekin Olaizola I eta Begino geldituta.

Bigarren partidua buruz-burukoa izan da. Irujo ogeita bi tantora iritsi da, Barriola lau tantorekin utzita.

Irugarren partidua, lau kuadro ta erdikoa izan da. Eta frontoi guztian txapeldun dagoen Bengoetxea VI-a, eta lau kuadro ta erdiko txapelduna dan Titin III-ren artean. Emaizta: Bengoetxeak 22, eta Titinek 20. Partidu zoragarriagorik ez dago ikusterik. Eta onek bete du aurreko bi partidutako utsunea. Zorionak Euskal Telebistari eta aurrera jarrai deza-la orain arte bezelaxe.

Iru partidu, lenengo biak
burrukarikan gabeak;
baiña irugarrenko orretan
berotu dira labeak.
Nola frontoi ala telebista,
gozatu giñan jendeak...
Nai dan guztian ez dira izaten
olako arratsaldeak.

Urriak 13 - Asteleena

Goizetik eguraldi onaren etorrera.

Albazeten eiztari batek irurogeita bost urteko eiztari laguna il du, basurdea zala pentsatuta tiroa tirata.

Arantzazun Artzai-Eskola berria zabaldu dute Gomiztegi baserria dagoen lekuan. Ospakizun ortan bertan izan dira Ibarretxe Leendakaria eta Eusko Jaurlaritzako beste kide batzuek ere.

Arantzazutik albiste onak
etortzen zaizkigu noiznai.
Berritu bear dana berritu,
izanik ortarako gai.
Aitortu bear gure au dala
aldaketarako garai.
Kristau-eskola genun lenago,
orain artzaiena ere bai.

Urriak 14 - Asteartea

Goizetik lainotsu eta goibel. Bart euri asko egin du

Guardia zibil izandu baten gorputza eta bere emaztearena aurkitu dituzte Granadako baserri batean. Errezeloak dira gizonak emaztea il zuela leenengo eta gero bere burua.

Lizarran berrogeita amaika urteko emakume baten arrastorik ez da. Bere lagun-kide izan zana lotu du poliziak, onen azioa ote dan errezelotan.

Ogeita amar lagun lotu ditu poliziak Txinatik alkohola eta tabakoa kontrabandoan ekartzegatik. Irundik asi eta ia Espainia guztian zabaltzen zuten kontrabandoan ekarritako emaitza ori, itxura danez.

Kontrabandoa ere jarri zun
legea jarri zuenak,
eta gaur egun darabizkigu
urrutitik datozenak.
Dirua tarten baldin badago
argitzen gera geienak.
Sarri kartzelan sartzen dituzte
erru gutxiña dutenak.

Urriak 15 - Asteazkena

Goizetik lainoak urruntzen eta eguraldi onaren itxura.

Gasteizen berrogeita lau urteko gizonezko bat il da laneko istripuan, amasei metro alturako teillatu batetik erorita.

Erandion bizkartzain baten kotxea erre dute gaizkille batzuek. Inguruetakoa beste bi autok ere naiko kalte larriak izan dituzte nonbait.

Amagiarreba (emaztearen ama) naiko bizkor zebillen larogeita amairu urterekin, jaiero mezetara joanez eta abar. Baiña illaren 9an ondoezik nabaritu ta Tolosako Asunzion gaixoetxera eramán zuten, eta gaur operatu dute. Momentuz ondo xamar dago, zorionez.

Larogeita amairu
urteko amona
operatuta gaixo-
-etxen zegona,
zortzi seme-alaba
azita dagona,
“iltzerikan ez det nai”
sarritan ziona.
Ain da amon ona,
genuen danona;
etorri zaiona
ezta zoriona...
Gerta bedi Jainkoai
dagokiona.

Urriak 16 - Osteguna

Goizetik eguraldi ona eta euria txarrastaka.

Egun aundia izan da Billabonarako gaur. Goizean leenengo BM deritzon supermerkatu aundi baten zabaltzea izan da. Leen Eroski geneukan eta orain bigarrena andik urbil. Ez ote dira geiegi izango?

Goizeko 11:30etan, berriz, Xenpelar Zentroa eta Bertsozale Elkartea izango dan Mintzola deituko dan etxearen zabaltzea egin da, Aldun Nagusia, Eusko Jaurlaritzako kultura sailburua, bertsolarien leendakaria, Kutzako ordezkaria, Billabonako alkate anderea eta ainbat goi-maillako bertan dirala.

Arratsaldeko 6:30etan izan du jarraipena Billabonako kaleetan bertsolariekin, Mintzolan bertso-saio, dantzari, arrantxo eta erromeriarekin amaituz. Bertsolari eta bertsozale, jende pilla ederra bildu gera. Besteak beste, Iñaki Murua bertsozale elkarteburuaren itzaldia ere ederra izan da, laguntzaille eta gaiñerakoei eskerrak emanez.

Etxekoandreak BM orretan,
ai, zer aukera daukaten!
Aruntz joan eta oso zailla da
saski utsakin irteten.

Mintzola, berriz, erreza dago
zertarako dan esaten:
bertsolaritzak eta euskerak
etxea izan dezaten.

Urriak 17 – Ostirala

Goizetik euria gaur ere. Bart ere dexente egin izango du.

Guadalajaran berrogeita amar furgoneta zeuden ortarako dagon leku batean, eta danak erre edo kiskali dira. Oien artean bi mutil gazte ere bai, emeretzi eta ogeita amaika urtekoak.

Euskadin jarri asmotan diran Tren Azkarrek larogei tunel izango ditu esan dutenez, eta oietatik leenengoa zabaldu dute Ubarrundia eta Legotianoren artean. 970 metrokoa, esan dutenez.

Tren azkar ori bistan ainbeste
ibilliko da lurpean:
larogei tunel bai omen ditu
Euskalerriko partean.
Kontra daudenak ere badira
naikoa gure artean,
ta eztabaidak bukatu bitez
amaitzen duten urtean.

Urriak 18 – Larunbata

Goizetik laino batzuk baiña eguraldi onaren itxura. Erabat jota, udazken ona dijoala esan liteke. Baiña bada keja dan jenderik: Eiztariak, batez ere. Ego-aizea nai usotarako, eta oraindik bi egun bakarrik izan dira olakoak.

Oñatin ogeita amazazpi urteko gizona il da, lan-istri-puan.

Sondikan txofer-ikasketak egiteko lekuan bi autobus eta iru kamioi erre dituzte, pikardiz. Ertzaiñak gogor ekin dio gaizkilleen billa.

Ogeita bost urte betetzen dirala-eta, Tolosako bi gazte, Lasa eta Zabala, GALEk il zituela-ta, manifestazioa antolatu dute errian. Baiña Garzonek galerazi egin baitu, naiko ixkan-billa izan da ertzaiña eta manifestatzailleen artean. Sei gazte lotu dituzte.

Bi gazte il zituztela ogeita bost urte,
oraindik naigabea ematen digute.
Utsa oker aundi bat izandu balute.
Ildakok oroimen bat mereziko dute.

Ondarrabiko Itsas-Eder ontziko arrantzaleak berreunda ogeita amairu kilo pixatu dituen atuna arrapatu dute. Ori dek ori!

Itsas-Ederrek barruratu du
iñork pentsatzen etzuna.
Ez da izango txantxetakoa
era ortako atuna!
Arrai kontuan bada aukera,
ariña edo astuna.
Ortatik pentsa itsaso orrek
daukan aberastasuna.

Urriak 19 - Igandea

Goizetik preskura ederra eta eguraldi zoragarriaren etorrera. Ego-aizerik ez, ordea. Ala ere, eiztari batek esan didanez, uso-pasa ikaragarria izan omen da gaur. Baiña oso goitik joan dira. Esaerak diona: "Pasa".

Nafarroa oiñez egin da gaur Iruñan, Jaso ikastolaren alde. Eta antolatzaillak pozik omen dira, millaka pertsona partaide izan diralako. Badago zerbaiten bearra Nafarroa alde orretan ere.

Iruñan ospatu da Nafarroa Oiñez,
bertako kale danak jendeakin gainez.
Euskerak artutzeko bear ainbait lainez,
trenez, automobillez edo egazkiñez...
Aldekoak komeni, kontrakorik bein'ez

Canadako gobernuak ETako Iban Apaolaza Espainiaratu
du. 2007garren urtean atxilotu zuten mutil au Quebec-en.

Naiz emendik aldegin oso urrutira,
ekarritzen dituzte beren barrutira.
ETA bukatutzea emen komeni da,
ta bildu ditezela beren familira,
maitasun danak utzi zituzten tokira.

Urriak 20 – Asteleena

Goizean ego-aize epel eta indartsua gaur. Eiztarien goza-
mena!

Urriaren 10ean asi zan lau koadro ta erdiko eskuzko pi-
lota-txapelketa nagusia, ogei pilotari partaide dirala. Eta
gaur jokatu da zortzigarren partidua Tolosako Beotibarren.
Eta istorirako geldituko da, seguru asko. Alde batetik, Ben-
goetxea VI zan, frontoi guztiko txapelduna. Gaiñera, neurri
berean txapeldun dagoen Titin III oso estu artu zuen oraindik
orain Donostian. Gaur, ala egokitu dalako, profesional mai-
llara sartu berria dan Mikel Olazabal zuen kontrario. Beraz,
leitzarra eta aresoarra leia bizian. Baiña zeruak lurra jotzea
ainbat ez genuen pentsatzen txapeldunak partidu ori galtze-
rik, eta Olazabal gertatu da irabazle, 22 eta 16. Emaizta iku-
sita ere ezin sinesturik pilotazaleak. Aurrez nion bezela, isto-
rirako partidua izan da.

Leengo larunbatez ondarrabiarrak berreun da ogeita
amairu kiloko atuna arrapatu bazuten, gaur Donibane Lohi-
zundarrak irureun eta ogeita bost kilokoa arrapatu dute,
alajaiñetan! Ondarrabiko ori 3.600 euro pagatu zuten enkan-

tean (subastan), Madrileko japoniar jatetxe baterako. Bigarren ori, berriz, 3.380 euroan erosi dute emengo arraindegietan saltzeko. Badago arraia, arranek ezpaitu!

Esker oneko bear genuke
guk itsaso orrengana;
berarengandik ainbeste arrai
etortzen da guregana.
Oraingo aldiz atun aunditan
emankor agertzen dana.
Arrantzaleen irabazia,
guretzat berriz zer jana.

Urriak 21 - Asteartea

Goizetik epel gaur ere baiña euri-itxura. Arratsaldeaz euria oparo.

Gasteizen Durangoko kamioi bateko txoferra il da, kamioiko istripuan. Berrogeita amairu urteko gizonezkoa, ain zuzen.

Pontevedran ogeita amabi urteko gazte bat guardia zibillarengana entregatu da, burni batekin bere aita il duela esanez, eta ama eta anaia zauritu gaiñera.

Ea-n baserritar bat il da traktorea amilduta.

Jerezen ogeita amabost urteko eta bost illabetez familia izateko zegoen emakume bat il ditu bere lagun-kideak, labanaz.

Jorge Oteiza artista aundia jaio zala eun urte betetzen dirala-ta, gorantza pranko izan du gaur. Jakintsua izango zala ez dago zalantzarik, baiña erri xeeak ulertu ote du aren lana? Gaiñera, Orion jaioa izanik, euskeraz ez zekien. Arantzazuko amalau apostoluak ere bereak dira; baiña guk amabi apostolu izan zirala ikasi genuen. Bere beste lan asko ere ez dira gu bezelakoak ulertzeko modukoak.

Gaur eun urte Jorge Oteiza
jaio omen zan Orion;
gure izkuntza ta oiturairi
maitasunik ote zion?
Bere gorantzak eta txaloak
entzun litezke Ernion,
baiña badakigu erritar soillak
berarengatik zer dion.

Urriak 22 - Asteazkena

Goizetik naiko otz eta euria.

Sansebastianetako tanborradak izen aundia du Donostian. Eta nun ez? Orain dala egun batzuk zabaldu zan albiste Udaletxetik emakumerik ametitzen ez zan taldeentzat ez zala diru-laguntasunik izango. Ikusten denez, 1.300 euroko laguntasuna dago talde bakoitzarentzat.

Gaur egin dute billera Alkarte edo Soziedade oiek, eta erabaki dute naiz laguntzarik ez izan berean jarraituko dute. Leendik bai omen dira emakumezkoak tartean dirala irtezen diran taldeak. Orain arte bezelaxe jarraituta ez ote litza-ke pake geiago izango?

Bat ez bada bestea badegu betiko,
oraingoz arazoa degu Donostiko.
Aurki San Sebastian zaigu etorriko,
baiña emen pakerik ez da komeniko.

Urriak 23 - Osteguna

Goizetik oskarbi izan degu gaur baiña otz: sei gradu. Ala ere, eguraldiaren etorrerak poza ematen du.

Urriaren 15ean idatzi nuen larogeita amairu urteko amona (amagiarreba) nola operatu zuten Tolosako Asunzion gaixotxean. Adiñak ematen zigun kezkarik aundiña; baiña

dana ondo irten da itxura danez, eta gaur itzuli da bere baserrira.

Zorionez dauzkagu mediku iaioak,
amonantzat billatuz erremedioak.
Operatuz garaitu ditu erioak.
Itxaropenez zitun otoitz-jarioak,
alperrikan etziran errosarioak.

Gaur argitara eman dute Tolosan urriaren 29tik azaroaren 2ra egingo dan munduko kantu-taldeek txapelketaren berri, ogei talde izango dirala, amalau naziotatik. Berrogeigarrena dute aurtengo leiaketa au.

Mundu guztian izen aundiko
jarri da Tolosa zarra,
kantu-txapelketa orri esker
biurturikan izarra.
Gure artean ugaldu zaigu
malkoa eta negarra.
Iñoiz bada-ta badadukagu
alaitasunan bearra!

Urriak 24 - Ostirala

Atzo otz bazan gaur goizetik otzago. Oskarbi zabaldu du eguna gaur ere, eta orrek badu bere poza.

Etxe askotan berogailluak
ikusten ditut piztuta,
eguzki orrek guk nai genuen
ainbeste indar eztu-ta.
Gauak luzatu zitzaizkigun,
egunak, berriz, moztuta.
Pixka batean bizi bearko
jantzi ariñak aztuta.

ETAk leerketa baten bidez Berrizko Euskotrenaren gelto-
kia txikitu du. Ez da zauriturik izan, zorionez.

Bilbon lau Batzoki izan dira erasotuak. Kale-borroka esa-
ten diote ekintza orri.

Kale-borroka deitzen dan ori
oso dabil indarrean,
ta ETA berriz lerketa bidez
jokaera zakarrean.
Gure erriko pake santua
ez da egongo urrean.
Nola sinestu orrelakorik
euskaldunaren lurrean?

Urriak 25 - Larunbata

Goizetik otz gaur ere. Laiño batzuk zeruan. Gaur eguraldi
-igarle oiek esan digutenez, datorren astean elurra ikusiko
omen degu.

Aitortu bear igarle oiek
asko asmatzen dutela;
orrela bada urri-azkena
ez da izango epela.
San Simon ere gertuan degu,
esaera bat duela;
danak erakutsitzen digute
negua badatorrela.

Muskizen, itsas-ertzean zebiltzan bi emakume olatuak
eraman ditu, eta irurogeita lau urtekoa bertan ito gainera.
Bestea, ozta-ozta salbatu omen da.

Hernanin presoen aldeko manifestazioa ertzaiñak gale-
razi eta naiko ixkanbilla izan da. Bost manifestari lotu di-
tuzte.

Gaur zan izatekoa Ibarretxe Leendakariaren ustetan gal-
deketaren erantzuna; baiña Madriletik galerazi zutelako ia

ogei milla lagun bildu dira Euskadiko sei erritan, erabaki orren kontrako asarrea agertzeko.

Eztabaidak guregan dauzkagu modako,
eta sarri ez dira gure onerako.
Otañoren bertsoa jartzen det galako:
“Ez degu arrazoirik gutxi geralako!”

Urriak 26 - Igandea

Goizean otza genuen gaur ere baiña eguzkiaren etorrera ona.

Gu orain arte salbo bagabiltza ere, ujoldeak kalte aundiak egin dituzten baztarretan. Gaur Melilla alde ori zigortu izan bear du, besteak beste.

Euskadiko arrijasotzaileen txapelketa egin da Arrigorriagan, arri txikiekin. Sei partaide izan dira, eta lau arri-mota erabilli dituzte, bakoitzarekin iru minutuko kintzeak egiñez: Amar arroako erretangularra, amarreko zilindroa, bederatzi-ko kubikoa eta zortziko biribilla, ain zuzen

Irigoi en erre zildarra izan da txapeldun, guztira 13.265,5 kilo bizkarreratuta. Bigarren, Ostolaza, 12.587,5 kilorekin. Irugarren, Izeta III, 11.375 kilo jasoz. Laugarren, Izeta IV, 10.450 kilorekin. Bosgarren, Xabier Agirre, 9.537,7 kilorekin; eta seigarren, Joxe Urrutia, 9.125 kilorekin.

Ala ere, utsune bat nabaritu zan Arrigorriagan: Izeta II-rena ain zuzen. Izango zituen bere arrazoiak, eta errespeta ditzagun.

Sei indartsuak ondo zekiten
zer eginkizun zeukaten:
lau arri mota saiatu bear
bizkarrera eramaten.
Onena batek bear du baiña,
ai, zer sasoia daukaten!
Gu berriz ezin aspertu gera
milla zorion ematen.

Urriak 27 - Asteleena

Giro onarekin zabaldu digu gaur eguna, laiño gorriekin. Eta esaera zaarrak dio: “Goiz gorri, illuntzerako euri”. Eta arratsalde erdirako euria, alajaiña!

Laiño gorriak ugari ziran
goizetik alkarren lagun;
arratsaldean begira gaude
euria nola ari dun.
Esaera zarrak diotenakin
ez gaitezen kontra jardun.
Biar San Simon degula ere
gogoan izan dezagun.

Eusko Jaurларitzan etxe-bizitza eta gizarte-kontuetako sailburu dan Madrazo jaunak esan du eun milla langille kanpotar geiago bear dirala Euskalerrian bertako premiak osatzeko. Leen bai omen daude 116.500. Euskalerrria erri berezi bat izan da, arrazagatik eta milla oiturengatik. Aurki orrela izango ote da?

Madrazo jaunak itz egin digu
mundu guztian aurrean,
esanez zer langille-falta dagon
Euskalerrriko lurrean.
Garai batean emendik kanpora
asko erdi negarrean,
ta orain gerok aurkitu gera
kanpotarren bearrean.

Urriak 28 - Asteartea

Goiz euritsua eta otza. Esaera zaarrarekin ongi datorrena: “San Simon eta San Juda, uda joan eta negua eldu da, gure artzai gaixoa mendian galdu da”.

Aurki erasotzera zijoan lau laguneko ETako talde bat lotu du poliziak, bi Iruñan, bat Añorben eta laugarrena, Valen-

tzian. Beren ekintzetarako material asko aurkitu omen diete gaiñera.

Munduko errialderik indartsuena Iparramerika da, noski. Eta azaroaren 4an aukeratuko dute Presidente berria. Asko-ren ustetan, Barack Obama beltza izango da amerikarren buru. Baiña bera ilko ote duten zurrumurruak ere indartzen ari dira ordea, eta ez giñake asko arrituko, lurralde orretan leen ere gertatu izan diranak gogoratuz. Orretarako al dira indarrak? Orretarako al dira aberastasunak? Orretarako al dira aurrerapenak?

Aurrerapen ta indarra bada,
noski, Iparramerikan,
baiña berririk tristenak ere
sarritan datoz andikan.
Ilko duten bildur nola bizi
ango Lendakaririkan?
Guk nai genuken aurrerapenik
ez da sortu oraindikan.

Urriak 29 – Asteazkena

Atzoko gisan gaur ere goiz-giro otza eta euritsua. Ernion azaldu da leenengo elurra.

San Simon bigarrena degu gaur,
zuri Ernio gaillurra;
urriko illa bukatzerako
mendian bera elurra.
Negu gogorra ote datorren
badegu naiko bildurra.
Kukua etorri bitartekoa
ez da izango laburra.

Hernanin berrogeita bi urteko erritar bat il da bere au-toan, istripuz. Esan digutenez, beste baten erruz izan da, baiña errudunak alde egin du.

Legutianon lanera zijoan berrogeita bat urteko gizon bat il da, kotxe-istripuan au ere.

Donostian izki-mizki edo pintxo onenak zeiniek egin txapelketa antolatu da. Eta Donostiako *Zeruko* tabernako Jo-xean Calbo izan da txapeldun. Ondarrabiko *Kai-Alde* tabernakoa bigarren; Valladolid-eko *Casa Angela* irugarren, eta ola amalau partaide arte. Izango zan mokadu goxoa pranko, arrenek ezpaitu!

Bazkal aurreko izki-mizkiak
eztira etortzen gaizki,
eta zalea izan ezkero
txakolin on batez busti.
Gaurko onetan Zeruko egin da
izenaren jabe, noski.
Jan-edanean izatekotan
txapeldun degu Donosti.

Urriak 30 - Osteguna

Goizean negu-giro aproposa, aize otza eta euriarekin.

ETAk kontxe-bonba bat leertarazi du Iruñako Unibertsidadeko aparkalekuan. Ala ere, ildakorik ez da izan eta gaitzerdi. Ogeita amaika arinki zauritakoak bai ordea, eta orrez gaiñera ogeita bat kotxe ondatuxeak, gaiñontzeko kalte materialetatik aparte. Leerketa ontan ildakorik ez izatea mirari bat bezela juzkatzen dute. Kotxea bezperan Zumaian ostutakoa omen zan.

Amurrión amasei eta emezortzi urteko iru gazte il dira kotxe-istripuan. Eta amazapi urteko laugarren laguna ere oso larri zaurituta omen da.

Afrikan mixiolari dabillen euskaldun batek esan du bera ibilli dan lurraldean bizikleta baten jabe dana aberatsa dala, eta Europan kotxe bat ez duena, pobrea. Au da erokeria, au!

Zorioneko kamio orrek
negarra franko sortzen du,
ta Amurriion gertatu danak
zer pentsatua jartzen du.
Eguneroko arazoa da,
nola demontre zuzendu!
Aberatsago ez al giñake
kotxerikan ezpagendu?

Urriak 31 - Ostirala

Goizetik naiko otz baiña ateri beintzat. Eguraldiak onera-ko itxura dauka. Illunabar aldetik aurrera euria egingo omen du.

Atzo ETak egin zuen azioaren kontrako ekintzak borobil-du dute gaurko eguna. Baiña...

Abiadura aundiko trenaren kontrako asarreak eta mani-festazioak egin dituzte Ordizian.

Santu Guztien bezpera danez, lore-saltzailleak ondo bete-ko dituzte poltsak. Batez ere, Tolosan azoka-eguna egokitu dalako, or izan da saldu-erosi nagusia.

Denboran bidez aldatzen dira
oiturak eta legeak;
gurean ere ainbat aldakuntz
ez gera ikusi gabeak.
Indartu zaigun oitura degu:
il ondorenen loreak...
Nere galdera: bizi gerala
ez ote dira obeak?

Azaroa azaro, egin eta itxaro



Azaroak 1 – Larunbata

Goizetik otz samar gaur ere baiña zerua oskarbi. Illerrietara joan-etorriak egiteko ez da gaizki etorriko olako eguraldia, ez orixe!

Bartzelonan adin eldura iritsi gabeko bi gazte lotu ditu poliziak, amalau urteko neskato bat labanaz il duten erreze-loz.

Donostian bi gazte labanaz zaurituak, gazteen arteko asarre bat dala-ta, dantzaleku baten inguruan.

Bestalde, ogeita amairu urteko gizon soraluzear bat lotu du poliziak Zaragozan, etxe-salketan 500.000 euro lapurtu dituelako.

Kanposantuetatik joan-etorrian jende asko Santu Guztien eguna dalarik.

Illerrira bixita jende askorena;
aitortu bear gu're izan geradena.
Entzuten zan izketak ematen zun pena.
“Auek ere il ziran”, askok ziotena.
Aurki guregatikan esango dutena.

Azaroak 2 – Igandea

Goizetik otz aundirik ez baiña euria gogotik egin du egun osoan euria atertu gabe.

Irurogeita amabost urteko Murtziako gizon batek bi emakume il ditu. Bat berrogei urtekoa eta bestea irurogeita amabostekoa. Azkenengo au, bera zaintzen ibiltzen zana, gaiñera. Bere burua iltzen ere saiatu omen da, baiña ori gertatu aurretik lotu dute.

Tolosan munduko abesbatzen kantu-txapelketa egin dalarik, leenengo saria Hungariako Cantemus Mixed Choirk taldeak irabazi du. Zorionak.

Xabier Laskibar Donostian bizi dan larogeita lau urteko tolosarra da. Perretxiku-mundua du bere afizio nagusia.

Eta gai orri buruz liburu batzuk ere baditu idatziak. Garbi aitortu digunez, aurtengo urtea baiño eskaxagorik ez du eza-gutu berak.

Etekiñik ez dator gure menditatik,
eiztari-munduan ta perretxikutatik.
Kontu ezkorrak dira bazter danetatik,
krisisa etorri da alde askotatik!

Azaroak 3 - Astelena

Atzo bezelaxe euria gaur goizean ere. Gerora, ala ere, eguraldi ona.

Berrogeita zortzi urteko irundar gizonezko bat il da autobusak arrapatuta Oiartzungo Lintzirin parean.

Adin txikiko emakumea eta beste lagun bat lotu ditu ertzaiñak Donostiako Egia auzoan, bi gazteri lapurretan egitearren, labanaz ikaratuta.

Bilbon, berriz, berrogeita zortzi urteko gizon bat lotu du udalzaingoak, bere lagun-kide emakumea tximetatik eldu eta jipoitzearren, Kristo kalean.

Nueva Yorken marathoia deritzon korrika-txapelketa famatua jokatu da, eta gipuzkoar askotxok parte artu du, itxura danez. Oien artean, besteak beste, Peio Ruiz Kabestani ere antxe omen zan, iru ordu eta bi minutuan bere lanak egiñez. Mikel Erentxunek, berriz, iru ordu eta berrogeita amazpi minutuan amaierako arraira sartzea lortu du.

Santa sekulan etzan izango
gaur ainbat korrikalari;
lanez jenderik nekatzen ez dan
ezaugarria da ori.
Kirolan bidez ateratzen da
nunai izardi ugari;
ta zorionak urruti artara
joan diran euskaldunari.

Azaroak 4 – Asteartea

Goizetik eguraldi on samarra eta ego-aizea datorren itxura.

Gaurko eguna Iparrameriketara begira pasatu du munduak, gaur aukeratzen baitzuten Etxe Zuriko maizter berria. Berrogeita laugarrena, ain zuzen. Barack Obama, berrogeita zazpi urteko demokrata beltza eta John McCain errepublikarraren artean zegoen auzia, baiña Obamak erraz irabazi dio auzia auteskunde bidez McCaini. Beraz, Barack Obama izango da Bushen lekua artuko duen Iparrameriketako Presidente berria. Istorirako geldituko dan gertakari bat ere badago gaurdanik aurrera: Leenengo mandatari beltza izango dala Iparramerikako buru.

“Gizon berriak, asmo berriak” da esaera, eta Iparramerikan eta munduan izango dira aldaketak. Onerako izan ditezela.

Iparramerikan lendakari
degula Barack Obama;
bera izan da boto geiena
gaurkoan jaso duana.
Pakea eta itxaropena
bere itzetan darama,
orixe baita mundu guztian
oso eskax deguana.

Botoen bidez lendakaria
zan aukeratu bearra;
aukeratu da Barack Obama
deitutzen zaion izarra.
Zalantzik ez da izango dala
argia eta azkarra
larrua beltza daramakian
Etxe Zuriko maiztarra.

Oviedoko pasealeku batean irurogeita amar urteko aita eta ogeita seiko semea minutu gutxiren barruan il dira, eriotz naturalez. Aitak komunetan izan zuen ezbearra, eta semea, berriz, ura ikusi zuenean bera ere illotz gertatu bat-batean.

Baionan bederatzi gazte lotu ditu poliziak ezker abertzalekoak diran errezelotan. Ala ere, batzuk berealaxe aske utzi dituzte, eta beste batzuk lotu ere bai.

Nunai badegu gorroto, griña,
nunai ezin konpondua.
Maitatutzeko agindu ori
berriz oso atzendua.
Eta pakea gure artetik
sarritan gerok kendua.
Obama asko bearko dira
zuzendutzeko mundua.

Azaroak 5 – Asteazkena

Goizetik naiko otz eta euria asi du. Laiñoak ere oso itsusiak.

Egun guztian euria ari du,
giro petrala benetan;
elurra, berriz, milla metrotik
gorako mendi danetan.
Udazken on bat ote genuen
giñan itxaropenetan,
usteak ustel gertatu dira
sarri aurtengo onetan.

Eiztariak pozik ez dute
mendi aldera joateko,
gerri aldeak uso kordakin
ez baitituzte beteko.
Giro aproposagorik ezin
etxe-zulon irauteko,
ipui batzuek kontatu eta
gaztain erreak jateko.

Finisterren mariñel batek bere barkuko kapitana il du labankadaz.

Astiasun adin txikiko bi gazte lotu ditu ertzaiñak lapurtutako kotxe batean zijoaztela. Beste iru lagun geiago ere baziran kotxean, baiña iges egiteko zoria izan dute.

ETak gaur zabaldu du albistea, azkenengo amar eraso edo leerketak bere gain artzen dituela esanez, eta aurrera jarraituko duela orain arteko bidean, gobernua pakea negoziatzera exeri arte Lizarrako tratua berrituz.

Batetik gogor baldin badaude
bestetikan gogorrago;
berriro ere jarri gera gu
iñoiz baiña bildurrago.
Batek enbido jotzen dunean
besteak azkar ordago.
Beste bide bat artu ezean
akats aundia or dago.

Azaroak 6 – Osteguna

Goizean euria gaur ere baiña gerora eguraldia ontzeko itxura.

Iparraldean leengo astearte eta asteazkenez poliziak lotutako amasei gazte gaur aske utzi dituzte.

Valentzian furgoneta baten beren etxera zijoazten sei portugaldar il dira kamioi batekin talka eginda. Kamioiko txoferra ere larri zauritua omen da.

Granadan, eztabaida bat dala bide, berrogeita bi urteko gizona il dute bi gizonek makilka.

Ibarran, ezezagun batzuek Udaletxea erretzeko asmotan su eman diote, eta kalte aundiak izan dira sarrerako atetik asita.

Bilboko gotzai laguntzaile Karmelo Etxenagusia il da, irurogeita amasei urterekin. Pare bat aldiz berarekin egokitu izan giñan; gotzai ez ezik abertzale eta bertsozale jatorra iruditzen zitzaidan gizon uraxe.

Jaiotzen danak eriotza zor,
au da munduko auzia;
euskaldun batek eriotzakin
mundua digu utzia.
Agur, Karmelo gotzai jauna,
agur, Etxenagusia.
Zorionean orain gozatu
sinesten zenun guzia.

Azaroak 7 - Ostirala

Goiz lainotsu eta goibela, baiña ateri beintzat, otz puska batekin.

Billabonako irurogeita zazpi urteko gure adiskide bat Nafarroako Billafrankan il da kotxe-istripuan. Soria aldera eizera omen zijoan.

Ondarroan berrogeita iru urteko gizasemea il da, moto-istripuz.

Laudioko lantoki batean ogeita amabi urteko langille bat il da, amabost toneladako pieza bat gaiñera erorita.

Berri txarretik ugari degu
eta onetikan gutxi;
aurrerapenaz gaiñezkatuta
zertara geran iritsi!
Gaur ola, eta zer ote degu
emen biar edo etzi?
Ildakoentzat oroi gaitezen,
gu bestetan zertan asi?
Jaungoikoaren itxaropenez
Berak nai dun arte bizi.

Azaroak 8 - Larunbata

Goizetik giro polita eta gerora ere oso ona, ego-aize zantzuarekin.

Zumaian motoan zijoazen bi lagun ondartzara erori eta gogor zaurituak izan bear dute.

Madriren amar milla motozale irten dira kalera beren asarrea erakustera, kamiotako segurantzi geiago eta zerga gutxiago eskatuz.

Haiti oso nazio beartsua da, eta larogei lagun (ume eta eldu) il dira eskola bat erorita. Zakur argalarentzat arkako-soak ugari beti.

Berri penagarria Haitiko ori,
orrelakorik uste ez arren inori.
Etzaie nolanaiko negarra erori!
Lagundu nai badegu, badaukagu nori.

Jakin-miñez betetako futbol partidua jokatu da Donostian, Reala eta Eibarren artean. Askok besterik itxaro bazuen ere, utseko berdinketarekin amaitu da partidua. Bada, ordea, okerragorik: Diaz, Realeko jokalaria anka bat autsita gaixoetxera eramán dute. Amar bat illabeteko lanak egin dituela esan dute.

Partidua amaitu zorian zegoela, ikusle batek botilla tira eta Realeko entrenatzaille Lillo kopetatik odola dariola utzi du bide batez. Auxe da borrokarako griña, mutillak!

Donosti ortan gertatu dira
ainbeste gauza berezi;
ura ikusita batek eztaki
izketan nundikan asi.
Ta gertatua penarik gabe
ezin leike adierazi,
nere iritziz kirol izenik
beintzat etzuen merezi.

Azaroak 9 - Igandea

Goizetik eguraldi bikaina izan degu, ego-aize zantzuarekin. Mendietan tiro-otsak ere entzun dira. Uso-pasea izana izango da, noski, eiztarien zorionerako.

Gaur egin da Behobiatik Donostiaraño ogei kilometroko korrikalarien norgeiagoka 13.950 partaiderekin. Bada zerbait! Txema Martinez madrildarra izan da leenengo arraira iristen, ordubete eta ogeita amaika segundotan. Laugarren garaipena badu aurtengoa. Bigarren, Kamel Ziani oriotarra: ordubete, bi minutu eta berrogeita amalau segundotan. Emakumezkoetan, Iruñako Ana Casares izan da, ordubete, amairu minutu eta berrogeita iru segundoan. Bigarren, Gas-teizko Ana Konde: ordubete, amazazpi minutu eta ogeita iru segundotan; eta irugarren, Ondarrabiko K. Beobide: ordubete, ogei minutu eta amazazpi segundotan.

Bilbon Urrezko Aizkora txapelketaren azkena jokatu da, eta Nazabal izan da txapeldun. Bigarren, Arrospide; irugarren, Larretxea; eta laugarren, Azpilikueta.

Egunerokoetan eskela-saillari begiratzen asita, berri mingotsa jaso det gaur. Oiartzunen bizi zan Sebastian Eizmendi, Errezilgo Loidisaletxe baserriko semea il zala atzo, larogeita iru urterekin. Bertsolari polita eta gozoa zan, eta bera izan zan nere leenengo maixua, garai batean Berrobin bizi zalarik. Berarekin batera kantatu nuen leenengo aldiz plazan ere. Beraz, badet zein en alde otoitz egin. Goian bego.

Sebastian zan bertso-kontuan
nere lenengo maixua;
ain zan etorri ederrekoa,
ain zan izketan gozua!
Burririk asko nekatu gabe
moldatzen zuen bertsua.
Gizarajoai bukatu zaio
mundu ontako plazua;
orain zeruan izan dezala
bizitza zoriontsua.

Azaroak 10 - Asteleena

Goizetik giro ederra ego-aizearekin.

Labastidan irurogeita lau urteko emakume bat il da, eta beste bi zauritu, kamioko istripuan.

Afrikatik igesi txalupa batean Kanarietara eunda ogeita iru lagun iritsi dira, eta oien artean bi ildako.

Datorren martxoan Leendakaria aukeratzeko auteskundeak dirala-ta, EAk erabaki du bakarrik joatea auteskundetara.

Irrati bidez jakin degu Ernest Alkat Iparraldeko bertsolari ezaguna, berrogeita amazazpi urterekin leengo ostiralean il zala, eta gaur izan dala bere animaren aldeko elizkizuna, Armendaritzen.

Omenaldi egunetan eta ola biltzen giñan alkarrekin; eta bertsolari alai eta egokia zan. Auspoa saillean bertso-liburu bat ere badu argitaratua; eta txapel batzuk ere bazituen irabaziak. Pakean beza atsedean Ernest adiskideak.

Oraingo ontan Iparraldetik
etorri da naigabea,
Ernest Alkatek bete baitigu
eriotzaren legea.
Ortatik ez da iñor libratzen,
bidean dator gurea.
Egun aundian bildu gaitzazu,
zeru ta lurren Jabea!

Azaroak 11 - Asteartea

Gaur San Martin eguna degu. Giro epela baiña euria.

Gaur saldu omen dira garai ontako leenengo angulak edo txitxardiñak Donostiako arraindegi batean. Guztira bi kilo, eta kiloko 680 euroan, au da, garai bateko 113.142 pezetan, gutxi gora-beera. Eta arrigarria, saltzera atera eta instante batean ezkutatu danak, alajaiña! Itzetik ortzera entzuten degun krixisa ez da egongo leku danetan. Ez orixe!

Seireun eta larogei euro
arraindegian kiloko;
mokadu ori jan bear dunak
bearko poltsa beroko.
Egia esan, angula oiek
neronek ditut gogoko,
baiña pentsatu det itxogitea,
badaezpada geroko.

Angulak jatera ez gerala iristen eta ez gaitezen kejavu;
gaur San Martin eguna degu, eta ontaz aurrera ardizaar edo
zerri gizen baten puskak txarrak al dira?

Puska gozorik bada zerrian,
ta berdin ardi zarretan,
sanmartiñak igaro ezkeru
zein etzan jartzen arretan?
Garai bateko etxeukoandreak
asko zekiten orretan;
orrelakoak gutxi dirade
gaurko etxeukoandretan.

Azaroak 12 - Asteazkena

Goizean otz aundirik ez, baiña euria zar-zar.

Eguneroko janari bezela jarri zaizkigu gazte-arteko bo-
rrokak, lapurretak, senar-emazte arteko okerrak eta abar.
Gaur ere izan dira Irunen, Eibarren eta abarretan. Jakin
degunez, bideo-kamarak jarri dituzte taberna eta kale as-
kotan oker oiek zuzentzeko-edo, ertzaiñak azkar etorri di-
tezen. Diotenez, asko ez dira konforme jokaera orrekin.
Jakiña, lapurrak ez du ertzaiñik eta espetxerik maiteko,
adibidez.

Frantziako poliziak, ETakoak diran ustetan bi gazte lotu
ditu Taraskon errian; bizikletan omen zijozten, eta agiri fal-
tsuak eta armak ere aurkitu dizkiete.

Gure arteko konpondu eziña
azkenik gabe al dago?
Ta nik pakea ikusitzen det
gero ta urrutiago.
ETako asko espetxen daude,
etxekoak okerrago.
Askok pentsatzen ez banun ere
ondo probatua nago.

Azaroak 13 - Osteguna

Goizetik otz aundirik ez baiña euria. Bart erruz egin du gaiñera.

Arrasaten, kotxe batekin zijoan emakumea kamioi batekin talka egin eta bat-batean il da.

Mijasen (Malaga), kamio bazterrean pasiatzen zebillen batek maleta bat aurkitu du, barruan pertsona baten gorpuzkiñekin. Diotenez, urtebete izango zan il zala.

Beasainen, goizeko 4:30etan, taberna batera lapurretara zijoala pertsianak puskatuz, gizon bat lotu du ertzainak.

Gaur jakin degunez, Eguberrietako loteri-txartelak sekula baiño geiago ari dira saltzen. Krisiaren eragiña izango da, noski.

Urtero bezela badatozkigu
Gabon ta Eguberriak,
beste konturik ez da entzuten:
krisiaren alderdiak.
Ta bear bada arrotu giñun
izandako geiegiak,
lengo galgari ezin eutsi,
orain dira komeriak.
Banaka batzun poza besterik
ez du izango loteriak.

Azaroak 14 - Ostirala

Goizetik otz, lainotsu baina ateri beintzat.

Barakaldon ogeita bost urteko gizon bat etxe batera sartu da, bertako nagusia drogatu eta nai dituen lapurretak egin ditu. Eta bera, etxe bertan lotan gelditu gero. Nagusia bere onera etorri danean ikusi du lapurra lo dagoela, eta ertzaiñari deitu eta auek esnarazi eta lotu dute.

Galdakaon bi lapur lotu ditu poliziak, jostailluzko pistola batekin lapurretara zijoaztela.

Euskadi izeneko futbol taldea dala-ta, bada oraintxe ezta-baidarik, Euskal Herria bear omen duela-ta. Izen ori ez badute artzen, gaiñera, jokalaria desapio egin dute ez dutela jokatu.

Bakoitzak bere arrazoiak izango ditu, noski, baiña ezta-baida ortan denborarik galdu gabe, aurreragoko lanak badauzkagula esango nuke.

Gauza askoren bearrik ezta
eztabaidatan asteko,
ta uskeri bat naikoa degu
bazter guztiak nasteko,
Euskadi ala Euskal Herriaz
ainbeste aldrebesteko.
Krixisen bizi geradenikan
askok ez degu usteko.

Azaroak 15 - Larunbata

Goizetik ateri baiña oso lainotsu. Atzo baiño otz gutxiago, ala ere.

Mundu guztian indartu dan krixisa dala-ta, ogeita bi naziotako agintariak bildu dira Iparramerikako Etxe Zurian, Bush presidentea buru dutela. Etorri zaigun, edo oraindik etortzekotan dagoen eraso bildurgarriari aurpegia eman nairik, noski. Ez dago esan bearrik naziorik indartsuenak bildu

dirala, Espaiña ere tartean dalarik. Jakin degunez, traba aundiak gainditu dituzte, eta denboraz ikusiko degu zer gertatzen dan.

Aurrez adierazita zegoen bezela, egin da Donibane Lohizunen Iparraldeko Bertsolarien txapelketaren azkena, zortzi bertsolariren artean. Onelaxe izan da jaialdi ortako emankizuna: Leenengo, Amets Arzallus; bigarren, Sustrai Kolina; irugarren, Miren Artetxe; laugarren, Maialen Arzallus; bosgarren, Odei Barroso; seigarren, Ekhi Erramundegi; zazpigarren, Karlos Aizpurua; eta zortzigarren, Xumai Murua.

Erabat jota, saio ona izan dala jakin degu. Beraz, Iparralde ere bertsolariz osatu zaigu. Euskeraren eta erriaren onerako izan dedilla.

Bertsolaritik osatu dira
egoa eta iparra;
poztekoa da azken urtetan
artzen ari dan indarra.
Bidasoaren bi alderditan
izkuntza degu bakarra;
egia esan bear badegu,
bada zerbaiten bearra.

Azaroak 16 – Igandea

Goizetik euri-langarra eta egun guztian zear iraun duena.

Zizurkilgo parrokia San Millani eskaiña dago. San Millan, berriz, azaroaren 12an izaten danez, gaur izan dira ospakizunak santuaren gorantzan, asi meza nagusitik eta alkartasun bazkariraiño. Erriko trikitilari gazteak alaitu dituzte bazterrak. Bertso-lanak, berriz, Etxeberria eta nere gain izan dira. Meza nagusian, erri-otoitzerakoan iru bertso auek kantatu ditut, gutxi gora-bera:

Gure aurreko euskaldun aiek
fedez edo sinismenez,
eleiz eder au altxa ziguten
San Millan onen omenez.
Bitartekotza egin zaiguzu
zeru goietan zaudenez,
egun eder au izan dezagun
geroko itxaropenez.

Ainbat oitura, ainbat aldakuntz
sortu da gaurko gizarten,
beti ez degu erreza, noski,
pazientziz eramaten.
Eskari asko egin litezke
onelako egun baten,
baiña, San Millan, lagun zaiguzu
pakean bizi izaten.

Krixi-kontua entzuten degu
egunean ainbat aldiz,
ta oker ori zuzendu nairik
agintariak or dabiltz.
Jaun zerukoa, erruki zaitez
bildu diran agintariz.
Zure laguntzik ez baldin bada,
gizonak alperrik gabiltz.

Azaroak 17 - Asteleena

Goizetik atzokoa bezelakoxe eguna, otz aundirik gabe.

Garikoitz Azpiazu "Txeroki" ETAKoa eta bere lagun Leire Lopez lotu ditu Frantziako poliziak Piriniotako Kauterets errian. Diotenez, Txeroki ETAKo buruzagia da, eta talde ori azkenetan dagoela diotenak badira. ETA bere borondatez erretiratzea izango litzake gauzarik ederrena; derrigorrean bukatzen bada, ondorengoak izango dituela esango nuke. Garikoitz Bilbokoa omen da, eta Leire Lopez, Beasaingoa.

Donostian poliziak bi zumarratar lotu ditu, amazazpi kilo droga zeramazkitela. Beste talde bat ere lotu dute Bizkaian pekatu berdiñarekin, baiña ertzain bat buruzagi zutela, esan dutenez.

Frantziako irurogeita bost urteko diputatu batek bere emakume laguna il du tiroka, eta ondoren bere burua.

Ainbeste oker izaten al zan
fedea genuenean,
meza entzutera jaiero zintzo
joaten giñadenean?
Orra zertara iritsi geran
gaurko aurrerapenean.
Ez dago zertan arriturikan
burua galtzen danean.

Azaroak 18 - Asteartea

Goizetik atzokoaren berdintsua gaur ere. Itz gutxitan esateko, ez euri eta ez ateri. Eguraldi lardats samarra, baiña garaian garaikoa. Zer nai dezu?

Donostian ogeita amabi urteko gizon bat lotu du ertzaiñak, alkantarilletako tapak lapurtzearren.

Orihuelan auto bat lapurtu dute, bost urteko ume neska-toa barruan duela. Bereala ume ori libre utzi dute ordea, eta gaitzik gabe.

Mundu guztian indartu zaigun krisialdi au trumoi-jasa bat bezela etorri zitzaigun, noski. Eta agintariak or dabiltz aurpegia nundik emango. Ibarretxe Leendakariak gaur erabaki du ogeita amaika milloi euro banatzea amar enpresariren artean, 2.521 langille berri ar ditzaten.

Ikusten degu agintariak zer
buruauste dauzkaten,
mundu guztiko erasoaldia
bere galgan eramaten.

Ta bereala zuzenduko dan
antzik etzaio ematen,
denbora askorik ez degu bear
len egindakoak jaten.
Baiña krisi au zerk ekarri dun
iñork eztigu esaten.

Azaroak 19 – Asteazkena

Goizetik ateri baiña lainñotsu eta giro goibela.

Konfebask enpresarien elkarteak ogeita bost urte betetzen dituela-ta, ospaketa aundiak izan dira Bilbon. Espaiñia-ko errege dan Juan Carlos ere etorri da funtzio ortara. Esan bearrik ez dago emengo agintari geienak, Leendakariaren-gandik asita, partaide izan dirala. Erregek esan duenez, pozik aurkitzen da Euskadin; eta emengo enpresariak aurrera jarraitzeko dituzten doaiak ere txalotu ditu. Ala izan dedilla.

Euskalduna jauregian izan dira ospaketa oiek, eta bere aurrean talde batek Erregeren kontrako oiua eta asarreak agertu ditu. Gurean olakorik ez gertatzea izango zan arritzeko.

Alqaeda ezaguna da mundu osoan. Alako azioak eginda dago, izan ere, Iparrameriketan eta abarretan. Baiña leen egindakoarekin apenas konforme dagoen orde, eta munduko musulman guztiei dei egin die, Iparramerikari eta aurki izango dan presidente berriari gogor erasotzeko. Zer ikusteko ote gaude?

Guk badakigu zer esan zigun
gurutz batean il zanak.
Leku ederrean gelditu dira
Aren orduko esanak!
Giza bildurrez bizi gerade
munduko gizaki danak;
aztu ezin diran gertakizunak
asko dauzkagu izanak.
Berriro ere badira, noski,
orren billa dabiltzanak.

Azaroak 20 – Osteguna

Goizetik giro tristea eta euri-langarra.

Garoñako zentral nuklearra itxiarazteko ekintza gogorrak burutu dituzte irurogeita amar bat lagunek, polizia azaldu dan arte.

Joan zan astean gertatu bazan ere, gaur zabaldu da argitara albistea. Ordizian ardi batek bost arkume egin dituela, alegia. Ez genuen oraindik olakorik entzun! Bixkiak ere banaka jaiotzen baitira animala oietan.

Franco diktadore maltzur ura il zala ogeita amairu urte bete dira, eta falangista eta ultra asko bildu da Valle de los Caidosen, ari omenaldi egin nairik. Baiña ospakizunetan asi diranean, guardia zibillak galerazi die. Orain ogeita amairu urte nork esan bear zigun orrelakorik?

Berrogei urteko diktadura zan,
etzan gaurko konturikan;
ta zeinek esan aldakuntzarik
izan bear genunikan?
“Caidos” orretan gertatu danak
utzi nau arriturikan.
Esaerak dio gaitzik ez dala
eun urte irauten dunikan.

Diktaduraren mendean artu
genun amaika zartako;
zorionean demokraziak
lekurik eztu ortako.
Madrilgo berri jakin ondoren,
guk auxe esan bearko:
Gaur zail ikusten ditugun gauzak
erreztu leizke biarko.

Azaroak 21 – Ostirala

Goizetik asi eta egun guztian ziartuenik, atzokoaren berdintsua: ez euri eta ez ateri. Baiña otz aundirik ere ez. Bare eta karakolak ondo.

Bi lagun lotu ditu ertzaiñak Eibarren, Ermuko enpresa batetik lau eskopena arrapatzearren.

Bilbon berrogeita amalau urteko gizon bat lotu du poliziak bere emakume laguna jotzen zuelako, eta beste gizon batzuekin oeratzera beartzen zuelako.

Bilboko Arnotegi mendian dagoen telebistako antenari eraso eta txikitu du ETak, leerketa baten bidez. Diotenez, kalte aundiak egin dituzte. Bigarrena da aurten eraso berbera izan duela antena orrek.

PPkoak gogor eraso diote Jabier Balza ertzainburuari joan diran azkenengo bost urteetan ETakorik ez omen due-lako lotu.

Beronan (Italia) berrogeita iru urteko gizon batek, berrogeita iru urteko andrea eta bere iru seme, iru, sei eta bederatziratu urtekoak il ditu pistolaz, eta ondoren bere burua.

Bere eskutik utzi al gaitu
zeru ta lurren Jabeak?
Gertatzen dira izenik ere
ez daukaten naigabeak.
Burua galdu ezkeru agur
erruki eta legeak;
eta sarritan pagatzen dute
batere errurik gabeak.

Azaroak 22 - Larunbata

Goizetik otz aundirik ez baiña bai euria gogotik.

Getarian bi zauritu izan dira iru kotxek alkar jota.

Donostian gazte bat lotu du ertzaiñak, 50 euroko bere gastua diru faltsuarekin ordaindu nai izatearren. Bestalde, Donostiako taberna batetik lapurreta egin dute. Eta furgoneta batetik bi moto eraman dituzte gainera.

Tolosan "Babarrunaren eguna" egin dalarik, babarrun onenaren leenengo saria Albizturgo Juan Ugartemendiari eman diote. Laugarren saria badu aurtengo onekin. Irabaz-

tun orren babarrunetatik lakari bat subastan jarri da, eta Tolosako Fronton jatetxeko nagusiak erosi du 2.015 euro aundi ordainduta. Diru ori Afrikako Maliko mixioari laguntzeko izango da. Ekintza txalogarria, bai orixe!

Bigarren saria, berriz, Legorretako Joxe Mujikarentzat izan da; eta irugarrena, Albizturgo Alberto Labakarentzat. Ogeita bi partaide izan dira guztira.

Uste gabeko aldakuntz franko
etorri zaigu munduan.
Asko onartu bearrekoak
etorri diran moduan.
Eguneroko bazkaria guk
babarrunakin genduan...
Olako izenik artuko zunik
zeiñek pentsatu orduan?

Azaroak 23 - Igandea

Goizetik otz aundirik ez gaur ere baiña euri-langarra oparo.

Castejonen, kamioi-trailera irauli eta ogeita bost urteko txoferra il da.

Huelvan ogeita bi urteko gazte bat, futboleak jokatzen ari zala txorabioak jo eta bertan ilda gelditu da.

Amurrion Euskalerriko Aizkolarien txapelketa jokatu da, sei aizkolariren artean. Bakoitzak egin bearreko lana: lau kanaerdiko, lau 60 ontzako eta lau oinbiko. Eraitza: Txapel-dun, Floren Nazabal (laugarrena badu aurtengoarekin) bere lanak 38:45ean egiñez. Bigarren, Joxe Mari Olasagasti (berrogeita amar urterekin), 41:06an bere lanak egiñez. Irugarren, Iñaki Azurmendi, 43:13an; laugarren, Juan Joxe Lopez, 43:18an; bosgarren, Luis Txapartegi, 47:45ean; eta seigarren, Daniel Bizente, 55:10ean.

Burruka gutxiko norgeiagoka izan dala esan bear; eta ezeren okerrik ez duela, puska bateko txapelduna izan liteke

Nazabal jauna. Oraindik ogeita emeretzi urte eta sasoi onean dago. Aizkolaritza ez dago iñoizko sasoirik onenean. Zaarrak erretiratzen dijoaz eta ordezeko gazterik gutxi azaltzen da.

Euskaldunaren kirol maitea
izan da aizkolaritza;
bere lekuan beste batzuek
orain indartsu dabilta.
Ta ez da zailla asmatutzea
nundik sortu zaion gaitza.
Besterik litzake aizkorak balu
baloiak duen emaitza.

Azaroak 24 - Asteleena

Goizetik euria gogotik eta eguraldiaren igarle oiek diote-nez elurra ere izango degu mendian beera. Esan bear bapo asmatu dutela oraingoan. Ernion beera elurra ikusi degu, eta gaiñontzean euria erruz. Eta kazkabarra, tximista eta trumoia ere bai gogor. Hernanin eta Astigarragan ibaiak gaiñez egin du, eta jendea argi ibilli da. Beste leku askotan ere kalteak egin ditu euriak, lur-jausien bidez. Irunen, pa-reta bat gaiñera erorita kotxe mordoa azpian arrapatu du. Ez da giro!

Oraindik udazkena izanik
aurten elurra goiztarra;
lagungarriak ekarri ditu
euria ta kazkabarra.
Ibaiak ere ezin kabituz
kanpora irten bearra.
Legortearen bildurrik gabe
dabil Euskalerra zarra.

Gaurko oiartzunik aundiena Madriletik zabaldu dana izan da, noski. Felipe Gonzalez, Espaiñiako presidente izana, ogeita emeretzi urtean bere emazte Carmen Romerorekin bizi

izan ostean apartatu egin dala esan dute, eta aspalditxoan dibortziatuta dagoen beste emakume batekin alkartu dala. Errebistan eta amodio-kontuetan idazten duten kazetariak izango dute mauka, bai orixe!

Bada zertaz itz egin, bada zer idatzi;
emen gertatzen dana nork adierazi?
Ezkontzak orain eztu len ainbat garrantzi.
Jaunak bere eskutik ez gaitzala utzi.

Azaroak 25 - Asteartea

Giroak oztera egin du eta euria gogotik gaur goizean.

Edozein arlotan dala ere, norgeiagoka edo txapelketaren faltarik ez degu Euskalerrian. Azkenengo egun auetan Donostiako Kursaalean jateko eta edateko onenak zeiniek antolatu or ibilli dira. Eta gaur, patata-tortillaren leiaketa izan da. Esan liteke gauza errezagorik ez dagoela, baiña izango ditu bere ezkutuak orrek ere. Leenengo saria Palentziako La Encina jatetxeko Ziri Gonzalezek irabazi du, alajaiña! Irugarren aldia du aurtengoarekin, eta orrek esan nai du zerbait.

Krisia dagoela egia ote da? Batzuentzat beti dago krisia. Baiña zenbaitentzat? Abenduaren 8an jokatu da Donostiako Atano III pilotalekuan lau kuadro ta erdiko pilota-txapelketako azkena, Irujo eta Olaizola II-ren artean; eta gaur, ordu t'erdian sarrera danak saldu omen dira (guztira 1.800). Adibidez, kantxako sarrera batek 120 euro balio du (ogei milla pezeta, leengo dirutan); goikoak eta atzekoak zerbait merkeagoak dira, baiña bada zerbait, jaunak. Ziartu nago, erreben-tan izango dirala sarrerak, eta zenbatean salduko ote dira?

Krisi itz ori egunero-egun
entzuten degu ainbeste,
baiña ori egia ote da
juzkaturik bataz beste?
Donosti ortako gertakizunak
krisi usairik ez dute.

Betikoa da: batzuk gainezka,
besteak limosna eske.
Okerragorik ez baldin bada
pozikan bizi gindezke.

Azaroak 26 – Asteazkena

Goizean zerua oskarbi samar eta izotza galanta.

Nafarroako Igal erriko irurogeita bederatzi urteko artzaia eta bere eun ardiko artaldea El Castellar en Fontellas-en trenak arrapatu eta il ditu. Seireun buruko artaldea omen zeukan.

Logroñon baratzatako lanak egiñez iru anai bolibiar bizi ziran. Baratza inguruan txabola bat zeukaten, eta gaur goizean iru anaiak ilda aurkitu dituzte. Ikusten danez, txabola ortan argindarra sortzeko motor bat zeukaten, eta ark botatzen zuen kiratsa arnastuta il dira. Bezperan ospaketa bat omen zeukaten borda orretan, anaietako bat bere sorterri Bolibiara zijoala-ta.

Gasteizen ogeita lau urteko mutil gazte bat il da, lan-is-tripuan.

Oviedon larogeita amar urteko ama il du berrogeita amasei urteko semeak, eta ondoren bere burua urkatu.

Bombay-n (Indian) bi hotel, jatetxeak eta tren-geltoki bat tirokatu ditu armaturik zijoan talde batek, eta larogeitaka lagun il dituzte. Madrileko gobernu autonomikoko buru dan Esperantza Aguirre andrea hotel oietako batean aurkitzen zan, baiña ez du okerrik izan, bere lagunak alde batera utzi eta anak azkar jaso bait ditu.

Osatzen gera negarrez eta
osatzen gera malkotik,
ezbear latzak badatozkigu
bata bestean ondotik.
Batzuek berez eta besteak
gizakiaren gogotik;

ori gaurkoa bakarrik ez da,
dator askoz lenagotik,
Kain gaiztoak Abel anaia
ilda utzi zun ezkeroztik.

Azaroak 27 - Osteguna

Atzo ainbatekoa ez, baiña gaur ere izotz ederra egin du.

Atzoko Bombay-ko erasoak gaur ere izan dute jarraipena. Eundik gora ildako kontatu dituzte. Okerrik ez badute ere bizkaitar bat edo beste badira larri alde egiñak. Munduan ibiltzeko ere zer konfiantza dago gaur?

Azaroaren 11n, Sopuertan (Bizkaian) ogeita amar urteko gizon gaztea gertatu zan arrastorik gabe. Gaur aurkitu dute bere gorputza bala zuloak dituela eta lurperatuta. Bi mutil eta neska bat lotu ditu ertzaiñak, eta, diotenez, azio orren egilleak dira. Ekintza orren arrazoi nagusia, bestalde, lapurreta izan dala juzkatzen dute. Gizon gazte orrek iltzailleei kotxea saltzeko tratua eta abar egin zituen nunbait. Baiña egiaren egia, ogeita amar urteko gizona ilda utzi dutela.

Espainiako presidente dan Zapatero jaunak gaur eman du albistea, 11.000 milloi euro zabalduko dituela indarrean dagoen krisiari aurpegia emateko.

Beste notizi au Iparrameriketatik dator. Indiana deritzon lurraldean munduko emakumerik zaarrena il dala esan dute, eunda amabost urterekin. Edna Parker zan bere izena.

Eunda amabost urteko sailla,
bizi luzea benetan.
Ala ere amon ori ilko zan
naigabez eta penetan.
Batzuk gazterik, bestek zartuta
iltzen alderdi danetan.
Orri iges egingo dionik
ez dago mundu onetan.

Azaroak 28 – Ostirala

Goizetik oso otz gaur ere (iru gradu) eta, jakiña, izotza.

Tolosan kamioi-trailer bat irauli eta berrogei urteko txoferra il da. Irunen bizi zan, naiz-eta bera Senegalekoa zan.

Hernanin emezortzi urteko gazte bat lotu du ertzaiñak, gaztetxo bati zeramazkiñak ostu nai zizkiolako.

Azken urtetan alkartzea eta indartzea modako jarri zaigu, noski. Ala, aspaldi asi ziran Kutxa eta BBK diru-etxeak ere alkartzeko asmotan. Etorri zaigun krisi oni aurpegia emateko eta abar komeni zala-ta. Gaur zan erabakia artzekoa botoen bidez; baiña azkenean ezezkoak irabazi du nunbait. Beraz, askori usteak ustel gertatu zaizkio.

Bombay-n izan berri dan infernu orretan, berrogeita amasei turista espaiñiar zebiltzan, eta gaur iritsi dira Madrilerara, sano eta salbo. Ala ere, asko soiñean zeuzkatene-kin etorri dira. Pozik, ala ere, bizi diranean. Eunda irurogeiren bat bai omen dira ildakoak, eta ortik atera kon-tuak.

Munduan izen aundiko uria
beti izandu da Bombay.
Oraingo ontan gertatu dana
ez da aztuko nolana!
Turistak ere aruntz joanda
bertan igaroz ainbat jai.
Pozikan joanak izango ziran,
etxera etorri ere bai.

Azaroak 29 – Larunbata

Goizetik giroak epeltzera egin du, baiña laiño illunak eta euri-itxura. Zerua beltz.

Donostian, eskaratz batean sua indartu eta estuasun aundiak izan dituzte bizilagunak. Ala ere, illik eta zauritu

larririk ez da, eta beste kalte oiek errez zuzenduko dira. Ertzaiña sutearen azterketa egiten ari da, sua nola sortu zan, batez ere.

Amurriion bi kotxek alkar jo eta bi lagun il dira, eta eme-zortzi urteko mutilla eta amazazpiko neska larri zaurituta.

Arrigorriagako Batzokiari eraso diote, eta ondoren kaleborrokak nabarmen izan dira.

Gure emaztearen basarrian, urteroko gisan, bi zerri il dituzte eta ezpaiñak gozatu genituela esan bear. Egia da lan puska bat egin bear dala olakoetan, baiña gauza merkeagoak eta gozoagoak asko al daude? “Txerria ildako astea eta ez-kondutako urtea onenak” dio esaerak, eta orrek zerbait esan nai du.

Lenago ere gauz ederra zan
zerria ildako eguna;
aitortu bear gaurkoan ere
ondo igaro deguna.
Gibel, odolki ta gaiñontzeko,
etxekoandean jarduna...
Bera izaten da negu-bildurrak
sarri kendutzen dituna.

Azaroak 30 - Igandea

Goizetik oso aize otza eta euri-itxura gaiñera.

Gaur San Andres eguna degu. Ormaiztegirako, Azkoitirako, Eibarrerako eta beste erri batzuetarako izen aundia. Eta nolaz aaztu gure jaioterri Berrobi? Santu oni eskaiña baitago gure parrokia ere. Gure gazte-denboran jai aundia izaten genun, iru apaizekin meza nagusia, kanpotik ekarritako sermoilaria eta abar. Jakiña, gaur baserriaren lekua industriak artuta dauka eta or amaitu da San Andres festa aundi ura. Aurten igandez egokitu da, baiña oitura bat galdu ezkerro, zailla izaten da ura berritzen.

Apostoloan eguna degu,
aurten gaiñera igandez;
garai batean gure eliza
bapo betetzen zan jendez.
Orrelakorik gaur ez daukagu,
ez gizon eta ez andrez.
Darabilzkigun zabarkeriak
barka itzazu, San Andres.

Donostian lasterkarien marathoia egin da, eta arraira leenengo iritsi dana, Abdelkeibir Lamatxi marrokiarra izan da, 2:15,15ean. Bigarren, Osea Kogei keniarra, 2:16,13an; eta irugarrena, Tesfye Badada etiopiarra, 2:21,14an. Zazpi-garren sartu da leenengo gipuzkoarra eta euskalduna, Ibon Esparza, 2:24,05ean. Emakunetan leenengoa, Ana Casares nafarra, 2:37,22an. Antolatzaileak esan dutenez, 2.900 partaide izan dira. Korrikalari faltarik eztago, beraz.

Zezen-plazako korrikariak
ondo bukatu ziraden;
apustu aiek jokatzekin
ainbat gozatzen giñaden.
Orain kalean korritutzen da
millaka nola diraden.
Garai bakoitzak bere emaitzak
ematen baititu emen.

Abendua, erdia gaua eta beste erdia jaia



Abenduak 1 – Asteleena

Goizetik oso otz eta euria.

Berri mingotsa jaso degu leenengo orduan: Mikel Laboa kantari ezaguna il dala Donostian, irurogeita amalau urte-ekin. Beste kantari guztietatik zerbait berezia bazuen, biotzeraiño sartzen zan bere abotsa. Ordezkoak sortuko ote dira?

Il onen 23an saria ematekotan zan Gipuzkoako Diputazioa egindako lana eskertuz. Baiña orra, eriotzak askotan artzen digu aurea eta oraingo ontan ere bai. Goian bego.

Gozatzen giñan bere kantuaz
eta kitarraren otsez;
Mikel Laboari entzuteko
zein etzan jarriko pozez?
Orain, berriz, bere errautsak
nastuko dira lur otzez.
Pakean atseden izan dezan
opa diogu biotzez.

Bilbon ogeita emezortzi urteko langille bat il da, laneko istripuan.

Astigarragan larogeita iru urteko gizona il da kotxe batek arrapatuta.

Trapagako (Bizkaia) ogeita zortzi urteko gazte bat kotxe-istripuz il da Santanderren.

Lapur gisara eriotz orrek
egiten ditu bereak;
alperrik dira aurrerapenak,
diruak eta legeak.
Izan litezke pertsona zarrak
ta berdin gazte trebeak;
itxaropenez bizi izaten
lagun deigula fedeak.

Abenduak 2 – Asteartea

Goizetik otz eta euria gaur ere. Aurten negua goiz etorri zitzaigun, eta orixe darabilkigu izketa-gai nagusi.

Erriberatan euria gogoz,
elurra berriz mendian;
jendea galdez udazkeneko
egualdi onak nun dian.
Aurten negua luze ote dan
danak arreta aundian.
Estuasunak izan litezke
juxtu dabillen sendian.

Giro ederrak darabilzkigu
zerri gizona iltzeko,
gibela janez famili dana
sukalde baten biltzeko,
ta gaztetxoak puskak banatzen
auzoetan ibiltzeko.
Negu gogorra izan liteke
batzuk ondo bizitzeko.

Biarritzen bi langille ito eta irugarren bat larri zauritua kaiñeri bateko okerrak zuzentzen ari zirala. Ustekabea kaiñuko urak aunditu zitzaizkien, itxura danez. Ainbeste egiten al du, izan ere!

Galdakaon ogeita zortzi urteko afrikar mutil bat aurkitu dute labankadaz ilda.

Krisirik ez daukana degu eriotza,
usterik gutxienan uzten du illotza.
Eriotza baimenduz genuen jaiotza;
berez gertatzen dana eztegu arrotza.

Abenduak 3 – Asteazkena

Gaur Xabierko Frantzisko santuaren eguna degu. Euskeraren eguna ere bai, bide batez.

Euskalerriak eman duen santurik aundienetakoa degu Xabierkoa, eta balegoke zertaz itz egin berari buruz. Bai euskerari buruz ere, baiña ixildu nadin.

Xabierko semea, seme atsegiña,
indioen artean ainbat lan egiña
erakutsitzen gure Jesusen dotriña.
Mixiolari danen zaindari jakiña.

Euskera izan leike zuka eta ika,
baiña erderik gabe guztiok, apika.
“Eztabaidan” lekuan orain “polemika”...
Geronen teillatura gabiltza arrika.

Bertso auk amaitzearekin batera etorri zait berria: Azpeitian irurogeita amaika urteko Iñaxio Uria kontratista eta enpresaria il duela ETAk, Loiolako auzoan, bere etxetik gertu, tiroz. Arrazoia, diotenez, Tren Azkarraren langintzan ari zalako enpresa ori. Baiña, jaunak: Onela ez goaz iñora. Au da itsumena, au! Goian bego Uriaren anima.

Abenduak 4 – Osteguna

Goizetik naiko otz eta euria gaur.

Gaur Santa Barbara eguna degu, ekaitz eta suaren kontrako doai bereziak dituela esaten dute, eta naiko ezaguna da Euskalerrian eta munduan.

Gaur'e badegu tximist ta trumoi
eta ekaitzen ikara,
denboralea asko ez dala
gizonak jarri ortara.
Fedea galdu genuenean
jarriak edozertara;
gure berri zuk badakizu ta
lagundu, Santa Barbara.

Gaurko oiartzun eta zeresan nagusiak Azpeitian eta ainbat lekutan atzo ETAk egin zuen azioa kondenatzeko izan dira. Euskadiko eta Espainiako agintariak, besteak beste, Azpeitian izan dira gaur, famili naigabetuari lagun-tzen. Iñazio Uria zanaren arreba batek au esan du, ordea: “Au dana ondo dago, baiña gure anaia ilda!”. Noiz arte onela?

Atzo Bartzelonan, gas-leerketa aundia izan zan etxe batean eta emezortzi lagun utzi ditu ilzorrian. Oietako bat irurogei urteko emakumea gaur il da.

Tarragonako etxe batean bikote baten gorputzak aurkitu dituzte golpeka ildako ezaugarriekin.

Nafarroako Arantzan baserri bat kiskali du bart suak.

Euskalerriko Unibertsidadeko erretorea aukeratzeko gaur izan dira botazioak, eta Iñaki Goirizelaia irten da garaille Marisol Esteban menderatuta.

Iñaki orri opa diogu
suerterikan onena;
eginkizun bat aundia, noski,
gaur berak artu duena.
Demokrazian legea degu
guk auteskundearena,
ta errespetoz artu dezagun
emaitzaren ondorena.

Abenduak 5 – Ostirala

Giroak epeltzera egin du, baiña euria gogotik.

Azpeitian ETAk il zuen Iñaxio Uriaren aldeko illeta-elizkizuna izan da gaur, Uriarte gotzai jauna buru dala; eta ondoren manifestazioa eginda Azpeitiko kaleetan millaka lagun bildu dalarik. Ainbeste manifestazio eta gaitzespen ez ditezela alperrik izan diralarik.

Galizian denboraleak ondoratu du arrantzan zebillen ontzi bat, eta iru ildako eta bost lagun arrastorik gabe galduak orain arteko emaitza.

Bartzelonako gasaren leerketaren bidez larri zeudenetik, bi lagun il dira gaur. Iru badira illak, beraz; eta oraindik beste amabost lagun oso larri daudenak.

Parisen munduko bitxi-denda edo joieri ederrenetako batetik lapurreta egin dute, eta ez nolanaikoa ere: Larogei milloi euroren balioa eraman omen dutela esan dute. Alajaiña!

Paris orretan bitxi-denda bat
utziko zuten ustua,
larogei milloiko balioa
izan bear dute ostua.
Zazpigarrengo agindu ona
izan ezkero aztua,
batzuentzako oraindik ere
bada nun aberastua.

Abenduak 6 - Larunata

Goizetik lainotsu eta euri-itxura.

Bartzelonan gasaren leerketaren bidez il da laugarrena ere. Ogei urteko gaztea ain zuzen ere. Eta oraindik beste amalau badira larri daudenak.

Leengo osteguna ezkeror arrastorik gabe zegoen larogeita sei urteko Zumarragako gizon bat gaur aurkitu dute ilda, Mutiloako mendi batean.

Bestalde, Madrilen, gas-leerketaren bidez etxe bat erori da. Eta larogeita emezortzi urteko amona bat bizirik atera dute, lau orduz zaborpean egon ondoren.

Euskal liburu eta diskoen azoka aprobetxatuz Ezker Abertzaleak antolatuta manifestazio aundia izan da Duran-gon, elkarriketa eta askatasuna eskatuz. Ondorenean gazte bat lotu dute, ertzain bat jo nai zuelako.

Hernanin aurpegia estalita zeramaten batzuek PSEren etxeari eraso diote, baiña kalte aundirik ez omen da izan.

Zer pentsatua eman digute
datozkigun albisteak.
Entzuten diran ainbeste berri
lanak ditu sinisteak.
Zerbait on ekarriko ote du
ontaraiño iristeak?
Etxe askotan izango dira
Eguberri-jai tristeak.

Abenduak 7 - Igandea

Goizetik oso eguraldi polita eta epela gaur.

Bartzelonan izan zan gas-leerketaren bidez gaixotuta daudenetatik beste bat il da, bosgarrena. Berrogei urteko emakumea, ain zuzen.

Iruñako Arga ibaian presa baten lana egiten zuen ogeita emezortzi urteko bilbotar baten gorputza aurkitu dute. Joan zan asteartea ezkeror arrastorik etzan.

Durangon, Abiadura Aundiko Trenaren kontrako manifestazioa egin dana, eunka lagun partaide dirala. Azpeitian il zuten Iñaxio Uriaren aipamenik iñork ez du egin ordea.

Andoaiñen kalte aundiak egin dituen sutea izan da, Danone-ren almazenetan. Atarian zegoen kamioi batean asi omen zan da, eta jarraian amalau automobil kiskali dira, eta ondoren almazen osoa. Norbaitek, edo norbaitzuek pikardiz egindako azioa ote dan errezeloak ere badira.

Neurritik pasatzean sua eta ura
ondamendiak datoz gure ingurura,
ezerezten dalako len genuen ura,
Danone-ri gertatu oi zaion modura.

Abenduak 8 – Asteleena, Sortzez Garbiaren eguna

Goizetik epel, euri-itxurarekin. Illunabar aldera, berriz, euria gogotik.

Berri tristea, batez ere berrobitarrok gaur goizean jaso deguna. Amazazpi urtez gure erriko erretore izan genuen aita Patxi Agirre frantziskotarra il dala Arantzazun, larogeita bat urterekin. Aratz-errekako semea zan aita Patxi.

Berrobitarrok goibeldu gera
jaso degun notizian.
Amazazpi urtez bizitu giñan
aita Patxiren grazian.
Zenbat anima jarri ote zun
geroko irabazian?
Orain aiekin goza dezala
betikotasun guzian.

Segovian, futbol-partidu bat ikusita jendearekin zetorren autobusa irauli da, eta amairu zauritu dira eta bat oso larri gaiñera.

Errioxan Jesusen jaiotza antolatzeko goroldio billa zebillen berrogeita amalau urteko emakumea il da, erorita.

Iparraldean ustez ETAKoak diran iru lagun lotu ditu poliziak.

Donostian, Atano III-ean jokatu da lau kuadro eta erdiko pilota-txapelketaren azkena, finala, Olaizola II eta Irujoren artean. Goizuetarrak jantzi du txapela, 22-17 partidua irabazita. Partidu ona ez da izan, ez. Irujok opari askotxo egin dio Olaizolari, eta orrela nekez irabazi liteke partidurik. Goizuetarrak badu onekin laugarren txapela neurri orretan irabazita. Zorionak.

Etxe aldetik etzaigu falta
telebistaren grazirik,
aitortu bear pilotak ortik
badula irabazirik.

Euskaldunaren kirola dabil
zorionean bizirik.
Aurrerantz ere bizi dedilla,
ez det beste iritzirik.

Gaur Donostian ikusi dana
ezta erreza esaten,
pilota-giro ederragoak
asko ez dira izaten.
Naiz biak ondo oituak egon
txapela aundiak jazten,
opari asko egiten dunak
zailla dauka irabazten.

Abenduak 9 – Asteartea

Goizetik epel izan degu gaur, baiña euria.

Berriz ere Bartzelonako gas-leerketaren berriak datozki-
gu, gaur il baita seigarrena. Amaika urteko neskatilla orain-
goan, ain zuzen.

Billabonan, Tolosara bidean, amairu aitomobilek alkar jo
dute eta sei pertsona zauritu dira. Ordu luzetan kamioa itxi-
ta egon da.

Orioko almazan batean milla ta berreun kilo droga aurki-
tu ditu ertzainak. Bere kotxetik zazpireun kilo deskargatzen
ari zan frantses bat ere lotu dute, esan dutenez.

Guk ez genuen arrisku latz bat
badute gaurko gazteak:
ondoren txarrak dakarzki, noski,
drogarekin jolasteak.
Errudun dira negozio ortan
saiatzen diran trasteak.
Dirua irabazi ezkeru
gutxi ajola besteak!

Abenduak 10 – Asteazkena

Bart tximista eta trumoiak esnarazi gaituzte, eta goizean euria gogoz egin du. Eguraldiaren igarle oiek, berriz, irureun metrotara elurra etorriko zaigula esan digute.

Egunero-egun euria degu,
mendian bera elurra;
igarle oiek diotena ere
sarritan degu ziurra.
Ibaiak erruz aunditu dira
aseta baitago lurra.
Oraindik ezta okerrik baiña
badago naiko bildurra.

Ertzaiñak sei pertsona lotu ditu Ondarrabian, Bilbon eta Barakaldon, kotxeetatik lapurretan egitearren.

Bestalde, Getxon bi gazte lotu ditu guardia zibillak, ETA-koak diralakoa.

Gure Real futbol-taldea ere ez badabil ba zorioneko. Joan zan denboraldian bigarren maillara jaitsi zan ezkeror bada emen naiko komeri. Klubeko presidente dan Iñaki Badiolak gaur eman du prentsaurrekoa kideen artean, eta etsipenezko billera geiago izan dala esango nuke itxaropenezkoa baiño. “Etxe uts, gerra uts”, dio esaera zaarrak, eta...

Joan zan urtean asi zan Master izeneko txapelketa, sei pilotari onenekin; eta gaur aurkeztu dute bigarrena, beste seirekin: Berasaluze VI (leengo txapelduna), Gonzalez, Olai-zola I, Barriola, Irujo eta Olaizola II, ain zuzen. Eta datorren larunbatez izango du asiera, eta abenduaren 27an amaiera. Emezortzi milla euroko saria izango du irabaztunak; eta bigarrenak, amabi milla euro. Merezi du saiatzeak, bistan denez.

Lege berri bat bada oraingo ontan: leenengo sakea pasa egiten duenari falta emango zaiola, alegia.

Gaur txapelketak jartzen zaizkigu
bat bukatzen danerako,
eta guztia izan dedilla
pilotaren onerako.
Irabaztunak sari ederra
izango du etxerako:
Urtezar on bat igarotzeko
ezta gaizki aterako.

Abenduak 11 - Osteguna

Goizetik oso otz, iru gradu bakarrik. Eta euria gainera.

Iparraldean zazpi lagun lotuak izan dira ETaren lagun-tzailleak omen diralako. Erriko Taberna bidez egiten omen zuten laguntza ori.

Azpeitian ANVkoa zegoen alkate orain arte, eta Iñaxio Uriaren ilketa gaitzetsi eztuelako, EAJ eta EA alkatu eta erabaki dute alkatetzatik kentzea bera, eta EAJkoa jartzea alkate bere ordez.

Gure Euskalerri maite ontan ez gabilta ederki, baiña munduko beste leku askotan okerrago dabiltzala esango nuke. Adibidez, gaur bertan Bagdad-en, musulmanak festa ospatzen ari zirala, jatetxe batean gaizkille “suizida” bat sartu eta leerketaren bidez berrogeita amabost lagun il ditu, eta beste eun zauritu!

Anai-arrebak, laster gerade
guztiok Eguberrian;
prestatutzeko erregu ori
daukagu sermoilaritan.
Nola dabilta munduan zear
ta berdin euskal-erritan...
Jesus alperrik jaio ote zan
pentsatutzen det sarritan.

Abenduak 12 - Ostirala

Goizetik otz, baiña ateri beintzat laino batzugin.

Irurogeita sei urteko koñata baten illetan izan gera gaur Ibarran. Elizkizun ederra, benetan. Elizak usten ari zaizkigula egia da, noski, baiña illeta-elizkizunetarako txikiegi jarri zaizkigu elizak ordea. Fedea baiño geiago ez ote da familiarekin ondo gelditzeko itxura? Jaieroko mezan sinisten ez eta zertarako joan bat iltzen danean?

Bestelakorik ere izan da Bizkaian, bi ildako izan baitira moto eta kotxez.

Illetara joan nai dunarentzat
aukerik asko badago,
eta elizak ikusten dira
iñoiz baiño beteago.
Igande ta jai meza santua
bearrezko zan lenago.
Orain itxura ez ote dabil
fedea baiño geiago?

Abenduak 13 - Larunbata

Goizetik ateri gaur ere, baiña oso otz eta laino asko. Gerora, egun guztiko euria berriz.

Gaur Santa Lutzi eguna degu, eta jende askok eztu aaztuta edukiko. Ferizaleak Zumarragara joango dira, jostunak eta jostun aitzakian, emakumeak jatetxetara. Bakoitzak asmatzen du zer egin.

Abendu illak berekin ditu
egunikan sonatunak;
jendea mugiarazitzen du
Santa Luzia egunak.
Gizonezkoak Zumarragara,
leku askotara jostunak...
Etxean triste gelditu bear
zerbait aitzaki ez dunak.

Araban eta Nafarroan bi ildako izan dira kamioko istripuz.

Arkaian (Araba) eta Bilbon beste bi lagun il dira trenak arrapatuta.

Master izeneko eskuzko pilota-txapelketako leenengo partidua jokatu da gaur arratsaldez Iruñan, Bengoetxea VI (leenengo txapelduna) eta Gozalezen artean, eta Iparraldekoa izan da irabaztun 22 eta 17 emaitzarekin. Urrengo kontrarioa Irujo izango du Gonzalezek.

Tolosan, berriz, bigarren maillako pilotarietan lau kuadro eta erdiko txapelketaren azkena jokatu da Mendizabal I eta Olaetxearen artean. Olaetxea izan da txapeldun 22-21 partidua irabazita. Bi pilotariak gipuzkoarrak izanik poztekoa da alde ortatik.

Aspalditxoan Nafarru dabil
txapeldunaren ospetan,
garai batean Gipuzku zana
zazpitan bostetan.
Etorkizunaz pentsa gentzake
oraingoz, nere ustetan.
Olaetxea ta Mendizabal
lekuko daude gaztetan.

Abenduak 14 - Igandea

Goizetik otz egin du oskarbi batzukin. Illuntzerako euria ordea gogotik.

Iruñako irurogeita zortzi urteko mendizale bat otzak ilda aurkitu dute Goizuetako mendietan.

Zaragozan berrogeita amazpi urteko gizon batek irurogei urteko bere arreba il du, eta ondoren bere ama zauritu gainera.

Valentzian eta Cuencan iru aitona il dira, suak arrapatuta.

Egipton berrogeita amabost lagun il eta beste amar zauritu dira autobusa iraulita.

Master izeneko eskuzko pilota-txapelketako bigarren partidua jokatu da Eibarren, eta Barriola izan da irabaztun,

Olaizola I-ri 22-21 partidua irabazita. Urrengo kontrarioa Olaizola II izango du leitzarrak.

Anai zaarra menderaturik
orain zai dauka gaztea;
leitzarrak oso zail izango du
bieri irabaztea.
Baiña irabaztun gerta liteke
bata bezela bestea.
Guk nai genuke danen gainetik
partidu on bat ikustea.

Abenduak 15 – Asteleena

Goizetik otz egin du eta euria.

Aiako Urdaneta auzoko Markeskua baserria kiskali du suak. Animalia batzuk ere badira erreak. Gizakietan ezta okerrik ordea, eta gaitzerdi. Baserria berrituta zeukaten, eta sagardotegi txiki bat ere bazuten, familia eta lagunentzako. Eta orra dana utsean gelditu orain. Badegu nori lagundua berriz ere.

Joan zan abenduaren 8an, Olaizola II-ak lau kuadro eta erdiko txapela jantzi zuen Irujori partidua irabazita. Ezkerreko eskuko beatz txikian min artu bazuen ere, ez zion garrantzirik eman. Orain, asteburu ontan, Barriolaren kontra jokatzeotan zan, Master txapelketan; baiña gaur erabaki du ez dala partidua jokatzeko gauza, min daukala-ta beatz orretan. Bere lekuan Julen Retegi *Retegi Bik* jokatuko du. Leen geneukan ikus-min ura ez da izango, baiña...

Zaletasunez beterik geunden
partidua ikusteko,
Olaizolaren gertakizuna
iñork ez genun usteko.
Beatz txikiko okerra izan da
jokatzeari uzteko.
Gizonak gauza gutxi bear du
goitikan bera jaisteko.

Abenduak 16 - Asteartea

Goizetik otz aundirik ez, eta euri-itxura.

Mallorcako hotel batean berrikuntzan ari zirala etxearen puska aundi bat erori eta lau langille azpian arrapatuta il dira. Zaurituak ere badirala esan dute. Diotenez, bear zan baimenik gabe ari zan lanean kontratista ori.

Bartzelonan bere andrea izan zana il du labankadaz gizon batek, eta ondoren bere burua.

Corellan emezortzi urteko gazte bat il da moto-istripuan.

Donostian eta Pasaian lau lagun lotu ditu guardia zibillak ETaren laguntzaille diralakoan.

PSOEk dioenez datorren udaberrian Euskalerrian dauden ANVko berrogeita bi alkate kenduko ditu bere karguetatik.

Aurtengo urtea txarra degula
ta urrengoa txarrago,
ori esaten ari zaizkigu
iñoiz baiño areago.
Ori lanaren aldetik, noski;
politika nola dago?
Emen pakerik eztegu izango
uste dan baiño lenago.

Abenduak 17 - Asteazkena

Goizetik otz aundirik ez baiña euria egun guztian atertu gabe.

Alakoxe giroa zegoelarik, Donostiatik Irunera bidean zazpi kotxek alkar jo dute eta lau lagun zaurituak dira.

Angula edo txitxardiñakin osatutako plato ori gogokoa degu, noski; baiña askorik jan gabe bearko degu. Gutxitzen ari dalako, edota erabat galdu baiño leen agintariak neurriak jarri nai dituzte. Arrantzale bakoitzak ez daukala kilo bat baiño geiago arrapatzerik esan dute. Leen garesti badaude, ez da sistima ederra merkatzeko. Adibidez, 1930ean, Donos-

tian, 275 milla kilo saldu omen ziran, eta joan zan urtean, berriz, 600 kilo ez omen ziran arrapatu Gipuzkoa guztian.

Jaki goxoak bakandu dira,
nolabaitek kok ugaltu;
ta osasunak bide ortatik
galerarikan ez al du?
Leen ez genitun ainbeste gaitz
nolatan dira azaltu?
Batetik asko irabazi degu
baiña bestetikan galdu.

Abenduak 18 - Osteguna

Goizetik atzoko eguraldi ber-bera: euria. Arratsaldean ere berdintsu.

Lleidan berrogeita amar urteko emakumea il du bere gizon-lagunak, tiroka.

Donostian eta Mallabian lau zauritu izan dira, kamioko istripuetan.

Donostian gizonezko bat lotu du ertzainak, kotxe batetik poltsa lapurtzearen.

Gasteizen iru ezkaratzetako bizilagunak kalera atera bear izan dituzte sute bat dala-ta.

Santanderren, plaza batean zegoen Franco diktadorearen irudia zaldi-gaiñean, eta gaur kendu dute agintarien aginduz. Falangista eta olako jendea ekintza orren aurka agertu bada ere, geienak ontzat artu dutela esan bear erabaki ori.

Joan zan azaroaren 14an idatzi nuen eguneroko ontan futbol-partidu bat jokatzekoa zala-ta gure taldeak Euskadi izena zeramakielako sortu zan asarrea. Izen orren ordezkal Herria bear omen du, eta or dago kakoa.

Datorren Gabon-bezperan zan jokatzekoa partidu ori San Mamesen, Iran-go taldearen kontra. Baiña bertan beera gelditu da oraingoz. Federazioak Euskadi izena bear duela dio,

eta eunda irurogeita bost futbolistak ez jokatzearabaki dute izen orrekin.

Euskadi izena amaika aldiz erabilli degu arrosasko, eta ara zertara iritsi geran orain. Eusko Jaurlaritzak ere esan du jokaera orrek ez diola on aundirik egin gure kirolari.

Alde batetik Euskadi eta
beste aldetikan Iran,
Gabon-bezperan San Mames ortan
jokatutzekoak ziran.
Baiña Euskadi izenarekin
asko konforme etziran.
Ezin sinestu gauza gutxikin
noraiño iritsi diran!

Abenduak 19 – Ostirala

Goizetik giro goibela eta euria egin naian.

Droga-arazoetan eta abar lana egiten zuen abogadu bat tirokatu zuten atzo Madrilen, eta gaur il da gaixoetxean. Berrogeita bost urteko abogadua zan.

Bilbon Diputazioaren furgoneta bat erre dute ezezagun batzuek.

Tolosan bada baserritarrak daukaten alkarte edo kooperatiba bat Izaskungo Amari eskaiña. Etxe ortan baserritarak bear dituzten pentsu eta osagarriak saltzen dira. Eta berrogei urtean Tomas Odriozola izan da bertako presidente edo zuzendari. Orain, erretiroa artzen duela-ta, bere lagunak omenaldia eskaiñiko diote gaur Usabal sagardotegian. Opari baten jartzeko lau bertso eskatu zizkidaten, eta auxerek mol-datu nituen:

Beti gogoan izango degu
guk Tomas Odriozola,
berrogei urte alkarte ontan
berak izan du ajola.

Omenaldi au guk eskaiñi nai
osasun onez dagola,
naiz badakigun asko merezita
gutxi egingo zaiola.

Alkarte au eskaiña dago
Izaskunen dan Amari;
Tomasek zenbat erregu eder
egin ote dio berari?
Ezpaita txantxa berrogei urtez
izatea lendakari.
Ikasbidea eman diozu
urrena jartzen danari.

Bearrezko zan leku askotan
eman dezu erantzuna,
Tolosa eta inguruetan
sarritan zera entzuna.
Aurki larogei ta zazpi urte
da beteko dituzuna,
erretiroa ta atsedena da
orain komeni zaizuna.

Emen il ondorenen askori
eskaintzen zaizka loreak;
oiek bizirik gaudean artean
ez al dirade obeak?
Omenaldi au eskaintzen gatoz,
Tomas, zure maitaleak.
Urte askoan lagun deizula
zeru ta lurren Jabeak.

Abenduak 20 - Larunbata

Goizetik lainotsu. Ateri baiña otz.

Eibarren Ego ibaira erori da kotxe bat bi gazte barruan
zituela. Bi gazteok sano eta onik atera dira ordea, mirariz.

Pontevedran gizon batek bere emakume-laguna il du, bere sei seme-alaben aurrean.

Oion-en gazte bat lotu du ertzaiñak, bere neska-laguna zortzi egunean bere etxean baituta eduki duelako.

Bilbon kale-garbitzaille bat il da makinak azpian arrapatuta.

Lizarran, PSN eta UGTko etxeari eraso diote ezezagun batzuek.

Master txapelketako azken aurreko partidua jokatu da, Barriola eta Retegi Bi-ren artean, eta leitzarra nagusitu da 22-6 partidua irabazita. Aurrez esanda nagoen bezela, Olai-zola II-ren ordezkari jokatu du Retegi gazteak. Eta berea egin du, baiña oraindik urruti dago izar aundi oiengandik.

Biar erabakiko da Barriolaren kontra azkena zeinnek jokatuko duen, Irujo eta Gozalezen partiduen ondoren.

Barriola azken txanpan or degu oster,
ikusten egon geran geienen uster.
Gertatu danarekin arritu ez gera:
alde aundia dago batetik bestera.

Abenduak 21 - Igandea

Goizetik ateri iraun du, itxura alaxe zeukan-da. Giro eguzkitsu zoragarria gerora. Neguaren asiera gaur omen degu, Santo Tomas egunarekin, ain zuzen.

Abenduaren ogeita bata,
Santo Tomasen eguna.
Donosti ortan izango degu
billerarik sonatuna.
Txorizoa ta ogia janez
zorioneko jarduna.
Gabon-ataria degulako're
askok ospatzen deguna.

Azpeitian, arrijasotzailleen txapelketa egin da, arri aundiarekin. Eta Errezilgo Aimar Irigoien izan da txapeldun. Lau indartsu izan dira partaide: Irigoien, Ostolaza, Urpe eta Lertxundi.

Lau arri-mota zituzten lanerako, eta bakoitzarekin iru minutuko denbora. Amasei arruako erretangularra, amalauko zilindroa, amabiko kubikoa eta amarreko biribilla. Errezildarrak 9.650 kilo bizkarreratu ditu guztira. Bigarren Ostolaza izan da; irugarren, Urpe; eta laugarren, Lertxundi. Leenengo txapelketa zuen onek, eta etzan parregarri gelditu.

Eibarren Master txapelketako azken aurreko partidua jokatu da; eta Irujo izan da irabaztun, 22-12 Gonzalez menderatuta. Beraz, azkenengo partidua, finala, datorren larunbatez jokatu-ko da Donostian Atano III-ean, Barriola eta Irujoren artean.

Master onetan neurtutzen dira
sei pilotari onenak.
Barriola ta Irujorekin
emango ditu azkenak.
Norentzat ote txapela, sari
ta gaiñontzeko omenak?
Zorion faltik eztu izango
irabazitzen duenak.

Abenduak 22 - Asteleena

Goizetik izotza eta oso otz: gradu bat.

Elgorriagan (Nafarroa) berrogeita amaika urteko galdakaoar bat il da laneko istripuan.

Alikanten larogeina urtetik gorako senar-emazteak il dira etxeak su artuta.

Oñatin eta Usurbillen bi langille zauritu dira, laneko istripuz.

Gaur Loteria-eguna degu. Eta zer geiago esan? Besteak beste, Euskadin berrogeita amalau milloi euro egokitu dirala esan dute, eta Bilbo eta Oñatik artu dituztela puskarik aundienak. Zorionak.

Batzuk badira diruz osatu diranak,
aberastuta atzo beartsu ziranak.
Osasun eske utsik gelditu geranak;
Loteriak beti ditu orrelako lanak.

Abenduak 23 – Asteartea

Goizetik izotza galanta eta zerua oskarbi.

Donostian emeretzi urteko mutiko bat lotu du ertzaiñak, os-
tuta zeukan bizikleta beste batek erosi nai ziolako labanaz ame-
nazatu zuen nunbait, eta ori izan omen zan arrazoia lotzeko.

Gasteizen ogeita lau urteko beste gazte bat lotu du er-
tzaiñak, labanaz amenazatu duelako bera. Bai ote dago bear
ainbat zigor olakoetan?

Gasteizko kaleetan gaur jarri da leenengo aldiz martxan
tranbia-serbizioa. Gaur asi duen ibilbide ori denboraz aundi-
tuko omen dala esan dute.

Garai bateko tranbia zarrak
ondo baztertu genitun,
aiek zituzten ibilbideak
automobillak jan zitun.
Ikusi degu kotxe-munduak
zer arazo sortu ditun.
Ara berriro tranbia orrek
nola menderatu gaitun.

Abenduak 24 – Asteazkena, Gabon eguna

Atzo bezelaxe gaur ere izotza galanta goizean eta zerua
oskarbi.

Gaurko nere egunerokoa bertso pare batekin egingo det,
beste berririk eman gabe.

Ezin konponduz ainbat partidu,
nazio eta erriak;
ta pozgarriak ez dira, noski,
iristen diran berriak.

Gizakiak gizakien aurka
ixuriz odol gorriak.
Poza ainbeste samin badute
Gabon ta Eguberriak.

Bi milla eta zortzi urtean
bada amaika istori.
Urtero erabiliko genun
Belengo pake itz ori.
Baiña munduan ez da ikusten
paketik nai ainbat zori,
aingeruak kantatu zutena
etzaie iritsi askori.

Abenduak 25 – Osteguna, Eguberri eguna

Goizetik zerua oskarbi eta izotza galanta berriro. Udazken guztian ikusi ditugun laiño pillak nora ezkutatu ote dira?

Zeru ta lurren Juan ta Jabea
or jaio zaigu arlote,
baiña Belengo jarraitzaillea
gaurko munduan nor ote?
Modan dauzkagu milla ondasun,
aunditasun eta dote...
Alderdi oiek Jesus Aurrari
poz gutxi emango diote.

“Poza ainbeste samin badute Gabon ta Eguberriak” kantatu nuen atzoko bertso batean, eta bapo baieztatu dala esango nuke. Bi andrezko il dira beren gizonen erasoz Coruña eta Tenerifen. Espainia maillan irurogeita zazpi omen dira urte ontan illak azkenengo bi auekin.

Caceresen ogeita zortzi urteko emakume militar batek berrogeita amalauko aita il du, bi tiro emanda.

Angleten (Iparralde) etxe-salketak egiten dituen etxea txikitu dute leerketa baten bidez.

Durangon Batzokiari eraso diote.

Aita Santua, Eguberri eguna dala-ta egin duen itzaldian, oso kezkatuta agertu zaigu munduaren etorkizunarekin, galbidean dijoala esanez.

Begiratzen badegu mundu zabalera,
irabazia ainbat badabil galera.
Kezkatsu agertu da Aita Santu bera.
Goazen itxaropentsu Belengo estalpera.

Abenduak 26 - Ostirala

Goizetik lainotsu eta negu-giroko eguraldi muxiña. Gero-ra euria gogotik, eta mendietan elurra.

Bilbotik Santandererako autopistan, ustakabeko kazkar-jasa batek kamioa labainduta berrogeita amalau kotxek alkar jo dute Abanto errian. Ogeita zazpi lagun zaurituak ere badira, larritasun aundirik gabe danak, zorionez.

Negua lagun txarra da kamiorako,
kazkabar, elur, izotz ditugunerako.
Ildako edo zauritu bada aukerako,
badira arrazoiak eskarmenturako.

Abenduak 27 - Larunbata

Goizetik lainotsu gaur. Ateri baiña otz: gradu bat utsaren gainetik.

Gu ere keja gera, baiña urruti oietan ez da giro. Berrogei urteko gerra daramate alkarren kontra Israel eta Palestinak, eta gaur Gaza bonbardeatu du Israelek, gutxieneko berreunda ogeita bost lagun il eta beste ainbeste zaurituz. Leku ederrean gelditu dira Belengo aingeruen kantak eta artzaïen irrintziak!

Abenduaren 13an asi zan Master izeneko pilotari-txapelketa, sei onenak partaide zirala, eta gaur jokatu da azkena Donostiako Atano III pilotalekuan. Irujo izan da txapeldun, partidua 22-16 Barriolari irabazita. Uts batzuk izan dira, baiña erabat jota partidu ikusgarria izan dala esan bear. Zer geiago

esan? Barriola oso pilotari ona dagola, baiña Irujo ohea. Muti-ko onek suerte piska bat izaten baldin badu, txapel batzuk jantziko dituela esango nuke. Sariak ere ez zituzten nolanai-koak: Irabaztunak 18.000 euro, eta galtzailleak, 12.000. Zor-ionak bai batari eta bai besteari. Eutsi goiari, mutillak!

Jokoak berdin ditu galerak
ta berdin irabaziak.
Nola Irujo ala Barriola,
biak dira bereziak.
Pilotarako jaioak, noski,
pilotarako eziak.
Sari ederrak jaso dituzte
eta ondo mereziak.

Abenduak 28 – Igandea, Iñuxente eguna

Goizetik elurraren gainetik ego-aizea, baiña naiko egural-di otza.

Ogeita zortzigarren eguna
gaurkoa da abenduan,
errugabeak zer izan zuten
ondo ikasi genduan.
Gaur ere millaka iñuxente
iltzen ditugu munduan,
gerok eroso bizitzearren
Herodes aren moduan.

Gaur elizak familiaren eguna ospatzen duela-ta, Madrile-ko Colon plazan meza santua izan da, Rouco Varela artzobis-koa buru dala. Millaka asko kristau bildu da bertan. Eta artzobispo orrek geiena zigortu duen pekatua aborto edo aur-galtzea izan da.

Erreterian eta Alegin bi gazte larri zaurituak izan dira kamioko istripuetan.

Zumaian iru emakume lotuak izan dira denda batetik milla euro lapurtzearren.

Bilbon eta Oviedon bi emakumezko egurtu dituzte beren gizon-lagunek.

Zumarragan giza-proba jokatu da 1.700 kiloko arriarekin. Amabi gizon bear zuten milla kiloren barruan. Leenengo Urretxu izan da; bigarren, Ezkio-Itsaso. Irugarren, Zumarraga; eta laugarren, Legazpi.

Arbizun bigarren maillako aizkolari-txapelketa jokatu da, eta Zizurkilgo Joseba Otaegi eta Arabako Joxe Angel Zubiaga gelditu dira leenengo eta bigarren. Auek datorren urtean leenengo maillan jokatzeko aukera izango dute.

Besteak beste, Euskalerrian
oraintxe bada indarra.
Era berean juzkatu leizke
naigabea ta negarra.
Etorri zaigun krisia ere
kontuan artu bearra,
eguneroko ogia berriz
politikaren su-garra.
Berri eder bat eska dezagun
agurturik Urtezarra.

Abenduak 29 – Asteleena

Goizetik otz, laiño batzukin.

Gaur Tolosako Beotibarren, pilota-jaialdi aundi bat izan da, eta partidu oso berezia: Irujo bikote baten kontra. Eta ez nolanaiko bikotea ere: Del Rey eta Galartza VI. Partidua as-terako bikotearen alde jarri da dirua, baiña berealaxe 10-4 Irujo jarri da irabazten eta dirua aldatu da ederki. Ikusteko partidu ona izan da, baiña bai artekariantzat ere.

Baiña betikoa, bi lagun beti bi baitira, eta bikoteak irabazi du. Esan bear da larunbateko partidutik bere onera oraindik etortzeko egon zitekeela iberotarra. Berrogeita zortzi ordu gutxi izango dira olako pasada artuta indarberritzeko.

Bakarrak biren kontra bear du zuzendu.
Jendean ikus-miña ederra sortzen du.
Bi lagun beti bi dira, ori ez atzendu:
geienetan bikoteak irabazitzen du.

Erreterian ogeita bost urteko emaztea il du senarrak,
labankadaz. Aldi berean, amasei urteko semea eta bere anaia
zauritu ere bai.

Leengo larunbatez asi zuen Israelek bonbaz Gazaren kon-
trako eraso gogorra, eta oraindik ere erasotzen jarraitzen du.
Irureunda berrogeita bost ildako eta milla ta seireun zauritu
badira, gutxienez. Adibidez, gaur bost aizpa il dituzte, lau eta
zazpi urte bitartekoak. Errurik asko izango ziran gaixoak!

Baiña nundikan etorri zaigu
emengo pakerik eza,
Belengo pake-kantu aieri
guk emateko ezetza?
Beste gauzarik ezin det esan:
au da mundu aldrebesa!
Itxaropenez bizi izaten
ez dago oso erreza.

Abenduak 30 – Asteartea

Gaur ere otza goizetik, laiño batzuekin.

Bergaran bi txirrindulari zauritu dira, kotxe batek arra-
patuta.

Iurretan, Zornotzako gazte bat zauritu da, bere motoak
kamioi baten kontra jota.

Gaur aukeratu dituzte eskuzko pilota-txapelketarako zein
bikote izango diran. Aspe enpresatik: Titin-Paskual, Irujo
-Goñi III, Xala-Laskurain eta Gozalez-Barriola. Asegarcetik:
Olaizola II-Mendizabal II, Bengoetxea VI-Beloki, Berasaluze
VIII-Begino eta Olaizola I-Patxi Ruiz. Datorren larunbatez
asiko da norgeiagoka Iruñan, Olaizola I eta Patxi Ruiz, Irujo
eta Goñi III-ren aurka.

Ezerk bada-ta pilotariak
gaur bai sasoi daukatela.
Aitortu bear ordu gozoak
eskaintzen dizkigutela.
Telebistari eskerrak, berriz,
bai eroso gabiltzela,
etxetik ikusten baititugu
frontoira joanda bezela.

Abenduak 31 - Asteazkena, Urtezaar

Goizetik epel ego-aizearekin eta zerua oskarbi.

Erri-kirol jaialdi aundia izan da gaur Astiasun, eta, besteak beste, Iñaxio Perurena etorri da marka berria jartzeko asmoz, 295 kiloko arri erretangularra jasota. Jaso gabe erretiratu da, ordea, bi ekiñaldi egin ondoren. Ogeita lau urte dauzka oraindik Iñaxiok, eta gauden lasai. Aitaren markatarira iritsiko ote da? Geroak esango du.

Iñaxio Perurena ori
genun izar nagusia,
berreunda larogeita amabost
kilorekin zun auzia.
Bi ekiñaldi egin ondoren
jaso gabe du utzia.
Zama oiekin zail da egiten
pentsatutako guzia.

Gaur goizeko 11tan ETAk leerketa ikaragarria egin du Bilboko Euskal Telebistaren lantokian. Beste komunikabide batzuk ere bazeuden etxe ortan. Eta kalte ikaragarriak izan dira, baiña zauriturik ez, ordubete aurrez ETAk abixua eman zuen-eta. Gaitzerdi!

ETAk berriro berea egin du
bukatzeko Urtezarra.
Pozaren orde zarritan degu
naigabea ta negarra.

Urte berriari derrigorrez
daukagu eska bearra,
komeni bada ekar dezala
pakea ta irriparra.

Agur, Urtezaar.

Urte guztian ziñan
bizkor ta sasoiko,
bi milla ta zortzia
zan zurekiko.

Geiago luzatzerik
ezta komeniko.

Oso txarra etzera
izan nerekiko.

Berria etorriko,
zer dun ekarriko
zeiñek igarriko?

Otoitz belauniko:

Agur, Urtezar maite,
agur betiko.

Agur betiko esanda
jartzen naiz pentsakor.
Danok bide berdiña
ote degu or?

Norbaitek esango du
“oneraiño ator”.

Joan bearra berriz
daukagu derrior.

Betiko ez da iñor,
naiz saiatu gogor,
ezin liteke lor,
busti edo legor.

Emen danon azkena
olaxe dator.